

47305/B

SCHROEDER, P.G.
c

Vol II



Digitized by the Internet Archive
in 2019 with funding from
Wellcome Library

https://archive.org/details/b30532231_0002

PHILIPPI GEORGII SCHROEDER

PH. ET MED. DOCTORIS, ARCHIATRI MAGNAE
BRITANNIAE REGIS ET MEDICINAE IN ACADEMIA
GOETTINGENSI PROFESSORIS PVBLICI
ORDINARII

OPVSCVLA MEDICA,

ANTEHAC SEORSIM EDITA, NVNC VERO

COLLECTA

STVDIO

IOANNIS CHRISTIANI GOTTL. ACKERMANN

MEDICINAE DOCTORIS.

VOLVMEN II.



NORIMBERGAE

APVD IOH. GEORG. LOCHNER.

1779.



307420



BENEVOLO LECTORI

S. D.


J. CHR. GOTTL. ACKERMANN.

Quum opusculorum academicorum
SCHROEDERI, *V. Cl.* collectio-
nem moliremur, omnes, quibus nomen illius
inscriptum erat, disputationes colligere, at-
que duobus voluminibus, forma, qua primum
jam prodiit, octaua, comprehendere animus
erat.



Re vero diligentius pensitata, consilium antea captum, mutauimus. Quasdam enim nulla, vel exigua argumenti grauitate conspicuas, et si villo modo, solo certe SCHROEDERI nomine commendabiles, ne parum vtilibus rebus libri moles augeretur, aut denique lectione rerum vel vulgatarum, vel nostro, quo viuimus aeuo, minus accommodatarum, lector taedio afficeretur, earum, quas Tibi exhibemus, Beneuole Lector, ordini subtraximus, quarum en recensum!

Omissimus vero Marburgi et Rintelii a SCHROEDERO editas disputationes et inuitationes academicas, quarum quidem numerus mediocris, et numero conueniens (si viro iuueni de viri doctissimi scriptis iudicare fas est) argumentum est.




Floruit autem inprimis vir optimus doctrinae laude maxima ab anno 1764. ad annum usque 1772. quibus Goettingam vocatus, artem magna cum laude exercuit, maxima vero publice tradidit. In hoc temporis Spatium optima quaeque SCHROEDERI scripta cadunt, quae exhibuimus. Verum tamen neque ab illo, neque ab auditoribus illius profecta, nec non imperfecta optimi viri opera omisimus.

Omisimus itaque consilio forsan haud penitus malo, de quo tamen me peritiores iudicent, disputationem de febrilibus metastasibus, nec non eam quae sub ejus auspiciis de cognatione inter arthritidem et calculum edita est, quippe ab aliis viris profectas. Omisimus et scripta academica, quae de insitione variorum agunt, argumento, quo nostris tem-



poribus nullum fere aliud vberius expositum est.

Habes itaque, Beneuole Lector, non plenam quidem, verum vt non spero solum, verum etiam confido, vfui Tuo magis inferuientem opusculorum viri doctissimi collectionem, quam vt talem Tibi exhiberem, non ratio solum, verum et auctoritas optimi mei praeceptoris, in eadem academia, qua SCHROEDERVS floruit, professoris medicinae primarii munere fungentis, suavit. Vale. Dabam
Zeulenrodae Varisc. d. 3. mens. Febr. 1779.





In hoc volumine continentur.

I.

PH. G. SCHROEDER diff. de haemorrhagiis febrilibus.
Gott. 1769. Resp. *Guil. Cph. Reichmann.*

II.

Ej. diff. de coctionis atque criseos in febribus impedimentis, variisque noxis inde oriundis. Gott. 1768. Resp. *Gerh. Math. Fr. Brawe.*

III.

Ej. diff. de viribus naturae debilioribus in febrium decursu recte aestimandis, iisque accommodata medendi ratione. Gott. 1770. Resp. *P. Henr. Weisf.*

IV.


Ej. diff. de febrium putridarum differentiis. Gott. 1768. Resp. *Aug. Bernh. Brandé.*

V.

Ej. diff. sist. circa variolarum distributionem inprimis ratione febrium cum iis conjunctarum quaedam analecta. Gott. 1770. Resp. *Is. Dan. Fellingner.*

VI.

Ej. diff. de inflammatione diaphragmatis. Gott. 1771. Resp. *Lev. Arnaldo Ebeling.*



VII.

Ej. diff. de haemoptysi in genere, et speciatim ejus nexu cum varia aduersa ex hypochondriis valetudine. Gott. 1766. Resp. G. A. Gramberg.

VIII.

Ej. diff. de apoplexiae ex praecordiorum vitiis origine analecta. Gott. 1767. Resp. G. Ph. Koch.

IX.

Ej. diff. de arthritide vaga. Gott. 1768. Resp. Balth. Dugend.

X.

Ej. diff. de puris absque praegressa inflammatione origine. Gott. 1766. Resp. Io. Chr. Grimmann.

XI.

Ej. Progr. quo experimentorum ad veriore[m] cysticae bilis indolem explorandam captorum Sectionem I. proponit. Gott. 1764. *)



*) Altera hujus programmat[is] Sectio non prodiit.



I.

Differtatio de frequentioribus febrium prodromis. Publice proposita Gott. 1769. Resp. GVIL. CHPH. REICHMANN, *Brunsvicensi*.

§. I.

Haemorrhagias videmus hominibus multiplices accidere, plurimisque rationibus inter se diuerfas. Sic pro partium locorumue corporis diuersitate fit fluxus sanguinis ex ore, ejusue partibus variis, ex naribus, oculis, auribus, ex faucibus, aspera arteria, pulmonibus, ex ventriculo, intestinis, hepate, splene, renibus, vesica lotii, pene, vtero, ejusue vagina, ano, habitu externo, digitis, temporibus, aliisque locis extraordinariis. Pro causarum differentiis oritur haemorrhagia vel per vulnera, lacerationem, diruptionem, lapsum, frictionem asperam, erosionem, motum vehementem externum, vt sternutationis, cantus, tussis, vomitus, equitationis, concubitus, et similia: vel per commotionem sanguinis inter-

nam, vt ab ira, terrore, aere calido, vino, spiritibus ardentibus, aromatibus, medicamentis ex aloe, myrrha, similibusue: vel per spontaneas naturae feu viuentis corporis actiones, in orgasmis, congestionibus, spasmis, febre, crisi, etc. vel ex utroque simul causarum genere, tam violento, quam spontaneo. Pro statu corporis sanguis erumpit vel extra morbos proprie dictos et in media sanitate, tam per vim externam, vt in vulneribus, plagis, motu nimio, cet. quam sponte naturae, vt in plethora, vnde narium haemorrhagia, menstrua, haemorrhoidum fluxus, alique: vel in morbis, vt in febribus, inflammationibus, mania, melancholia, cet. idque pariter tam violento modo, per erosionem dissolutionemue vasorum, in aneurysmate, carcinomate, scorbuto, saluatione, cet. quam spontaneo, in crisi, plurimisque febribus: Porro, contingunt sanguinis effusiones, respectu circumstantium corporis, in adolescentibus, iuuenibus, viris, senibus, feminis adultis, mulieribus grauidis, viduis, arnosis, cet. Quidam fluxus per se nascuntur, id est, ita vt ab essentiali affectu, non ab alia conjuncta affectione excitentur, vt plerumque spontaneae, tum haemorrhoides, menses, haemorrhagia vteri, multaeque febriles: alii per accidens oriuntur, siue ex diuersa vel symptomatica corporis affectione haemorrhagiam inferente, vt si inter saluationem sanguis a mercurii violentia vel acrimonia, quae vasa rumpat, protruditur;

si

si in febribus ira, terror, calefacientia acriora, tussis, erosio, humoris vel motuum quaedam peruersitas, sanguinem effundat. Modum, quo fiat haemorrhagia, consistere vel in anastomosi vasorum, vel in diapedesi, vel in diaëresi, vel in diabrosi, fatis cognitum est.

§. II.

Quodsi diuersitates istas propius consideramus, inprimis maioris momenti discrimen intercedereprehendimus inter eas haemorrhagias, quae per vim externam vasis illatam eueniunt, qua haec diuiduntur, lacerantur, rumpuntur, vt fit in dissolutionibus partium violentis quibuscumque: et eas, quae nascuntur ex interna causa sanguinem commouente, vel dissolvente, vasa distendente, nonnunquam et rumpente, velut ex ira, aestu, vino, medicamentis, congestione, febre, crisi, vlcere, cet. Nam in violentis istis, quia vasorum tantum contextus laeditur dissoluiturque, haëtenus, quantum ad ipsum sanguinis fluxum attinet, illa maxime solidorum laesio attendenda est. In iis contra fluxibus, qui per internam sanguinis commotionem ejusue aut vasorum alienationem cientur, ad internarum praecipue partium atque morbi conjuncti conditionem respiciendum, curaue dirigenda est. Neque autem reticendum, sanguinis illos cursus, qui ab interna humoris concitatione generantur, multa discrimina recipere; siquidem aliter comparatum

ratum est, si sanguis ab ira, calore aeris, vino, similibusue causis procatacticis commotus est: aliter, si extra morbum, a plethora sola fluxus nascitur, sicut ordinarie menses et haemorrhoides sanorum: aliter, si a morbosa corporis labe, quemadmodum in scorbuto, hydrope, dysenteria, cet. praecipueque plurimis morbis febrilibus. Denique nonnunquam violenta causa et spontanea simul ad haemorrhagiam ciendam concurrunt; ut, si sanguis abundans concitatusque vasa membranasue disrumpat in apoplexia, haemoptysi, etc.

§. III.

Et violentarum quidem profusionum expeditior videtur ratio, siquidem manifestum per vasorum distensionem aut variam dissolutionem, externam internamue, contingant: spontaneae vero reconditam magis naturam habent. Nimirum, dum hae fiunt, sanguis quandoque copiosius fortiusue propellitur versus locum, ex quo profunditur: dum igitur ad locum exitus magis mouetur, necesse est, ut interim ab aliis partibus quadamtenus repellatur, haeque minorem ejus quantitatem retineant accipiantue: porro, sanguis ad distantiam quamcunque locorum pellitur actione continentium partium, id est, cordis, vasorum, praesertim arteriarum, et ambientium muscutorum: quum autem hi motus ferantur ad locum, ubi fit sanguinis effusio, sequitur, ut motus ad haemorrhagiae locum versus
major

major sit, ad alias partes minor, hoc est, ut motus solidorum sit inaequalis siue spasticus. Vnde quoque fieri solet, ut in partibus humorem recipientibus animaduertatur major arteriarum pulsus, habitus laxior tumidiorque, rubicundior, calidior, cum aliquarum molestiarum sensu; ab humore scilicet copiosius aggesto validiusque moto, partesque grauantē: contra, in locis sanguinem repellentibus quaedam constrictio, pallor, frigus percipiatur, cum conjunctis et consequentibus. Quod autem iste motus ad certum illum locum tendit, ubi sanguinis fluxus accidit; in hoc loco, necesse est, existat aliqua res aut conditio, quae faciat, ut huc potius, quam alio versus impetus dirigatur. Atque haec conditio vix alia esse poterit, quantum ad fabricam corporis ejusque mouendae leges attinet, nisi quod parsiciens vel debilius resistit impulso humori, quam aliae: vel quod in loco profusionis materia quaedam aut affectio praesens adest, quae motum irriter eoue deriuat: vel quod utraque ratio simul existit. Et certe videmus, partes laxiores minusue resistentes haemorrhagiis potissimum expositas esse, nominatim, per ipsam nativam fabricam, tunicam mollem narium, pulmones, uterum, ventriculum, rectum intestinum, cet. propter imbecillitatem vero ex affectione morbida contractam, varices, aneurysmata, vasa membranasue scorbutō, hydrope, similiue labe affectas. Deprehendimus etiam, aliquamdiu ante, quam
san-

sanguis ex naribus, ex pectore, ex ventriculo, ex ano, ex vulua, ex gingiuis scorbuto laborantibus, etc. erumpat, grauitatem ibi locorum, titillationem, aut irritationem qualemcumque sentire; id quod sine dubio a sanguine jam ad locum congesto et exitum moliente proficiscitur. Nam in hujusmodi haemorrhagiis, quae sine violentia contingunt, nec subito sanguis ad locum destinatum confluere solet, nec eodem momento statim effundi; sed ordinarie paullatim colligitur, pluribusque et repetitis spasticis et molestis, etiam febrilibus, turgescientium humorum motibus conflatur agitaturque, donec tandem perrumpat. Quodsi quaeratur, quid sit, quod faciat, vt sic paulatim humor in certo loco accumuletur; id fieri puto partim propter structuram situmque partium, quatenus eae magis aptae sunt ad humorem admittendum: partim propter complures causas antecedentes et occasionales, quo pertinent calor externus locum certum magis incendens, laxans, aut rarefaciens, praesertim si cum calore simul humor locum afficiat: externa frictio, constrictio durior vicinorum, obstructio visceris cuiusdam, suppressio consueta- rum alias aut naturalium haemorrhagarum, quies partis, vel contra nimius motus; et quae sunt similia. Sic caput inprimis humoribus colligendis opportunum est propter ingentem vasorum, quae eo tendunt, numerum: in quibus menses aut haemorrhoides obstruuntur, facile nascitur haemoptysis,

sis, fanguineus vomitus, aliaeque eruptiones: qui scribendo vacant et caput interim pronum inclinare consueuerunt, frequentius in narium haemorrhagiam incidere solent: qui multum sedendo, vel et equitando, vitam agunt, ad haemorrhoides mensumue excessum proclives sunt: mariti concubitus acrius exercentes, in aetate prouectiore multum sanguinis saepe contrahunt; et sic porro. Ex his omnibus conficitur, quantum intelligentia assequi licet, spontaneas haemorrhagias fieri motibus humorum spasticis siue inaequalibus, ad certum locum, varias ob causas, directis a). Qua in re supponitur, quod verum est, partes motum exercentes a Deo viuis motricibus viribus esse praeditas; vt haecenus non necesse sit ad Animam recurrere rationalem: sufficit, totum corpus vita semel donatum, eaque jugi facultate suas actiones exercere.

§. IV.

Materia, quae per haemorrhagias excernitur spontaneas, est, quemadmodum oculis patet, ipse san-

a) FRID. HOFFMANNVS in *Medicina systematica*, Tomo IV. Parte 2. Sectione I. Prolegomenis §. X. docet quidem, haemorrhagias hujus generis, quibuscunque etiam in locis prod-eant, proxime et directe ab extra ad intus conuerso motu atque inaequalitate circulationis sanguinis oriri: sed rationes, cur ad certa prae caeteris loca ferantur, non explicat. Idem §. XI. pro antecedente haemorrhagiarum causa solam ponit viscerum obstructionem: quam tamen in omnibus existere vel valere, minime crediderim.

sanguis, qualis in vasis continetur *b*). Et quum omnis spontanea virium motricium actio a re quadam irritante nascatur, sicut in praecedente sectione expositum est; potest utique haec sanguinis materia motus istos prouocare, vel quantitate sua, vel qualitate, vel vtraque. Id quod etiam saepe reapse fieri videmus, quando, verbi causa, post justum corporis incrementum perfectum, sanguis abundans, certis periodis collectus, per nares, per vuluam, per sedis vasa profunditur: quando post obstructas has vias, idem haemoptysi, vomitu, vel mictu reiicitur: quando post truncatum aliquod membrum majus, dum tantundem sanguinis genitum paucioribus jam vasis mouetur, propterea corpus haemorrhagiis obnoxium redditur: quando phrenitis, apoplexia, mania, melancholia, synochos febris, alique plures morbi sanguine largius effuso sanantur: quando feruidior sanguis caput petit grauatque, tum per nares erumpens, aegritudinem leuat: quando qualitas sanguinis quasi fermentans, hunc nimis expandit, vel ejus acrimonia vires motrices exstimulat, vel ejus nimia tenuitas justo facilius pellentibus viribus cedit. Hujusmodi hae-

b) HOFFMANNVS alleg. l. §. VIII. asserit, non sanguinis boni et consistentis, fibrosi, purpureo colore praediti, abundantiam pro causa haemorrhagarum praecipua et proxima materiali agnoscendam esse: sed serum, quod copiosius et ultra proportionem in vasis continetur. Quod quanquam saepenumero sic se habere videatur, tamen plures dari differentias in materia sanguinis, quae haemorrhagiis eum aptum reddant, existimo, sicut etiam subinde monui.

haemorrhagiae recte videntur *actiuae* appellari, vbi scilicet sanguis quacunque de causa commotus ad excretionem sui naturam stimulat: quemadmodum alii humores abundantes aut turgentes, serum, pituita, mucus, lympa, saliva, glandularum variarum humor, bilis, cet. alia excretionum genera mouere solent, catarrhos, coryzam, tussim, sudores, diarrhoeam, vomitum, choleram, pollutionem nocturnam, cet. Quanquam igitur plethora quaelibet, siue sit abundantia sanguinis vera, siue ejus expansio commotioe nimia, quomodo-
cunque vasa nimis distendat, haemorrhagiarum existit causa; non tamen semper sanguis solus, siue sincerus per se partes mouentes ad haemorrhagias faciendas inducit atque concitat: ira quoque, vina vehementia, spiritus ardentis, aromata acris, medicamenta ex aloe, myrrha, croco parata, similiaque, possunt pariter, ac saepe solent, stimulum praebere, quo vasa ad sanguinem validius mouendum et effundendum sollicitentur, licet per se sanguis non abundet, neque irritante qualitate peccet; sicut videmus, ab inebriantibus haemoptysin et apoplexiam inferri, a graui terroris affectu nonnunquam subito sanguinem per nares, os, aures, oculos copiose pertinaciterque protrudi, c) cet.

Etsi

c) Exemplum memorabile refert PETRVS KOLB in descriptione Capitis Bonae Spei pag. 340. editionis Germanicae Norimb. 1719. f. Conf. aliud apud CHRISTIAN. FRANC. PAVLLINI *Observationum Centuria* 2. Obseru. 51.

Etsi vero tales haemorrhagias inter actiuas quoque referre par est, quatenus natura irritata sanguinem expellit, aliter quam in ejusmodi haemorrhagiis fit, quae per vulnera quaecunque eueniunt, vbi sanguis tantummodo ordinario motu profluit, non ab alia, intus nata, causa concitatur, quales proinde haemorrhagiae *Passivae* merito vocantur: tamen has posterioris generis actiuas, quae subito vehementerque ab occasionalibus causis nascuntur, multum differre patet ab istis prioribus, quae ab interiore causa sensim conflata, leniore modo paulatim suscitantur. Et hae quidem proprie *spontaneae* videntur appellari; vt sic duplicis generis *actiuae* sint, partim *spontaneae*: partim *violentae*, subitaneae scilicet modo dictae d).

§. V.

d) Celeb. Stahl's schola haemorrhagias actiuas consistere statuit in spontaneis actibus principii vitalis, deliberato consilio institutis, quo plethora diminuatur, et sic sanitas conseruetur, multaque damna ab abundante sanguine metuenda praecaveantur: vel saltem ob solam assuetudinem repetitis actibus. Vid. e. g. *Stahl's Collegium Practicum* a JOH. STORCHIO editum, Sectio 1. Membrum 2. §. 1. JOH. FRIEDERICI de SANDE Disp. Inaug. de *Haemorrhagiis Actiuis*. Cap. 1. xii. Verum sic multae species excluduntur aut praetereuntur, in quibus tamen manifesto irritatae motrices naturae vires agunt, tam in statu sano, quam in morbis. Neque deliberatum animae consilium haemorrhagias regere aut moderari videmus, quum saepe perperam vel incongrue fiant, vel male cedant: saepe quidem etiam bene; sed utroque modo effectum ex caecis causis, secundum leges motuum agentibus, consequi,

§. V.

Operae quoque pretium fuerit, eam diligentius considerare differentiam, qua vel extra morbum alium contingunt haemorrhagiae actiuae et spontaneae, vel ex aliis affectionibus, vel denique cum talibus conjunctis. Etenim, quae extra morbos praesentes eueniunt, vel a sola plethora proficiscuntur, eademque morbis causam praecedunt, quos alias ex ista plethora orituros metuendum erat, quosque numerosos esse constat: vel a causis occasionalibus concitantur, sicut proxime ante de actiuis violentis dictum est, eaeque hactenus per se parum boni promittunt; quodsi vtramque simul originem agnoscant, vt haemorrhagia narium in plethorico post vini compotationem, cet. ambiguae sunt, hoc est, quatenus sanguinis copia minuitur, vtilitatem praestant: quatenus autem a peregrina re sanguis vehementius commouetur, facile modum excedere possunt. Quae morbos alios comitantur, vt si in phrenitide, in hydrope, scorbuto, peste, variolis, petechiis, febribus aliis accidunt; eae ex horum morborum rationibus dijudicandae sunt. Quibus tandem alii affectus sese adiungunt, vt, si febris accedat, si spasmus aut conuulsio, si defectio animi, etc. haec signa status rerum pro sua quaeque ratione praebent; vt, febris indicat maiorem sanguinis seu vitalis humoris perturbationem: conuulsio, et lipothymia, nimiam profusionem, mortisque periculum; et sic porro.

§. VI.

Ex illis affectionibus, quae vel haemorrhagias excitant, vel vna cum iis se manifestant, speciatim nunc febres contemplandas sumo; quas proinde *febriles* appello. Primum apparet, hujus generis haemorrhagias esse ex spontaneorum numero; siquidem febris sine spontaneo motu cogitari non potest; unde, quatenus ipsa in motu interno praeter naturam versatur, haemorrhagias facere potest: quatenus autem a vi vitae irritata mouetur, ad haemorrhagias accedit. In violentis quoque, si quando febris observatur, ut in illis quae post vehementiores corporis motus fiunt, vel post exesam a prava materia vasorum compagem, etc. vel actio spontanea violentiaque simul existunt, haemorrhagiaeque ex utroque genere composita est: vel febris tum demum adjungitur, postquam ea quoque a suis causis accensa est, ut a nimio motu, ab aestu, ab efferuescente materia, etc. Solet vero febris, id est, motus sanguinis praeter naturam citatior spontaneus, cum laesis functionibus, ab interna causa, naturae inimica, proficiscens, quantum ad haemorrhagias attinet, a sanguinis quantitate et qualitate, quae naturalem ejus indolem motumue pervertant, concitari, quo ex conflictu tum variae consequuntur mutationes affectionesque solidorum, humorum, motuum, et functionum, in melius quidem, si causae laedentes superabiles sunt; in pejus autem, si minus. Porro innumerabilis est diuersitas laedentis

tis

tis quantitatis, qualitatis, et graduum laesionis; unde pariter febres, earumque gradus, innumerabiles existunt; ut adeo vix detur haemorrhagia spontanea, quantumvis levis, quam non aliqua febricula, aliquid febrilis motus comitetur. Sane, si attendimus, etiam in illis, qui cetera commode valent, consuetum sanguinis ex naribus cursum, menstruum et haemorrhoidum fluxum ordinarium, non sine majore citatioreque sanguinis motu, molestissimae nonnullis febrilibus succedere experimur, id quod etiam ex capitis, aliarumque partium, vel totius corporis grauitate pigritiae, doloribus, horroribus, phlogosi, similibusque symptomatibus cognoscitur. Manifestius tamen haec apparent, ubi febris euidentius et majore gradu se exserit; quales tum febres, varias ob conditiones, specialibus quoque nominibus donari consueuerunt, et appellari ephemera, synochos, et quae sunt reliqua.

§. VII.

Sigillatim, in *ephemera* siue diaria febre nonnunquam e), sed rarius tamen, sanguis per nares profunditur, ita ut eo febris tollatur. Nascitur enim haec febris ab ejusmodi rebus externis seu causis procatacticis, quae sanguinem in aestum et justo celeriores motum concitare possunt, prae-

B 3

fertim

e) Vid. exemplum apud PET. FORESTVM *Observationum et Curationum Medicinalium* Libro 13. Obseru. 12. Conf. FR. BOISSIER de SAVVAGES *Nosologia Methodica*, Tom. 2. Pars 1. pag. 215. seqq.

fertim si is simul paulo copiosior fuerit; quales res sunt calor externus solis, balnei, hypocausti, crapula, calefacientia ingesta, fatigatio corporis ab immoderato labore vel exercitatione, suppressa subito perspiratio, et similia. Quare non mirum est, si, rebus ita comparatis, sanguis calidior ad caput feratur, nares aliquando perrumpat, eoque sic imminuto aestus et motus subsident, febrisque sese subducit. Magis tamen aliis mutationum excretionumue generibus, maximeque resolutione et sudore, vel et madore aliquo diaria febris solui solet, quum plethora et congestionum in his mitius aegrotantibus causae saepe desint, vixque sanguis a naturali sua crasi deflectat, neque aucto valde impetu vasa distendat. Quapropter etiam, ob contrariam rationem in *synocha*, seu sanguinea strictè dicta, febre longe frequentius sanguinem naribus fundi observamus, siue simplex sit ea febris, siue putris, ubi nimirum ejusdem cum diaria generis febris, et iisdem fere de causis, sed grauioribus nata, ad quatuor, septem, pluresue dies produci-
tur, quo tum longiore spatio praeterea quoque via facilius ad transmittendum sanguinem parari potest. *Ardens* febris seu *causos*, ut prae aliis vehemens est, et plures etiam per dies continenter affligit, rationes fere similes habet; ita nec mirum illam, alias inter excretiones, largam quoque narium aliamue haemorrhagiam, pro leuamine aut crisi frequentius mouere. De febribus autem his grauioribus etiam
notari

notari meretur, quod, vbi forte illarum in decursu nimis attenuatus fuerit sanguis, aut acrior in praecordiis bilis abundauerit, qualis *causi* praesertim conditio esse solet *f*); aut quae vehementiorem

B 4

et

f) Conf. VAN SWIETEN *Comment. in aph.* BOERH. T. II. p. 454. in illustratione §. 740. PRINGLE *Observations on the Diseases of the Army*, edit in 4. Lond. 1765. p. 64. 65. et 180. Grauem valde epidemicam putridam et biliosam febrem, cum haemorrhagiis nunc salutaribus nunc etiam inutilibus et noxiis describit HVXHAMVS *de aere et morb. epid. Oper. edit. cel.* REICHELH T. I. p. 234. *sqq.* Sic Idem sollertissimus Observator in febre alia epidemica, quam putridam malignam nominavit, saepe cum pustulis rubellis, saepe cum petechiis incedente haemorrhagias enormes interdum ex ore, naribus, vtero, praesertim cum maculae praelargae fuere ac liuidae, aut nigrae, aut violaceae, accessisse memorat. *Ibid.* p. 317. Ceterum etiam quae Auctor hicce praestantissimus de sanguinis dissoluti in putridis febribus indole ad haemorrhagias facile perniciosas proniori tradidit, quoad nostram doctrinam, conferri quam dignissima videntur. *Oper. T. II. c. V.* Notabilia quoque valde sunt ipsius observata de pertinacibus in ictero saeviore ac febrili sanguinis profusionibus, quae plures per vias iis in aegris contigerint. T. I. p. 158. 150. Quam terribilis autem bilis vis in putridis febribus, quoad haemorrhagias excitandas, eludere possit, inprimis ex historia patet febris illius grauissimae, apud Indos occidentales frequentioris, quam Angli *the yellow Fever* vocare solent, quamque sub nomine *putridae biliosae* ex propria sua observatione cel. HILLARY prae aliis accuratissime descripsisse videtur. Iuvabit forte ipsa adduxisse ejus verba: *in the latter Stage of this Fever the blood is so attenuated and dissolved, that we frequently see it flowing, not only out of the Nose and Mouth, but from the Eyes, and even through the very Pores of the Skin; also great Quantities of black half-baked, or half-mortified Blood is frequently voided, both by Vomiting and by Stool, with great Quantities of yellow and blackish putrid Bile by the same ways; and the Urine, which was before* of

et nimis pertinacem spasticam congestionem excitet, in visceribus causa latuerit, haemorrhagia etiam talis spontanea in aegri detrimentum cedere queat. Variaque talis fere est ratio plurimarum febrium remittentium continuarum; in quibus nempe toties, tum cum leuamine, tum instar criseos, tum etiam inutiliter, aut majori minoriue cum noxa, sanguinem naturae efficacia profundi animaduertimus. Quoad vias vero tutissimam plerumque illam ex naribus habemus, nisi morbi genius, sexusque vel aetatis conditio corporisque habitudo illas ex vtero aut haemorrhoidibus praefarendam postulent. Mictum equidem vomitumque sanguinis, et ejusdem sincerioris cum tussi rejectionem mali plerumque ominis esse satis compertum est.

§. VIII.

of a high icteritious Colour, is now almost black, and is frequently mixed with a considerable Quantity of half-dissolved Blood v. HILLARY'S Observations on the Changes of the Air and the concomitant Epidemical Diseases in the Island of Barbados. Lond. 1759. p. 151. 152. Conferri etiam de hac ipsa observatione meretur JO. MOULTRIE Diff. de febre maligna biliosa Amer. quam recudi curavit cel. BALDINGER, Longosol. 1768. p. 4. 5. et CHARLES BISSETS Medical Essays and observations p. 20. Quae autem in hacce graui febre magna et manifesta est, in aliis quidem apud nos minor et saepe occultior atque lentior, attamen verissime quoque, nec valde raro aliqua reperitur, noxia bilis et cacochylicae putridae efficacia in excitandis febrilibus haemorrhagiis, iisdemque pertinaciter producendis. v. praecipue cel. TISSOTI Diff. de febre biliosa Laus. annesi p. 120.

§. VIII.

In exanthematicis pariter febribus, in variolis nempe, morbillis, purpurata et scarlatina febre, etc. varios non raro sanguinis fluxus, quoad vias, qualitatem, causas, copiam et effectus, observamus, quos etiam in hocce morborum genere fere simili ratione secundum ipsas corporibus inhaerentes causas, atque discrepantes febrium conjunctarum conditiones, ac in simplicibus continuis dijudicandas censemus, nisi quod criticae metastaseos ad cutem, quam exanthematum plura genera praestant, indoles, atque singularis illorum cujusque decursus, peculiarem aliquam attentionem sibi postulare soleant. Nonnunquam plurimo cum aegrotantium leuamento, primis in diebus febris variolosaе vehementioris, attamen melioris indolis, largam ex naribus haemorrhagiam accedere, praesertim, ubi grauis capitis dolor, sopor, vel delirium adfuerint; etiam faustum et mitem inde aliquando sequi decursum, ex certissima et vulgari observatione satis constat. Neque minus exoptatum talem simili ex haemorrhagia successum in morbillosoe, purpuratae rubrae et scarlatinae febris, licet in binis hisce posterioribus rarius, initio quandoque animaduertimus. Attamen nequaquam semper fluente sanguine plane securos nos esse licet, quum et nonnunquam paucae modo stillae appareant, aliquando etiam nimis copiosa profusio, pessimi ominis et cum difficili valde rerum statu occurrant;

immo et ipse fluxus sanguinis sua natura quandoque in aegri potius detrimentum, quam commodum vergere videatur; qualia exempla plures apud Auctores, et inter alios apud laudatissimum inprimis HVXHAMVM reperire licet. Faustus successus vera ex plethora, sed non sola tamen, verum et ex sanguine integriori, moderato ejus fluxu, viscerum laudabili conditione, systematis neruosi vigore, absentia prauorum symptomatum et praesertim quoque biliosae colluuiei, subinde et variis demum ex haemorrhagiae effectibus, aestimandus videtur. Dubia magis et facilius periculosa rerum conditio est, vbi pustulis jam praesentibus sanguis profluat. *Nunquam sane non prognosticum est mortiferum*, ait HVXHAMVS, *si quando maculae et haemorrhagiae in vera variolarum eruptione apparent, et aeger raro aut nunquam ad nonum morbi diem usque vitam trahit; cum sanguis sine mora in dissolutionem et putredinem ruat g)*. Petechialis febris rarius, quod frequentissime ad putridarum aliquod genus referri mereatur, largiorem absque noxa haemorrhagiam admittit, etsi nequaquam generatim semper detrimentum inde metuendum, sed potius aliquando verum inde commodum expectandum fit *h)*. Multo autem adhuc minus, in simplici miliari alba, ob junctam illi ordinarie virium vitalium penuriam,

pro-

g) Oper. T. II. p. 59.

h) v. F. HOFFMANNI *med. system.* T. IV. P. I. Sect. I. C. XI. Obs. VI. CL. HASENOEHL. *hist. trium morb.* p. 83. KLOEK-HOF *opuscul. med.* p. 99.

probandae plerumque sunt haemorrhagiae, neque etiam illa laborantes hisce facile obnoxii reperiuntur; quamvis utique plures etiam varietates atque complicationes hic morbus admittat, quas inter occurrere satis compertum est, in quibus et sanguinis missioni locus i), et ex fluxu moderato spontaneo, praesertim illo lochiorum in puerperis, commodum insequatur k).

§. IX.

Inflammatoriis etiam febribus sanguinei fluxus non nunquam accedunt, easdemque saepe leuare, quandoque fere curare valent; attamen pariter quoque cum aegrotantium detrimento illos nonnunquam contingere, omni dubio vacat. Ad sanguineos autem fluxus minus referri solent frequentes illae et ordinariae sanguinis pauci ex inflammata parte, sub ipso morborum initio et cruditate quasi expressi, et cum muco varia ratione remixti, rejections, quae in angina, peripneumonia, pleuropneumonia, ventriculi et intestinorum inflammatione, nephritide et inflammatione vesicae saepissime ex viis maxime propinquis observantur. Veriores

i) F. HOFFMANNVS *L. c. Sect. I. C. IX. p. m. 214.* FORDYCE *hist. febr. miliaris S. 92. et seqq.* HVXHAM oper. T. I. p. 171. HAMILTON *curat. febr. mil. edit. Geneu. operum Sydenh. T. I. annex. p. 390.*

k) DE FISCHER *de febre miliari p. 17.* salutarem in grauida, quae alba simul cum rubra purpura laborauerat, haemorrhagiam narium refert p. 48.

riores autem, et quae frequentius leuamini aut crisi his in morbis inferuiunt, haemorrhagiae, etiam hic praecipue memorandae sunt illae ex naribus atque haemorrhoidibus. Hisque viis etiam fauent corporum illae affectiones, quas vt aliis in vehementioribus continuis, ita etiam in inflammatoriis haud raro deprehendimus, euidentiora nempe staseos, licet spasticae modo ac transitoriae, in visceribus hypochondriacis indicia, praecordia tensa, quodammodo dolentia, obstrictam vel duriores saltem aluum, cum aestu et dolore capitis ac ceruicis, et cum impetu sanguinis ad partes praecipue dolentes grauiori. Facilius autem in aegrorum huiusmodi febribus afflictorum commodum cedere obseruantur haemorrhagiae, vbi prioribus diebus accedant, modo bonam sanguis indolem habeat, et sufficiente, non tamen immoderata copia profluat *l*). Ceterum, quod ratione causarum et euentuum de simplicibus continuis atque exanthematicis, praesertim quoad febrium varietatem, jam notatum fuit, de inflammatoriis etiam valere satis habere licet exploratum *m*).

§. X.

Intermittentes febres rarius longe continuis euidam sanguinis profusioni ansam praebent. Haud
fre-

l) conf. ill. TRILLER *de pleurit* p. 7.

m) v. ill. TISSOTI *diff. de febr. bil.* Laus. p. 130. 146. Ill. PRAESIDIS et cl. ELLERT. *diff. de pleurit. partitione.*

frequenter illae plethoricos, venaesectione magis indigentes, quibus nempe densior simul et integrior sanguis fuerit, prehendere videntur, neque ea iis indoles est, quae pluribus in continuis locum habet, ut ad crisin per aliquam haemorrhagiam pronae sint, quum potius vix non semper eam per diaphoresin et urinam fere solas postulent. Ipsa etiam intercalaris ἀπυρεξίς, dum per vices remissionem, etiam subinde naturali debiliorem, sanguinis motum praestat, efficaciam congestionum, quominus haemorrhagiam tam facile excitent, infringere quodammodo poterit; siquidem aliquando tanta est paroxysmorum cum symptomatibus haemorrhagiam alias praenunciantibus violentia, ut, nisi mitior breui status euaderet, ipsa profusio sanguinis quam facillime excitaretur. Vix praeterea dubitandum, peculiarem aliquam, quae intermittentes foueat febres, systemati nervoso debilitatem inhaerere, cui sanguinei fluxus plerumque non respondeant, ita quidem, ut etiam, si forte acciderint, pariter ac venae sectio, difficiliorem morbum aut grauiore ejusdem metaschematismos facile excitare possint *n*). Verum tamen et aliquando intermittentibus verissime conjuncta reperitur nociua sanguinis abundantia, talisque illius orgasmus, ut sanguis ex naribus aut ano ad insigne leuamen aegri profundatur, nisi forte venae sectione opportune insti-

n) v. HIPPOCR. aph. 3. Sect. VIII. SYDENH. oper. uniu. edit. Leyd. 1754. 91. 94. p. 298.

instituta is fluxus praeuertatur o). Et nonnunquam, ubi etiam staseos cujusdam sanguinis in hypochondriaco viscere probabilia indicia praesto fuerunt, salutis aut commodo cessit aliqua ex iisdem viis haemorrhagia p).

§. XI.

Similiter de aliis Febrium speciebus, quas figillatim exponere nimis longum foret; et de morbis, in quibus haemorrhagiae cum febre eueniunt, existimandum est. In vniuersum, quae *criticae* sunt, bonae esse consueuerunt; quae *symptomaticae* ab istis recte distinguuntur, a febre scilicet, quamuis fortasse non sola, excitatae, nunc malae nunc bonae; similisque conditio est aliunde *superuenientium*. Criticae autem eo dignoscuntur, si vires vitae bene valent, quodammodo inter crisin increscunt: si febre paulatim jam ad vigorem producta, siue coctione peracta, fit euacuatio: si cum euacuatione decrescit febris, affectioque morbosâ magis magisque leuatur: si, quod necessario ex his consequitur, tantum sanguinis, quantum valetudini aduersum est, hoc est, multum pro re nata, profunditur: si per vias commodas, siue patentiores ad emittendum sanguinem, profluit, quales sunt potissimum nares, vterus, haemorrhoides; minus

com-

o) Conf WERLHOFII *observ. de febr.* p. 73. 74.

p) FORESTVS *Libri III. obs.* 41. Ill. de HAEN *rat. med.* T. XI. p. 6.

commodi pulmones : adhuc magis incongrui renes, ventriculus, intestina, aures, oculi. Nonnunquam tamen etiam per vias, quae minus conuenire videntur, salutare contingunt haemorrhagiae, modo ceterae conditiones bene se habeant. Quemadmodum nec de mensura excretionis alia fere, quae in vniuersum valeat, regula dari poterit, quam vt in melius aegri status et functiones mutentur. Sic non pauca reperiuntur apud autores observationum exempla, vbi per haemoptysin, vel cruentum vomitum, mictumue sanguineum, itemque ex naribus aut haemorrhoidibus ingens humoris copia salutariter aut sine detrimento valetudinis effusa fuit *q*). At si vires per excretionem dejiciuntur, si pulsus debiliior fit, si spiritus semper difficiliter trahitur, mens non bene constat, ceteraeque functiones in pejus vertunt: si paucae tantummodo guttae sanguinis profluunt: si nullum sequitur morbi leuamen, sed potius sopor, spasmi, tremorum refrigeratio, et quae sunt alia supra dictis

q) De Haemoptysi vid. exempli causa AVG. QVIR. RIVINVS in *Dissertationibus Academicis* collectis pag. 332. JOH. STORCH. in *Praxi Stabliana*, Sectione I. Membro 7. 2. m. 353. de vomitu cruento idem STORCH. *ibid.* p. 382. de sanguinis Mictu HOFFMANN. *Medic. System.* T. IV. P. 4. Sect. I. Cap. VI. §. VII. STORCH. *ibid.* p. 456. et 458. (vbi sigillatim de critico in *scarlatina febre*). De largissima salutari narium haemorrhagia KLOECKHOF. *opuscul. med.* p. 99. BALLONII *oper. edit.* TRONCHINI T. IV. p. 327. De omnibus ill. RICHTERI *disp. Natura morborum per morbos viris*, passim.

etis bonis signis contraria; tunc haemorrhagiae tales cum discrimine vitae omnino conjunctae sunt; saepius morbi praevalentis et naturae fatifcentis indicia praebent; etsi etiam verae criticae *r)* ita nonnunquam excedant, ut artis auxilio, quo illae mitigentur vel cohibeantur, aliquando utique indigeant. Quod ad symptomáticas haemorrhagias atinet, hae non semper malae putandae sunt, sed aliquando bonae, tum praesertim, ubi sanguinis abundans copia, quae non quidem ipsum morbum faciat, sed tamen eum aut ejus accidentia augeat, curationemue reddat difficiliorem, virtute naturae et motuum enatorum propellitur diminuiturque; sicut in variis febribus aliquando fieri supra dictum est.

§. XII.

Itaque, si in febribus res naturae permittatur, eaque per se negotium gerat, neque in suis moliminibus impediatur; persaepe sanguinem abundantem et turgentem spontaneis haemorrhagiis in emolumentum valetudinis effundi, certum est. Quamobrem

r) Criticas euacuationes de faustis intelligo, quo sensu haec vox accipi consuevit, quando simpliciter adhibetur. Ceterum latiores vocis Criticos significationes explicat cl. BRAWII sub Ill. mei Praesidis moderamine habita Dissertatio Inauguralis, de *Collisionis atque Criticos in Febribus impediementis*, §. 2. SAVVAGESIVS criticam febrilem haemorrhagiam inter symptomáticas refert, essentialibus oppositas, *Nosologia Methodica* Tomo III. Parte 2. pag. 19. Sed nolumus, cum opus non videatur, ab usitatore discedere loquendi ratione.

obrem nec licebit, si jam sanguis in cursu est, aut futurae criseos indicia comparent, ut pulsus caprizans, titillatio seu pruritus aut molestia similis in naribus aut ano, sputum pleuriticum, cet. non licebit, inquam, hos naturae motus compescere, sufflaminare, impedire, aut interuvertere, sed potius adjuuare, si opus est, saltem finire; et tantummodo praestolari, num forte signa nimis immoderatae profusionis subsequantur, quae nimirum sedanda vel comprimenda. Antea vero quam haemorrhagia fiat, aut ejus breui oriturae certa praesto fuerint indicia, in quaestionem adduci potest, num sanguinem arte detrahere consultum sit, eoque spontaneam euacuationem anteuvertere? Nam ad sanguinis profusionem, cui vera plethora, siue illa ad molem dicta s), ansam praebuerit, rite auertendam non alia datur apta via, quam ipsius sanguinis vicaria, quae per artem fit, diminutio. Quamuis enim visum quibusdam fuerit, plenitudinem sanguinis in morbis etiam eo modo plerumque satis diminui posse, ut abundans ejus pars motibus febrilibus, et aptae auxilio diaetae, ac medicinae, in serum resoluatur, tumque superfluum illud per sudorem, aluum, coryzam, urinam, similesue excretionum vias eliminetur; potius tamen credibile est, ejusmodi plethoram, nisi reapse vel in ipsa sua substantia detrahatur, multiplices corruptiones susce-

s) GAVBII *pathol. medic.* §. 388.

fufcepturam , grauesque morbos aut fymptomata, nominatim inflammationes, putredines , fpasmos, dolores , fpontaneas haemorrhagias et congestiones facile periculofas creaturam effe; id quod etiam experientia fatis fuperque confirmat , certeque conftat, febres, quae plethorae fuam debent originem, aut eam habent conjunctam, longe difficilius , vixque fine majori aegrotantis discrimine, curari fine detractiōe fincerī fanguinis, quam hac, quoad fufficit , adhibita. Denique, fanguinis partem abundantem non poffe alio commodo modo confumi, nifi ipfius fincerī fanguinis excretionē, hoc fatis videtur effe documenti, quod faepe, adhibitis etiam optimis auxiliis ad moderandum fanguinis impetum, omiffa modo ejusdem detractiōe, ipfa tandem haemorrhagia fuccedere morbumque leuare aut foluere foleat, nifi jam alienata ipfius vitalis laticis conditio fuerit, aut vifceribus ac nervis grauior illata fit injuria; nonnunquam vero et febre fuperata varias ex plethora nondum imminuta moleftias , et pericula remanere. Ipſam fpontaneam autem haemorrhagiam, antea fatis exhausto per artem fanguine, longe rarius euenturam effe, hoc minus dubitandum eſt, quod praefentem quoque haemorrhagiam miſſione fanguinis imminui ſupprimique videmus. Jam confiderandum eſt, fpontaneas iſtas euacuationes multis difficultatibus eſſe circumſeptas : grauiā interim, dum ad bonam excretionem via praeparatur, ab abundante et aeſtu-

ante sanguine induci symptomata: quin ipsius sanguinis periculosas metuendas esse corruptiones, nec non symptomáticas ejusdem, aut incongruas alienis in locis, perniciosasque eruptiones, vel partium interiorum læsiones multiplices: denique, nec certo sciri posse, spontaneam fore hæmorrhagiam, et, si vel maxime fieret, tamen eam vel imperfectam, vel nimiam esse posse; quodsi non eveniat fluxus, noxas sanguinis inhærentis putrescentisque, graues admodum, expectandas esse: si nimis paucum sanguinis profluat, intus restantem materiam aegrum oppressurum ac confecturum esse: si nimis multum, consecuturam imbecillitatem universalem, mentis perturbationem, delirium, pallorem et frigus, cachexiam, hydropem, tabem, convulsiones, et ipsam aliquando mortem. Quibus omnibus bene perpensis adducor, ut existimem, Medicum oportere, nisi de feliciori critico sanguinis profluvio mox aduenturo satis certa spes fuerit, quoad fieri potest, hæmorrhagiis spontaneis febrilibus, quibus plethora siue ad molem siue ad volumen, et quibus spastica congestio, itemque nimia tenuitas sanguinis, nimiaue fabricae quarundam corporis partium debilitas ansam dederit, perite præcauendis operam dare, eaque propter etiam, ubi modo de sanguinis præsertim integrioris abundantia constiterit, superfluum emittere, quoad licet, ita nempe, ne vires reliquo morbo superando necessariae prosternantur aut exhauriantur.

tur. Sic officio suo, ducem sequendi naturam, fatisfacit Medicus, quatenus sanguinem detrahit, quem verisimiliter alias, ubi res feliciter cesserit, natura ipsa detractura foret. Negari quidem nequaquam poterit, sanguinis detractio in mitiori febre haud semper opus esse, etiamsi aliqua rubri hujus laticis abundantia se prodere videatur, praesertim si hunc ante morbum certa ejus indicia non fuerint, neque periodicis sanguinis fluxibus aut missionibus sanitati congruis nondum assuetus quis fuerit. Qui etiam diaetae, et curationis antiphlogisticae et antisepticae potens auxilium, frequentemque febrilis ebullitionis ex praecordiis originem, aptis praecipue domandam euacuationibus, probe habuerit cognitam, facile verissima reperiet ill. TISSOTI asserta monitaque, *frequenter hodie abesse plethoram, licet adesse videatur, servandumque sanguinem esse, quo ad arcendos morbos non sanguineos ipse quoque suum afferat auxilium t*). Neque nimis praeterea meticulosos nos esse decet, ratione incidentis forte moderatae spontaneae haemorrhagiae, in sanguineis febribus toties, ut per vulgus notum, salutari, atque futurae valetudini saepe magis conveniente ac detractio artificialis. Tantum tamen abest quoque, ut prudente, verisque ex rationibus instituta, venaesectione vis naturae debilitetur, ne sufficiat ad debellandum morbum, ut ab impedimento, quod sanguis abundans ac turgescens ob-

t) Diff. de febr. biliosis. p. 122.

objiciebat, jam libera, magis infurgat, et parte rerum aduersarum remota, hoc potentius ad reliquas vincendas inualefcit; vnde quoque tum pulsum fieri liberiores, respirationem faciliorem, sensus animaeque reliquas facultates expeditiores, excretionem promptiores, caeterasque functiones quaslibet meliores; adeoque minui febrem cum suis symptomatibus, experientia docet.

§. XIII.

Attamen alia plane incedendum via existimo, vbi aliae praeter plethoram veram causae metueendarum aut jam praesentium haemorrhagiarum febrium in aegris reperiantur. Ita, quum biliosae coluuiei, quam ex grauioribus haemorrhagiarum causis esse iam supra inuimus, indicia praesto fuerint, saepe quidem facillime apparere talis rerum conditio poterit, ac si venae sectione opus foret, siquidem aestus quandoque totius corporis vehementior, et ipsae viscerum inflammationes et aliae molestissimae congestiones nonnunquam animaduertuntur; attamen magna tunc semper cautione opus est in mittendo sanguine, vtpote illum non modo sine commodo aegri, sed vera et grauissima saepe cum ejusdem noxa emissum esse, certissime plurimum obseruatione constitit. Ita etiam ipso in *causo*, quem hujus generis esse indicauimus, summus BOERHAAVE, licet ob eam, quam exposuerat, morbi naturam, inflammationem videlicet per vniuersum

corpus, maxime necessaria sanguinis missio censeretur posset, tales constituit venae secandae cautiones, quae peculiarem facilis noxae metum prodere, indoli autem biliosae putridaeque febris praesertim accommodatae videntur. *Venaesectionem* enim ad causi curationem tunc modo commendat, *si morbi initium, plethorae indicia, inflammationis singularis signa, calor intolerabilis, rarefactio nimia, reuulsio necessaria, symptomata urgentia, neque alio remedio facile superanda, illam exegerint u)*. Atque accuratissimus magni hujus viri Commentator van SWIETEN, bene memorat, Medicos etiam veteres, utpote qui pro biliosa febre illam habuere, parum aut vix quid venaesectioni hujus in febris sanatione tribuisse, licet in aliis multum ex illa commodi sperauerint v). Praeter alios autem in primis quoad hanc doctrinam laudandus videtur praestantissimus TISSOTVS, qui pluribus ex rationibus experientia perpetua confirmatis noxas facile graues ex venaesectione in biliosis febribus, praesertim ubi manifestius putridae simul fuerint, accurate exposuit w); licet merito etiam ejusmodi complicationem admiserit x) ac bene descripserit y), ubi plethora vera, et inflammatoria sanguinis dispositio, et ex impactu alicubi sanguine metuendum nec alia ratione auertendum

u) BOERHAAVE aphor. de cogn. et cur. morb. §. 743.

v) Comment. T. II. p. 496.

vv) Diff. de febr. biliosis p. 121 et seqq.

x) Ibid. p. 147. seqq. et Avis au peuple §. 241. p. 268.

y) Lettre a Mr. ZIMMERMANN sur l'Epidemie courante.

dum periculum, sectionem venae postulare soleant. Optime cum his plurimorum quoque aliorum monita, observationi accuratiori innixa consentiunt, quorum fatis multa ipse TISSOTVS adduxit, quibusque plura superaddi facile possent. Sic et ill. PRINGLE, de biliosis scribens febribus: *When the Fever of the Marshes is of an ardent Kind, it may seem to require large Bleeding; but in general as the Humours have here a more putrid Tendency than common, this Disease admits less of Bleeding than the Camp-Fever, in which by frequent and great Colds the Blood becoming Sisy fixes the Inflammation* z). Eo autem inprimis redeunt venaesectionum in biliosis febribus, in grauioribus maxime, noxae, quod rapiendo ad sanguinis massam bile plura spastica excitet vel augeat symptomata, majori humorum putredini ansam praebeat, aestum cum imminutis viribus facile auctum sistat, animi deliquiis, deliriis, soporibus proniores aegros reddat, coctionem inde quoque turbet, crisinque difficiliorem efficiat, immo et aliquando arti cuius insuperabilem statum producat. In ejusmodi ergo febribus spontaneas arcere haemorrhagias maxime conueniet, quod ipsum diluente inprimis acidulo potu, et antiseptiis diureticis, blandisque, prout indicantia postulauerint, primas vias sensim expurgantibus remediis, dein vero etiam tonicis atque diaphoreticis antiseptiis peragi posse, experientia toties comprobauit.

C 4

§. XIV.

z) *Observ. on the Diseases of the Army Part. III. Cap. 4. p. m. 208.*

§. XIV.

Neque iis in putridis febribus, quas, cum a corrupta biliosa in primis viis colluie illas minus pendere animaduertamus, a biliosis merito distinguimus, quibusque *synochi putridae* nomen melius, ac illud *malignae febris*, (licet summi inter Anglos viri hanc vocem ita nunc sumant,) conuenire censemus, veri quid commodi ex venaesectiōe, absque sollicita cautione institutae, vel ad arcendas tollendasque haemorrhagias spontaneas, facile nociuas, vel quoad reliquam vniuersam curationem, expectandum existimamus. Etiam si enim rationes mittendi sanguinis his etiam in febribus occurrere, faustique euentus detractam satis tempestiue abundantiam insequi possint, quum et plethora incrementem foueat putredinem; non solum tamen ipsa saepe his in febribus obseruata pronitas ad haemorrhagias, etiam deficiente omni plethora ex feruido nimis ac dissoluto sanguine oriundas a), sed perniciosus etiam ille, qui non raro institutae ex probabili ratione venaesectiōi successit, virium vitalium languor, cum deliriis, sopore, stupore, conuulsivis affectionibus saepe et facile coniunctus, mortemque vel summum aegrorum periculum intulit, satis probant, non nisi summa cautione ad auertendas haemorrhagias artificialem sanguinis detractiōem adhibendam, eidemque tunc etiam

a) Conf. van SWIETEN *Comment. T. II. p. 421.*

etiam soli parum confidendum esse *b*). Etsi ergo probe semper obseruandi quorumuis hujus generis morborum genius et complicatio sint, quibus maxime differre illos constat, medendique secundum indicantia methodus varia saepe requiratur; praecipua tamen curationis pars, et ipsis aduersa spontaneis ex tenuitate ac feruore sanguinis oriundis haemorrhagiis, plerumque, praemissis, ubi opus, primas vias expurgantibus, iusto continetur usu antisepticorum, tum acidorum, et spiritus inprimis vitriolici, tum incrassantium et quodammodo adstringentium, vt potus frigidi *c*), corticis Peruvian, aluminis, succi catechu, tum et ipsorum subinde excitantium cardiacorum, et ex his praesertim vini boni subacidi et austeri, tum aptorum denique diaphoreticorum, in primis camphorae radicisque serpentariae Virginianae *d*).

§. XV.

Supra etiam spasmodicas congestiones ad haemorrhagiarum sponte contingentium causas retulimus, et experientia omnino satis manifeste constat, illas etiam subinde absque indiciis vniuersalis

C 5

nimiae

b) PRINGLE *on the Diseases of the Army* P. III. Ch. 7. p. 307.
HUXHAM oper. T. I. p. 329. T. II. p. 105.

c) van SWIETEN *Comment.* T. II. p. 422.

d) De his conferri praeter alios merentur HUXHAMVS, PRINGLIVS, MONROVS, TISSOTVS.

nimiae vasorum plenitudinis *e*), in febribus variae indolis locum habere. Plura facile affectionum genera, quae spasmodicarum constrictionum efficacia sanguinem ad interiora atque certam ad partem depelli, et in arteriis collectum majori actione ad extrema illarum cogi, designant, febrilesque haemorrhagias, praecipue illam narium praecedunt et comitantur, ipsum apud HIPPOCRATEM reperire licet, hodiernae experientiae etiamnum plane consona. Ita enim horroris sensum *f*), tumidaque dura et dolentia praecordia *g*), eademque palpitantia *h*) et lumborum orisque ventriculi dolorem *i*), neque minus dolorem ceruicis cum tensionis sensu *k*) et capitis grauitatem *l*) et venarum in temporibus pulsus cum facie bene habita *m*), saepissime sanguinis ex naribus profluuium praesertim in febribus acutis praenunciare idem docuit. Neque ipse praetermisit quodammodo similes, quae alias haemorrhagias praecederent, spasmodicas affectiones memorare. Pluribus communes esse frequens docet ob-

e) Memorabile propterea et hoc respectu dictum illud Hippocraticum est, quod experientia saepe confirmauit: *Qui in febribus ad contactum nullum ardoris sensum prae se ferunt, phrenitici fiunt, iique magis si sanguis fluxerit.* Coac. 228.

f) Coac. 24 326. Praedict. I. 134.

g) Coac. 280.

h) Praedict. I. 144.

i) Coac. 306. 307.

k) Coac. 555. Praedict. I. 135.

l) Praedict. I. 135.

m) Coac. 128. 142.

obseruatio horrorem in vniuerso corpore, tensionis et strictionis in hypochondriis et in dorso sensum, anxietatem, aluum obstructam, pulsumque contractum ac duriores. Non autem solum in fatalibus criticis aut leuantibus haemorrhagiis, sed in istis etiam, quae discrimen aegrorum augere videntur, molimina illa naturae, spasticas excitantis congestiones, animaduertimus. Solent enim et haec saepe stillas comitari perpusillas, plerumque malas *n*); variisque causis et alias proritantur, vbi copia effluentis sanguinis periculum inferre valet, et vbi potius optandum foret, neque congestiones illas neque haemorrhagias fuisse subsecutas. Ex iis vero, quae antea exposuimus, facile apparet, eo plus hisce ex affectionibus spasmodicis metuendum esse, quo grauius illarum plures simul aegrum infestauerint, quo minus diminuendae plethorae adsit ratio, quo certiora praesentis colluuii biliosae, praesertim putridae, indicia reperiantur, quo magis jam increuerit putrida sanguinis dissolutio, quo magis depressae jam sint, quae pulsu et calore innotescunt, aegri vires, quo magis denique perturbatae fuerint, sine plethorae, inflammationum, colluuii biliosae, quae originem forte praebere malo possent. signis, neruosi systematis functiones. Quum tamen omnino exempla occurrant, vbi leuamini et ipsi crisi ita excitata haemorrhagia inferuiat, vbi et nihil periculi plane ipsis in spasticis meli-

moliminibus animaduertatur, integerrimaque subsequatur saepe valetudo, non semper quid suscipiendum existimamus, quo futura illa eruptio praepe-
diatur, aut praesens breui tollatur. Subinde vero etiam nimium, qui instare videtur, fluxum, nonnunquam et omnem, auertere utique ex re erit, pro varia morbi aegrique conditione. Et ipsi quidem venaesectioni locus esse poterit, vbi abundantia vere adfuerit, et ex causarum numero esse reperiatur, aut nimis valida congestio fuerit, ac detractio nihil detrimenti minetur. Alias optima erunt auxilia, quae spasmos tuto leniant ac tollant, et liberum sanguini per vasa, quae contracta fuerint, progressum restituant. Salutariter tunc saepe, vbi per vias corporis superiores exiturus sanguis fuerit, pediluua tepida, clysteres emollientes, lenes artuum frictiones adhibendo, HIPPOCRATIS imitamur consilium, *quae perfrigerata sunt, praecipientis, excalescere oportet, praeterquam quae sanguinem profundunt, aut sunt profusura* o). Magna etiam nitri, frequentius et maiore dosi exhibiti, atque subfrigidi et subacidi potus efficacitatem, vbi modo potentiora non postulauerit putrida dissolutio, plane compertissimum habere licet. Multum quoque commodi a selectioribus antispasmodicis et anodynis, morbi genio et aegrotantis integrae dispositioni accommodatis, ex F. HOFFMANNI p)
plu-

o) Aph. 19 Sect. V.

p) Med. Syst. T. IV. P. II. p. 17. §. III. Conf. Cl. TRALLES
Ufus opii Sect. II, cap. I.

plurimumque consilio expectari poterit. Insigni praeterea praesidio erunt aluum blande ducentia et purgantia, dum hanc viam ipsa natura, docente cum HIPPOCRATE *q)* experientia, sponte cessantibus haemorrhagiis, affectare saepe solet, et, quae mali originem perfrequenter fouet, acris praecordiorum colluuiis, laudato etiam F. HOFFMANNO *r)* bene monente, hac ratione aptissime expellitur, nisi forte materiae satis mobilis grauior ad superiora orgasinus, spasmis antea sedatis, atque corpore quoad reliqua etiam bene praeparato, emeticum mite praefereendum postulet. Caeterum nec omitendum hoc loco esse, vbi quis viscerum infarctus animaduertatur, commodorum deobstruentium, et cum debilitas viscerum aut neruorum remanserit, roborantium medicamentorum, corticis praesertim Peruuiani, vsum, quisque rationalis indicationum doctrinae haud ignarus facile perspexerit.

§. XVI.

Tali autem modo, sanguine satis detracto, aliisque, quibus opus, auxiliis subministratis, etiam leuantes, forsitan et criticae haemorrhagiae nonnunquam plane impediri vel, vt minores atque moderatiores succedant, effici poterit. Nihil tamen inde metuendum erit noxae, vbi varia incommoda
spem

q) Quibus per febres sanguinis copia undecunque eruperit, in refectionibus his alui humectantur. Aph. 27. Sect. IV. Coac. 153. 355.

r) L. modo cit. p. 18. §. V.

spem salutaris haemorrhagiae probabilem fecerint, tutiorque modo, quam si haec ipsa expectetur, quia nempe quodammodo dubius quoad illam euentus est, et ipse fluxus nonnunquam plane non, aliquando vero non nisi post grauiora, incremente sensim morbo, exorta symptomata, subsequitur, ad probatorum indicantium normam aegro subueniatur. Haec enim animaduersio non solum ad haemorrhagias pertinet, sed etiam ad reliquas euacuationes leuantes et criticas, de quibus nimirum valent ea, quae in allegata dissertatione Cl. BRAWII s) ex ill. PRAESIDIS sententia, monita sunt: *Nemo non optabilem habuerit morbi sine ancipiti illa perturbatione critica progressum, quam nempe varia ratione crisis mala, atque naturae oppressio sequi potest; sed quo exactius pleniusque memorata et plura certius cognita impedimenta remouere studeamus, eo minus irritamenti eliminandi naturae relinquemus, quod negotium illi facessere possit.* Similiter de haemorrhagiis pariter ac de aliis cresium speciebus pronunciat ill. ANTONIVS de HAEN t): *Vbi quis cum Hippocraticis Sydenhamiana et Boerhauiana conjunxerit, scilicet venesectiones crebriores, medicamentaque et plura et efficaciora adhibuerit, interea dum ab Hippocraticis ne latum unguem discedat; ille videtur in suis aegris ejusmodi perturbationes habiturus variores.* Etsi vero etiam salutare forte quodam respectu futuras in mor-

s) §. IV. p. 14.

t) Rat. med. Parte I. Cap. IV. pag. 70.

morbis haemorrhagias, dum illarum causas, quae praeter naturam occurrunt, morbi genio et aegri naturae conuenienter tollamus, anteuertere consultum putem, non tamen, vti supra jam monitum fuit, in naturalibus aut consuetis narium, haemorrhoidum, maximeque menstruum fluxibus, qui moderate se gerant, idem tentandum existimo. In his enim, si recte enueniant, istae supra positae prauitates plethorae criticaeque pericula, aut ex humorum, viscerum et nervorum vitiis oriunda discrimina, timenda non sunt: et vita sensuque praedita corporis natura tempus ac modum euacuationis saepe rectius inuenit, quam ipse Medicus vel peritissimus hariolari potuerit. Quodsi difficultates existant, quae tales fluxus remorentur, aut si iidem vel nimis parce vel nimis copiose fluant, aut si qua simul alia plethorae valetudinem laedentis fuerint indicia; tunc etiam ante vel inter naturales haemorrhagias venaesectionibus aliisque, quae praesens rerum conditio ad promouendos vel minuendos fluxus postulauerit, secundum principia exposita, locum dari, facillime perspicitur.

§. XVII.

Quoad instantes etiam haemorrhagias, quas salutares fore augurari licet, aliquando praeterea contingere notandum, ut non amplius conueniat missione sanguinis, aliisque auxiliis, ejus fluxum spontaneum auertere, vel quia jam firmiter certae
parti

parti impactus est humor, vt non aliter nisi cum tempore materiam et vias praeparando solui educique possit: vel quia jam in procinctu stat haemorrhagia: vel adeo jam prorumpit. In hoc enim statu venaesectionibus institutis, partim nihilo minus fit haemorrhagia, et vires duplici fluxu nimis consumuntur, partim verendum est, ne ex ea quam natura selegit via iusto parcius fluat, vel ibidem ex toto intercipiatur, et sic in affecta illa parte sanguis inhaerens, aut ejus aliquid, restet, quod perniciem, aut certe grauem noxam afferat. Quod autem humor certo loco paulatim aliquando fortius affigatur, qui deinde solutis viis profluat; ex eo cognoscendum videtur, quia criticae haemorrhagiae certis demum temporum interuallis prodeunt, postquam sanguis coctionis, quae dicitur, apparatu maturus ad exitum redditus est. In principiis autem morborum sanguinem non ita fixam occupare sedem, sed patientiorem habere per venas reditum, qui vero postea impeditior fiat; inde scire licet, quoniam congestionibus tunc occurrentibus transitoriae magis causae, quibus non difficulter saepe medemur, ansam praebent, sanguinisque in minora vascula violentae penetrationi tum illius non ita multum prouecta resolutio, tum in his adhuc praesens majus robur obesse facile potest. Ergo, si hoc jam praeteriit tempus, et criticus sanguinis fluxus sperandus est; id saltem, si opus est, agere oportet, vt caueatur, partim, ne tardior minorque iusto fiat;

fiat; partim, ne modum excedat. Ne nimis diu differatur crisis, neue, pauco tantum sanguine per eam proeunte, reliquis intus maneat; opus est, vt liber, expeditus, ac placidus humorum per vasa motus sit; sic enim ad destinatum criseos locum promte mouebuntur. Quam quidem ad rem necesse est, vt sanguis satis dilutus temperatusque sit, partes, per quas mouetur, et ad quas tendit, satis laxae, agitatioque humorum ac tensio fibrarum, praesertim in loco vbi sanguis profundendus est, satis moderatae sint. Conferunt itaque hoc etiam fine, quae corpus humectant, quae aestum temperant, quae spissum sanguinem attenuant, quae vias aperiunt, quae spasmos grauiore soluunt. Quamuis enim spasticis motibus ipsae salutares haemorrhagiae excitari quoque soleant, illos tamen leuiore modo probamus, grauiore enim spasma, vel impedire bonam excretionem, vel etiam haemorrhagias immoderatas, vel incongruas excitare facile poterunt. Ad spasmos vero leuandos, quae maxime valeant, siue externa, siue interna, jam antea innuimus, et nunc modo addimus venaesectiōni etiam, licet ea jam non amplius haemorrhagiam auertere queat, tamen aliquando adhibendae locum esse, nempe tum ad praecauendam nimiam haemorrhagiae vehementiam, tum quoque ad promouendum moderatae haemorrhagiae faciliorem successum. Quod ad immoderatum sanguinis fluxum attinet, qui quidem in criticis haemorrhagiis raro

timendus est; ille iisdem, quae secundum proposita causas excedentis fluxus tollunt, saepe caueri, et ubi jam adest, minui vel quoque fisti poterit. Aliquando tamen ad proprie sanguinem sistentia externa quoque confugiendum, quibus autem recensendis, quum in generali themate versemur, nunc abstinemus *u*).

II.

Differtatio de coctionis atque criseos in febribus impedimentis, variisque noxis inde oriundis. Publice proposita Gott. 1768. Resp. GERH. MATH. FR. BRAWE, *Hannouerano*.

§. I.

Et si equidem ad omnis morbi sanationem ipsius naturae efficacia salutaris necessaria sit, in morbis tamen praecipue febrilibus istae vires, ratione peculiari, ad perficiendam alienae febrimque cientis materiae separationem, per sic dictas coctiones et crises manifestius actuosae, ac ad morbos hosce deuincendos valentiores, deprehenduntur. Quod ipsum prouti perpetua medentium obseruatione quam euidentissime constat, ita nec mirum, a

viris

u) Conferri de his meretur cel. TRALLES *Vsus opii Sect. II.* p. 18. 19. 27. 39. 49. 50.

impedimentis, variisque noxis inde oriundis. 51

viris optimis, accuratiori edoctis experientia, ipsam febrem pro singulari et fausto saepe salutis praesidio haberi. Hancce laudem febribus quoque veteres artis nostrae principes passim asseruere, et qui vestigia HIPPOCRATIS tam sollicite secutus est, febrium praesertim sollertissimus aequae observator, ac domator felicissimus, diuus ille SYDENHAMVS, febrim ipsam *naturae instrumentum* vocat, quo *partes impuras a puris secernat a)*; et alibi, *solemnem dicit naturae machinam, qua tum in praeparanda tum in eliminanda materie quavis inimica in sanguine latente praecipue utitur b)*. Verum tamen haud minus certo, nec minus euidenter observando constitit, quam saepissime naturam suam in operatione ita impediri, ut vel a justo tramite deflectat, vel a materie oppressa fatiscat, vel etiam ad agendum nimis illam stimulari, ut aptos excedat vehementiae suae limites. Hinc est, quod multa quoque apud auctores optimos legantur febrium vituperia, quorum amplum catalogum recensuit de febrium doctrina quam praeclarissime meritus b. WERLHOFIVS c). Sed quamvis permagna plurimaeque febrium pericula diffiteri nemo facile ausit, dubitari tamen vix poterit, cum vere jam excitati sunt febriles illi motus, et ubi modo satis potentes, neque tamen nimis vehementes, ratione devincendae causae, fuerint, neque

D 2

vllum

a) Opp. uniu. S. I. Cap. IV. edit. Lugd. 1754. pag. 62.

b) Diss. epist. ad GVIL. COLE, opp. uniu. p. 363.

c) Caution. med. Tract. I. p. 50. seqq.

ullum etiam adfit, quod moderatae illorum actioni obfit, impedimentum, neque talis simul corpori conditio inhaereat, aut in illo excitetur, quae finistris ab istorum natura et ordine alienis motibus ansam praebet, eam utique illorum indolem esse, ut ad subigendam et eliminandam illam, quae febrem effecit, materiem, si non omnem, aliquam tamen ejus partem, inferuiat. Licet ergo cum ASCLEPIADE, febre ipsa praecipue ad remedium febrium utendum esse *d)*, existimemus, amplissimum tamen arti locum esse contendimus, ad moderandos atque dirigendos motus febriles, et ad arcenda salutaris illorum efficaciae impedimenta. Et horum quidem postremum, primarium et summum habere in febrium curatione momentum eo minus dubitamus, quo clarius patet, proficua plurima ad illud ipsum tendere artis auxilia, etiam quae ad moderandos ac dirigendos motus febriles capiuntur, consilia eo plerumque spectare, ut facilior, integriorque succedat febrilis materiae exterminatio, et quo rarius in id, (quod nempe unicum haud semper commode ad idem caput retuleris) intendere opus est, aut expedit, ut naturae viribus ipso in acutarum decursu roborantibus, vel nutrientibus succurras. Haec ipsa quum meum de argumento speciminis inauguralis eligendo meditantem subirent animum, operae pretium fore existimaui, si, quoad pro virium tenuitate liceret, de impedimentis tractarem,

quae

d) CELSVS *de medic. Lib. III. Cap. IV. p. 118. edit. ab Almel.*

impedimentis, variisque noxis inde oriundis. 53

quae salutarī naturae virium in febribus acutis efficaciae obstant, atque noxas inde metuendas exponerem; ad ipsa non ex instituto transiturus artis praecepta, quae ab hisce periculis aegrum tutiorem praestare, aut ab iis quoque felicius illum vindicare doceant.

§. II.

Quae vero ad febres proprie pertinent naturae in salutem aegri actuosae, conamina, si vſitatis artis nostrae terminis exponantur, in crudi coctione, coctique critica excretionē, vel ejusdem ex humorum circulo separati ad corporis certa loca depositione consistunt; hisque merito quidem varia, quae in morborum decursu natura sibi parat leuamina accensentur, quamuis haec ex parte minus proprie motuum febrilium effectus habeantur. In tradendis, quae experientia doceat, cruditatis, coctionis et criseos signis multi sunt scriptores veteres, horumque in primis antesignanus HIPPOCRATES, et post hos quoque complures illorum vestigia et exempla secuti e), vt ergo minime habeamus, quod in hisce colligendis et repetendis prolixi simus. Coctio ista febrilis πεπασμός Graecis plerumque dicitur, notante enim GALENO πέψις ἐς τῶν παρὰ φύσιν, ὁ πεπασμός τῃ νερήματος f), aptiusque cum

D 3

Dv-

e) Conferri ex his merentur imprimis THOM. GLASS commentariū de febribus ad Hipp. discipl. accomm. II. et III.

f) Comment. in Lib. I. epid. HIPPOCR.

DVRETO *mitificatio* g), aut potius cum aliis *maturatio* verteretur. Bene illustravit EROTIANVS hujus vocis HIPPOCRATI vsitatam significationem, in-
 quiens: Κυρίως μὲν ἐπὶ τῶν ἀκροδύων εἰρηται, ὅταν
 ἐξ ὠμότητος πέπειροι οἱ καρπὸι γίνωνται, καταχρη-
 σικῶς δὲ καὶ ἐπὶ τῶν ἡμετέρων σωματῶν, ὅταν οἱ
 χυμοὶ πεπανθῶσι. Vix autem melius coctionem
 hanc febrilem definiueris, quam illustr. van
 SWIETEN verbis, maturationem nempe illam
 esse, per quam febrium materialis morbi causa sic
 mutetur, vt minus noceat, et apta euadat, vt ex-
 purgari commode possit h). Notae autem coctio-
 nis omnium maxime ex vrinis, non raro etiam e
 sputis, nonnumquam et ex alui dejectionibus et
 vomitionibus, etiam ex pulsu et ex reliqua solido-
 rum conditione desumuntur i). Quoad igitur hae
 notae adhuc defecerint, *cruditas* adesse dicitur k).
 Liberantur autem a febribus aegri superstites varia
 ratione: aliquando nempe insensibili modo, ple-
 rumque vero, excretionum ope, sponte oborta-
 rum, signis coctionis praegressis, et saepe quoque
 post similia signa per abscessus. Primum ex his mo-
 dum aliquando locum habere clare docuit ipse
 HIP-

g) *Comment. in Coac. HIPP. p. 9.*

b) *Comm. in BOERH. Aph. T. II. p. 49. 50. conf. quoque BOER-
 HAAVE instit. med. §. 926-928.*

i) *Conf. PROSPERI ALPINI de praesag. vita et morte L. VI. C. I.
 Etiam elegantem Diff. CORN. ALB. KLOEKHOF de crisibus,
 in opuscul. med. p. 200.*

k) *Conf. BOERHAAVE instit. med. §. 925.*

HIPPOCRATES, dum *fuisse* refert, *quibus febres nulla observata judicatione desinerent l)*. Et praestantissimus quoque SYDENHAMVS idem testatur, *dari quasdam febrium species*, inquit, *quas natura methodo sibi peculiari, sine visibili aliqua euacuatione, ablegat, reducendo scilicet in sanguinis massam, eique adsimilando materiam illam morbificam, quae cum eodem minus quadrabat m)*. Praeterea tamen ipsis veterum ex monumentis et multis recentiorum observatis utique satis constat, fieri posse, ut perfecta coctione, longe grauior fiat aegri conditio, dum symptomatum numerus et vehementia fere subito increfcit; et huic perturbationi vel euacuatio largior aut abscessus, quibus febris plane tollitur, sanitasque restituitur, succedant, vel mors quoque subsequatur; verumtamen haud minus certo quoque compertum habetur, interdum contingere, ut magnam ejusmodi mutationem passi non statim sanentur, neque subito moriantur, sed modo melius vel deterius nunc sese habeant. Atque tales repentinas in morbis febrilibus per ipsam naturae efficaciam productas mutationes Graeci plerumque *crisin* dixerunt n). Subitam vero morbi ad sanitatem conuersionem *crisin per excellentiam* dici voluit GALENVS, tunc vero *imperfectam* vocauit, ubi non penitus ablata fuerit febris caussa materialis, sed morbus vel mi-

D 4

nori

l) Epid. L. I. Lind. T. I. p. 656. et 660.

m) Opp. Sect. V. C. II. p. m. 226.

n) GALENVS in Comment. ad aph. XXIII. S. II. et comm. 3. in progn. HIPP.

nori gradu pergat, vel remanens materia recidiuæ aut alii morbo ansam praebeat. Memoratam praeterea subitam febris ad mortem vel in deterius mutationem ubi criticam perturbationem subsecuta fuerit, *crisin malam* ipse nominare solet o). Sollicite autem a mala crisi distinxit GALENVS alios modos, quibus ad mortem vel in deterius transire status aegri posset, morbi aequae initio ac eodem vigente p); ubi eo respexit, quod ad illam aliqua etiam coctio, vel ei saltem analoga in humoribus mutatio, simulque manifesta naturae efficacitas, licet sinistre operetur, necessaria sit. Vbi grauior perturbatio in febre circa vigorem non contingat, subsequentem in melius vel deterius morbi mutationem voce *crisis* non insigniendam existimauit GALENVS, atque tunc febres tantum *solui* docuit q). Hanc autem vocem pro generica sumit, quae crisin ipsam comprehendat, siquidem κρίσιν quoque explicet per τὴν ὀξύρροπον τῆς νόσου λύσιν r). HIPPOCRATES autem magis promiscue voce κρίσις vsus est, quippe qui etiam, ubi sine magna quadam perturbatione, et lentis gradibus, repetitisque euacuationibus, aegri febribus absoluntur, hos quoque *judicatos* in historiis aegrotorum pronunciauit s). Quid? quod hic ipse generalius etiam definiuerit

crises

o) De crisisibus L. III. C. I. et II.

p) Ibid. C. IX. et X.

q) Ibid. C. IV.

r) De crisi. Lib. II. C. VII.

s) P. I. et III. Epid.

crises t), *judicari in morbis*, dicens, *est, quum morbi augeſcunt, aut marceſcunt, aut in alium morbum tranſeunt, aut deſinunt.* Alibique u) *judicationem ſimpliciter dixit eſſe morbi ἀπόλυτον.* Quum ergo in grauioribus quoque febribus, HOLLERIO jam bene notante x), *apud nos varius incidant repentina illa et perturbationis plena iudicia, quas κρίσεις proprie appellari voluit GALENVS, ſaepius autem exſoluantur alternantibus coctione et excretionibus, nonnumquam et intercurrentibus vel ſubſequentibus abſceſſibus; omnino etiam aptiſſime huius generis benigniores, et frequentius occurrentes febrium ſolutiones judicationum haberi ſpecies poterunt, ita quidem vt criticarum cognomine illas excretiones et abſceſſus coctioni factae reſpondentes, diſtinguamus.* Optime quoque notauit CORN. ALB. KLOECKHOF: *ad pellendam nunc coctam morbi materiem quae ſanguini miſta fuit, aut vaſis haeret, varius vno egeſtionis genere, vel abſceſſu ſolo natura vtitur. Haemorrhagia, ſudor, vrina craſſa hypſtatica, vomitus, alui fluxus, ſi ſolitarie interdum, at ſaepius varie conjuncta, in criſi accedunt y).* Licebit autem ſine dubio quoque ſucceſſiuas ejusmodi excretiones vel abſceſſus in complexu ſumtos pro perfecta aut integra et abſoluta criſi haberi, vbi de morbo ejusque cauſa in corpore nihil remanſerit. Non opus eſt addere, quando

D 5

imper-

t) *De affectionibus C. VIII. Lind. T. II. p. 165.*

u) *Præceptionum C. XII. Lind. T. I. p. 67.*

x) *Comment. in coac. HIPPOCR. p. 398.*

y) *Diff. de criſibus, in opuscul. med. p. 214.*

imperfectam ejusmodi crisin dicendam existimemus. Sed praeterea nunc etiam aliqua *leuaminum* facienda mentio est, quae per excretiones et abscessus vel cujuscumque generis metastases, non critico tamen molimine, contingunt, quum ista sine praecedente coctione accidentia, eo nomine satis apte distinguantur. In ipso nempe morbi acuti initio et primo progressu corpus sese per saepe exonerat materiae morbidae parte, si quando turget; vel humoribus bonis, ubi vel re vera redundant, vel aestus copiae vicem suppleat. Inde hoc morbi tempore vomitus, alui fluxus, haemorrhagia multiplex, forte etiam sudor, aliaque frequentia sunt. Bona ejusmodi euacuatio est, si vitio apta sit, atque morbum extenuet ²⁾, alias inter symptomata morbi crudi recenferi meretur. Pari fere jure nonnumquam exanthemata quaedam et varices, et exterius subortum erysipelas, et articulorum dolor, similia ad leuamina referri possunt, etsi haec varias ob difficultates, quibus haud raro implicata reperiuntur, magna ex parte minus istis sint optabilia. His autem modis alleuata natura coctionem ipsam et crisin facilius expedit, certiusque ad integritatem aegros perducit.

§. III.

2) HIPPOCR. *apb.* S. I. *conf.* THOM. GLASS. *comm.* de febr. IV.

§. III.

Quum ergo , sub moderato motu febrili, ex ipsa naturae efficacia, morbidae, quae febrem incendit, materiae laudabilis maturatio et huic succedens ejus eliminatio expectanda sit, quisque facile intellexerit non nisi in detrimentum aegri cedere posse, vbi salutaria ista naturae molimina qualicunque ratione impediuntur. Etsi enim febres, vt antea jam notatum fuit, sine judicatione sensibili, cum bonis aegrorum rebus, desinere queant, non solum tamen *benigna* ejusmodi *resolutio*, qualem SYDENHAMVS et BOERHAAVIUS a) memorant, rarius longe quam reliqui febrium exitus obseruantur, vt quoque ill. DE HAEN, praxi medica in XXIX, annum occupatus, nec dum potuerit casum talem obseruare b); sed etiam vbi febris illa resolutio contingit, ab actione virium naturae eadem pariter atque ipsa crisis pendet c), pariterque non sine incommodo aegri similes per errores impediretur. Quam raram ill. DE HAEN habeat insensibilem illam et securam febrium terminationem alia occasione repetit, noxasque simul deficientis manifestae judicationis vbique metuendas proponit, addens: *eam ob caussam semper se et praedixisse et euentu confirmasse, aut recidiuas, aut alios morbos, aut mortem,*
si

a) Aphor. de cogn. et cur. morb. §. 595.

b) Rat. med. P. VIII. p. 23.

c) BOERHAAVE instit. med. §. 930.

si casus talis (febris sine quapiam euacuatione desinentis), *obseruaretur d)*. Quod ad ipsa autem attinet coctionis et criseos impedimenta, ea fere infinita esse posse, quisque facile largietur, qui ad summa illorum genera modo leuiter attenderit. Secundum certiora autem obseruata clare liquet, istis naturae moliminibus nonnunquam ipsam obesse febris indolem, ejusque corpori inhaerentes causas, variasque partium singularium affectiones, nonnunquam impedimento esse peculiarem aegro propriam constitutionem, alias quoque potentias eas nocentes quae rebus insunt non naturalibus ad aegri statum minus apte comparatis, vel iisdem, quoad hominum subjectae sunt arbitrio, minus bene administratis; alias denique difficultates oriri posse ex curationis institutae methodo, ad omnes aegri conditiones non satis accommodata. Sed horum omnium accuratior pleniorque expositio, quum non modo maximam verae, vel quae nobis saltem probetur, practicae de curatione febrium doctrinae partem, si non ipsam integram iis morbis medendi methodum, fundamenti loco praemissam, verum quoque dein eidem oppositos quam plurimos, de quibus constat, errores, et quaslibet fausto successui contrarias et aegri et morbi et externarum rerum conditiones declaratas, postulet; vix aliud mihi hic agendum existimo, ne tractatio mea nimis prolixa euadat, quam vt, ex variis istis impedi-

men-

d) *Rat. med. P. VIII. p. 62. 63.*

impedimentis, variisque noxis inde oriundis. 61

mentoribus generibus, nonnulla saltem exempla speciminum loco subministrem.

§. IV.

Magnam omnino in febribus diuersitatem quoad faciliorem vel difficiliorem coctionem atque crisin experientia satis manifeste confirmat. Hac equidem obseruatione maxime nititur peruulgatum discrimen, inter benignas atque malignas febres constitui solitum, quum in illis de faustiori ex omni parte successu, ideoque praesertim etiam quoad integriorem coctionem et crisin, minus quam in his dubitandum sit. Ita quoque simplicioris indolis febres plerumque prae complicatis facilius ex voto terminantur, et ex utrisque imputres ordinariae, tum inflammatoriae tum biliosae, prae putridis, aequae biliosis ac simplicibus, ad bonas integrasque crises magis pronae deprehenduntur. In nervosis autem febribus peculiaris difficultas est coctionis et criseos, quae utpote ad metastases varias valde proclives sunt, et in quibus etiam amplissimus articulus datur, quo naturam subleuetur, viresque excitentur. Speciatim vero haud rarum, difficiliorem fieri coctionem et crisin, ubi sanguinis copia turgeat, neque natura excitato ejus profluvio apta sibi leuamina praestet, nec medicus secundum indicantia, in primis cum phlogistica diathesis adsit, sanguinem mittendo naturae subueniat. Nec forte quis dubitabit, ubi febris cum inflammatione conjuncta

juncta fuerit, grauius et magis anceps fore negotium naturae in perficienda coctione et crisi, cum quae in artis potestate sunt ad resoluendam et auferendam inflammationem non satis apte et efficaciter suscipiantur. Utque haud rarae sunt humorum vitiosae ad primas vias in febribus colluies, quibus vel ex parte natura saepius, fausto cum successu, vomitu aut aluo corpus liberat, sic nequaquam dubitandum, remittente hoc ab opere natura, neque vestigiis ejus insistente medico, quin magis incerti euentus futura sint onere alienae hujus materiae impedita molimina critica e). Lubenter hinc adstipulamur ill. DE HAËN referenti: *Auditorēs suos secum animaduertisse, emetica tunc pulcerrimas edere curas, quando putrida bilis, suis signis conspicua, tumultus crearet: expellere namque illa tum sursum, tum etiam passim deorsum morbi causam; datisque dein mox paregoricis, reliquum morbum et tranquillius tolerari et curari facilius; eandemque ob causam et purgantia auxiliari f).* Neque minus etiam persaepe profundius et

e) Conf. inter alios CORN. ALB. KLOEKHOF, medici maxime Hippocratici histor. febris epid. a. 1741. Opusc. med. p. 58-80. ubi multis contendit, HIPPOCRATEM quoque probare emetica et purgantia, in acutorum initiis et incrementis justas secundum cautiones exhibita. Conf. quoque ejusdem optimi Viri diff. de crisis Opusc. med. p. 190-194. et TH. GLASS comment. de febr. VII. et BAGLIVI epist. de purgat. in principio febrium, Oper. omn. p. 703, seqq. et FREIND comment. de febribus VI. et VII.

f) Rat. med. P. II. C. I. de methodi Hippocr. Sydenh. ac Boerb. praestantia p. 4.

impedimentis, variisque noxis inde oriundis. 63

et firmitus impacta vasculis, glandulis et visceribus haeret aliena et vitiosa materies, cui soluendae, diluendae et mobiliori reddendae ars multum conferre valet, hujus autem intermisso auxilio, omnino difficilior erit naturae efficacitas, in coctione crisi-que ex voto perficiendis. Nemo non optabilem habuerit morbi ad crisin ac declinationem sine anticipiti illa perturbatione critica progressum, quam nempe varia ratione crisis mala, atque naturae oppressio sequi potest; sed quo exactius pleniusque memorata et plura certius cognita impedimenta remouere studeamus, eo minus irritamenti eliminandi naturae relinquemus, quod negotium illi facessere queat. Maxime confirmat hanc sententiam ill. DE HAEN, inquiens: *Si detur conjecturae locus, ubi quis cum Hippocraticis, Sydenhamiana et Boerhaauiana junxerit, scilicet venae sectiones crebriores, medicamenta et plura et efficaciora adhibuerit, interea dum ab Hippocraticis ne latum unguem discedat, ille videtur in suis aegris ejusmodi perturbationes habiturus rariores g).*

§. V.

Speciatim quoque inter impedimenta coctionis et criseos referri meretur, naturae per morbi decursum, et praesertim circa stadium criticum nimius languor, ratione materiae morbidae majori copia praesentis; siue oppressae hac ipsa fuerint, siue aliunde in febre attritae et consumtae istae vi-

res

g) *Rat. med.*, P. I. c. IV. p. 70.

64 Diff. de coctionis atque criseos in febribus

res aegroti, siue jam ante morbum vndecunque debilior ejus constitutio fuerit. Ita enim fit, vt sola naturae vi materies illa resolui, atque per crisin euacuari satis commode nequeat, quamuis in hocce casu partim per accommodata roborantia, partim per resoluentia et per aliqua etiam euacuantia, viae, ad quam natura vergit, respondentia, persaepe ars ex voto naturae succurrat. Quod vero ad prima ista attinet auxilia, facillime error committi poterit, si talibus a nutrientibus et excitantibus vsum quis sine iusta cautione expectauerit, quae licet sanis et aliis a febre liberis optime conueniant, carnibus scilicet earumque iusculis, ouis, aromatibus, viño, tam facile tamen praesente febre, vel primis in viis in acrem et rancidam materiam degenerant, noxasque praesentis ibidem vitiosae colluiei augent, vel sanguinem in maiorem organum concitant, et symptomatice ejus profluuiis aut sudoribus aut inflammationibus vel aliis ad viscera nobiliora congectionibus, vel systematis neruosi perturbationi ansam praebent. Ipsa experientia non raro hasce graues noxas victus istius nutrientis et roborantis in febribus commendati vel concessi confirmat; quo ergo his in morbis non nisi cautissime vtendum eoque plerumque abstinendum esse, clare docuerunt HIPPOCRATIS, SYDENHAMI, BOERHAAVI, aliorumque maxime salutaria diaetae praecepta *b*).

Pari

- 1) Conf. GLASS de victus ratione in acutis, in comment. V. de febribus, III. VAN SWIETEN comm. in BOERH. aph. T. II. §. 599. p. 100. III. DE HAEN Rat. med. P. I. C. I. KLOEKHOF opusc. med. p. 29.

impedimentis, variisque noxis inde oriundis. 65

Pari fere modo coctioni et crisi facile obicem poni, ac difficilibus variis affectionibus ansam praebere posse non dubitamus, praemature vfu medicamentorum roborantium ac aliquo gradu adstringentium, corticis nominatim Peruuiani, eo nimirum tempore exhibitorum, quo vel materia morbida vltiori adhuc indiget resolutione, motibus ipsis febrilibus, etiam artis auxilio subleuatis, perficienda, vt e corpore satis euacuari possit; vel etiam quo necessaria ejus eliminatio nondum absoluta est, aegri praesertim conditione ita comparata, vt ejus vires hoc ad negotium omnino suffecturas praeuidere liceat. Eo etiam plus difficultatis in crisi, indeque plus noxae ab isto ceteroquin valde aestimabili artis praesidio in febrium decursu metuendum existimamus, quo magis ad inflammatoriam indolem morbus inclinauerit; quo certius adhuc variis leuaminibus natura indigeat quoad minuendam sanguinis copiam, quoad ejiciendam e primis viis colluuiem, quoad educenda e pectore sputa; siue haec ipsa sibi sola sit praestitura, siue artis adjumento ad eadem excitanda sit: porro etiam quo magis assidue ad vigorem cum signis coctionis properauerit morbus, siue continens, siue continue remittentis fuerit indolis. *Nonnulli, refert BAGLIVVS, in hisce casibus (variarum nempe febrium inflammatoriarum et mesentericarum) solent more solito chinam chinae praescribere, quo autem cum successu, pluribus in locis hujus operis animaduerti; nam hoc remedium impuro*

corpore dare, saepe in aegroti perniciem vertitur i). Nec dispar huic SYDENHAMI fuit sententia, asserentis, in peste, atque epidemicis continuis, debellandis, non alios effectus ex usu corticis Peruviani expectare licet quam eos, quos hodie in pleuritide, peripneumonia, angina, ac id genus febribus inflammatoriis videmus, quibus non tantum non prodest, sed et plane obest k). Nostrum autem hic non est conditiones exponere, intermittentium, aliarumque febrium, quarundam nempe remittentium, et putridarum, et nervosarum, quibus saepissime idem cortex alia inter praestantissima quoque est medicina.

§. VI.

Pari jure ac roborantium abusum, etiam omnino ad coctionis criseosque impedimenta referre licet justo largiorem et praeter indicantia et absque necessaria cautione, susceptam eorum quae vires infringunt, motusque febriles minuunt, administrationem. Certo satis constat, ejusmodi dari febres, acutas etiam, quae nullam ferant sanguinis missionem sine majori, et nonnunquam evidentissimo aegrorum periculo; aliquando etiam tales occurrere, in quibus hoc auxilii genus per aegri plures

i) Opp. omn. edit. Lugd. p. 58. conf. p. 740.

k) Epist. resp. ad ROB. BRADY, opp. univ. p. 317. Exactissime quoque suis observatis idem ipsam confirmarunt b. WERLHOF obs. de febr. S. II. §. V. p. 50. 51. CLIFT. WINTRINGHAM comment. nosol. p. 138. Qu. 54. et HVXHAM opp. T. I. p. 299. multique alii celebres Viri.

impedimentis, variisque noxis inde oriundis. 67
res affectiones, aestum vehementiorem, pulsum
magnum ac durum, respirationem difficilem, prae-
sentia inflammationis indicia, requiri videatur,
idemque tamen ubi adhibetur, vere grauiorem red-
dat morbum, crisinque impediat. Pertinet huc
monitum HIPPOCRATIS: *Lateris dolores in febris,*
leuiter firmatos, et absque significatione, venae sectio
laedit, siue cibum auersetur aeger, siue sublata praecor-
dia habeat l). Et vel ipsa ex febre diuus idem
Auctor nonnunquam rationem omittendae consti-
tuit venae sectionis *m).* Facile MARTIANO, Hip-
pocratis optimo commentatori, huiusmodi febres a
biliosa primarum viarum colluue deriuanti assensum
praebuerit, qui aliis etiam a praestantissimis practi-
cis hoc ipsum obseruatione confirmatum deprehen-
derit. Ita enim et BAGLIVVS, *sciendum est, ait,*
pleuritidem aliquando purgatione tolli debere, etiam in
principio morbi, sed non inflammationis causa, verum
ratione materiae morbosae magna copia primis viis con-
gestae ac pleuritidem immediate producentis, et quotidie
fouentis n). Exemplum quoque necessariae in phle-
botomia administranda cautionis in ipsius febris ar-
dentis curatione haberi potest, febris illius, in qua

E 2

sum-

l) Coac. n. 491.

m) Epid. L. II. S. V. Lind. T. I. p. 706. 707.

n) Opp. omn. p. 40. Conf. etiam, quae ipse allegauit ex BALLONIO,
p. 41. ipsaque BALLONII dogmata opp. omn. T. IV. ed.
TRONCH. p. 293. et ill. TISSOTI Diff. de febr. bilios, et ejusd.
Lettre a Mr. ZIMMERMANN sur l'epid. cour.

68. Diff. de coctionis atque criseos in febribus

summo incendio corpus extorremi dicitur o), quam vero et ipse HIPPOCRATES bile commota excitari docuit, et qua biliosos homines promptius prehendi adseruit p), adstipulantibus praeter alios celeb. GLASS q) et ill. PRINGLIO r). Minus certum vero auxilium, immo et noxam facile afferre venae sectionem, vel in primis diebus hujus febris administratam, ipse quoque ill. v. SWIETEN sapienter monuit s), licet inflammatoriam hujus febris indolem esse, antea cum BOERHAAVIO satis clare statuerit t). Praeterea quoque et alia dantur artis adminicula subinde vtilissima, quae tamen sine justo indicante adhibita, praeter alias noxas et vires infringunt, atque hac etiam ratione coctioni et crisi obesse possunt. Merito huc emetica pertinent atque purgantia, vbi mobilis non adfuerit, quam his ejicere conueniat, materies nociua, vbi nec ratione plethorae, inflammationis jam praesentis aut facile metuendae, aluique durioris aut suppressae corpori antea prospectum fuit, et vbi excretio cieatur impetuosior aut justo frequentior, et vbi nec potu satis alleuetur. Sed vfitatissimis etiam in febrium curatione medicamentis antiphlogisticis, si ultra, quam

o) LOMM. *observ. med.* p. 6.

p) *De morb.* L. I. c. XII. et XXVII.

q) *Comm. de febr.* p. 98 - 180.

r) *Observat. on the Diseases of the army*, P. III. ch. 4. edit. in 4. p. 180.

s) *Comm. in BOERH, aph.* T. II. §. 743. p. 495 - 497.

t) §. 742.

impedimentis, variisque noxis inde oriundis. 69

quam febris postulauerit, illis vtaris, acidis praefertim et nitro, coctrices febrium vires infringi, ipsaeque crises difficiliiores reddi poterunt. Praeter alios, optime hoc etiam notauit Io. FREIND, qui, postquam pessimum fudoriferorum abusum damnauerat, haec addit: *Est et alia huic diuersa insania, quam insaniunt nonnulli, quorum in acidis posita est omnis curatio, quique spem nullam nisi in aceto aut pomorum agrestium succo collocant, quasi, quia nefas sit aegrotum comburere, ideo protinus frigore enecare oporteat u*). Qui autem leuiorem febrem, in primis ex neruosarum genere, et quamuis aliam, cuius mitior indoles fuerit ratione copiosioris morbidae materiae, multis ejusmodi refrigerantibus aggrediatur, simili fere modo ac detracto nimium sanguine nocebit, spasticis affectionibus facile ansam dabit, motibusque hinc salutaribus aequae leuantibus atque criticis obicem ponet. Bene ideo monuisse existimo PROSPERVM MARTIANVM, licet equidem integram ejus theoriam amplecti nolim, *medicamentorum, inquentem, refrigerantium usu, propter febrim incrasatis humoribus corporibusque densatis, spontaneae euacuationes saepe prohibentur, vt haec non sit leuis causa, cur nostris temporibus tam raro fiant crises, quae frequentissimae erant antiquis.*

§. VII.

Porro nec ulli dubitationi locus est, quin artis quaecunque molimina, insensibili perspirationi efficacius adaugendae, et magis etiam illa prouocando sudori destinata, quam facillime faustis coctionis criseosque successibus obesse queant. Siue ad aestum, qui curationis hac methodo simul augeri solet, respiciamus, quo vehementiori grauissima symptomata vario modo facile excitantur, siue ad alienatam humorum tenuiori parte sic orbatorum crasin, siue ad virium omnium aequae animalium ac vitalium debilitatem, a nimis aucta tenuissimi liquidi per cutim expulsiōe metuendam, fatis ubique momenti deprehendemus, quo illius instituti noxa confirmetur. Hac utique per cutim et pulmones via natura sponte plerumque utitur, antea modo fatis leuata, ubi hoc opus fuerit, ad eliminandam vel omnem probe maturatam febrilem materiem vel insigniorem saltem ejus partem, neque tunc vero et efficaci stimulo facile indiget. Et quamuis omnino quoque fieri possit, ut liberiori perspiratione, et sudore quoque ante coctionem absolutam natura leuetur, obseruante HIPPOCRATE, *sudor optimus quidem est, qui febrem in die judicatorio soluit, commodus autem est et qui leuat iv)*, minus tamen certo de hujus procurandi leuaminis indicantibus constat, quam de rationibus alias per vias aegro salutares ciendi

ex-

impedimentis, variisque noxis inde oriundis. 71

excretiones. Sapienter hinc monuit SYDENHAMVS: *quod ipsa diaphoresis proprie loquendo naturae ipsius sit methodus, qua materiem febrilem foras protrudit, et prae ceteris maxime genuina sit et accommodatissima, quoties natura, suo relicta arbitrio, dictam materiem primum digerat, dein rite coctam per corporis habitum blande expellat, quo tamen dato et concessò, ars nihilominus quantamcunque naturae imitationem prae se ferat, id saltem sibi priuilegii adrogare nequeat, vt febribus per sudores certo exigendis par sit x). Atque certe, si complurium Auctorum experientiae habenda fides, vix vnquam, excepta secundum nonnullos peste aliisque similibus paucis y), ante absolutam coctionem, opus est artis auxilia directe ad sudores, qui leuamini sint, mouendos adhibere, quum vbi futuri sint, sponte suboriri soleant, si modo non impediantur, atque reliqua curatio manifestiora secundum indicantia suscipiatur z). Quam facile vero medicina et regimen ad sudores excitandos commendari solita moderato et salutari febris decursui obsint, apud multos pariter, et quos magna medicinae lumina suspicimus, praeter SYDENHAMVM, isti methodo sudoriferac in primis inimicissimum, BAGLIVVM quoque a) FREINDVM b), HUX-*

E 4

HAMVM

x) In schedula monitor. de nou. febr. ingressu opp. viii. p. 538.

y) BAGLIV. prax. med. L. II. C. XII. §. 4. Opp. p. 233. GLASS
comm. de febr. X. p. 196.

z) KLOEKHOF opusc. med. p. 92. 93.

a) Loco modo alleg. p. 232.

b) In lectu dignissimo comment. de febr. IV.

HAMVUM c), VAN SWIETEN d), DE HAEN e) aliosque plures, propria per observata satis superque confirmatum reperimus. Quoad opiata praeterea et theriacalia, sudoriferorum quoque genere comprehensa, et quae etiamnum vel hoc ipso scopo vel ob virtutem anodynam ad curationem febrium commendata legimus, diffiteri non possumus, illorum usum plurimis in febrium generibus nobis suspectum videri. Libenter abstinemus in febribus inflammatoriis et biliosis ab omni quod orgasinum sanguinis augere soleat. Cauemus in his aequae ac in aliis febribus quae animales vires minuant, irritabilitatem ventriculi et intestinorum infringant atque ideo leuantibus obsunt excretionibus, hisce ex locis alias expectandis. Ab iis merito metuimus, quae majori vasorum capitis pectorisque repletioni anam praebent, atque in delirii vel soporis statum aegrum perducere valent. Satis autem exploratum habetur, ab opiatis in febrium decursu datis ista omnia oriri posse, etsi pro febrium et aegrotantium indole quoque minoris doseos effecta nociua exigui momenti esse queant, etiam ratio adesse possit, quae cautum et prouidum medentem ad usum illorum circumspectum omnino permoueant; attamen ubi quaedam ex damnosis istis affectionibus opii usum insecutae fuerint, non difficulter quis intellexerit,

c) *Opp. edit.* REICHELII T. II, p. 22. 85. 87. 113.

d) *Comment in* BOERH. *apb.* T. II, p. 841

e) *In rat. med. passim.*

impedimentis, variisque noxis inde oriundis. 73

xerit, coctionem et crisin facile inde perturbari, varioque gradu praepediri posse. Placet ideo cel. TRALLESII monitum *f*), quod adducere haud alienum videtur. *Crisis, inquit, est euacuatio cocti non assimilandi, fitque per sputum, per vomitum, per diarrhoeam, per urinam, per sudorem; sed opium suppressit omnes excretiones excepto sudore, atque observationes practicae abundant infaustis exemplis salubrium illarum excretionum, quae criticae futurae erant, quomodocunque suppressarum, irreparabili aegrotorum damno, quare merito de opio eas vere insita sua vi suppressante dicitur, quod turbet, et inhibeat crises, in damna aegrotantium.*

§. VIII.

Hicce nunc praemissis ad exponendum progredior, quid noxae metuendum sit, coctione et crisi ex voto non succedentibus. Quum coctio inseruiat ita mutandae et maturandae materiae morbificae, ut per crisin ex corpore possit exterminari, manifeste apparet, ubi coctio imperfecta fuerit aut eadem plane defecerit, minus integram modo vel nullam quoque crisin oriri posse. Malumque hunc euentum eo certius praesagire licet, quo plura et grauiora in aegro conuenerint faustae illius maturationis impedimenta, et quo minus dubia praesto fuerint perseverantis cruditatis, morbo magis crescente satisque protracto, indicia. Quoad haec

E 5

in-

f) In Tract. de usu opii Sect. II. §. XII. p. 97.

inprimis notabile HIPPOCRATIS obseruatum: *quandiu fulua fuerit vrina et tenuis, morbum crudum esse significat; si vero et diurne fuerit talis existens, periculum est ne sufficere homo possit, donec vrina cocta fuerit g).* Sed quam plurima certe hic notanda veniunt, quae deficientem coctionem declarare queant, tum quoad alia vrinae et reliquorum excretorum vitia, tum quoad affectionum et symptomatum grauiorum pertinaciam, laesas inprimis et perturbatas systematis neruosi functiones, viriumque vitalium debilitatem, in quibus exponendis praecipue multus est Hippocrates. Plurimas etiam huc merito retuleris periculi et exitii a febribus metuendorum notas, a LOMMIO *h)* aliisque ex oraculis maxime Graecorum multo cum studio collectas. Etsi vero ἀγισία, siue criseos defectus ex primariis quidem est perseverantis cruditatis sequelis, ideoque et cum illa communia huic sunt pericula; non tamen ἀγισίας nomine omne malum ex deficiente coctione oriundum bene comprehenditur; vti nec omnis ἀγισία deficientem plane coctionem ponit. Notatu dignum est HIPPOCRATIS dictum de pertinacioris cruditatis noxis, inter quas iuxta alia saltim ἀγισίας mentionem facit, *cruda*, dicens, *et incocta (ἀπεπτα) et in malos abscessus conuersa, aut ἀγισίας aut dolores, aut diurnitatem, aut mortem aut morborum recidivas significant i).* Quum enim morbida materia suae naturae

g) *Obseru. medic. L. I. p. 7-13. et p. 23-26.*

h) *Prognost. n. 75. et coac. n. 575. etiam de indicationibus n. 39.*

i) *Epid. L. I. Sect. II. Lind. T. I. p. 661. 662.*

impedimentis, variisque noxis inde oriundis. 75

rae modo relinquatur, nec vi febris dometur et subigatur, non eadem penitus aegri a cessante febre superstitis conditio esse poterit, ac ubi facta qualitercunque coctione crisis non successerit. Ipsa quippe coctio sua indole semper inter faustiora pertinet; ideoque nec difficulter patet, eo pertinaciores cessantis sine plenaria coctione febris sequelas fore, quo plus incoctae materiae in corpore manserit, siue quo minores natura hoc in opere suo progressus fecerit; etsi affirmare non liceat, maiora semper deficiente coctione pericula esse, quam ubi, hac bene succedente, crisis non sequatur. Multa utrobique^{*} pendent a morbi varia magnitudine et indole, a meliori aut qualitercunque corrupta viscerum constitutione, a diuersa virium nervosarum quae coctioni et crisi praesunt, potestate, ipsoque a modo etiam quo aeger, ratione diaetae, regiminis, aliorumque accidentium, et curationis tractetur.

§. IX.

Pessimum autem et omnium maxime metendum, quod *ἀνγισίαν* consequi potest, siue coctionis defectus simul in culpa sit, siue minus, mors est. Atque hanc nonnunquam ex febribus varia ratione obeunt aegri, cum signa coctionis verac absunt. Aliquando enim loco faustae maturationis ejusmodi contingit putrida humorum corruptio, quae petechiis liuidis, castaneive coloris aut nigri, vel similis

lis coloris majoribus maculis vel exanthematibus nigrescentibus, vel spontanea sanguinis sine magna febris vi, profusione, se prodit, ut vel nata simul intus gangraena, vel humoribus nimis sensim alienatis, quam ut vitalibus inferuire functionibus queant, aeger extinguatur. Nonnunquam et tam graues viscerum, ad vitae munia necessariorum, oppletiones, atque perturbationes contingunt, ut hinc aegri, perseverantibus etiam cruditis vel alicujus coctionis minus constantibus indiciis, encencentur. Exemplo esse poterit mors complurium, qui phrenitide vera, et in primo aliquando dierum quaternario, vel apoplectica febre, vel similibus hisce minoris quidem vehementiae, attamen vere malignis affectionibus, perturbata neruorum functione, extinguuntur, aut qui peripneumonia vel angina ipso in stadio inflammatorio suffocantur. Aliquando inflammatio visceris febrem comitata vel ex mala etiam immaturae materiae metastasi exorta, et in gangraenam transiens vitam aegro eripit. Quodsi etiam vires non suffecerint ad coctionem necessariae, vel materiae copia et indole refractaria oppressae, quod ipsum in quibusdam biliosis neque minus in veris neruosis accidere potest, vel etiam excretionibus utilium humorum, aut vigiliis, deliriis, spasmodicis affectionibus infractae et detritae, vel alio praegresso morbo exhaustae, vel ex aegri debiliore natura deficientes, quandoque sine animaduversis coctionis signis aegri aut lente consumuntur,

impedimentis, variisque noxis inde oriundis. 77

tur, aut quoque exitialem per metastasin spiritu priuantur. Horum omnium exempla passim inter accuratiores morborum et aegrotantium a multis traditas historias reperire licet, plurimaeque dictorum quoque confirmantur ipsis HIPPOCRATICIS de morborum epidemicorum vario euentu fidei narrationibus. Sed quamuis utique melior adsit spes fausti per futuram bonam crisin successus, cum signa coctionis vera non defecerint, fieri tamen quoque tunc poterit, ut vel succumbat natura imbecillior, vel peruerso critico molimine opprimatur. Et priorem quidem euentum tunc merito metuimus, ubi signa coctionis minus constantia sint, minusque tempori morbi atque reliquis aegri affectionibus responderint. Ideo et bene HIPPOCRATES notauit, *iis, quae non secundum rationem leuant, credendum haud esse k)*; speciatim, *vrinas derepente praeter rationem parum coctas, vitiosas esse, in totum quoque, vrinam in morbo acuto praeter rationem coctam vitium denotare l)*; etiam *periculum denunciare vrinam, quae in acutis colore ac sedimento variat m)*. Et iuxta hoc simul attendi meretur GALENI monitum: *primum, dicentis, et maximum in morbis lethalibus signum, quod sine crisi mors est subsequutura, est virium imbecillitas, nam virtus ita prostrata ad pugnam contra morbum non excitatur n)*. Tunc autem non

angr-

k) Aph. 27. Sect. II.

l) Coac. n. 579.

m) Coac. n. 578.

n) De crisibus L. III. c. X.

ἀνγισία, sed crisi potius mala, exstingui dicuntur aegri, vt supra jam notauimus, vbi post signa coctionis praestantiora, naturam tentasse constat morbi depulsionem, sed ejus magnitudine oppressam succubuisse; siquidem ipsi incerti naturae cum morbo conflictantis euentus crisis nomini, sic, vt initio declarauimus, vsurpando anam dedisse perhibentur o). Atque hinc intelligitur, quare HIPPOCRATES acutorum morborum non omnino tutas, quoad mortem et sanitatem praedictiones habuerit p). Etiam huc pertinent plurima eundem apud Auctorem in vtramque partem graphice dicta, vbi cum signis variis judicatoriis, grauibusque cum symptomatibus in criticam perturbationem praesertim incidere solitis, periculum aequae vitae ac faustum a crisi successum coniungit. Ita enim, vt quaedam exempla proferamus, habet, *quibus in febre morbus regius superuenit ante septimum diem, malum est, nisi confluxus humorum ad aluum contingant q).* Summi totius corporis perfrictiones in diebus judicatoriis, cum angore, et corporis inquietudine, si sine sudore fiunt, damno sunt, praecipue vero damnantur, qui ex his superueniunt rigores r). In praecipiti morbo, capitis dolor et praecordia reuulsa, nisi sanguis ex naribus profluat, ad phrenitidem deueniunt s). Quicunque sub

febre

o) Idem de cris. L. III. c. II.

p) Aph. XIX. Sect. II.

q) Aph. 62. Sect. IV. Conf. de hocce dicto perill. VAN SWIETEN comment. in BOERH. aph. T. III. p. 138.

r) Praedict. I. 61.

s) Coac. 119.

febre continua jacentes sine voce, conniuentibus oculis nictant, si quidem sanguine naribus fluente, aut vomitu accedente, locuti fuerint, atque ad se redierint, seruantur, si vero haec non fiant, difficulter spirantes subito moriuntur t). Ipsa autem ratio varia, qua mors coctione facta circa febris vigorem oriatur, ex iis non difficulter intelligi poterit, quae de funesto cruditatis perseverantis euentu antea diximus.

§. X.

Sed cum a febre, absque crisi, eademue non perfecta, cessante superstites manserint aegri, pluribus utique ac diuersae indolis malis obnoxii fiunt, pro varia ipsorum et morborum febrilium et reliquorum omnium, quorum aliqua in aegro admissa efficacitas fuerit, conditione. At vero primum, ne vel inani metu futurae affectionis molestae, vel nimia in bonis aegri rebus confidentia decipiamur, sollicitè iuuabit attendere, an morbus ejusmodi fuerit, qui manifesta indigeat crisi, et siue talis quaedam contigerit siue minus, qua ratione a febris cessatione homo valeat. Nec facile nimiam adhibemus curam in disquirendo functionum quarumuis post febrim successu, cum quoque exercitatis in arte viris crises absolutae apparuerint, quum tamen morbus idem breui sponte redierit; nonnunquam contra crises haud perfectae, minusque securae visae fuerint, aegris tamen sensim, sine ulteriore

riori euacuatione ex voto conualescentibus u). Ab ipso autem criseos defectu, et ubi illa minus perfecte absoluitur, in superstitibus duò praecipue habemus pertimescenda, nempe vel praeteritae febris recursum, vel morbum qualemcunque alium; atque hisce continentur sequelae *ἀνγισίας*, siue coctio aliqua praecesserit, siue minus. Medici quidem veteres recidivam in primis exspectandam esse monuerunt, cum vel sine euacuatione sensibili aut abscessu vel crisi saltem non absoluta febris finiretur, etsi alia euenta mala nequaquam praetermiserint. Ita HIPPOCRATES: *quibus febres cessant, neque apparentibus solutionis signis, neque in diebus criticis, illis recidiva exspectanda est x)*. Sic et GALENUS: *solutiones morborum, qui non paulatim imminuti fuerunt, sed subito quieverunt, ut fidae sint, requirunt omnino excretionem quandam copiosam vel abscessum insignem; nam qui sine his cessauerunt recidivam facere amant y)*. Neque minus vero hunc euentum ex imperfecta etiam crisi praedixerunt, quae enim, ait HIPPOCRATES, *in morbis post crisin relinquuntur, recidivas facere solent z)*; idemque ipsum dictum saepius in epidemicorum libris repetiit; neque raro, ut absolutam esse crisin declararet morborum historiis

verba

u) Conferri hac de re meretur in primis ill. DE HAEN *rat. med.* P. VIII. c. II. c. IV. V. XI.

x) *Prognost.* n. 138.

y) *De dieb. crit.* L. I. c. I. conf. quoque CELSVS *de medic.* L. II. c. VII. p. 60.

z) *Aphor.* 12. S. II.

impedimentis, variisque noxis inde oriundis. 81

verba subjecit: *ἐκ ὑπέρσεψε*. Praeterea vero et ex coctione deficiente recidivam metuisse HIPPOCRATEM, ex ipso illo dicto constat, quod supra allegauimus a). Neque dubitandum, quin febrium intermittentium quoque, ut quoad alia mala ex deficiente crisi oriunda cum acutis conueniunt, etiam quoad recidivas metuendas conditio similis reperiat. Praeclare hinc b. WERLHOFIVS, *prono*, inquit, *consequitur impetu, quam facile humoris impuri pars, a crisi particulari vniuscujusunque paroxysmi post motum immaturum relictā, ita profunde visceribus et succorum crasi immergi possit, ut nouis paroxysmis pluribus, et longa aut recidiva febre opus sit, si naturae virtute corpus repurgari deinceps debeat b)*. Sed peculiariora etiam signa optimus habet Crous de febre, ex relictā in corpore materiae febrilis parte reuersura, quae quidem praecipue morbidas affectiones sistunt iis similes, quae et saepe alias febrem aliquam instare denotant c). Ita enim, ut praecipua modo adducamus, *reuerſionibus tentari*, ait, *quibus febribus desinentibus vigiliae pertinaces, aut turbulenti somni*

ac-

a) Epid. L. I. Sect. II. Lind. T. I. p. 661. 662. conf. etiam Epid. L. II. S. I. p. 686.

b) Obseru. de febr. Sect. IV. §. 2. pag. 135.

c) Ex instituto haec signa exposita reperiuntur in GALENI art. med. C. XXXII. de signis futurae aegritud. et apud CELSUM de med. L. II. C. II. Conf. quoque Diss. de frequentior. febr. prodromis, quam ill. Praeses habuit c. cl. LVD. IAC. HETTLING Goettingae a. 1765.

82 Diff. de coctionis atque crifeos in febribus

accedunt, aut corpus languet, aut singulorum membrorum dolores adsunt; etiam si deficiente febre sudor accedat, et urinam fuluam minxerint d), quae non difficulter quisque cum vulgaribus prodromis febrium alias propin quarum cum nempe in corpore euolui coeperint, conuenire deprehenderit. Sed passim et alia quaedam signa tradit quae ipsum febris finem praecesserunt, vt urinas ante iudicationem suppressas e) aut plane non coctas, nec aliis secundum rationem euenientibus, porro quoque sub idem tempus exorta iuxta aures tubercula, non suppurantia sed subsidentia f), denique cum iudicatio coctionem perfectam anticipauerit g). Notandum vero et eodem docente opportunam purgationem post febres acutas conualescentes multoties ab imminente recidiua defendere, eandemque omis sam relapsum quoque in febres post se trahere, etiam alui fluorem vel sedimentum h) vrinarum crassarum copiosam longamque recidiuam auertere posse i). Qui autem plura de vtilissima hac materie scire cupit, adeat elegantem et accuratam de recidiuis tractationem CORN. ALB. KLOEKHOFFII k).

§. XI.

d) *De iudicationibus c. IX.*

e) *Epid. L. IV. c. XV. p. 753.*

f) *De iudicat. c. X.*

g) *Epid. L. II. S. I. p. 686.*

h) *De febre quadam manifeste biliosa HIPPOCR. L. II. de morb. c. XXXVII. Lind. T. II. p. 64. sequentia praecipit: ubi sedata febris fuerit, pharmacum deorsum purgans bibat, reuertitur enim quandoque morbus, si impurgatus permanserit.*

i) *De iudicat. c. X.*

k) *Opusc. med. p. 205.*

§. XI.

Sed plurimis quoque aliis morbis febres absque omni, vel sine perfecta crisi desinentes ansum praebere solent, eosque vix non omnes a veteribus abscessuum (ἀποζασίωv) nomine comprehendantur, etsi hos etiam ipso in febris decursu tum instar symptomatis tum critico modo accidere posse atque per illos etiam crises fieri, docuerint. Generatim quidem humoris ad partem qualemcunque factam translationem ea voce intellexisse videntur, quum alios fieri per effluxum, (κατ' ἔκρυν) alios per decubitum (κατ' ἀπόθεσιν) dixerint, saepius tamen qui posteriori oriuntur modo eodem nomine simpliciter insigniti reperiuntur, ut etiam abscessus ex febribus, ubi ad crises, quae per excretionem fierent, minor spes fuit, generalius praedixerint. Ita enim HIPPOCRATES: *si febris desinet et dolor non desinit, neque sputum ex ratione procedit, neque biliosae sunt alui egestionem, neque bene solutae, sed sinceræ, neque urina admodum multa, et copiosum habens sedimentum, suffragantur vero ad salutem reliqua omnia salutaria signa, in his tales abscessus fore sperandum est l).* Et GALENVS scribit, *in morbis acutis et calidis si crisis fiat primis periodis excretionem sperandam esse, sed si morbus fuerit diuturnus et tardus, atque urinae fuerint longo tempore tenues et crudae abscessum futurum m).* Attamen et finitis febr-

l) Prognost. n. 112.

m) De cris. L. III, C. ult.

bus abscessus tales metuebant, crisi per excretionem non succedente, ait enim Cōvs *quibus ex morbo resurgentibus aliquid dolet, ibi abscessus fiunt n)*. Quam vero amplam HIPPOCRATES vsurpauerit abscessus significationem e sequentibus praecipue constare potest. *Abscessus fiunt aut per venas, aut per alium, aut ad ossa, aut neruos, aut ad spinalem medullam, aut ad cutem, aut per alias emotiones.* Eoque pertinent et varices et lumborum grauitates. Ex iis, quae per effluxionem fiunt, est sanguis e naribus, pus ex aure, sputum, vrina, menses, aliaque. Sub cutem abscedunt foras tubercula, velut putrescentia, et quae suppurantur, aut vlcus, aut ejusmodi pustulae, aut squamae, aut capillorum defluuium, vitiligines, leprae, aliaque ejusmodi. Mentionem quoque facit abscessus ad testes ex tussi et aliunde o), ad oculos p), ad articulos q), juxta aures r), ad internas partes quoque vt ad lienem s), etc. Vt vero idem Auctor varias per excretiones, vt alui fluorem, vrinam copiosam, crassam, narium haemorrhagiam, abscessus illos qui per ἀπόθρεσις fiunt, praeuerti obseruauit, sic etiam eosdem jam exortos similibus et accommodatis effluxionibus

n) Aph. 32. Sect. II.

o) Epid. L. II. Sect. I. p. 687. 688.

p) Epid. II. C. 17. p. 254.

q) Passim vt aph. 31. Sect. IV. et Praenot. n. 139. et epid. I. Sect. I. p. 666.

r) Coac. 207. et alibi passim.

s) Epid. II. Sect. III. p. 700.

impedimentis, variisque noxis inde oriundis. 85

bus iterum in aegri salutem saepe tolli posse, vbi autem sine ratione euanescent, et intus recurrant, recidivas aut mortem metuendum esse pluribus in locis animaduertit.

§. XII.

Quodsi jam de ipsis morbis, praeter recidivas specialius denominandis quae experientia doceat ex impedita crisi frequentius exoriri, dispiciamus, varii generis facile deprehendimus longiores saepeque pertinaces morbos, ex decubitu materiae morbificae ad partes varias nobiliores excitatos. Pertinent huc primum varia contabescentiae genera, lentaeque febres vel cum interna suppuratione vel absque illa. Plurima fane exempla horum morborum ex reliquiis variarum febrium praegressarum frequentem originem confirmant, etsi ex aliis facilius, ex aliis rarius ac difficilius subnasci soleant. Sed in vniuersum quoque ex omni fere febre, criticis euacuationibus ex voto non succedentibus eiusmodi chronicas oriri posse FR. HOFFMANNVS testatur *t*), vbi adserit: *Quin omnes euacuationes in morbis criticae, maxime tamen per sudorem si supprimuntur imprudenter, vel minus sufficienter succedunt, morbi recidivas vel peiorem priorī, et solemniter febrem lentam inuehere solent.* Et *u*): *Deinceps perpetuae et vberius confirmatae obseruationis est, tabificas eiusmodi*

F 3 febres

t) In med. rat. syst. Vol. II. Sect. I. C. XV. p. 375.

u) L. c. T. IV. Sect. II. C. XIV. p. 576.

febres succedere, quam maxime euacuationibus criticis solemnibus deficientibus, aut perperam prohibitis etc. Neque intermittentes ratione hujus morborum generis tutiores esse, declarat R. MORTON x), dum a nulla alia febre frequentius quam ab intermittente phthiseos originem se obseruasse retulit. Oriuntur autem istae febres lentae variae vix non semper ex aliqua morbificae materiae ad viscera et glandulas depositione, qua fieri facile potest, vt secretiones necessariae impediantur, massaque humorum, ex perturbata ejus crasi, natisque hinc ad febriles motus irritamentis, perditis praesertim haud ex aequo restitutis, magis magisque consumatur, nec minus firmarum partium iusta intercipiatur nutritio. Nonnunquam vero simili ex decubitu ad viscera glandulasque cum defecerit modo iste ad motus febriles stimulus cachexia sensim, imo et hydrops quoque et tympanites, alique morbi haud febriles chronici subnasci solent. Inde bene LOMMIVS de leucophlegmatia refert: *magis ita affici eos, qui ex longo morbo conualescunt, utique si id quoque temporis duro tumore, viscus aliquod, maxime jecur aut lien obsidetur* y). Et HIPPOCRATES hydropem ex acutis quoque oriundum memorat, malumque esse dicit z). Quam facile autem ex intermittentibus praesertim quartanis, et his inprimis autumnalibus, tum sibi

reli-

x) In *Phthisiol.* C. XII, p. 127.

y) *Observat. med.* p. 55.

z) *Prognost.* n. 42.

impedimentis, variisque noxis inde oriundis. 87

relictis, tum et minus rite tractatis cachexia et hydrops oriri queat, ita observationum frequentissimarum fide peruulgatum est, ut nullo peculiari testimonio hic opus esse videatur *a*). Tympanitem quoque ex febribus praesertim biliosis et dysentericis minus perfecte solutis et minus prudenter tractatis obseruarunt plures *b*). Nonnunquam et paralyticae et spasmodicae affectiones, et insaniae longae, quas nomine abscessuum ad nervos HIPPOCRATES comprehendit, inde ortum habent *c*). Similis etiam nec rara est arthritidum origo ab HIPPOCRATE ad nostra usque tempora plurimis obseruatis comprobata. Ita quoque BALLONIVS morbum affinem, cui rheumatismi nomen imposuit, ea saepe corpora corripere adseruit, quae longo morbo laborant, sed qui jam est desiturus aut falsa et praecipite crisi videtur solui, quum tamen supersit *d*). Quoad reliqua vero quae huc referri possent ex deficiente perfecta crisi metuenda mala, et quae desiderari forte posset, specialiore omnium expositionem, ab iis etiam exhibendis, ne speciminis Academici limites transgrediar, me nunc supersedere posse, urgente praesertim temporis ad

F 4

scri-

- a*) b. WERLHOFIVS *obseru. de febr. Sect. II. §. V. p. 76. 77.*
b) *Conf. ill. PRINGLE obseruat. on the Dis. P. III. Ch. IV. §. 2. p. 183. et ill. ZIMMERMANN von der Ruhr c. VII.*
c) *Conf. F. HOFFMANNI Med. rat. Syst. T. IV. P. IV. §. 17. p. 10. et T. IV. P. III. Sect. I. C. II. et cl. G. HEINRICI Diss. de abscess. per materiem et ad nervos, Goett. a. 1755.*
d) *Vid. ejusd. Lib. de rheumatismo opp. T. IV. p. 314.*

scriptionem hancce mihi concessi breuitate, et beneuoli lectoris humanitate pariter ac aequitate confusus, existimo.

III.

Dissertatio de viribus naturae debilioribus in febrium decursu recte aestimandis, iisque accommodanda medendi ratione, Gott. 1770. Resp. PAVL. HENR. WEISS, *Hamburgensi*.

INSTITVTI RATIO.

Et si constet, in humano etiam viuo corpore multa contingere, quae ex causis perspicue deriuare nemini haecenus licuit, quasuis tamen ejus mutationes, tum ex varia partium ejus indole, viribusque per illas distributis, tum ex mentis artificissimo illo, quod cum corpore obtinuit, commercio, tum ex rebus etiam externis, semper proficisci, vix vlli obnoxium esse dubitationi existimo.

Quum vero vires illae agendi peculiare, cum animali vita conjunctae, in perficiendis viui corporis et sociatae ipsi mentis functionibus praesertim efficaces reperiantur, ex primariis certe officiis est Medici, siue in restituenda sanitate, siue in eadem tuenda versetur, semper quoque et inprimis in illarum

rum naturae virium conditionem accurate inquire-
re; et vbi etiam de agendi modis non constiterit,
legum tamen, quas in agendo naturam sequi obser-
uatio docuit, rationem exactius habere. Atque
nec de harum naturae virium ad febriales morbos ex
voto superandos necessitate vnquam dubitare quis
poterit, modo parum in Medicorum doctrinis ver-
satus, quoniam eis deficientibus, experientia fere
perpetuo satis manifeste confirmante, vitiosa, quae
adeest materies, minus extricatur et eliminatur, ve-
rum potius eadem sponte augetur, magisque nociua
fit, nec raro etiam ad nobiliores corporis partes
deponitur; contra vero, ipsa et sola fere integrior
natura, modo prudenter, vbi opus, dirigatur,
plurimarum febrium, imprimis continuarum, cu-
rationem ex voto perficere solet.

Quum igitur in curatione febrium, et maxime
quidem difficiliorum complurium et grauiorum,
quam plurimum intersit, non solum virium istarum
in agendo discrimina, sed etiam varias, quibus im-
pediuntur, imminuuntur, incitantur, ac suis in
actionibus perturbantur, causas, neque minus di-
uersa ita mutatarum effecta, quoad fieri possit, ac-
curate perspecta habere, tantae mihi doctrina haec-
ce grauitatis et vtilitatis esse apparet, vt specimen
inaugurale conscripturus, operae pretium fore exi-
stimem, huius in argumenti partem, de naturae
nempe viribus febrium in decursu debilioribus recte

aestimandis et accommodanda illis medendi ratione, operam pro ingenii modulo impendere.

§. I.

Tam frequentem vocis naturae apud Medicos usum reperias, ejusque tam peruulgatam, in qua fere praestantiores plurimi conueniunt, ideam, ut illam hoc loco explicare superfluum videretur, nisi consuetudinem sequi, atque suspicionem finistri, qui datur, sensus auertere nunc liberet. Per vocem vero *Naturae* nos hic intelligimus complexum principiorum agendi, corpori animali et speciatim humano viuo propriorum. In aegro igitur superstitibus quasuis actiones, siue sanitatis legibus conformes, siue ab illis alienae sint, modo vitam adhuc praesentem testentur, pro ipsis naturae effectibus habere licebit. Quum vero variis in partibus vario modo actuosam reperiamus naturam, ita quidem, ut cessare plures ejus actiones possint, aliis perseverantibus, haud inepte, si phaenomenorum habeamus rationem, varias et plures ejusdem vires a se inuicem distinguemus.

§. II.

Non immorabimur exponendae illi differentiae, quae solidarum nostri corporis partium viribus, a *cohaerentia* et *elasticitate* oriundis, cum iis ipsis, quas ad naturam viui tantum hominis referimus, quasque *vitales* etiam dicunt, intercedit,
quum

quum de illa fatis inter omnes constare videatur. Neque a nobis expectari arbitramur, ut hoc loco systematis neruosi ministerium, quo viribus hisce vitalibus per corpus distribuendis inferuit, quoad nobis perspicere concessum, explicare ac definire adnitamur, siquidem et hanc doctrinam, quousque exponendo nostro inferuit argumento, ex ipsis disciplinarum nostri temporis elementis cognitam sumere liceat. Notasse vero paucis forsan conuenient, inter se multis in phaenomenis conspirare vires vitales, ac illas ab elatere et soliditate pendentes, dum alteram altera in contrahendo et resistendo iuuat, viuidiore etiam se ambas frequentius comitari solere, pariter ac saepe simul debiliores comparent, neque minus simul quandoque destructae, ut in parte putrido tabo corrupta, offenduntur. Sed reperias etiam firmiorem compagem solidam in senibus et durioris vitae generis hominibus, cum vi minori vitali quoad certas functiones, et vicissim laxiorem mollioremque et flaccidiorem illam fabricam cum actuosiori vis vitalis, sed etiam in certis modo actionibus, efficacia conjunctam. Et posterioris quidem conditionis exempla plurima, sed variae tamen ac discrepantis indolis, obseruare licet, in juniore hominum aetate, in foeminis et in aliis molliori vitae generi adfuetis, multisque hystericis ac hypochondriacis. Praeterea quoque confirmat omnino accuratior naturae diuersorum hominum contemplatio, cum optimo quandoque corporis habitu,

habitu, et nisi præter ordinem quid neruorum systema sollicitet vel debilitet, cum exoptato quoque functionum omnium successu, peculiarem et miram conjunctam esse, quoad varias et plures causas procatacticas, systematis neruosi sensibilitatem et mobilitatem; cujus quidem morbosae virium naturæ proportionis in hominibus apparenter sanissimis veram ideam habuisse videtur SYDENHAMVS, vbi interioris, vti nominat, hominis ab exteriori differentiam proposuit *a*).

§. III.

Maxime vero notatu dignum censemus, latius patere virium vitalium potestatem, quam ex irritabilitate et sensibilitate, per experimenta vulgaria et euidentiora declarandis innotescit. Negandum enim haud est, vim illam vitalem pluribus in partibus, quas cultri apex in motum ciere non valuerit, aliis sub conditionibus in producendis motibus efficacem se præstare posse. Hujus enim vis miræ potestati merito quoque tribueris tum febriles tum alios horrores, siue calor cum illis naturalis perseueret, siue is simul mutatus reperiatur; pariterque aliquando calorem auctum et incidentes transitorios aestus et refrigeria cum pulsu naturali, interdum et rubores particulares et anxietates varias, plurimosque dolores et secretionum alienationes,

a) Diff. ejusd. ad GVIL. COLE. opp. edit. Lugd. Bat. 1754. p. 395.

nes, fluxusque pariter ac retentiones, et sopores et deliria et alia plura, vbi ordinariae corporis mechanismo manifestius respondentes caussae defecerint. Quare igitur dubitare vix licet, quin et in fausto functionum corporis omnium successu multum a peculiari et singulis partibus accommodata vi vitali pendeat; atque hanc vim per corpus quam sapientissime distributam ad quorumlibet morborum decursum, et ad quorumvis symptomatum certam indolem et gradum producendum suam quoque symbolam, eamque majoris quidem momenti conferre; dum nunc bene et in commodum valetudinis integrioris conseruandae, aut amissae illius restituendae agat, nunc vero excessu vel defectu peccet, nunc perturbata actione salutis contrarios effectus producat.

§. IV.

Vigorem naturae humanae exoptatum, qui functiones homini conuenientes, et mentis et corporis quaslibet, integerrimas praestet, et conseruandae ex voto sanitati non solum prospiciat, sed felicius quoque deuincendis, qui forte suboriantur, morbis succurrere valeat, a plurimis pendere corporis conditionibus, satis certo magna ex parte cognitis, ac de quibus generalius consideratis et expressis inter Physiologos euidenter constat, quisque facile, vel parum attentus, sibi persuasum habebit. Ita enim omnino id manifeste liquere videtur,

tur, de fabricae partium corporis integritate, de justo toni sic dicti phyci, seu cohaerentiae, flexilitatis, duritiei, elateris, per tota quaelibet organa gradu, de moderato singulis conueniente, tum a se inuicem, tum ab humoribus, tum a praesentibus vitae viribus oriunda, tensione, ac de bona humorum firmae compagi, ejusque omni conditioni respondente mixtione, densitate, copia. Quo propius enim hanc ad normam comparatas corporis humani conditiones reperimus, eo magis actuosam ejus naturam in tuenda sanitate plerumque animaduertimus. Atque his etiam in corporum conditionibus, cum a recta mensura et justa proportionem fuerint, plerumque vera ratio consistit, vel immutarum, vel incitatarum nimis, aut in agendo perturbatarum naturae virium. Aliquam tamen et ea ipsa in virium vitalium integritate, qualem in hoc vniuerso exoptare licet, graduum et proportionum, certarumque determinationum differentiam admittendam esse, discrimina illa, etiam per vulgus cognita, aetatum, sexuum, temperamentorum, consuetudinum, etc. quam manifestissime declarant.

§. V.

Maxime efficacem plurimis in tollendis morbis humanam naturam se gerere, inter omnes quidem constat, ita autem haec ipsius potestas etiam hisce in muniis suis exercendis se habet, vt in omni
etiam

etiam reliquo naturalium rerum ambitu obseruari idonei quilibet contendunt veri aestimatores, eo nempe plura sapientissimae opificis nostri prouidentiae specimina reperiri, quo studiosius et attentius rerum singularum affectiones earumque nexus ac fines perquisiuerimus. Praeclare hoc de argumento ipsum jam diuum nostrum CVM cogitasse, plura ipsius asserta euidenter confirmant; vt, cum non modo *b)* morborum naturas medicas dixit, atque *nec edoctam naturam nulloque magistro vsum ea quibus opus est, facere* notauit *c)*, sed *eandem quoque artis peritis, quae facienda sint, demonstrare*, inter alia verissime docuit *d)*. In plurimorum certe morborum origine ac decursu ab initio ad finem actuosam facile obseruamus naturam, ita quidem, vt materialem morbi causam certa ratione mutet, euoluat, ad secessum praeparet, posteaque vel aliquam in partem deponat, vel ex corpore expellat, eaque vel sola, vel artis auxilio adjuta, praestet. — Reperies quidem, vbi ab efficacia, quam optauimus, remittat, et in suo deficiat negotio; vbi etiam salutis in detrimentum morbos euoluat periculosissimos, vbi motus varios excitando in discrimen aegros perducatur, aut vbi omni fere actuositate sua in perniciem illos praecipitet. — Neque tamen haec veram debitamque naturae humanae laudem

in-

b) Epid. VI. sect. V. LIND. T. I. p. 309.

c) Ibid. et de alim. cap. VIII.

d) De arte cap. XXII.

infringunt, sed limites modo perfectionis a summo rerum arbitro in eadem ipsa et in rebus nos ambientibus constitutos, declarant.

§. VI.

Quam efficaces vero ad nostram salutem esse soleant naturae vires, in primis ex febrium decursu quam manifestissime plerumque innotescit, quum per eas et excitari febres ac plane tolli, meliori succedente valetudine, videamus; quum iis vigentibus eas praesertim functiones magis incitatas, quae deuincendo inferuiant morbo, reperiamus, imminutas autem eas vel deficientes, quae alias in aegri damnum facilius quam commodum cederent. Atque per faustos huiusmodi successus totius occurrentes, maxime instrui Medicum quisque facile largietur, quando et qua ratione vel succurrendum sit naturae, quo easdem, quas ipsa legit vias efficacius et felicius persequatur, vel et ejus actiones, cum ad sinistra ruere coeperint, ad valetudinis commoda ducere contendat, nisi quandoque aliam quandam singularem, eamque satis tutam et efficacem, saluti aegrorum consulendi methodum fida observatio docuerit atque confirmauerit *e*). Quae tamen qualiscunque sit, a naturae solius iuuandi ratione recedens, artis methodus, nihilominus adhuc

e) Conf. TORTI *therap. spec. L. I. Cap. III.* KIRKLAND'S *Essay towards an improvement in the Cure of those Diseases, which are the Cause of Fevers.* Lond. 1767.

huc satis bonas et actuosas naturae vires, quae salu-
tari illius virtuti fulcimentum praebeant, omnino
semper quoque praesentes postulat.

§. VII.

Cum itaque in febribus quam plurimum a vi-
rium naturae integriore efficacia pendeat, omnino
quoque in his morbis in illarum conditionem et
gradum eo magis sollicite inquirendum esse liquet,
quo minus in primaria medelae parte quis error
committatur. Et quoniam, ut jam notatum fuit,
naturae virium efficacia ad functiones viui corporis
omnes, vitales nempe, animales et naturales, se
extendat, plura sine dubio debilitatis in hisce sin-
gulis, tum seorsim tum quoque conjunctim confide-
ratis, indicia reperire licebit. Primum quidem in
vitalibus virium declarare imbecillitatem solent pul-
sus *paruus* et *mollis*, et illam quidem eo grauiorem,
quo minores mollioresque pulsuum ictus fuerint. —
Attamen quandoque ex leuioribus ac transitoriis
quoque causis hanc imbecillitatem nasci posse, etiam
interdum illam cum reliquis melioribus aegrorum
conditionibus, ut in iis, qui ex morbo jam con-
ualefcere incipiunt, reperiri, haud rara obseruatio-
ne constitit. Pulsus praeterea *intermittens*, cum
aliis quandoque grauioris debilitatis indiciis occur-
rit, et in ipso horum numero, si reliqua consen-
tiunt,

tiunt, locum mereri videtur *f*). Fere certius autem *frequentia* pulsuum, cum hi exigui simul et molles fuerint, et vbi reliquus aegri status hoc iudicium confirmat, verum subinde sistit effectum debilitatis *g*). Qui *inaequalis* sunt roboris et frequentiae pulsus, hinc etiam, quousque virium vitalium defectum designent, facile dijudicari poterunt. Neque *rarior solito* pulsus ex debilitatum indiciis excludendus est, quandoquidem grauioribus praesertim soporibus, ex encephalo per idiopathiam affecto oriundis, conjunctus esse solet. Sed vt alias etiam debilitas vitalis variae indolis spasmis facile ansam praebet, ita et ipsa durities pulsuum, vbi simul exigui sunt et contracti, virium quandoque defectum prodit. Praeterea vero nec raro grauiorem in vitalibus functionibus debilitatem minor caloris gradus designat, siue ipso naturali, siue illo etiam, quem alias reliqua febris conditio et vehementia, meliori sub rerum statu, inducere solet, inferior; pariterque et extremitatum frigus, et perfrigerii sensus, licet calor tunc ad contactum naturalis appareat; et cutis pallor et sudor frigidus, et respiratio difficilis, eademque parua, rara, anxiosa et praesertim frigida. — Debilitatem vero in functionibus naturalibus quandoque declarat appetentiae ciborum ac sitis defectus, mandendi ac deglutiendi difficultas, ventriculi et intestinorum imminuta irritabilitas,

f) conf. III. de HALLER *elem. Physiol.* T. II. p. 252.

g) *ibid.* p. 252.

bilitas, alui tarditas, urinae et alui foecum inuoluntaria et sine sensu contingens excretio, etiam urina minus tincta, et nimis lente succedens vel deficiens materiae febrilis coctio et crisis. — In animalibus denique functionibus pluribus quoque modis vitalis debilitas in febribus se exferit. Et maxime quidem notatu dignum discrimen illud graduum videtur, quod in aegrorum lassitudine observamus, cum insignioris certe sit in formanda prognosi momenti. Nunc enim reperies, qui nonnullam quidem in mouendis artubus difficultatem conqueruntur, attamen ita se gerunt, ut vix ullum ejus indicium animaduertas; nunc decumbentes cernes, minus alacres, tristes, quietem amantes, nec sine molestia artus mouentes, verum pro necessitate tamen corpus adhuc erigentes, et absque adminiculo, quandoque passus aliquot progredientes; sed interdum quoque et eo res aegri peruenisse dolebis, ut semper supinus cubet, artus et caput mouere, osque clausum seruare et loqui vix amplius valeat, neque impedire queat, quo minus ex eleuatori, quem ipsi dederis, situ, ad pedes, aut cum in latus eum collocaueris, in dorsum sponte prolabatur. — Nonnunquam et spasticis affectibus, tremoribus ac tendinum subsultibus ipsa debilitas ansam praebet. Praeterea vero et grauiorem praefertim debilitatem designant sensuum externorum torpor, capitisque grauitas, et vertigo, aurium susurrus, deficiens doloris ac molestiarum morbi

reliquarum perceptio, mentis stupor, rerumque necessariarum ac ipsius, in quo aeger versatur, periculi incuria, et modo actorum aut perpefforum obliuio, et perpetua mentis in tranquilla quadam desipientia confusio, et plenarius conscientiae defectus et somnolentia, cum oculis semiapertis, aut subsidentibus, aut illacrymantibus, aut distortis, etc. licet caussarum, integraeque conjunctae morbidae affectionis, in definiendis cujusuis horum debilitatis indiciorum momentis, habenda vtique semper sit ratio. Quod ipsum inprimis quoque in subitae mortis illa imagine, quam animi deliquia sistunt, locum habet, quae vtpote non quidem sine grauiori et manifesta occurrunt virium vitalium in omnibus viui corporis functionibus imbecillitate; attamen diuersissimi, pro morbi reliqui cui accesserint, et caussarum, vnde ortum habuerint, varia conditione, momenti reperiuntur.

§. VIII.

Notatu hic digna videtur obseruatio, imparia valde virium diuersis in functionibus decrementa, in morbis praesertim febrilibus, quam frequentissime deprehendi. Nihil in hoc morborum genere peruulgatius, quam vitalibus in functionibus vitae vires, ob stimulum praesentem magis ac in sanitate actiuosas, nimiaque contentione sua saepe noxias, lassitudinem comitari artuum, sensuumque internorum imminutum vigorem, et remittentem ventriculi

culi in cibos potestatem. Veruntamen contra etiam integrioris mentis vires, minusque prostratum appetitum, et quodammodo adhuc succedentem ingestorum digestionem, et corpus erigendi qualemcunque facultatem, cum debiliore arteriarum pulsu et aliquando cum pronitate ad animi defectiones, et cum calore nimis remisso, conjuncta quandoque animaduvertere licet. Habeas etiam, nonnunquam, quod maxime mireris sanam mentem cum pulsu tali, quem vix persentire queas, cum halitu jam frigido, cum ventriculi et intestinorum paralytica insensibilitate, ut quaevis ingesta et immissa, eademque subinde acriora, recipiant quidem, sed ne minimum quidem inde moueantur, nihilque iterum expellant. Et ex minime raris est phaenomenis, cordis viribus non respondere calorem et ruborem corporis, exanthematum eruptionem, coctionis febrilis successum, excretionum copiam, ubi etiam interdum in ordinariis, de quibus constat, illorum omnium causis et conditionibus, euentuum rationes detegere non licet. Quare ergo cautissime procedendum esse, nemo dubitauerit, ubicunque ex debilitate vnius partis ad illam alterius, aut ex quarundam functionum languore ad illum aliarum argumentari libuerit; etiamsi ceteroquin verus partium nexus non lateat, muniaque vnius ab illis aliarum partium certo pendere satis liqueat; quum studiosa hujus etiam generis euentuum observatio tales naturae proprietates declaret, quales cognitae

ex principiis deriuare , nisi mortalium excedat perspicaciam , negotium tamen difficillimum semper fore videatur.

§. IX.

Dum vero de naturae viribus in febrium decursu debilioribus nunc sermo nobis est , nequaquam praetermittere diuisionem licebit, istas inter vires, quae strictius et magis proprie naturae humanae a Medicis attribui solent, quas nempe in morbis arcendis atque deuincendis manifestius efficaces comperimus, et reliquas illas constituendam, quae minus propinque ad hunc finem conferunt, ita quidem, vt hae quoque in commodum priorum, vel sine illarum damno saltem, quodammodo impeditae esse queant, quamuis etiam hae posteriores, ob suam cum illis conspirationem, ac vtrasque afficientium causarum conuenientiam, simul accurate attendi semper omnino mereantur. Ita ergo non erit, quod de naturae ad superandam febrim necessario vigore deficiente conqueramur, vbi iustis temporibus, singula, quae coctioni obsint, impedimenta ex voto remoueat, leuamenta quaeuis, feliciori atque citiori febris decursui inseruientia, aptissima ratione praestet, nociua horreat, appetat vtilia, coctionem et crisin breuissimo tempore et perfectissime absoluat, sublataque febre, diaetae modo auxilia, quae augendis denuo illis atque firmandis conferant viribus, per febrem antea fractis,

desi-

desideret, concessaque ista in valetudinis commodum conuertat; licet praesente febre, lassitudo artuum grauis, et mentis alacritas nulla, et somnolentia, et plane deficiens cibos concoquendi facultas, et plura, quibus huiusmodi augeatur imbecillitas, adsint, et multam aegro molestiam faceffant. Verumtamen nec negligendam quoque esse studiosam has ad vires, quas illa strictior et magis propria roboris naturae idea excludit, attentionem, ex ipso nihilominus rerum usu abunde fatis innotescit; siquidem et grauiore praesente imbecillitate artuum, atque tanta, ut ne caput quidem aeger mouere, clara proferre verba, linguamque exferre valeat, et cum quarumvis morbi molestiarum sensus defecerit, cum ipsius recuperandae salutis omnem deposuerit curam, vel ubi variis ex debilitantibus causis deliria, sopores, et conuulsivae affectiones accesserint, in magno plerumque periculo aegrum versari constet, isque rerum status a quibusvis artis nostrae non plane imperitis merito valde metuatur. Ita grauius enim debilitatis viribus animalibus, probabili conjectura colligere nobis licet, nec proprie dictas naturae vires aduersus morbum ea efficacia salutaris actuosas fore, quae ipsa multam praesertim successus fausti spem concipere permittit.

§. X.

Sed nostrum jam erit, ipsas illas in decursu febrium obuias variae debilitatis causas proponere, ita quidem, ut in omni iis tribuenda potestate experientiam semper ducem sequi adnitamur. E re autem praesertim fore arbitramur, ut istarum quoque causarum effecta specialius distinguamus, atque num in vitalibus aut naturalibus aut animalibus functionibus, et in quibus ex quolibet illorum genere, suam potissimam et primariam nocendi efficaciam exferere videantur, quoad perspicere concessum fuerit, succincte exponamus, quod alias nimis incerta forent, quae hoc niti fundamento debent, momentorum debilitatis aestimatio, ac declaranda pro varia aegrorum affectione consilia. Eo etiam nos intentos esse conueniet, ut hac in causarum disquisitione, num quae ipsarum proprie et simpliciter dictas naturae vires, vel reliquas ab hisce remotius dependentes, potius debilitent, et quisnam ex harum imminuto robore in illarum actiones effectus redundet, sollicite notemus, quo ad ipsum illud, quod elegimus, argumentum, a nobis proponenda semper quoque dirigamus. Quoad plurimas praeterea debilitatis, in febrium decursu obuias, causas, discrimen quoddam generalius attendisse quoque iuuabit, quod quidem tum conditio illarum manifesta et verus agendi modus, tum diuerforum etiam auxiliorum, quibus subuenire fac-

pius

pius concessum, peculiaris indoles facile declarat. Sunt enim his ex causis aliae, quae praesentes vere non minuunt vires, sed earum modo actiones impediunt, et interdum vires quasi opprimunt, ubi demtis aut imminutis his causis, absque roborante aut incitante ullo adhibito remedio, suam vires naturae efficaciam liberius exferere sponte incipiunt; dum aliae potius causae ipsas virium potestates infringant, earumque partem qualicumque ratione consumant. Licet vero quisque, hac modo divisione intellecta, habendam illius in medendo rationem esse, sine dubio sit largiturus, ob utilitatem tamen ejus insignem, aliquam ipsius mentionem hoc loco faciendam esse non dubitauimus.

§. XI.

In aestimandis autem causarum, quas *procatarticas* dicunt, veris potestatibus, atque in ipsa vitiorum corporis inde genitorum efficacia dijudicanda, ad propriam cujusvis aegri constitutionem, quoad inhaerentes illi causas *proegumenas* attendendum semper esse, neminem Medicorum latet. Frequens equidem observatio satis euidenter confirmat, variam naturae virium in februm decursu debilitatem, magna ex parte, a peculiari non solum corporis, sed animi etiam aegrotantium conditione pendere. Non eadem tamen ratione quasvis ad occasionales causas, indeque oriundas corporum affectiones, in debilitate producenda, quaelibet se

gerunt in hominibus obuiæ, et proegumenis hujus mali caussis comprehensæ, dispositiones. Facilius ita succumbunt variis debilitantibus caussis, excretionibus scilicet nimis, inediae, vigiliis, tenerior firmarum partium fabrica, humorumque tenuitas, quales infantili aetati ac aliquo gradu etiam sequiori sexui, multisque vita molliori vtentibus, solemnes sunt; verumtamen haec ipsa quoque corporis tene-ritas, ob actuosiores vitae vires plerumque conjun-ctas, multum simul boni sperare permittit, vbi caussae debilitantes aliae adfuerint, quas nunc inci-tatae vires illae superare valeant, si modo iusta in-medendo dexteritas adhibeatur. Neque manife-stior etiam illa quibusdam in hysteris, hypochon-driacis, grauidis, puerperis, nervosi systematis im-becillitas, licet multas minus commode ferat caus-sas debilitantes, semper defectum istarum simul vi-rum naturae, quas febris postulat sanatio, produ-cit; cum interdum his in aegris circulationis vehe-mentiam antiphlogistica medela potius infringere conueniat. Sed inficias tamen ire non licet, hujus-modi etiam debiliori et mobiliori constitutioni, siue perseveranti siue temporariae, in caussarum praedispo-nentium numero locum omnino esse, praesertim cum ad vires naturae integrum per morbi decursum, quo optatus sequatur euentus, sustinendas, maxi-me quoque respiciendum sit. Praeter ejusmodi vero inhaerentes corporibus debilitates, aliae quo-que praedisponentes occurrunt caussae, quae ad

aegro-

aegrotantium certas in febribus affectiones, variam debilitatem inducentes, aptiora ipsorum reddit corpora, ac ideo ex harum, ut caussarum debilitatis proximarum, indole facile intelliguntur. Sic enim, ut exemplo sententiam illustremus, nemo forte dubitauerit, ad humorum stases, ad crases illorum alienas, ad excretiones aequae nimias ac easdem interceptas, ad plura motuum vitia, certas in corporibus dari diatheses, quae multam et peculiarem his malis ansam praebent. Ipsa autem ex contemplatione caussarum debilitatis proximarum quoque satis liquet, contrarias corporum affectiones, pro vario ipsarum gradu, atque pro diuersa ipsius morbi conditione, debilitati in aegris producendae nonnunquam fauere: nunc firmarum nempe partium rigiditatem aut stricturam, nunc laxitatem illarum aut flacciditatem, humorum abundantiam aequae ac defectum, eorumque spissitudinem pariter ac tenuitatem, excreta non minus ac retenta. Generatim tamen obseruandum, eam inprimis hominum conditionem, quae vel deficientes vel minus actiuas naturae vires, praesertim quoad functiones vitales, illasque viscerum ac systematis nervosi, declarat, qualisque in sedentariis, cachecticis, tabidis, scorbuticis, in illis qui aliis ex morbis modo conualuerunt, in senibus, in meticulosis denique ac spe dejectis *b*), reperiri solet, debiliorem

b) Singulare certe fuit, quod in amico olim, eademque mecum in ciuitate nato, erudito multaeque spei doctoralium in medicina

liorem modo in accedente febre naturae efficaciam promittere, facileque ansam praebere, quo plura dein

cina honorum Candidato IO. FRID. SIEMSEN observare mihi contigit, exemplum, animi, rara et insolita plane ratione perturbati, ex deposita subito et praeter opinionem omni salutis recuperandae spe, in stuporem fere et ἀναισθησίαν delapsi; cumque integra morbi, quo laboravit, conditio, plura tractationis meae capita illustret et confirmet, breuem illius historiam hoc loco subnectere non alienum censeo. — Firma is et inoffensa plures per annos gaudens valetudine, majoris momenti nonnulla subinde neglexit, parvique fecit salutaria ejus conseruandae praecepta, benigno confidens robustioris naturae praesidio. Postquam tamen grauiori cuidam indulserat animi sui indignationi, pluresque per dies eam sustentauerat, neque tunc valetudini suae, licet morbum quendam difficilem sibi instare, inde jam persentiret, vlllo modo prospexerat, a. d. VIII. Maji h. a. febre continua correptus fuit. Atque licet hanc biliosam ipse censuerit, ancipite tamen minimeque probando consilio, quod alii certe non dedisset, vini gallici aliquot haustibus febrilem sibi molestem horrorem initio dispellere viresque languentes excitare tentavit. Quomodo vero inde se habuerit, mihi satis certo non constitit, cum nulli suorum amicorum hoc de morbo ante sextum diem quid aperuerit. Hoc saltem mihi postea innotuit, ipsum die morbi quarto emeticum, dein potionem, quae sal catharticum et nitrum cum succo citri continuerit, sumsisse, atque a die morbi quinto spiritus vitriolici largiorem copiam cum potu ad sitim hauriendo miscuisse, ipsumque his diebus plurimos habuisse vomitus biliosos aluique similes dejectiones. Continuabat vehementior diarrhoea redibantque nonnunquam adhuc sponte vomitus biliosi, arcessito die morbi sexto Ill. SCHROEDERO, Praeceptore et meo optimo, cujus auxilium rogare, petechiis inprimis nunc efflorescentibus, permonebatur. Petechiae, quas et ipse vidi, aegrum ab hoc tempore saepissime inuisens, floride rubri erant coloris, etiam parciore modo solitis in locis eruperant, in collo nempe, pectore, abdomine, dorso et artu-

dein superueniant mala, quibus necessariae ad salutem vires perturbentur ac prosternantur.

§. XII.

artubus. Artuum viribus satis bene adhuc valuit, siquidem pro arbitrio non solum erigere corpus, sed etiam sine aliorum adminiculo surgere et ambulare potuerit. Calor naturalis parum superauit, pulsusque adhuc aequalis nec debilis, licet nec fortis, fuit, respiratio etiam et vox a naturali vix discreparunt. Metuenda nulla symptomata hoc tempore apparebant, praeter diarrhoeam nimis frequentem, inter vomitus spontaneos biliosos, cum amaritie, osi semper adhuc pertinaciter inhaerente, et obtusum aliquem in praecordiis dolorem, somnique defectum; quibus autem nunc praesertim accessit animi ipsius insignis inquietudo, magna quidem parte ex rejecta fere omni conualescendi spe, quae nullis plane persuasionibus, vel maxime sollicitis, nec Medici sui, qui sedulam in id operam adhibuit, licet is jam praesentem metuerit hepatis inflammationem, nec amicorum suorum, nec optimi Sacrorum Antistitis, qui a confessionibus ipsi erat, erigi poterat, veri autem similiter etiam aliis ex curis, quas tamen nostrum nemini aperiebat, oriunda. — Non respondebat, de metu et curarum suarum ratione quaesitus; taciturnus plerumque sedebat vel decumbebat, parum ad ea quae fierent, nec ad amicos, qui ipsum inuiserent, attentus, plerumque se gerens, ac si profundis meditationibus immersus esset. In gerendo consiliis more plerumque modum excedebat. Medicamenta opinato citius consumsit; cum sessio extra lectum pro viribus ipsi commendata erat, commorando in sella; vires consumebat; dato consilio, de ptisanarum decocto, cui succus citri et saccharum modice admista erant, frequentius bibendi, nimis largis haustibus bibit; cum temperatus conclauis calor postulabatur, ad apertam fenestram consedit, atque frigidiori corpus aerae exposuit; cum in his omnibus obseruanda cautio, ne excessu sibi noceret, injungeretur, in contrariam incidendo partem errores commisit. Jam vero cum Ill. Praeceptor statim euacuantium salinorum usum dissuassisset, atque antiphlogistica, antispasmodica, demulcentia, cum rhei tincturae modicis diuisisque do-

sibus

§. XII.

Ex iis vero caussis debilitatis, quae ipsis febre correptis inhaerent aegris, primo loco ipsa febris
 natura

dosibus juxta cum potu memorato commendasset, minuebatur sensim, ac dein sistebatur diarrhoea, rarioresque reddebantur spontanei vomitus, petechiae sine villo aegri damno evanuerant, omninoque fausti successus haud exigua spes affulgebat. Attamen aeger ne minimi quidem solatii inde percipiendi capax videbatur. Sponte rediit aliquoties alui largior excretio, cum aliquo defectionis animi sensu, unde nihil sibi certius morte subita instare persuasissimum aeger habuit; statim tamen aduocatis Medico, et me, et paucis aliis amicis, pulsus, calorem, ruborem, respirationem, sensus, simili fere modo ac antea comparatos reperiēbamus. Per intervalla delirare coeperat, nocte d. XV. Maji et mane sequente, ex vomitionibus autem paucis et facilioribus melius iterum compos mentis reddebatur. Redibant vero deliria eodem die, et quidem graviore sensim cum perturbatione systematis nervosi. Circa vespēram primum diei XVI. Maji debilis valde pulsus erat, calorque naturali inferior. — Cum sollicitè omnia ponderasset Ill. Medicus, vesicatoria ad suras jussit applicari, camphoramque cum antiphlogisticis sumendam praescripsit. Deliria non levata, neque aucta, licet sequentibus diebus minora intervalla habuerint. Vesicatoriorum in cute vix vllus apparuit effectus. Sed jam crebrae quoque ingruebant permutationes. Alterne accidebant pedum, manuum, genarum aestus et frigora, quandoque vno eodemque tempore altera in gena cadauerosum erat frigus, in altera vero vrens calor. Superiores tamen partes, caput, collum, pectus et brachia plerumque nimis calebant, et sudabant. Sensim quoque calor totius corporis eminebat, certioraque apparuere febris putridae continentis indicia. Inter haec deglutitionis difficultatem saepe conquerebatur, licet nullus plane tumor, aut phlogosis, ut oris inspectione constitit, in faucibus adessent. Intermittebat quandoque pulsus, atque tendines in carpis saepe subsiliēbant, etiam sonora deglutitio

natura memoranda mihi videtur, cum docente experientia, febre laborantes reperire fere nullos liceat,

titio inter haec observabatur. Pro indicantium varia ratione omni solertia subuenire aegro nostro adnitebatur ill. Praeceptor, etiam efficacioribus antisepticis et antispasmodicis et aduersus metuendas in praecordiis atque encephalo phlogoses directis remediis, attamen pertinacem nimis et insuperabilem in aegri corpore latentem causam increscens morbus cum decrescantibus vitae viribus declarabat. Ex lethargo tandem, qui per nychthemeron fere duravit, ac plures abiit aeger noster, die morbi decimo sexto. — Non dubitauimus nos ipsius populares, ill. Praeceptorem rogare, ut illius cadauer incidere curaret, qui et hac in re facillimum se nobis praebuit. Quo prolixitatem euitem, praecipua tantum in secando cadauere, proximo post mortem die visa et reperta commemorabo. Totum corpus, praecipue dorsum, non nihil magis ac aliis in cadaueribus consuetum, calebat. In humero dextro et sub clauicula sinistra maculae maiores liuidae conspiciebantur. Intestina maiori ex parte praesertim colon transuersum aere valde distenta, coli tamen sinistra pars maxime contracta. In cauo abdominis sanguis ater et fluidissimus ad uncias fere sex effusus. Integra superficies hepatis inferior profunde liuida; in medio superioris superficiei macula magna ejusdem coloris, strias circumquaque liuidas dispergens, punctisque valde rubentibus circumdata. Separabatur facile digitis membrana hepatis, ac sic emollitum hujus parenchyma reperiiebatur, ac si viscus in aqua coctum fuisset. Vasa hepatis sanguine vere penitus vacua. Superficies lienis conuexa et pars concauae superior pariter valde liuebat, viscerisque hujus substantia, instar pultis intra digitos difflebat. In Diaphragmatis ea regione, cui hepar adjacet, non quidem in carnea solum, sed etiam in tendinea parte rubor et liuor inflammatorius, effususque in cellulosa sanguis vasa diaphragmatis pariter ac illa mesenterii, omenti, intestinorum, ventriculi, comitabatur. Renum vasa eorumque parenchyma sanguine maxime repleta. In utroque thoracis cauo etiam effusus erat sanguis tenuissimus sub-

ter,

liceat, nisi forte peculiaribus ita laceffitos irritamentis, vt auctum robur modo appareat, qui non aliqua lassitudinis indicia praebeant, quietem corporis exercitio ejus praeferant, vigorem sensuum internorum imminutum sentiant, etiam plerumque cum cibi cupiditate decrefcente vel cessante, vires ingesta digerendi et assimilandi labefactatas habeant. Ita fere semper, cum febris inuaserit, etiam quos
artis

ter, qui in dextro fere sex, et in sinistro trium vnciarum pondus aequabat. Superiores pulmonum partes nigrae, pultaceae, foetidae. In piaë meningis certo et circumscripto loco sinistri lateris rubor inflammatorius, in cerebri substantiam plane non penetrans. Mollities encephali naturali non maior, in ventriculis lateralibus multum lymphæ, in plexu choroideo hydatides passim; reliqua satis integra reperiiebantur.

Probabile videtur, graues, quae reperiæ fuerunt, viscerum quorundam corruptiones, antiquiores ea febre, quae mortem attulit, origines habuisse, cum alias sub antisepticorum, initio mitiorum, dein autem efficacissimorum, largo nempe extracti corticis perthuisiani et vitrioli spiritus, modico etiam aluminis et sub decrefcentibus viribus circulationis atque systematis neruosi perturbatione, camphoræ, moschi et vini, licet ubique cauto vsu, eum ad gradum vix peruenire potuissent. Remedia enim vsurpata morbo accommodata fuisse, pariter ac hujus vim illorum; secundum indicantia exhibitorum, efficaciam superasse, cadaueris lustratio satis euidenter nobis declarabat. Maxime autem veri etiam simile censendum, peculiarem qualemcunque in aedibus, quas defunctus inhabitauit, causam, tunc epidemicam latuisse, quae aliquam simul ipsius morbo ansam dederit. Fere simili enim ratione, circa idem tempus, quo beatus aegrotauit, febribus petechialibus grauissimis, eadem in domo, maximo cum vitae periculo laborarunt et aedium domina, et ancillae duae, et seruus, et Chirurgus iuuenis, medicinae quoque studiis deditus, ex quibus quatuor priores ill. etiam Praeceptor curandos habuit, qui tamen omnes quinque ex voto plane conualuerunt.

artis peritus quilibet antea sanissimos judicasset, ex catarrho, ex variolarum insitione, vel aliunde, prout quandoque accidit, subito exorta, statim valde fractas ac infirmatas artuum, stomachi et mentis vires animaduertimus. Omnino saepe peculiare quaedam, et nonnunquam plures simul concurrentes languoris hujus causas obseruare licet, attamen et quandoque de nullis harum, quamuis accurate inquisueris, constat; ut ideo non sine ratione febribus atque febrilibus morbis infirmitas ista essentialis a doctis viris habita reperiatur. Ita inter alios etiam cel. SAVVAGES in generali tradita febris definitione pulsus frequentiae *artuum debilitatem*, pro ulteriori caractere jungendam esse censuit *i*). Non tribuenda vero haec debilitas soli circulationi auctae, cum haec saepe, et multo quandoque celerior ac plurimis in febribus aliunde orta obseruatur, absque omni conjuncto artuum languore occurrat. Neque languor etiam hic in febribus circulationis respondet vehementiae, siquidem in grauiissima nonnunquam pleuritide inflammatoria satis bonum in artubus robur, et in aliis diuersae indolis mitioribus febribus summa quietis cupiditas reperiatur. Minuimus quidem saepe languorem in febre praesentem auxiliis ad varias illius causas directis, reliquum vero aliquem ejus gradum, eumque vna cum febre plerumque sensim incrementem, remouere

i) Nosol. method. T. I. p. 147. et 198.

uere non licet; qui sub finem demum febris nunc cessat, nunc varia ratione saltem minuitur, ita, ut vires denuo sensim inualecant. Et ubi reliqua modo satis bona, viriumque circulationis moderate auctus vigor, nec mentis facultates nimis impeditae aut alienatae fuerint, non metuimus mediocrem, licet cum febre incrementem, lassitudinem, quod per ipsam dein febrem ad nouas iterum recuperandas vires tuta muniri via soleat. Aequè vero difficulter hujus fere perpetui febrium comitis, ubi alia ejus nulla praeter febrem causa detegatur, ac ipsius febris veram originem quis explicauerit. Stasim tamen alicubi, eamque praesertim in praecordiis haerentem, conjicere licet, quam coctio expediat, et crises tollant; quum illa, quae cessante febre superest, debilitas, alias plerumque causas, inopiam nempe aliquam humorum, consumtasque motibus febrilibus, variisque saepe symptomatibus, vires habere videatur.

§. XIII.

Ex pluribus autem causis grauioris in febribus debilitatis, frequenter inprimis *plethora*, eaque variae indolis, occurrit, quae quidem, et praecipue quae vera et absoluta dicitur, extra febres quoque, ut satis peruulgatum, eundem non raro effectum producit; attamen facilius in febre, sanguine per hancce jam commoto, rarefacto, atque nobiliores ad partes congesto, cordique ad ictus celeriores stimu-

stimulato nunc magis resistente, salutarem naturae virium efficaciam pluribus modis impedit. Non enim languorem artuum tantum in febribus auget plethora, sed maiorem quoque capitis grauitatem, et soporem inducit, sensuum internorum ac externorum vigorem saepe minuit, medicatricibus naturae viribus, quoad coctiones et excretiones aequae criticae ac leuantes, obicem ponit. Hinc est, quod aliquando etiam exanthematum illorum, quae criticae aut leuantis sunt indolis, eruptionem impediat, cum venae tempestiua sectione hanc et modo memoratas reliquas ejus noxas haud raro auertere liceat *k*). Sed notatu quoque maxime dignum, aliquando in februm initio, quod sagax docuit HVXHAMVS, fortes et plethoricos magna spirituum deiectione et vniuersali debilitate, conjuncta cum pulsu grauiter oppresso, corripere, quae Medicos minus expertes, num sanguinem emittere debeant, valde dubios reddit, licet hoc necessarium sit, nec aliud quid aegros citius leuet; si praesertim haec magna ex parte a morbi metu ac terrore oriantur *l*). *Suffocationem circulaturi*, alia inter plura mala, non sine ratione ex plethora summus metuit BOERHAAVIVS, ipsumque hoc etiam ejus effatum perill. van SWIETEN accurate exposuit et confirmauit *m*), qui et alibi inter causas debilitatis

H 2

febrilis

k) MEAD de variol. et morbillis, edit. Gotting. 1748 p. 29. HVXHAM'S Essay on Fevers. p. 134

l) Libr. alleg. p. 138.

m) Comment. in aph. Boerb. T. I. §. 106. p. 156.

febrilis nimiam sanguinis copiam expresse retulit, atque venaesectionem suppressas vires toties erigere notauit *n*). Et vel ipsis etiam animi deliquiis, in febrium praesertim initiis, plethoram interdum ansam praebere, clare jam docuit GALENVS *o*); idemque recentiorum etiam complurium obseruatione abunde confirmatum reperimus *p*). Qui vero praeterea perpenderit, quae alia symptomata ex plethora in febribus originem habere possint ac soleant, dum anxietatibus, inflammationibus, vigiliis, deliriis, conuulsivis motibus, soporibus, haemorrhagiis, sudoribus largioribus, etc. excitandis plurimum confert; qui porro etiam abundantem sanguinem difficilius depurari, indeque illam ad putridam degenerationem proniorem fieri, eumque coctiones etiam et crises necessarias maxime impedire, is facile consentiet, quam plurimis modis ex plethora noxiam et periculosam in febribus debilitatem oriri, variasque medicatricis naturae vires per illam quoque diuersimode infringi et perturbari posse.

§. XIV.

n) Ibid. T. II. p. 285.

o) de arte curat. ad Glauc. L. I. c. 14.

p) SAVVAGES Nosol. meth. T. II. P. II. p. 395. SENAC Traité du Coeur L. IV. c. 12. p. 540. HOFFMANN Med. Syst. T. IV. P. IV. p. 266. HIERON. QVEYE Diff. de Syncope et causis eam producentibus. Monspeli 1735. p. 86. in ill. de HALLER collect. Diff. anat. T. VII. p. 308.

§. XIV.

Intelliget vero etiam quisque facillime, quem plethorae differentiae a Medicis notatae, et a cel. in primis GAVBIO accurate expositae *q*), non latuerint, ista fere omnia quoque, licet vario gradu, diuersaque cum pertinacia, variisque cum aliis accedentibus aegrorum affectionibus, a reliquis plethorae speciebus metuenda esse. Superfedere ideo nobis licebit, exponendis nunc respectivae diuersae ratione plethorae, quae et illam ad vires comprehendit, variaeque spuriae, siue apparentis, vel ad volumen dictae, quousque debilitatem inducant, potestatibus. Ipse communis quoque rerum usus quemuis docet, in aestiuo solis calore et in maiore conclavis aestu, plerosque optime ceterum valentes multum fatigari. Etiam lipothymias ex rarefacto sanguine et varia respectiva plenitudine quandoque generari, satis constat; eumque effectum ill. SENACVS praeclare in primis exposuisse videtur *r*). Quam saepe vero non etiam obseruamus, febre correptos, ex regimine calidiori male administrato languescere, eodemque imminuto, et aere liberiore atque frigidiori admissa, dein maxime refocillatos? Neque rara quoque obseruatio est, aucto ex internis causis aegrorum aestu, vires eorum, et praesertim quidem animales, depressas, ab adhibi-

H 3

ta

q) Institut. pathol. med. §. 387. et seq.

r) Loc. cit. p. 541.

ta curatione antiphlogistica denuo increfcere. Ill. autem TISSOTO, plethora vera et absoluta fimplici frequentiore longe effe fpuriam et apparentem, docenti, pluribusque argumentis confirmanti s), lubenter quidem adftipulamur; attamen perfuafum quoque fatis habemus, eum orgasmum, qui plethoram fimulare queat, plenitudini quoad molem non raro conjunctam effe; darique orgafmum ejusmodi febrilem, praefertim vbi de inflammatoria fanguinis diathefi conftet, in hominibus, quibus ante morbum fanguis non abundauerit, qui venaeftionem plerumque et interdum quoque repetitam poftulet. Eft vero, quod ex orgasmo vehementiori, ratione virium inde minuendarum, in febribus fere plus noxae metuamus, quam fola ex plethora, cui intensior fanguinis motus non conjunctus fuerit. Intelligimus enim facile, idemque ipsis etiam in aegris perfaepe comperimus, validius commoto et rarefacto fanguine graues congestiones, inflammationes, corruptiones, euacuationes, vigilias, fopores, dolores, anxietates, deliria et fpafmos cieri; quibus omnibus falutarem naturae efficaciam ipsis in deuincendis febribus maxime infringi poffe, nemo forfan dubitauerit.

§. XV.

Multa praeterea funt, quae varias, certis modo partibus inhaerentes cauffas, debilitatem nunc
toto

s) *Diff. de febr. biliof. Lauſannae 1758. p. 121. et ſequ.*

toto in corpore, nunc vero in quibusdam saltem et interdum quoque vitalibus in functionibus, inducere confirmant. Inprimis autem ipso encephalo, a repletis praeter modum capitis vasis, propius affecto, variae indolis languores in febribus haud raro nasci, aegrorum observatio satis euidenter docere videtur. Omnes fere norunt, quam molestus languor, quamque ingrata capitis grauitas, cum sensuum internorum torpore et somnolentia sentire plerumque soleant, qui catarrho ad nares vel mediocris vehementiae laborant; quibus pleniora iusto capitis vasa esse, rubor faciei, oculorum, narium, susurrus aurium, calorque capitis auctus manifeste testantur. Neque rara etiam illa est observatio, capitis hebetudinem et fractas artuum vires percipi, ubi ob aluum diutius clausam, collectosque flatus, aut ob alia, quae sanguinis per abdominalia vasa progressum difficiliorem reddant, major ejus copia ad superiores corporis partes congeratur. Satisque inter Medicos etiam constat, orta vndeunque praeter naturam encephali pressione, sensus externos aequae ac internos, neque minus motricem facultatem, quandoque et illam cordis, vario gradu minui, interdum etiam deleri *t*), indeque stupores, sopores, paralyfes, apoplexias, hasque subito nonnunquam lethales, generari. Non ergo mirum, hoc sub rerum statu, ubi a sanguine ad caput vberius congesto, maxime debiles aegri sunt, et vel

H 4

. ipsa

t) DE HALLER *elem. Physiol. T. IV. p. 299-304. 346-349.*

ipsa voce defecti jacent, aut vertigine tenebricosa corripuntur, largiori sanguinis ex naribus fluxu illos ex voto saepe refocillari *u*). Nec dubitare, complurium ex observatione, licet, natam in aliqua parte encephali phlegmonem, ortumque inde apostema, sensuum potius hebetudini, languorique ac stupori, cum pulsu arteriarum debiliori ac tardiori, quam delirio, et praesertim quidem agiliori cuidam et furioso, ansam praebere *x*). Quae vero in febribus contingunt, sanguinis ad caput congestionem, in aliquo viscerum imi ventris, quae ad chyli officinam pertinent, vitio suam profecto saepissime originem habent. Vt enim praesentibus ejusmodi capitis affectionibus, quas distendenti ejus vasa sanguini tribuere licet, vel humorum aliquam stasim, vel certum quoddam irritamentum, si accurate attendamus, in praecordiis haerere plerumque animadvertimus; ita quoque ipsas sanguinis ex naribus stillationes, absque simili eisdem in partibus haerente vitio rarius observamus. Notatu ideo dignissima circa haec plurima certe sunt HIPPOCRATIS pronunciata, quibus praecordia, tumida, dura, dolentia, palpitantia, aequae capitis dolores, deliria, convulsiones, ac narium quoque haemorrhagias

u) HIPP. *coac.* n. 77. 341. *Praedict.* Libr. I. n. 152.

x) *Conf.* TH. WILLIS *de anima brutorum* p. 161. *Oper. edit.* Amst. 1682. MORGAGNI *de caus. et sedib. morb. epist.* VII. n. 8. F. PRINGLE'S *observat. on the Diseases of the Army* P. III. Ch. 7. §. 4. *edit. in 4to.* p. 301. *sqq.* HOME'S *Medical facts and experiments* p. 12. 184. *sqq.*

rhagias fignificare memorauit y). Eo vero probabilius illorum fymptomatum, quae fanguinis congeftione caput in primis affectum declarant, caufam praecordiorum vitio cuidam tribuere perfaepe licet, quod fimili fub rerum ftatu, quo narium haemorrhagia leuamini cedit, interdum et fponte oborti vomitus, aut alui fluxus plurimum iuuare foleant z).

§. XVI.

Neque, fecundum accuratiores complurium obferuationes, dubitandum, quin et illis in febribus, quas *malignarum* nomine infignire multis libuit, quae nempe mitioribus ex initiis difficiles aegris infidias parant, quarumque fymptomata minus ac alias inter fe, morbique temporibus, ob fystema neruofum perturbatum, conueniunt, et quas grauiore praefertim capitis et neruorum affectiones comitari folent, quae praeterea quoque virium non folum animalium fed vitalium etiam et fpontaneas quaslibet functiones dirigentium, debilitatem folito maiorem, ipfamque naturae potestatem, quoad coctionem et crifin perficiendam, occultioribus fubinde atque dubiis ex cauffis fractam fiftunt, primaria faepiffime labes in praecordiis, varia ra-

H 5

tione

y) Coac. 110. 280. 296. Praedict. I. 125. 144. II. 164. Conferri quoque hac de re meretur VAN SWIETEN Comment. in aphor. Boerb. T. II. p. 461-462.

z) H.PP. Aph. 60. feft. IV. Coac. n. 77, 208, 210, 334. Prognost. n. 144.

tione alienatis contineatur. — Nolumus tamen dijudicandae huic aliisue malignitatis febrium ideis, atque damnofo hujus vocis abufui, cui permulti indulferunt, reprobando nunc immorari, quum hoc de argumento folide jam tractauerit, ejusdemque expositionem a fe vltcrius perficiendi fpem fecerit Clariff. apud Stadenfes Medicus, mihique amiciffimus, HENR. MATTH. MARCARD *a*). In memoratae autem indolis febribus, quales haud raro paffim epidemicae reperiuntur, et quae praeter generale illud nomen, ob variam reliquam conditionem, quandoque et illa *catarrhalium malignarum, petechialium, biliofarum, mesentericarum, intestinalium, gastricarum*, a Practicis obtinuerunt, plura atque certa omnino frequenter occurrunt vitiofae colluuei, primas ad vias delatae, indicia. Vtque natura haud raro in hujusmodi febribus per vomitum et alui fluxum fibi ipfi leuamen praestat, fic etiam fimili ratione, noxiam nempe iftam eliminando faburram, artis auxilia, remittente ab officio natura, ad aegrorum falutem quam plurimum faepiffime conferunt *b*). Quam plurimis vero atque certiffimis Auctorum fide digniffimorum obferuationibus, quas et quisque artis in exercitio non plane rudis facile

a) Diff. fift. examen rigorofius malignitatis febrilis. Goett. 1770.

b) BAGLIV Oper. Lugd. 1733. p. 251. 388. SYDENHAM paffim, praefertim in fched. monit. de nouae feb. ingreffu; Opp. p. 517. fqq. TH. GLASS Comment. de febr. comm. VII. HUXHAM'S Essay on Fevers p. 109. fqq. Ejusd. de aere et morb. epid. obferu. anni 1740. Iun.

facile saepius ipse confirmatas viderit, maxime palam constat, colluiei isti non lassitudinem solum artuum, sed sensuum quoque internorum hebetudinem, ac omnem plane debilitatis formam, sopores etiam, animi defectiones et apoplexias, suam per saepe et satis manifeste originem debere c). Eaque ratione et sine dubio multis in febribus res habet, et praesertim quidem in illis, quae modo memoratis nominibus insignitae fuerunt; siue humorum congestiones excitando, siue aliaratione systema neruofum propius afficiendo, colluies illa forte praesens grauiorem vario gradu debilitatem inferat d). Habemus tamen, quod nobis caueamus, ne quorundam assertionibus nimis forte generalibus, quoad hujus causae potestatem, plane confidamus; quum praesertim iis in febribus, quibus, subdola post initia, febris mitioris indolem simulantia, grauior sensim et euidentior systematis neruosi perturbatio accedit, ita quidem vt dolores capitis, colli, lumborum, manuum et surarum, pallida vrina, sitis defectus, calor membrorum permutatus, incerti horrores, linguae tremor, animi

c) Conf. HENR. IOS. REGA de *sympath. s. consensu part. corp. hum.* ac potiss. *ventric. c. VII.* BOERHAAVE *praelect. de morb. neruor. p. 460* SENAC *traité du Coeur T. II. p. 545. 546.* ROB. WHYTTS *Works p. 497-499. 547. III.* SCHROEDER Resp. GE. PH. KOCH *diff. de apoplex. ex praecord. vitiis origine. Goett. 1767.*

d) V. SWIETEN *comm. in aph. Boerb. T. II. p. 271.* SYDENH. *oper. p. 56.* Conferri etiam plures merentur, quos Clariss. MARCARD *laud. Diff. p. 49. 50. allegauit.*

animi incuria et abjectio, frequentius aut perseverantius delirium et agrypnocoma, etc. absque solitis in meliori statu causis, accesserint, probabili saepe conjecturae de inflammatoria stasi, praecordiorum in visceribus maxime, nonnunquam et in aliis, suborta, locus omnino esse videatur. Ut enim grauiorem hanc aegrorum sic decumbentium affectionem satis certa quandoque signa declarant, dolor praesertim, tumor, aestusque praecordiorum, vomitus frequentior non leuans, et singultus, lingua sicca aspera et fissa, nimisque rubra, aut nigra, cum paucis, subalbis, aut fuscis, et nimis foetentibus dejectionibus; sic etiam ipsae cadaverum sectiones ejusdem praesentiam subinde satis euidenter confirmarunt *e*). Ipso autem rerum usu

- e*) De hoc rerum statu intelligendus videtur ARETAEVS cum de curat. morb. L. II. C. III. edit. Boerb. p. 100. ad syncopen, quae a plenitudine ex ardente febre fiat, et ubi inflammatio aliqua insignis in praecordiis aut jecinore appareat, non differendam esse venae sectionem suadet; pauloque post monet, multo minus sanguinis, quam in aliis occasionibus detrahendum esse, quia vel minimus hic commissus error ad interitum duceret. — Caeterum conf. F. HOFFMANNI Med. syst. T. IV. P. I. cap. de febr. ardente et choler. thes. path. §. VI. p. m. 345. de febr. petech. §. VII. p. 260. v. SWIETEN Comment. T. II. §. 735. Etiam notabilia omnino sunt, quae BOERHAAVIVS aphor. §. 950. docuit, ex iis quae de hepatitide et ictero multiplici proposuerit, intelligi posse infinita symptomata in morbis acutis occurrentia, quorum ignota ratio inanes malignitatis fabulas produxerit. Attentionem quoque meretur BAGLIVI sententia: quae nobis videntur malignae febres, a viscerum phlegmone aut erysipellate fluat, Oper. L. I. c. IX. p. m. 51. licet causae huic dein adjungat

usu edocemur, hujus indolis febres, quas forte phreniticas et paraphreniticas apte vocaremus, vel melius etiam generaliori acutiorum nervosarum nomine comprehenderemus, frequenter simul ex genere esse biliosarum; neque raro putredinis humorum nunc majoris, nunc vero minoris conjuncta indicia habere; quandoque tamen putredinis etiam et biliosae colluviei signis destitui; quo postremo sub rerum statu interdum ad inflammatorias, aliquando vero ad lentas nervosas propius accedunt. Neque dubitandum, quum haud raro ita aegrotantium corpora vermibus scatere intestinalibus compertum sit *f*), atque horum in perturbando morborum

gat p. 52. *apparatum pravorum crudorumque humorum in primis viis vel in massa sanguinis.* Con entit quoad viscerum inflammationes VALCARENGHI *Medic. rationalis Sect. III. c. 3. §. 303.* Ut quoque MORGAGNVS *de caus. et sed. morb. epist. XLIX. no. 35.* et BRENDÉLIVS *Diss. de cognatione paraphrenit. et febr. malign. §. X.* Attamen illas nequaquam plane in uniuersum omnibus communes esse, qui febribus hujusmodi paraphreniticis, subdolis, et nervosa varia perturbatione stipatis extinguuntur, clare probant observata TISSOTI *Diss. de feb. bilios. p. 23.* KLOECKHOFF *opusc. med. p. 55. seqq.* BISSET *Med. Essays and observ. p. 50. 53. 58.* dissectiones cadauerum proponens febre flaua Americana mortuorum. Praeterea vero nunquam non, ut ill. quoque MORGAGNVS docet, cogitandum, quae in visceribus siue inflammationes siue gangraenae, siue alia dissecantibus se obtulere, effectum potius praecipui latentis morbi quam morbum ipsum facile fuisse. *De caus. et sed. morb. ep. LXVIII. n. 3.*

f) PRINGLE'S *observ. on the diseases of the Army p. 171.* HUXHAM'S *Essay on Fevers p. 271.* Ejusque *observ. de aere, et morb. epid. anni 1743. mensis Apr. et Maji; Lips. p. 383. 290.*

rum decursu, plurimisque praesertim symptomatibus nervosis producendis, permagna sit potestas g), quin et peculiaris ista grauis et maligna dicta febrium multarum indoles ab alienis hisce hospitibus vel ex parte suam quandoque originem habere queat b). In modo memoratis ideo nervosis acutioribus a nobis dictis febribus, ob reliquam earum maxime discrepantem indolem, vix quid perpetui, ratione debilitatis, expectari poterit. Si grauioribus aliis immunes fuerint infirmitatis causis, aegri quandoque non initio tantum morbi, sed ejus etiam in progressu, corpora erigunt, nonnihil ambulant ab aliis parum sustentati, soli extra lectulos in sellis confident; talisque virium status spasticas inter permutationes periculosas interdum quoque observatur i). Horrendus vero sub herba quandoque anguis latet, ubi varia gliscentis phrenitidis indicia cum debilitate sub initiis febrium conjuncta fuerint; secundum illud Hippocraticum: *inter initia soporosi, cum capitis, lumborum, praecordiorum, cervicis, dolore, peruigiles, annon phrenitici sunt k)*? Peculiaris etiam debilitas, huc forte referenda, sequentibus designatur; *qui sopore oppressi, circa initia breuiter*
ex-

g) ROB. WHYTT'S. *Works*. p. 573. 574.

b) Praeclarissime de hac medicinae parte meritus est cl. VAN DEN BOSCH in libro quem inscripsit *Historia constit. epidem. verminosae*. Lugd. Bat. 1769.

i) Hujusmodi rerum conditionem etiam in populari nostro b. SIEMSEN observare nobis licuit.

k) *Praedict.* L. I. n. 1. conf. *Coac.* n. 175.

exsudantes, cum urinis coctis, ardentes, citra judicationem perfrigescentes, et breui rursus ardentes, torpidi, soporosi, conuulsi, perniciose habent l); itemque his: mentis emotiones tremulae, obscurae, palpatoriae, prorsus phreniticae m). Quam diuersissimam vero in his, plurimisque aliis ab HIPPOCRATE notatis, rerum conditionem animaduertimus, perturbato simul ac infirmato systemate neruoso.

§. XVII.

Jam vero satis quidem certo constat, cum indole illa modo memorata febrium, quas generatim neruofas dictas velimus, humorum crasin tali ratione alienatam non raro conjunctam reperiri, qualis putredinis nomine distingui solet, nihilominus tamen habebimus, quod nobis caueamus, quo minus easdem ipsas febres, atque veras putridas, quas discrimen verum intercedit, inter se confundamus. Vt enim quandoque phrenitides, haeque subinde paucis diebus lethales n), aliaeque febres, cum perturbatis ex occultiori causa cerebri et neruorum functionibus o), occurrunt, vbi putridae
cujus-

l) Coac. n. 180.

m) Praedict. L. I. n. 34.

n) Conferri merentur historiae phreniticorum in HIPP. Epid. L. III. LIND. T. I. p. 716. 733, FORESTI obseruat. I. et nonnullae sequentium L. X. SYDENHAM sect. I. c. IV. p. m. 69. PRINGLE'S obs. p. 133. Vbi ait: *The phrenitis happens indifferently in the bilious, malignant or inflammatory Fever.*

o) Conf. BRENDELII Diss. de cognat. paraphrenit. et feb. malign. MORGAGNI l. c. epist. XLIX. n. 13. 14. 22. 23. Plura exempla

cujusdam corruptionis indicia fere nulla, neque majora, ac in miti febre intermittente vel simplici quadam catarrhali animaduvertere licet; ita quoque de neruosa lenta febre, in qua pariter ac in modo dictis, uaria ratione perturbatae, oppressae et consumtae naturae vires, occultioribus ex originibus, reperiuntur, manifeste liquet, aegrorum corpora indiciis verae putridae talis corruptionis, qualem alias hoc nomine intelligimus, subinde plane destitui *p*. Atque ex contraria parte satis etiam constat, ejusmodi dari febres, quibus putridam indolem denegare nemo possit, quum hujus indicia cuius quandoque sint eulentissima, quae tamen simul systematis neruosi vigorem, quoad vires tum animales, tum spontaneas dictas, praesertim et illas circulationis, fere integrum, neque magis ac ordinariis in faciliore febribus alienatum, conjunctum habent *q*). Minime vero in dubium vocare ausim, putridam humorum corruptionem ad causas pertinere debilitatis; attamen, quo rectius hoc symptoma aestimare queamus, varias istius corruptionis

plā hujus generis febrium, ipsarumque phrenitidum, in quibus probabilia putridae humorum corruptionis indicia plane defecerant, suis in lectione pract. nobiscum communicauit Ill. SCHROEDERVS.

p) V. LANGRISH'S *modern Theory and Practice of Physic* p. 329. HUXHAM'S *Ess. an. Fev. ch. VI.* vbi ex instituto de differentia lentar. neruos. atque putrid. febrium egit. Eandem quoque differentiam notauit PRINGLE *libr. cit. p. 339.*

q) Exempla nonnulla memorauit clar. MARCARD *Diff. alleg. p. 52. 53.*

ptionis origines, gradusque et conditiones reliquas distinguere omnino expedit. Generatim quidem putredinem naturae vigori facile aliquam inferre vim posse, quisque concesserit, quod irritando grauiiores saepe congestiones ad viscera nobiliora producat, quod fluxibus sanguineis, aliisque nimis et intempestiuis excretionibus, humores dissoluen- do, ansam praebeat, quod etiam quandoque pro- xima noxiorum halituum in nervos actione vires ipforum prosternat; sed si illas perpendamus, quae occurrunt, corruptionis illius varietates, magnam tamen in efficacia ejus debilitante discrepantiam fa- cile animaduertemus. Interdum nempe inflamma- toriae, aliaeque febres imputres, siue cum aliqua certae partis inflammatione conjunctae siue hac immunes, ex medela conueniente intermissa, ad- hibitisque forte regimine, victu, medicamentis ca- lesfacientibus, humores commouentibus, excretio- nes necessarias inhibentibus, in putridas sensim transeunt *r*). Quandoque et sanguinis abundantia, humorumque impuritas, vitaeque vires aliunde de- biliores, efficiunt, vt major nunc ad corruptionem putridam pronitas oriatur. Quum autem de reli- quo,

r) Conf. SYDENH. Sect. II. c. II. p. m. 106. ejusque sched. monit. de nouae febr. ingressu p. m. 540. Etiam v. SWIETEN Com- ment. T. II. p. 419. bene notauit, dum mala medendi methodi tentantur simplices febres, mutatis a naturali sua indole humori- bus, in synochum putrem degenerare possunt.

quo, varia sint vitiorum curationis, quae ad illum euentum ducant, genera et gradus, ipsarumque febrium illarum, quae ad imputres recte referuntur, insignis differentia, praetereaue permultum, quoad hanc noxam, peculiari cuiusque corporis tribuendum sit constitutioni; neque minus praesens aequae ac praegressa tempestatum victusque ratio plus minusue per saepe putridae humorum degenerationi vel faueat, vel obstat), nemo certe non largietur, diuersissimam esse posse rerum, in excitata sic putredine, conditionem. Atque hunc varium maximeque discrepantem euentum, nobis interdum ferius aduocatis, etiam ratione debilitatis, obseruare contigit, vt quidem in quibusdam, iisque praesertim simplici antea inflammatoria febre correptis, non deficientibus putredinis manifestioribus indiciis, corpus erigendi, suasque molestias enarrandi, potestatem, cum satis laudabili secretionum et excretionum successu, animaduertimus; quum longe minorem in biliosis et neruosis, ex putredine accedente, vigorem virium obseruare plerumque liceat. Vidimus in Collegio ill. SCHROEDERi Clinico, in quo non sine insigni meo emolumento quam plurimos notatu dignissimos morbos, eorumque curationes per annum obseruare mihi licuit, etiam verminosos infantes, quos ex diu tolerata maiori lumbricorum copia, febris cum liuidis

pe-

s) conf. WINTRINGHAMI *comment. nosol. in Works Vol. II.*
p. 207. 211. 296. *sqq.* et alibi passim.

petechiis aliisque putredinis signis affligit, viribus corpus erigendi et ambulandi non plane destitutos, nec de reliquo valde infirmatos. Ex abundantiori quoque purulentae materiae copia, putrida laborantes variolarum secundaria febre, immo etiam aliquando cum subliuidum passim cernatur pus, satis bonis artuum, cordis et animi viribus non raro adhuc praeditos, viriumque naturae superstitem in illis potestatem, ad superandum morbum satis efficacem, per saepe observamus. Nonnunquam ex occulto quodam corporis vitio, quod quandoque absorpto vomicae antiquae corrupto puri, aliquando et bili acriori collectae et retentae tribuere licet, gangraenosae oriuntur in variolis pustulae, et cum in his tum in aliis acutis maculae lividae multae nonnunquam accedunt, viribus istis similiter non valde prostratis. Vt ideo sua inter se asserta conciliare vix posse videantur, qui ad malignitatem virium insolitam debilitatem requirant, simulque veram ejus indolem in putrida humorum corruptione consistere tradunt.

§. XVIII.

Plerumque vero grauior apparere solet debilitas iis in putridis, quae ex humorum corruptorum, variae ceteroquin vitiosae indolis, praesertim vero bilioforum, in praecordiis collecta, sensimque augeri solita, colluue plus minusue pendet, atque ad *gastricas* BALLONII, BAGLIVIQUE

mesentericas, multorumque *biliosas*, aliorum etiam ad *ardentes*, referendae sunt, saepiusque epidemicae obseruantur, atque sub nominibus *catarrhalium malignarum*, *petechialium*, *malignarum simplicium*, a multis descriptae reperiuntur. Quum enim et absque putridae febris notis, vt jam supra monui, vitiosus in praecordiis haerens humor per consensum variae indolis debilitatem inferre queat, multo certe facilius, turgescencia febrili accedente, putredinemque corrupti fomitis augente, aut causa communi et reciproca cum ista colluie etiam reliqui corporis humores inficiente, maiorem ad gradum illa perducı poterit. Atque harum febrium si descriptas a fidis Auctoribus historias perlegamus, ipsasque subinde occurrentes intueamur, cum his persaepe artuum ab initio prostratas vires, immo et aliquam ante febris initium lassitudinem et vertiginem, praeterea in febre de membris quasi conquassatis ac obtuse dolentibus querelas, et erigendi corporis impotentiam, et motuum quandoque simul internorum languorem, nonnunquam et pronitatem ad animi deliquia, et somnolentiam, et oppressam perturbatamque naturae ad morbum deuincendum efficaciam, conjunctas esse, facile nobis compertum habere licet. Minor vero debilitatis, omnibus in functionibus, modus aegros illos corripere solet, qui absque vitiosa praecordiis inhaerente colluie, sed interna tamen ex causa, quae circulantes humores infecerit, putrida quadam

dam febre laborant *t*). Vbi autem his grauior debilitas accesserit, eadem saepe pertinacior et periculofior ac in illis ex colluuie reperitur, quum causam difficiliorem, vt vitium corporis antiquum, inflammatoriam stasin in gangraenam tendentem, etc. non raro habeat; dum e contrario in altera illa febre, debilitatem etiam valde grauem vel ipsis etiam catharticis et emeticis deuincere persaepe liceat *v*). Verum ab harum putridarum vtraque, vt origine, sic et vera sua indole ac debilitatis conjunctae modo, multum discrepant, quae foetidis corporum diuersi generis, aquarum nempe stagnantium, vegetabilium corruptorum, in primis vero animalium putridorum, atque ex his praecipue putridis hujusmodi morbis jam laborantium, exhalationibus, excitantur, facileque per contagium, cum permagna hominum strage, vltius propagantur. Ipsum quidem facile se diffundens contagium solam hujus morborum generis naturam non satis definit, quum, vt de variolis et morbillis constat, atque de vera peste *x*), similiter ac de

I 3

qui-

t) Pulchre hanc putridarum differentiam exposuit cl. van den BOSCH. *Histor. constit. epid. verm.* p. 45. et *sqq.*

v) SYDENH. *opp. m.* 56. 370. BAGLIV. *opp.* p. 702. HVXHAM *Ess. on Fevers* p. 109. 142. *sqq.* TH. GLASS *comment. de febr.* p. 116. *sqq.* 124. 149. 155. CAR. STRACK *obseru. de morbo cum petechiis.* TISSOT *diff. de febr. bilios.* p. 32.

x) SYDENH. *oper.* p. 110. 117 - 120. *Traité de la Peste. à Paris* 1744. p. 41. ADAMI CHENOT *tract. de peste.* Vindob. 1766. p. 59. *sqq.*

quibusdam contagiosis petechiis *y*), confirmatur, mitem quandoque decursum, indolemque a putredine et neruosa perturbatione alienam, contagia febrilia producant, praetereaue certis animantium generibus proprii dentur morbi contagiosi *z*). Illud quidem commune est hisce specificis contagiis cum putridis memoratis exhalationibus, quod nervos praesertim, seu vitale ipsum in corporibus principium, aggrediantur *a*), atque per hujus alterationem, bilis etiam secretionem et crasin, plurimasque functiones perturbare soleant *b*). Febres autem illae, putrido ex fomite primum genitae, et ab vno in plures, etiam sanissimos dispergi solitae, frequenter in primis in carceribus, nosodochiis, nauigiis, castris, ergastulis, et oppugnatis urbibus, observantur, indeque a multis *febres carcerum, nosodochiorum*, etc. ab aliis etiam *pestilenciales* dictae fuerunt; quandoque et sub nomine *pestis* descriptae, et per saepe sub illò *malignarum febrium* comprehensae, aut eodem κατ' ἐξοχὴν insignitae, reperiuntur. Hujusmodi autem in febribus, prouti ex accuratis, praecipue recentissi-

y) STRACK de morb. c. petech. p. 19. 119. sqq. KLOECKHOF opusc. med. Traj. ad Rhen 1747. n. 94. sqq.

z) Traité de la Peste p. 125. 209.

a) Ibid. p. 75. MEAD diff. de peste; edit. Gött. p. 33 sqq. HVXHAM on Fevers p. 106. 139.

b) WINTRINGHAM'S Essay on contagious diseases; Works Vol. I. p. 233. HVXHAM on Fevers p. 109.

tissimorum Medicorum, WINTRINGHAM c), PRINGLE d), HVXHAM e), MONRO f), BROCKLESBY g), observationibus euidenter constat, non modo singularis artuum languor apparet, sed grauis etiam, per omnes functiones corporis, atque mentis facultates, infirmitas magis magisque diffundi solet; quae ipsa irregulares horrores, pulsum incremente morbo depressiorem, caloris defectum, animi deliquia, stuporem, torporem, deliria, motusque spasmodicos, in multis producit. Atque licet initio multi aegrorum adhuc orthostadii reperiantur, etiam in plurimis per aliquam morbi partem pulsus naturali non minor, atque ideo etiam in diagnosi error non facillime semper euitetur h), pro integro tamen reliquo aegrorum statu, causis illis, quas detegere concessum, solito grauior et aduersus remedia alias laudabilia et efficacia, magis refractaria et pertinax, ac intimis quasi corporis medullis inhaerens infirmitas, inter morbi huius characteres potissimum prae aliis eminet. In multis quidem non deficiunt manifestiores variae, etiam alias obuiaae, debilitatis causae, siquidem non raro vitiosa et putrida colluies praecordiis in-

I 4

haeret,

c) *Ess. on contag. Diseases.*

d) *Observ. on the diseases of the Army. ch. VII. on the Jail or Hospital Fever. p. 287. sqq.*

e) *De aere et morb. epid. edit. Lips. p. 268. sqq. 240.*

f) *Account of the Diseases in the Hospitals p. 1. sqq.*

g) *Oec. and Med. observ. p. 200. sq.*

h) BROCKLESBY l. c. p. 208.

haeret, perturbataque est viscerum primae officinae functio *i*), quandoque vera etiam plethora praesto est, atque turgescencia sanguinis, nunc sani nunc etiam inflammatorii, et sub morbi progressu quoque dissoluti. Omni praeterea dubio vacat, inflammationes viscerum *k*), prae aliis forsitan hypochondriacorum atque cerebri *l*) accedere. Denique et euidentiora sanguinis putrescentis indicia sensim ac saepe satis cito sese exserunt *m*). Quum vero haec omnia eam ad conditionem debilitatis, quae his in febribus reperitur, producendam, sufficere non videantur, peritiores febre quilibet a peculiari putridi miasmatis in nervos actione illam majori ex parte esse deriuandam statuerunt *n*). — Maximi vero momenti est, febris hujus carcerum et nosodochiorum cum illa, quam *lentam nervosam* dicunt, quoad ipsam non solum debilitatem grauiorem, sed alia quoque symptomata, curationisque instituendae modum, insignem aequae conuenientiam ac illos intercedentem discrepantiam accurate cognitas habere. Praelucere in morbis hisce distinguendis sagax imprimis HVXHAMVS poterit *o*), cujus tamen ideae et praecepta hoc de argumento tradita,

i) Ita BROCKLESBY *l. c. p. 203. frequently a foul furred bilious tongue, and often a bad taste in the mouth came upon them.*

k) MORGAGNI *de causis et sed. morb. ep. XX. no. 4.*

l) PRINGLE *l. c. p. 300. sqq. et 338*

m) HVXHAMVS *Ess. on Fevers ch. V. et VIII.*

n) *Conf. in primis PRINGLE l. c. p. 337.*

o) *Ess. on Fevers ch. VI. et VII. De aere et morb. epid. p. 163.*

tradita, apud alios optimos etiam Scriptores, GLASS *p*), LANGRISH *q*), WINTRINGHAM *r*), GILCHRIST *s*), MANNINGHAM *t*), PRINGLE *u*), HOME *x*), aliosque, abunde confirmata reperiuntur. Primum characterem lentae hujus nervosae febris in eo posuit HUXHAM: *the slow nervous Fever frequently runs on to a great Length of Time, without any considerable Signs of putrefaction* *y*), licet etiam largiatur, ubi diutius durauerit, feri corruptionem accedere *z*), et hanc febrem cum putridis veris quandoque complicari *a*). Contagium quaecumque ansam huic febrī in dispositis praebere potest *b*), siquidem et variolosa febris, et plures quoque aliae, hujus interdum indolis obseruantur *c*), attamen idem pro causa minime postulat. Proposita hujus morbi historia, et recensitis antecedentibus ejus causis subjungit HUXHAM: *Whence I thinck it evi-*

I 5

dent,

p) Comm. de febr. p. 130. sqq.

q) The modern Theory and Pract. of Physic. eb. X. p. 329.

r) Comment. Nosol. in Works Vol. II. p. 203. 222. 225. et alibi passim.

s) Med. Ess. of Edinb. Vol. IV. et V.

t) On the Febricula.

u) l. c. p. 338.

x) Med. Facts and Exper. p. 1. sqq.

y) Ess. on Fevers p. 12.

z) ibid. p. 89.

a) ibid. p. 73.

b) ibid.

c) ibid. p. 127. et cl. FELLINGER Praeside SCHROEDERO habita dissert. de variolar. distribut. in primis rat. febr. conjunct. §. XIII. Etiam cl. ELLERT eod. Praes. habita Diss. de pleurit. partit. XII.

dent, this disease arises from a too relaxed state of the Solids, a poor weak Blood, and a Lentor and Vapidity of the lymphatic and nervous Juices d). — Ex pituitae, in primis viis et reliquo corpore abundantis, lentore et peculiari corruptione, has praesertim febres deriuauit TH. GLASS e), eademque fere est FRANC. HOME sententia f). Sed hic ipse clariss. Auctor cadauerum inspectione quoque detectas in cerebro ac cerebello suppurationes refert g), atque alibi hujus etiam obseruationis exemplum proponit h). TH. quoque WILLIS in cadaueribus, ex febre plane simili defunctis, *vasa meninges perceptantia sanguine plurimum turgida, quasi fere tota cruoris massa in capite aggesta esset*, se conspexisse, retulit i). Consentit quoque ill. PRINGLE: *The Fevers*, inquit: *of the low and nervous Kind carry strong marks of an inflammation of some part of the Brain* k). Attamen perpetuam hanc esse conditionem febre hac laborantium, non facile quis contenderit, qui graduum et varietatum ejus historiam integriorem animo tenuerit. Ex hisce vero jam satis apparet, quaenam peculiaris his in febribus sit caussarum debilitatis indoles, et in quam graui discrimine inde praesertim

d) *ibid.* p. 30.

e) *l. c.*

f) *Princip. med.* p. 77. §. 3.

g) *ibid.* §. 4.

h) *Med. Facts and Exper.* p. 12.

i) *De morb. convuls.* C. VIII. p. m. 51.

k) *l. c.* p. 338.

tim aegri versentur, quod hoc symptoma per omnes fere corporis animique ipsorum functiones distributum esse soleat.

§. XIX.

Singularem praeter haec attentionem debilitas illa meretur, quae in vigorem febrium non raro incidit, eamque dierum praecedentium persaepe quoque superat, et quam ipsa praesertim salutaris naturae efficacia quandoque producere solet. Plures quidem sunt causae, quae conjuncta potestate ingrauescenti eo tempore debilitati ansam praebent, verumtamen a reliquis ipsa naturae molimina distinguere expedit, quibus praeparatam materiem febrilem eliminare contendit; quippe quae, dum hocce negotium aggreditur, alia inter symptomata, plerumque simul grauiorem virium praesertim animalium languorem, et maxime quidem spasticas per congestiones, inducit 1). Non quidem est, quod dubitemus, grauiores tales criticas perturbationes, quales a veteribus memorantur, per satis efficacem, simulque morbis ex omni parte accommodatam mendi rationem, prouti optime notauit ill. de HAEN *m*), multo rariores reddi; attamen ipse usus rerum satis euidenter quoque docet, naturae omnino, ut in coctionis et criseos, ita etiam ipsius in per-

1) Conferri merentur HIPPOCRATIS pronuntiata, *coac.* 19. 182. 208. 555.

m) *Rat. m. d. P. I. p. 70. 71.*

perturbationis criticae negotio, singularia quaedam jura esse, quibus priuari se impune haud sinat *n*). Hoc autem sub rerum statu, eo utique melior spes fausti est successus, quo integriores de reliquo naturae vires, quoque minus suis in muniis impeditae fuerint; quum alias vel ipsae morbi grauitate opprimi, vel aeger mala etiam crisi exstingui queat *o*). Non raro tamen imbecillior quoque natura ex causis est longioris morbi durationis minusque perfectarum crifum, et inprimis quidem variae indolis abscessuum, tunc praesertim, vbi haec in febre minus lethali conjuncta fuerint, citius aut ferius aegro accidentium *p*). Verum in id omnino sollicitè semper attendendum, ne meliorem hanc rerum conditionem qua valentior in reliquis natura virium animalium languorem comitatur, eumque ipsum forte produxit, cum oppressa aut plane impedita ejus ad coctionem et crifin necessaria facultate, vel vndecumque fractis, detritis, aut consumptis ejus viribus vnquam confundamus.

§. XX.

n) Conf. KLOECKHOF *de crifibus* p. 203. *sqq.*

o) Conf. PROSP. ALPINVS *de praefag. vita et morte* L. VI. C. XI.

p) Conf. MARC. AVREL. SEVERINVS *de recond. abscess. natura* L. I. C. IX. Notatu etiam dignissima complura huc spectant HIPPOCR. dicta, vt *Progn. n.* 78. 139. *Coac.* 143. *Aph.* 31. 37. 44. 56. *sect. IV. Epid. L. II.* LIND. *P. I.* p. 687.

§. XX.

Breuissimis memorare sufficiet reliquas euidentiores debilitatis febrilis causas, quibus aegrorum vires minui fere neminem latere solet. Referendae huc sunt excretiones praeter naturam euenientes, aequae sanguineae ac serosae, ubi neque leuantium neque criticarum indolem habuerint, aut ubi etiam commodo antea cesserint, dein tamen in aegrorum damnum abundauerint. Quemadmodum vero, pro discrimine corporum et febrium, certae excretiones prae aliis in salutem cedunt; ita quoque vicissim, vna prae aliis illarum excretionum subinde grauiorem aegris noxam infert, magisque vires eorum infringit, siue sponte orta siue sinistro medentis instituto excitata fuerit.

Sed maioris etiam momenti metuenda saepe debilitas est, ubi systematis neruosi, quoad functiones animales, actiuitas modum excefferit; siquidem vigiliae diutius perseuerantes, dolores, anxietates, deliria, motus conuulsiui, praesertim quoque vires consumendo febrium decursum periculosiorem reddere solent. Similis noxa est, quam curae, meditationes, metus ac tristitia, alique animi affectus interdum aegris inferunt. Neque vero praeterire licebit, debilitatem in febrium decursu, ex ipsa etiam inedia increfcere, ubi cibi cupiditas plures per dies vel hebdomades defecerit, vel et ejusdem fastidium pertinaciter inhaeserit. Licet enim

enim aegrorum hae affectiones damno per saepe careant, immo etiam in commodum aegrorum frequenter cedant, minus tamen ratione ingrauescentis debilitatis metuendum, vbi appetitus non plane deletus fuerit, vel idem idoneis adhibitis auxiliis aliquo iterum gradu breui redierit. Quare omnino quoque permagni momenti est prouida aegrorum appetitus cura, vt quoad fieri modo possit, non solum caussae remoueantur, nauseam efficientes et appetitum prosterntes, verum talis etiam victus, qualis maxime conuenit, iusto tempore et mensura viribus aegri accommodata ipsi porrigatur. Tandem et regiminis vitia, siue calidius illud fuerit, siue iusto etiam frigidius et humidius, atque intermissa munditiei seruandae, aerisque renouandi cura, aduersaque tempestatum et atmosphaerae hinc facile deficienda constitutio, inter causas debilitatis maxime attendi merentur. Licet vero harum quoque causarum efficaciam ponderare omnino permagni semper intersit, superfluum tamen atque nimis prolixum videtur, hoc loco illas vltiori confirmare aut illustrare expositione.

§. XXI.

Explanatis haecenus debilitatis in febrium decursu obuiaae causis, praecipua etiam adungere et intertexere placuit, quae momentis ejusdem variis accuratius dijudicandis inseruire possunt; ideoque, cum et concessi nobis temporis breuitas ad finem

finem properare nos jubeat, seorsim subjungenda *prognosi* nunc supersedere licebit. — Quoad auxilia vero, aduersus debilitatem, aegris, febre correptis, ferenda, non solum ad ipsam ejus conditionem, quibus nempe in functionibus, et quo gradu, se exferat, ejusque ad causas, ex quibus orta fuerit, sed etiam simul ad integram praesentis morbi singularis indolem, et quem hicce, tum sibi relictus, tum certa ratione tractatus, habiturus sit exitum, respicere medentem oportet. Est enim non raro, quod bene perspecto morbi praesentis decursu, ex ea, quae adest, debilitate, nihil mali esse metuendum praeuideas, ubi grauiorem modo artuum et ventriculi languorem, juxta cum integrioribus externis internisque sensibus, atque cum naturae fatis actiuo in coctione et crisi vigore, animaduuerteris. Est etiam, hoc sub rerum statu, saepissime, ubi non solum ab iis omnibus, quae strictiori sensu nutrientium, roborantium, cardiaco- rum, nomina ferre solent, ob certam eorum noxam, plane abstinendum sit, sed ubi etiam talia potius remedia usurpare conueniat, quibus debilitantem alias efficaciam nemo denegauerit, et quae nunc eo ipso quoque fine, ut nimiam infringant virium vitalium vehementiam, adhibere consultum sit. Quamuis autem integri morbi consideratio minuendam circulationem et aestum saepe postulauerit, omnino tamen de reliquo parcendum semper quoque viribus est, eademque nunquam non per-
quie-

quietem, per abstinentioniam a nocentibus, et per ejusmodi nutrientia, quae febris, et reliqua aegri conditio, permiserint, conseruandae. Danda omnino quoque opera est, quo valentiores iterum reddantur, quae defecerint, vires, curationem aduersus debilitatis causas prudenter ita dirigendo, ne forte alia ex parte damnum grauius inducatur. Caueamus igitur hac ratione, ne querela BOERHAAVII, *rarum esse cardiacorum in acutis intellectum q)*, in nos etiam cadat; maxime errorem illum cane pejus et angue fugiamus, quem merito damnat ill. VAN SWIETEN: *dum initio morborum acutissimorum oppressis viribus aegri jacent, malignitatem morbi accusant imperiti, et cardiacis erigendas volunt vires, non absque ingenti saepe decumbentium damno r)*. Nimis autem nunc longum foret, variam febrili huic symptomati medendi rationem, secundum singulas ejusdem causas persequi; quum non magnam solum curationis febrium partem simul exponendam postularet, sed nec difficulter, ex probe intellectis iis causis, de ferendis aduersus illas auxiliis, cuius, nostrae artis elementis imbuto, constare videatur. Ad satis certa enim et expedita pertinere existimo, quibusdam in febribus quandoque conuenire cautum et prouidum usum jusculorum, junioribus ex carnibus paratorum, et Peruuiani corticis, et affinium huic roborantium aliorum, et vini,

et

q) *Aph. de cogn. et cur. morb.* §. 672.

r) *Comm. in aph.* BOERH. §. 672. T. II. p. 286.

et volatiliū complurium remedium, et vesicantium, et adstringentium, et subfrigidi regiminis; contra vero, sub aliis aegrorum conditionibus, per illa omnia graues induci noxas posse, dum corruptio humorum qualiscunque augeatur, congestiones damnosae excitentur, nimiaeque moueantur, vel et necessariae inhibeantur, excretionēs. Similique ratione euidenter etiam liquet, omnia, quae vires, in motibus aequae ac sensibus, alias infringere valent, sanguinis nempe missiones, euacuantia, nitrum, acida, demulcentia, anodyna, etc. ubi causis recte opponantur, ad vires aegrorum actuosiores reddendas, quam praestantissime non raro inferuire.

Neque vero praesidium illud insignis momenti, et in urbibus praesertim magna hominum frequentia celebribus summe necessarium, hoc loco praetermittendum videtur, quod, tum ad praecidenda febrium complurium epidemiarum, grauiori plerumque cum virium infirmitate junctarum, pericula, tum ad cauendum, ne communibus ex causis hominum natura sensim languescat, a prouida merito expectamus Magistratuum vigilantia. Secundum certissimas enim a permultis Medicorum consignatas obseruationes, ad salutem ciuium conseruandam et arcenda illa mala quam plurimum confert; si munditiei platearum ac domiciliorum, praesertim angustiorum, et maiori hominum copia refertorum, vt nosodochiorum, orphanotropheo-

rum, ergastulorum, carcerum etc. vbi multos non raro pessimo in squalore ac foetore quasi sepultos reperire licet, maxime sollicita semper habeatur cura s); si artificum illae officinae, quae tetros et sanitati infestos spargunt halitus, vt illa coriariorum, falsamentariorum, fullonum, saponariorum etc. ex propiori ciuium commercio ad loca remotiora ablegentur, nec ipsa in vrbe tolerentur t); si aquarum potabilium puritati conseruandae, et frequenter expurgandis ab omni faece canalibus, singularis attentio destinetur, et quo minus impurae minusque salubres aquae ad coquendam cereuiciam vnquam adhibeantur, studiose defendatur; si accurate prospiciatur, ne stagnantes aquae, corruptioni maxime obnoxiae, putridisque suis et pestiferis exhalationibus vehementer nocere solitae, vllibi colligantur v); si tandem, quoad fieri modo possit, impediatur, ne fraudi ac negligentiae, quae in diuendendis cuiusuis generis alimentis ac medicamentis quam frequentissimae obseruantur, commodus

s) Conf. PRINGLE *observ. on the Jail or Hospital Fever l. c. Part. III. Ch. 7. §. 6. p. 319. sqq.*

t) Conf. elegantissima Diff. plura quae hoc spectant, accurate exponens, b. PLATNERI *de morbis ex immunditiis. §. VII. opusc. T. I. p. 77.*

v) Conf. lectu dignissima ejusdem Viri summi *Prolusio de pestiferis aquarum putrescentium expirationibus; opusc. T. II. p. 238.* Et in primis quoque IO. MAR. LANCISII *de noxiis paludum effluuiis, Libri duo; Oper. T. I. p. 135. sqq. Venet. 1739.*

modus relinquatur locus x). Indefessis AMPLISSIMI SENATVS HAMBVRGENSIS pro salute *Ciuum* curis etiam debemus, quod inter alia custodiendae sanitatis publicae instituta, nuper illum Canalem, *der neue Herren-Graben* vulgo nominatum, qui exhalationibus suis certe non exiguam, etsi non semper plane manifestam, noxam ciuibus intulit, a sordibus purgare iussit. Minimeque dubitandum, quin alia etiam ad momenta, quae publicam ad salutem conseruandam et pericula quaeuis auertenda, tot mea laude maiores praeclari Medici commenda-uerint, sagacem prouidamque suam attentionem sint collaturi.

IV.

Dissertatio de febrium putridarum differentiis.

Publice proposita Gott. 1768. Resp. AVG. EBERH. BRANDE, *Hannouerano*.

PROOEMIUM.

Febrium putridarum nomen vt peruulgatum est et frequentioris apud medicos, non recentio-

K 2

res

x) De his omnibus conferri meretur IO. ERN. HEBENSTREIT, *anthropol. for. cap. de causis sanitatis publicae ordinandis. p. 43. seqq.* et ANT. GVIL. PLAZ Resp. T. G. SONNENKALB *diss. de sanitatis publicae obstaculis. Lips. 1754.* et SÜSSMILCHS *Göttl. Ordn. in den Veränd. des menschl. Geschl. 1 Tb. p. 108. et seqq.*

res modo nostraeque aetatis, sed etiam apud antiquiores, vsus; ita et attentus quisque horum scrutator varios distinctiuos facile reperiet hujus generis morborum characteres, in quibus optimi conueniunt scriptores.

Etsi quidem HIPPOCRATES nullum peculiare febrium genus putridarum nomine distinxerit, attamen ad putridae humorum corruptelae vim in producendis febribus quoque respexit. Sub τύφος enim nomine febrem, putridae cuidam recentiorum simillimam, comprehendere videtur, cum de illius causis et symptomatibus sequentem in modum loquitur a): *Inuadit aestatis tempore cum canis sydy oritur, bile per corpus agitata. Statim igitur eum febres vehementes corripunt, et grauis ardor, et cum grauitate imbecillitas, crurumque ac manuum impotentia quae nullum ei usum praestant; venter perturbatur et quae ex eo dimittuntur grauiter olent, vehementiaeque tormina accedunt etc.* Haec autem si cum febrium quarundam putridarum symptomatibus comparaueris, inuenies ea cum his ferme conuenientia. Patet autem ex curationis methodo quoque similitudo inter hunc typhum et febres illas putridas. Nam abstinentiam a balneis et cibo, forbitiones tenues et frigidas, vinum, aliaque commendat, ad tollendam huiusmodi febrem putridam potissimum apta. Dicit etiam alium typhum gigni, cum bilis putre-

a) L. *internis Affectionibus edit.* LIND. T. II. p. 246.

putrefacta admixta fuerit sanguini *b*); iterumque alium, cum corporis humidum putrefactum et plus aequo resiccatum fuerit *c*).

Sed clarius multo tradidit febrium putridarum expositionem GALENVS; nam non solum humorum putrefactionem inter modos recenset, quibus febriles dispositiones oriantur *d*), verum etiam quae-
nam febres hac ratione excitentur, et quomodo hae inter se differant, ex instituto definire contendit *e*). Ad praestantiores quoque contemplationes illam refert, qua disquiritur, num, et quemadmodum ex vtraque bile et pituita fiant quaedam febrium species, e sanguine putrefacto febres accidere soleant *f*). Pariter alibi *g*), febres Synochos vel continentes in illas diuidit quae putredinis stipatae sunt notis et quae his carent, pauloque post priorum febrium συνέχων genus sic describit, quod ibi *in omnibus vasis, et potissimum maximis, succi aequabiliter putrescant*. Passim in Operibus plura de febribus putridis profert. TRALLIANVS peculiare febrium genus sub putridarum nomine pertractat, notasque illarum praecipuas statuit nullum rigorem aut horrorem per vices redeuntem, qualitatem rodentem per extimas partes magis perceptibilem,

K 3

pul-

b) Ibid. p. 249.

c) Ibid. p. 252.

d) De different. febrium. L. I. C. III.

e) Ejusd. tractat. L. II. C. I. et II.

f) Ejusd. Libri C. IX.

g) Meth. med. L. IX. C. II. et III.

pulsuum systolen citatiorem et inaequalem, et vrinarum cruditatem *b*). AETIVS vbi de febrium agit diuisione *i*), in spiritibus ephemeram, in humoribus febrem putridam, in corpore cordis hecticam accendi asserit; et dein iterum tria summa constituit febrium genera, ephemeram nimirum, putridam et hecticam, et peculiaribus etiam in capitibus *k*) putridas febres pertractat. HEVRNIVS de febre putrida vt ab aliis distincta loquitur, et illas diuidit in perpetuas vel nunquam remittentes et in eas quae interdum vehementiam suam remittunt *l*). SENNERTVS febrem putridam dicit esse febrem, a vaporibus calidis e putredine excitatis, et cor atque hinc totum corpus praeter naturam calefacientibus ortum habentem *m*). Statuit FORESTVS etiam singulare genus febrium ex putredine *n*). LOMMIVS binas distinxit febrium putridarum species continentem scil. et continuam putridam *o*).

Recentissimis autem auctoribus hancce placere denominationem scripta ipsorum satis docent. BOERHAAVIUS de putridis vt peculiari febrium genere agit, quod Synochum putridam vocat, atque hancce caussis inflammatione simplici maioribus, viscerum obstructioni, cutis oppilationi, et capil-

larium

b) In Opp. L. XII. C. II.

i) Tetrab. II. Serm. I. C. 58.

k) C. 74. et seq.

l) Opp. Tom. II. C. X.

m) Opp. Tom. IV. Lib. 2. Cap. I.

n) Passim in Operibus.

o) Obseruat. medicinal. L. I. p. 3. et 5.

larium fere omnium, acrimoniae vero acutiori et saepe prorsus singulari, originem debere docet *p*). Quod FREIND peculiare febrium putridarum genus statuerit, ex ipsius Commentariis de febribus ejusque de purgantibus in secunda variolarum febre adhibendis epistola, luculenter apparet. MEAD omnes quae corpus inuadere possunt febres in simplices, putridas, et pestilenciales diuidit *q*). Ill. BOERHAAVII Commentator febris putridae nomen sibi placere in commentario super loco Boerhaauii modo citato ostendit *r*). De HAEN febris putridae nomine saepius utitur *s*). HUXHAM *t*), WINTRINGHAM *u*), PRINGLE *w*), TISSOT *x*), HOME *y*), MONRO *z*), omnes frequente vocis hujus usu, quod applaudant ipsi, fatis clare docent. Sed haec mihi fatis superque sufficere videntur ad demonstrandum, quod febris putridae denominatio apud optimos omnis fere aetatis auctores usu recepta sit.

K 4

Etl̃i

- p*) Aphorism. §. 730. sqq.
- q*) Opp. edit. Edinburgh. Tom. II. p. 110.
- r*) Commentarior. Tom. II. §. 730. sqq.
- s*) In Thesibus de febrium diuisione praecipue, et in ratione meden. passim.
- t*) Conf. Essay on Fevers et Observationes de aere et morbis epidemic.
- u*) Passim in Opp.
- vv*) Conf. Observations on the Diseases of the army.
- x*) In Avis au peuple etc.
- y*) Conf. Principia medicinae.
- z*) Account of the Diseases which were most frequent in the British Military Hospitals.

Etſi vero tot magni et ipſo rerum uſu ſubactiſſimi viri multum ſtudii et operae in dilucidanda huius februm generis indole nauauerint; facillime tamen cuius aequo patebit veri aeſtimatori, quantum ipſorum ſententiis inſit, etiam apud recentiſſimos auctores, quoad magni momenti conditiones, diuortii, quo haefitans et anceps cujuſuis lectoris animus reddi facile poſſit. Quare, cum verior de his febribus doctrina, ob illarum et frequentiam et ſummum cum iis maximam partem conjunctum vitae diſcrimen, et iudicii de ipſarum diuerſiſſima natura et exitu difficultatem, tanti omnino ſit ponderis, ut ſollicitam omnium medentium diſquiſitionem, proprios in uſus poſtulet; non arbitror me, ex lege academica ſpecimen inaugurale ſcripturum, oleum plane omne et operam perditurum fore, ſi, ſuadente Praefide Illuſtri, Praeceptore et Fautore aeternum colendo, quae vel ex optimorum Praeceptorum inſtitutione, vel aliunde, aliquali etiam propria obſeruatione, certiora de putridarum februm indole ac differentiis apparuerint, breui hac tractatione expoſuero.

§. I.

Cum autem de febribus putridis ſcripturus ſim, poſtulari mihi videtur, ut ideam putredinis generalem pauciſſimis primum verbis exponam, adjectis nonnullis de ipſius cauſis, ſignis atque effectibus, praecipue in corpore animali. Optimos autem per-
uoluens

uens hac de re autores, haud exiguum quidem inter eos reperiō circa putredinis definitionem diffensum, cum vnus illam pro fermentationis habeat specie, altero id ex toto negante. Ita BOERHAAVIVS putredinem dicit *motum intestinum qui pro effectu dat olea putrida foetidosque alcalinos sales a*); illam autem a fermentatione distinguit, ad cuius scilicet essentiam requirit spiritus ardentis vel acidi productionem. WALLERIVS autem putredinem definit per *specimen fermentationis, quae in corporibus mortuis in primis succulentis et aquosis, mediante calore et aere excitatur, unde principia eorundem constitutiva mobilia primum in eam transponuntur connexionem, qua odor producitur foetidus, deinde vero sensim plene separantur, relicta portiuncula terrestri immobili b*). GILBERT putredinem illum dicit corporis statum quo *solidae fluidaeque partes ex nexu suo deturbatae foetorem contrahunt c*). Sed sufficiant haec ad demonstrandum, quantum inter se discrepent et conueniant putredinis a variis autoribus datae definitiones. Mihi quidem putredo ea praesertim motus intestini conditione declarari videtur, qua partes corporis ad vltimas vsque dissoluuntur, atque ita mutantur, vt odor foetidus, saporque alienus penetrantior, et color plerumque profundior, excitentur, neque vinosa nec acida indoles liquidae parti concilietur.

K 5

Prae-

a) Conf. *Elementa Chemiae*, edit. Lond. 4. T. II. p. 67.

b) Conf. *Elementor. Chemiae physicae*, Part. Imae p. 385.

c) *Dissertat. de putredine in corpore animali*, Lipsiae 1753. habitae §. II.

Praecipuae autem generales putredinis causae sunt.

1. Atmosphaera calida et humida. In eo omnes ferme consentiunt autores aerem calidum et simul humiditate refertum praecipuam esse putredinis causam. BOERHAAVIVS affirmat corporum veram putrefactionem vix alia causa magis promoueri ac aere calido et simul humido *d*). Ill. PRINGLE quoque aerem calidum et humidum vt praecipuum incusat putredinis fontem *e*). Aer humidus et frigidus forte, propter relaxationem, quam corporibus inducit, putredinem etiam accelerat, at in minori procul omni dubio gradu. 2. Effluuia putrida. Maxime autem probabile est hasce exhalationes fermenti modo in alia corpora agere, quam quoque sententiam experimentum ab Ill. PRINGLE institutum praeclare confirmat. Diuisit nimirum recentis oui vitellum in duas partes aequales, et has, aqua dilutas, aequali exposuit calori, vni parti portiunculam jam putrescentis vitelli alius oui admiscuit, alteram puram reliquit, et illam ocyus multo inuenit putrescentem cui fermentum hoc addiderat *f*). Hinc etiam deriuari forte poterit ratio, cur omnia in aere clauso facilius putrescant ac in libero, in priori enim casu retinentur vapores putridi et reliqui accelerant putrefactionem, in posteriori autem per aerem ambientem magis dissipantur,
et

d) In Elem. Chemiae Tom. I. p. 183.

e) Passim in Observations on the Diseases of an army.

f) Conf. Appendix to the Obs. on Army Diseases Paper III. Exper. 18.

et motu ejus fugantur. Sunt hae causae putredinis generales. Effectus autem in genere et signa ipsius ex data definitione fere fluunt. Sunt quidem sequentes. α) Omnia vincula rumpit et humores antea coagulabiles in tabum nunc difficilius coagulabilem dissolvit. β) Aerem antea fixum expedit. γ) Mutat colorem rerum actu putrescentium et omnium odorem in foetorem conuertit. δ) Oleosa reddit rancida, fluidiora et foetida. Optimi fere omnes in eo olim conueniebant auctores, quod sal volatile alcalicum a putredine produceretur. Sufficiat STAHLIVM *g*), et BOERHAAVIVM *h*), allegasse. Ill. autem PRINGLE experimentis suis circa hanc rem institutis, optime demonstravit, nullum, vel maxime saltem latentem salem alcalinum in plurimis substantiis per putredinem gigni, vel ejusmodi certe salia ad putredinis essentiam non pertinere, nec crescente ea augeri, et solam forsan urinam sal volatile putredine exhibere *i*); et hinc error iste forte ortum duxit. Generaliora autem praesentis putredinis sunt signa, coloris natiui mutatio, foetor, solidorum major laxitas, aucta fluidorum tenuitas, nonnunquam et manifeste auctus calor.

§. II.

g) Conf. ejus *Fundamenta Chemiae*.

h) In *Elementis Chemiae*.

i) Vid. *Appendix to the Observations on Army Diseases*.

§. II.

Operae autem pretium erit in causas, signa et effectus putredinis in corpore animali paulo curatius inquirere, cum haec thema nostrum propius spectent. Generales putredinis causae ad corpus animale applicatae, eundem et ibi edunt effectum. Humidus enim aer solidorum, propter laxitatem quam iis ex absorpto aquoso conciliat, infringit robur: minuitur ita horum in fluida contenta actio, quae, cum calore simul acriora fiant, his maxime ad putredinem disponuntur. Experientia quoque huic theoriae annuit; solent enim putridi morbi in tali aeris intemperie praecipue grassari, cujus rei testes Ill. PRINGLE *k)*, et HUXHAM *l)*, solum allego. Vix opus est ut dicam putrida effluvia septica vi in corpus etiam animale agere. Cum enim fermenti instar operari videantur, magnaque copia per pulmones, forte etiam per inhalantia cutis vasa hauriantur, noxia sua vi humores ut inficiant necesse omnino est. Frequentes morborum putridorum ex effluviis putridis origines hoc ulterius confirmant. Assentit quoque huic de fermento exhalationum putridarum doctrinae Ill. PRINGLE *m)* et notatu dignissimum simul narrat casum, ortae ex vapore sanguinis putrescentis dysenteriae. Omnium autem pessima

k) Vide *Observations on Army Diseases*.

l) Passim in *observat. de aere et morbis epidemicis, praecipue in Prolegom.* p. 17.

m) *Observat. on the Diseases of the Army* p. 164. sqq.

fima sunt illa effluuia quae ex substantiis animalibus putrescentibus per aerem disperguntur, sic vt MEAD *n*) credat, pestilentiam veram ortum inde in calidis regionibus duxisse. Summa enim ibi tempestatis intemperies, summum iis conciliat putredinis gradum. Speciales autem, quae putredinem in corpore animali ciere valent, causae sunt: 1) Putredo aliunde nata et in corpus recepta *o*), ita victus putrescens morbis putridae indolis ansam facile praebet. Videtur autem haec etiam, vt fermentum in humorum massam agere. 2) Motus muscularis nimium auctus et febris *p*). Binae hae causae eodem agunt modo. Ab aucto enim calore et motu, humores redduntur acriores, et ad putredinem proniores. 3) Abusus victus animalis *q*). Partes animalium tendunt in fermentationem putrescentem, vegetabiles in acescentem; in iusta ergo harum proportione salus. Vbi autem mere animalis fuerit diaeta, corporis humores in putredinem tendere facit, magis, si potus accedat mere aquosus. Harum causarum crescit vis, vbi debilia fuerint viscera digestionis inferuentia. 4) Excernendorum retentio *r*). Huc pertinet transpirationis, vrinae, et alui obstructio. Materiam perspirabilem
extra

n) Conf. *Traſtat. de Peste*.

c) Conf. PRINGLE *Obſerv. on the Diſeaſes of the Army* p. 4.

p) HVXHAM *on Fevers* p. 53 et 54. VAN SWIETEN in *Tom. I. Commentar.* p. 116.

q) HVXHAM *on Fevers* p. 56.

r) VAN SWIETEN *Tom. II. Commentar.* p. 139. 149.

extra corpus facile putrescere, innumera fere tri-
stiaque demonstrent exempla eorum, qui, in angusto
loco sine libero aeris recentis accessu occlusi, vi
materiae perspirabilis putrefactae in morbos putri-
dos citoque lethales inciderunt: hinc autem veri-
simillimum est, hujus materiae in corpore praeter
naturam retentionem, vel putredinem humoribus
inducere posse, vel eos saltem ad illam maxime
disponere. Urina autem ad abluendos fales humo-
rum acres destinata, sic eorum putredinem arcet.
Si ergo obstruitur, salia haec in corpore remanent,
humorumque acrimoniam ac dissolutionem augent.
Hinc in Ischuriis plus noxae ex humorum acrimo-
nia nascitur, quam ex accumulati lotii copia s).
Sin autem quae per alium excerni debebant reti-
nentur, ipsorum putredo indies augetur et reliquos
humores inficit. 5) Abusus salium, praecipue vo-
latilium. Salia volatilia injusta copia assumpta putre-
dinem ciere posse cel. HVXHAM inter alios asseruit t),
et egregia comprobavit observatione u), etsi extra
corpus putredini, secundum experimenta ab Ill.
PRINGLE instituta w), resistant. Haud tamen peni-
tus negat Vir Ill. salia volatilia, quantitate nimia
temporeue injusto ingesta, humorum putredinem
accelerare, sed hunc effectum ab aucto ex eorum
usu calore et fluidorum motu potius, quam ex vi
septica

s) Conf. HVXHAMS *Essay on Fevers* p. 305.

t) In eodem libro p. 299.

u) *Essay on Fevers* p. 308.

w) Conf. *Appendix to the Obs. on Army Diseases*.

septica iis propria deriuandum esse statuit. Aliorum autem, etiam antisepticorum salium abusus, adjumento putredini esse potest. Ita obseruauit Ill. PRINGLE magnam salis culinaris copiam carnum putredinem arcere, paruam illam accelerare x). Ipsa immodice vsurpata acida tendentiam humorum in putredinem augere, nonnullis visum est y). Sales alcalinos fixos humores etiam colliquescere testatur cel. HVXHAM z), et simul morbi putridi, ex diuturno vsu lithontriptici alcalici orti, narrat historiam. 6) Animi pathemata vehementiora. Agunt haec nimirum in vias bilis, quibus spasmodice contractis, humor hicce commotus facile iterum in totam sanguinis massam recipitur, illamque dissoluit *), praecipue cum bilis ab animi affectibus vehementioribus et frequentioribus acrior et quasi corrupta fiat. 7) Inedia **). Postulant leges oeconomiae animalis frequentem humorum, per blandi chyli admixtionem, renouationem, qua neglecta, sales et olea exaltantur, humores acerrimi fiunt, et vltimo vniuersi putrescunt. 8) Venena quaedam vel sanguini immediate admixta, vel in ventriculum recepta. Sic MEAD ex relatione PAVLI

x) *In Appendix to Obs. on Army Diseases Paper III. Exper. 25.*

y) Conf. cel. GILBERT *Dissertat. de putred. animal. §. XIII.*

z) *Essay on Fevers p. 48.*

*) Conf. HVXHAM *Essay on Fevers p. 113.*

**) Conf. HVXHAM *in libr. citat. p. 55.* v. HALLER *Elementa Physiologiae* Tom. VI. Lib. 19. Sect. II. §. 4. VAN SWIETEN *Commentar. Tom. II. p. 42.*

PAVLI HERMANNI refert, morsum serpentis Haemorrhoi macassarici, vniuersalem ex poris corporis ciere haemorrhagiam *a)*, quae vix ex alia causa, ac ex humorum dissolutione putrida oriri posse videtur. Docet etiam aquam destillatam Laurocerasi intus assumptam, humores vehementer resolvere *b)*: et Ill. de HALLER venenum serpentis caudifonae humores citissime colliquescere et carnes flauo colore tingere narrat *c)*. 9) Abusus medicamentorum mercurialium et terreorum, et aromatum. Mercurialium frequens, diuturnus et imprudens vsus sanguinis crasin ex toto dissoluit *d)*, eumque putridum reddit, quod vel pessimo saluantium foetore satis comprobatur. Terreorum remediorum vim septicam experimentis demonstrauit Ill. PRINGLE *e)*. Hinc verisimillimum quoque est ipsa, corpori sine iustis cautionibus applicata, putredinem ibi ciere, vel certe ad illam praedisponere posse. Aromatum abusus, cum humores valde reddat acres, ad putredinis saltem pertinet adiumenta *f)*. Nimium acrium et aromaticarum herbarum vsus humores etiam corrumpere, docent Ill. BOERHAAVE *g)* et

VAN

a) Opp. Tom. I. p. 20.

b) Opp. Tom. I. p. 138.

c) Conf. *Element. Physiolog.* Tom. II. Lib. V. Sect. II. §. 29.

d) Conf. HVXHAM *Essay on Fevers* p. 46. v. HALLER *Elem. Physiol.* Tom. II. Lib. 5. Sect. II. §. 29.

e) *Appendix to the Observ. on Army Diseases* Pap. III. Exp. 23. GILBERT *Dissert. de putredine animali* §. IX.

f) Conf. GILBERT *Dissert. de putredine animali* §. XIII.

g) *In Aphorism.* §. 76.

VAN SWIETEN *b)*. 10) Fomites ulcerosi, cancro-
 si etc. *i)* vel secundinae relictæ putrescentes et hu-
 morum massam inficientes. Effectus suos exserit
 putredo in solida, fluida et nervos. In solidis ni-
 mirum, præter effectus generales §. I. recensitos,
 partium continentium imminuit cohaesionem, ma-
 joremque iis inducit mollitiem, vnde præter mo-
 dum aucta flexilitas. Erodit etiam ipsa. Humores
 corporis reddit acres, justo tenuiores et ad nutri-
 tionem ineptos, vnde facile extra præscriptos ter-
 minos vagantur et obstructiones, exanthemata,
 gangraenas, aliaque vitia gignunt. Nervos ex
 acrimonia irritat, vnde variae systematis nervosi
 turbæ. Speciali quadam vi quoque in fluidum ner-
 ueum agere videtur, quod ex variis illis symptoma-
 tibus nervosis, quæ putridos ut plurimum concomi-
 tantur morbos, et ex sola irritatione deriuari ne-
 queunt, probabile fit. Signa autem præsentis in
 corpore animali viuo putredinis, sunt excretorum
 insolitus foetor, solidorum laxitas, fluidorum te-
 nuitas, magna virium systematis nervosi prostra-
 tio, etc. De his autem mox fusius cum de diagno-
 si morbi putridi loquar.

§. III.

b) In Commentar. Tom. I. p. 114.

i) Conf. GAVBII Institut. Patholog. §. 313.

§. III.

Morbum autem dico putridum cum quo humorum implicata est putredo, majori minoriue gradu. Characteres talis morbi, quorum ope ab omni alio non putri distingui potest, sunt: magna virium prostratio, tanta saepe vt minimum etiam motum animi sequantur deliquia. Animi vehemens dejectio. Pulsus iusto debilior. Humorum nimia tenuitas; vnde faciles saepe et spontaneae haemorrhagiae, ex locis infuetis etiam prouenientes. Maculae figura et colore variae, rubicundae nimirum, fuscae, vel liuidae, quae ex sanguine dissoluto et in cellulofam telam extrauafato oriuntur. Oculorum imminuta viuacitas. Lingua fusca, liuida, vel nigra. Spiritus et sudor foetidus. Vrina nonnunquam tenuis, minus pro ratione caloris tincta, vtplurimum crassa, turbida et mox foetens. Auctus et putridus alui excretorum foetor et in liuidum mutatus color. Sunt haec praecipua signa morbi putridi in genere. Febris autem oritur putrida, si humores corporis sic degenerauerunt, vt inepti fiant ad placidam per vasa corporis circulationem. *k*) Notandum enim est plenariam humorum putredinem ad hujus febris essentiam non requiri, antequam haec enim fit, mors vtplurimum finem tragodiae facit, propter partium ad vitam necessariorum destructionem. Quod tamen magna semper in his febribus adsit humorum ad putredinem procliu-
uitas,

k) Vid. VAN SWIETEN in *Tom. II. Commentar.* p. 420.

uitas, facilis et velox excretorum, vel arte educ-
 rum corruptio fatis testatur. Signa autem ex qui-
 bus de febris putridae praesentia per morbi initium
 et incrementum judicare licet, sunt calor mordax,
 tactum laedens et omni momento quasi adauctus,
 pulsus celerior et inordinatus, virium summa pro-
 stratio cum animi dejectione, capitis dolor aliquis
 cum sensuum perturbatione, oculorum imminutus
 splendor, saepe cum rubore aliquo, sic vt inflam-
 mati videantur; lingua in initio morbi subalbida,
 dein autem nigra et arida, faucibus simul et denti-
 bus foeda sorde tectis; anima foetida, sapor aduer-
 sus quasi a rebus putridis, sudores foetidi, et in vl-
 teriori morbi progressu sanguine nonnunquam tin-
 cti; cutis, in incremento morbi haud raro arida est,
 aliquando nimia est ad sudores pronitas; vrina va-
 ria, crassa, turbida, immo nigrescens, interdum quo-
 que pallidior, cruda, vel cum sedimento fuligineo;
 dejectio foetidissima, subviridis, liuida, interdum
 nigra et sanguine tincta; maculae rubicundae vel li-
 uidae, petechiae, et si latiores fuerint vibices di-
 ctæ, non eleuatae, nec vnquam forte criticae; hae
 post mortem interdum demum erumpunt ¹⁾; sitis
 vtplurimum moderata, haemorrhagiae spontaneae,
 et facile vltra omnem modum vehementes, cruor
 minus cohaerens et in vltiori morbi progressu,
 omnino saepe dissolutus, serum rubicundum sangui-
 nolentum; crusta interdum quidem obductus est

L 2

fan-

¹⁾ Conf. PRINGLE *Observat. on Army Diseases*. p. 304.

sanguis, at tenui et infirma, transparente et saepe variegata. Tumere etiam solet in vehementiori morbo abdomen, ab aere in ejus cauitatem per putredinem expedito, quem statum *meteorismum* nuncupare solent medici. Sunt haec praecipua febris putridae simplicissimae, ab omni complicatione liberae, symptomata, quae etsi raro, attamen interdum occurrit. Pulchrum talis putridae exemplum leges apud HVXHAM. *m*) Habes ibi egregiam febris putridae, sine malignitatis, sine colluuiei biliosae signis historiam. Tremores enim, tendinumque quorum facit mentionem subsultus, magnae debilitati ex inanitione adscribendi esse videntur, non autem latenti malignitati. Febris, quam sub nomine putridae contagiosae describit, *n*) putrida quoque est non biliosa, at malignitatis quibusdam stipata symptomatibus. Febris illa putrida quae ab Ill. PRINGLE carcerum seu nosocomiorum dicitur, etiam putrida non biliosa est, at non sine omni *o*) malignitate. Distinguitur ideo febris putrida ab inflammatoria, humorum degeneratione majori, pulsu inaequali, inordinato, minori, calore mordaci, excretorum foetore, sordibus linguae et oris, urinae colore, sanguinis dissolutione, petechiis, insigni lassitudine et animi dejectione; a nervosa autem, colore et consistentia urinae, signis putredinis et febre

m) *Essay on Fevers* p. 62. seqq.

n) Conf. ejus *Observat. de aere et morb. epidem.* Tom. II. p. 32.

o) *Observations on the Diseases of the Army* Part. III. C. 7. p. 297. seqq.

febre fortiori; a biliosa, minori capitis affectione minorique nausea et ventriculi perturbatione, lingua puriore, nigriore et aridior, dejectionum colore et indole minus biliosa, fitis et inquietudinis minori gradu; calor etiam in putridis continuo quasi crescit, in biliosis autem, licet permagnus saepe fit, nihilominus per vices remittere solet.

§. IV.

Multi autem et praeclari viri qui hac de re scripserunt, ad hoc putridarum febrium a biliosis aliisque discrimen non satis respexisse videntur, indeque forte quoad magnam partem ortum habet ingens illorum in methodis curationum dissensus. In eo autem praecipue errarunt multi, quod putridas febres cum biliosis et malignis confundant, vel ipsas etiam semper pro vere malignis habeant. Ostendam autem deinde quaenam sit inter febrem putridam et malignam differentia, quodque febris putrida existeret possit sine malignitate et maligna sine putredine; quod saltem malignitas ad febris putridae essentiam non pertineat, etsi negare non possim quod plurimae febres putridae simul sint malignae. Putridam autem febrem a maligna non distinguit cel. TRALLERES: non solum enim febres petechiales et castrenses *malignis* adnumerat, p) cui generali tamen sententiae assentire nolim, sed etiam ubi externam

L 3

mali-

p) Vid. *Virium quae terreis remediis etc. adscriptae sunt, examen rigorosius*. C. XIX. p. 365. et 66.

malignarum pingit faciem, *q*) veram dat febris *putridae* descriptionem; magnam enim debilitatem, pulsum celerem, debilem et inaequalem, appetitum ciborum prostratum, linguam scabram et aridam, petechias aliaque verae putridae signa, ut praesentis malignitatis indicia enumerat. Et ubi malignarum febrium theoriam thesibus illustrat, satis apparet illum ad febres putridas respexisse; febres enim malignas ex stimulo causticae et putridae indolis oriri dicit, *r*) ex quo miasmate hausto virium subitam prostrationem, villorum nervorum irritationem, humorum stagnationes etc. deriuat; *s*) et ex his effectibus miasmatis primariis, malignitatis symptomata antea enarrata sequi docet *t*): dein etiam, humorum resolutionem putridam ultimum esse malignitatis effectum dicit *u*). At in egregio illo de usu opii libro sequente loquitur modo, cum de febrium malignarum *miasmate* sermo sit: *Insuper alcalicae, septicae et putridae illud esse indolis, omnia phaenomena morbi et medelae, una cum extispiciis euincunt w*). Quarum etiam febrium celeb. Tissot, sub *malignarum* nomine, descriptionem tradit *x*), si causas, decursum et symptomata allegata spectemus;

q) In eodem capite. §. IV. p. 376 seqq.

r) In eodem capite. §. 7. ad II. p. 381. seqq.

s) In ejusdem capitis §. 12. ad 14. p. 387. seqq.

t) Vid. ejusd. capit. §. 15. et seqq. p. 394. seqq.

u) Conf. *Examen rigoros.* etc. p. 398.

vv) Conf. *Usus opii salubris et noxius.* Sect. II. p. 177.

x) Vid. *Avis au Peuple sur sa Santé.* C. XVII. p. 272 seqq.

mus; verissimae sunt continentes putridae GALENI, aptissime forte, nostra sententia, putridarum simplicium cognomine distinguendae. *Putridas* febres idem praestantissimus Auctor in praecedente optimi libri capite vocat, quae a colluue spontanea materiae corruptae, ex humorum circulantium massa ad primas vias delata dependent, quas ipse quoque saepius biliosas nominari ait. Atque hae febres ejusdem vtique sunt indolis ac illae, quas, sub biliosarum nomine, in eximio peculiari opusculo y) exposuit; continuae nempe remittentes et putridae GALENI et LOMMII, sub gastricis BALLONII et mesentericis BAGLIVI comprehensae. Aptissime forte cum PRINGLE, MONRO et pluribus biliosae dicuntur, sed cum huic febrium generi putredinis characteres non perpetui sint, vbi hosce simul animaduverteris, adjecto *putridarum* cognomine a simplicibus biliosis commode distinguuntur. Cel. quoque DEGNER dysenteriam, bilioso-contagiosam solum nuncupat, quam simul putridam fuisse nemo facile negabit, qui symptomata ab ipso enarrata z) perlegerit. Celeb. HUXHAM febris malignae nomen pro synonymo febris putridae habere videtur, dicit enim: *idem forte est an hasce febres, putridas, malignas, vel pestilenciales dixeris a)*; et quo in capite has febres pertractauit, de biliosis putridis aequae, ac de

L 4

putri-

y) In Tractatu de febribus biliosis.

z) Conf. Historiam Dysent. bilioso-contagiosae §. XXIX. p. 16. sqq

a) Conf. Essay on Fevers. p. 100.

putridis simplicibus egit, minime tamen quoad curationis methodum diuersa haec putridarum genera a se inuicem distinguere neglexit. Illustr. etiam PRINGLE, qui omnium optime de febribus putridis egit, voce febris malignae, ad indicandam putridam simplicem, saepius usus est *b*). Cel. quoque MONRO nullum discrimen inter febrem malignam et petechialem atque putridam ponere videtur *c*).

§. V.

Necessarium autem mihi videtur, cum malignitatis saepius usus sim voce, paulo curatius perscrutari quid sibi velint auctores cum malignitate sua, et quaenam ejus idea mihi prae aliis maxime arrideat indicare. Etsi enim medicinam hoc termino commode carere posse arbitrer, etsi malignitatis nomen, ex SYDENHAMI opinione, magis infestum fuerit generi humano ipsa pulueris pyrii inuentione, nihilo minus tamen, cum usus ejusdem apud omnes maxime inualuerit, aptamque designandis pluribus morborum phaenomenis explicationem admittat, expulsionem ejus temere quis meditaretur. Optimum ideo erit, varias primum proponere auctorum circa malignitatis definitionem sententias, quae quidem vehementer inter se discrepant, ac his dein accuratam et experientiae consentaneam superaddere hujus vocis definitionem, adjectis praecipuis maligni-

b) In *Observations on the Diseases of the Army*.

c) Vid. *Account of the Diseases which were most frequent in the British military Hospitals C. I.*

malignitatis signis. Medicorum ille parens HIPPOCRATES sub *κακότητος* nomine, per *malignitatem* verti solito, affectionem ex occultiori origine difficiliorem, saepius periculofam, ideoque semper quoad euentum suspectam, et in febriles praecipue morbos subinde incidentem, intellexisse videtur. Et ejus quidem indolis pleraque malignitatis indicia Hippocratica deprehendere licet, quae ex latente causa perturbatas cum discrimine systematis nervosi functiones esse docent. Ipfis etiam morbis nomen malignorum tribuit, in quibus grauiiores ejusmodi affectiones obseruantur; dicit nimirum: *In febre conuulsio, manuumque ac pedum dolores κακότητες, seu malignum quiddam denuntiant. Malignus quoque ex febre doloris impetus. Sed neque genuum dolor probari potest. Quin et surarum dolores quoque maligni sunt, ac mentis emotio, tum vero praecipue si sublime quid in vrina innatet. Ex praecordiorum dolore obortae febres malignae sunt etc. d).* Vix aliunde autem ac ex systematis nervosi perturbatione haec repetes symptomata, modo periculi sint nuntii; si enim rheumatici v. c. fuerint dolores, nemo facile hos ad malignitatis signa referet. Paulo aliter et latius terminum exposuit GALENVS, qui *κακότητι νοσήματα* inquit, vocamus eos morbos qui aegris periculum minantur, nec sperare salutis adimunt e). Sed propius ad HIPPOCRA-

a) In Coacis praemotionibus Nro. 30. 31. Passim aliis quoque in locis de iisdem symptomatibus ut malignis loquitur aliaque addit.

e) In Commentar. I. in Proorrh. HIPPOCRATIS.

ris mentem accedit auctor libri definitionum medicarum inter Galenicos reperiundi, *malignum morbum* dicens *qui facultate quidem magnus est et difficilis, specie tamen debilis, neque ad judicationem statuta habet tempora*. Qui autem Hippocraticam maxime restituit doctrinam, Anglorum ille magnus SYDENHAM, malignitatem in particulis calidissimis ac spirituosissimis, humorum in humano corpore contentorum naturae plus minusue aduersantibus, consistere ac terminari asserit f). BOERHAAVE illos malignos dici vult morbos, qui vires subito destruunt g). Celeb. TRALLES malignitatem definit per *talem febrium conditionem physicam, quae eam functionum vitalium depravationem, et a naturali integritate recessione ponit, ut hae cessationi plenariae sint quam proximae h)*. Ill. DE HAEN dicit eos solummodo morbos malignitatis appellatione recte insigniri, quos symptomata insueta, aut longe solito grauiora numerosioraque comitantur; nullatenus vero illos, qui, acutine fuerint an peracuti, interni aut cutanei, consueto more sua spatia decurrunt i). Audiamus etiam celeb. GAVBIVM de malignitate, qui eam proprio sensu morbum notare dicit, qui insidiosè mittis, sub phaenomenis non ominosis aggressus, ex improviso grauissimis symptomatibus naturae vires opprimit:

alias

f) Conf. Opp. Tom. I. p. 154.

g) Vid. Praelect. in institution. med. cum notis HALLERI Tom. VI. p. 92.

h) In Exam. rigoros. virium etc. C. XIX. §. VI. p. 380.

i) Vid. Ration. medendi Ed. Lugd. Bat. Tom. I. C. XXIII. p. 146. et Tom. III. C. I. et Thesum de febr. diuis. Div. VIII. p. 130 sqq.

*alias et talem, qui praeter morem suum inusitata sympto-
mata turbasque vehementiores quam quae naturae suae
conuenire videantur excitat: denique et refractarios,
qui expertorum quoque remediorum vires eludunt ac cura-
tione vel magis exacerbantur k). Illustr. MORGAGNI mali-
gnitatem significari dicit cita maximaque virium prostra-
tione, quae neque in praegressas evidentes causas, neque in ni-
miam rejici possit obruentemque sanguinis copiam l). Celeb.
ELLER malignitatis vocem istam febris indolem denotare
dicit, qua morbus febrilis vehemens per contagium propa-
gari, et epidemice grassari solet m). Vix vnam autem, al-
teramue harum definitionum cum alia conuenien-
tem reperies. Empiricorum ignobilis turba omnem
morbum malignum nuncupat quem tollere nescit,
infelicem curae euentum non suae ignorantiae, sed
latenti malignitati adscribens. Sed nemo facile dif-
fitebitur, fieri vix posse vt quis vnam generalem,
omnibus peritiorum atque celebrium medicorum
sententiis accommodatam, tradat malignitatis morbo-
rum expositionem. Plerisque tamen is videtur esse
animus, vt sensum vocis ab HIPPOCRATE aliisque
veterum vsurpatum definiendo exprimant et appli-
cando imitentur. Hac ipsa nobis etiam consti-
tuta norma, malignam existimamus habendam esse
aegro-*

k) Conf. Institution. pathol. med. §. 876.

l) De Sedibus et causis morborum Epist. 49. Art. 23.

m) Conf. Observat. de cognosc. et curand. morbis, praesert. acutis,
Sect. VI. p. 112.

Qui et aliorum auctorum de malignitate sententias scire
cupit, adeat celeb. TRALLES *Examen rigorosius virium etc.*
C. XIX. §. V.

aegrorum affectionem, quae secundum experientiam cum vitae conjuncta est discrimine, neque tamen, ex causis euidentioribus aestimata, talis esse apparet. Atque febris illa malignae nomen merebitur, quam ejusmodi affectionibus distinctam obferuamus. E magnitudine ergo et raritate symptomatum, totiusque ex morbi periculo, minus apte malignitas febris dijudicabitur. Solet autem systema neruofum non sine periculo laceffitum et perturbatum esse, vbi symptomata febris, absque manifesta causa, non ita respondent decursus ejusdem temporibus, neque sibi inuicem, nec signis reliquis externis, ac in ordinariis minusque periculosis fieri compertum est. Vnde peruulgatum illud, aegrum in malignis aliquando inter pulsum vrinamque bonamori. Malignitatem vero, secundum nostram hancce definitionem, in febribus gradu maxime variare posse neminem facile latebit. Sed operae pretium erit praecipua quaedam breuiter enarrare symptomata, quibus praesentibus maligna dici febris potest. Sunt autem, indoles mitis ipsius febris ex pulsu, vrina et membrorum calore aestimata, si cum grauiori virium prostratione inuaserit, aliisque cum symptomatibus incedat, alias ex majori febris vehementia oriundis; dorfi, colli et artuum, manuum praecipue et surarum, item praecordiorum dolores, sine omni apparente causa oborti; deliria fere continua, vigiliae diuturnae aut sopor, et capitis, praecipue occipitis grauatiuus, tensiuus pressoriusue dolor,

dolor, sine plethorae, congestionis ad caput, inflammationis et fordium biliosarum signis; fitis nulla, etsi lingua arida sit multusue aegrum teneat calor; magna insensibilitas, sic ut de morbo, medico ceterum grauiori viso, vix conquerantur aegri. Facile est differentiam percipere, hanc insensibilitatem inter, illamque animi placiditatem, quam in vehementibus etiam morbis seruare nonnullis concessum est. Immodestia etiam, aegrorum antea verecundorum, huc pertinet, et iactatio illorum frequens cum denudatione brachiorum crurumque, sine multo calore, et spasmi varii atque conuulsiones, latente horum omnium causa; item artuum et praecipue linguae et labiorum tremor cum magna debilitate; notandum tamen hic est frigus febrile, turgentiam fordium biliosarum, debilitatemque a morbo grauiori superato causam nonnunquam esse tremoris, qualis tamen malignitatis signis adnumerari nequit; linguam extendendi impotentia impeditaque oratio absque omni apparente partium vitio oborta; audiendi difficultas, nulla tamen imminente crisi; haec enim vbi instat, praecipue in febribus biliosis, auditum saepius quoque bono cum omine impedit; tunc autem malignitatis indicium est, vbi absque omni causa in debilibus aegris fit; oculi inuitis aegris illacrymantes sine omni visibili irritamento, non ut in febribus catarrhalibus benignis, vbi oculi etiam inuitis aegris lacrymas fundunt; impedita, sine omni faucium tumore aliaue causa euidente,

dente, deglutitio, etc. Sunt haec praecipua praesentis malignitatis indicia. Multis quidem insignior virium animalium prostratio fere primum, et maxime ex his perpetuum esse, visa est; attamen huic sententiae tum id aduersari existimo, quod illa saepe bono cum vigore vitalium virium, atque tunc haud raro vix vlllo cum periculo, conjuncta obseruetur; tum etiam, quod febres occurrant, Hippocratico sensu verissime malignae, quibus, per initium et incrementi partem, singularis illa virium animalium prostratio omnino deficiat. Hoc tamen facile concedo, virium animalium vigorem melioris esse in febribus notae, ac ipsarum oppressionem et vndecunque oriundum defectum. Intuitu harum tamen malignitatis notarum generatim obseruandum est, plerumque plures illarum simul et manifestiore modo praesentes requiri, vt febris maligna dici possit, nihilo secius autem non omnes in omni febre maligna reperiri. Poterit tamen hic illa oriri quaestio, an vllum detur febrium, propriis nominibus distingui solitarum, certum genus semper et vbique malignum? Praeter phrenitidem forte et paraphrenitidem, rectius intellecta hac voce, et febrem lentam neruosam Anglorum, pro meo quidem arbitrio, nullum. In his autem omnia ferme malignitatis symptomata adsunt *n*). Quicunque autem modo

enume-

n) Conf. BRENDÉL D. de phrenitide. Resp. cl. ELLENBERGER,
et ejusdem D. de cognatione paraphrenit. et febrium malign.
Resp.

enumerata malignitatis signa, cum symptomatibus febris putridae §. III. positis comparauerit, magnam inter haec facile reperiet discrimen; ad malignitatem ideo constituendam nulla requiritur humorum putredo, nec ad febrem putridam malignitas. Id tamen lubenter concedo, i. e. malignitatis signa sibi juncta habere, vt cuius optimorum de febribus putridis auctorum lustratori facile patebit.

§. VI.

Supra jam notauimus, febres putridas a multis optimae notae auctoribus cum febribus biliosis etiam confundi; vt hoc autem clarius elucescat, iuuabit accuratam exhibere febris biliosae ideam, eaque enumerare signa, quibus fordes biliosae in primis viis haerentes cognosci, in quouis morbo queant; vt ex horum cum signis putredinis collatione appareat, non omnem biliosam febrem esse putridam, nec omnem putridam biliosam. Febrem autem dico biliosam, quae causam habet bilem copia et qualitate peccantem, aliisque admixtis humoribus, ad primas vias confluentibus, vario modo et gradu alienatam. Signa, quibus peccans et abundans cognosci poterit biliosa talis colluies, sunt, amarus, nidorofus vel peculiaris quidam, cuius indolem aegri verbis exprimere nequeunt,

focdus

Resp. cl. BIEDERMANN; etiam ILLVSTR. PRAESIDIS et cl. FEIN D. de indole et sede phrenitid. et paraphrenit. et HVXHAM Diff. de febre lenta nervosa.

foedus sapor; lingua muco, primum flauescente, dein flauo et spissiori obducta; ructus amari vel nidorosi, halitusque ex ore satis ingratus et quodammodo foetens; anorexia, saepeque simul cibi, praecipue animalis fastidium; sensus plenitudinis circa praecordia cum anxietate; interdum quoque vomitus biliosi; penetrans et fortis, naturali molestior stercorum foetor et biliosus color. Atque haec ulterius confirmare solent somnus inquietus haud reficiens vel plane nullus, saepe etiam paucioribus et phantasmatibus viuидioribus interruptus, capitis quoque dolor et grauitas et, si modo erigatur, facile accedens vertigo; praeterea et ipsa deliria et aestus vehementior, quam ut plethorae et sanguinis motui respondere videatur. Praecipua haec sunt colluuiei biliosae signa, qualia nonnunquam et extra febres, minori gradu licet obseruare. Febris autem biliosa sese manifestat sordium modo enumeratis signis, exacerbationibus plerumque quotidianis, saepe etiam cum typo duplicis tertianae, raro simplicis; pulsu forti et celeri, calore vehemente, minus mordaci tamen ac in putridae indolis febribus, et in exacerbationibus multum aucto; delirio saepe aliquo, rarius continuo et periculoso; vrina spissa ruberrima, multa siti, diarrhoeis spontaneis biliosis etc. Patet ex his biliosam febrem a putrida omnino esse diuersam, licet saepius cum ipsa, vel etiam cum febre inflammato-

ria

ria sit complicata *). At exempla aliqua febrium biliosarum sine putredine adducere non superuacaneum prorsus fore arbitror, quorum plurima facile quidem reperiuntur, licet hoc non semper nomine autoribus veniant, sed variis aliis etiam gaudeant appellationibus, multasque ex iis febribus quae biliosae audiunt ad putridas pertinere ostenderim. HIPPOCRATES veram jam descripsit simplicemque biliosam, sequentibus verbis o). *Si quis bile vexetur febris eum quotidie prehendit et dimittit, potissimum vero medio die detinet, os amarum est, et cum sine cibo fuerit offenditur, ubi vero comederit strangulatur, et paucis cibis impletur, eos execratur et multis vomitionibus tentatur, ad lumbos et crura grauitas decumbit et multum dormit etc.* FRID. HOFFMANN sub febris cholericae nomine veram biliosam sine putredine describit p). Sub febrium continuarum remittentium nomine, plures hujus generis epidemias descripsit cel. CLIFTON WINTRINGHAM q), etsi quaedam ad inflammatoriam, aliae ad putridam indolem magis minusue inclinauerint. II. PRINGLE veram describit, simplicem, absque putredine biliosam, quam quoque biliosam, et remittentem vel intermittentem castrorum

rum

*) Conferri de his meretur Diss. Illustr. PRAESIDIS mei et cl. FRID. LVD. MAY, de amplitudine generis febrium biliosarum.

o) In Lib. de morbis II. Cap. 36. ed. Lind.

p) Med. rat. syst. T. IV. P. I. Sect. II. Cap. II. thes. path. §. VI.

q) In Comment. nosolog. passim.

rum dicit r). Sed sufficiant allata testimonia ad comprobendam existentiam febris biliosae simplicis.

§. VII.

Jam autem, praemissis hisce generalioribus, ipsas nunc aggredior harum febrium differentias. Diuidi autem poterunt 1. In *simplices, et cum aliis morbofis affectionibus complicatas*. De simplicium indole jam antea §. III. locutus sum, superest tamen vt pauca de harum causis frequentioribus addam. Oriuntur hae potissimum ex partium animalium actu putrescentium exhalationibus, hinc in carceribus, nauibus, castris et nosocomiis frequentius ac aliis in locis reperiri solent, partim ob regnantem his in locis et vix euitabilem foeditatem, partim quoque ob putridas vlcerum, gangraenarum etc. exhalationes, et alia ex parte ob deficientem aeris liberioris accessum. Stagnans enim ita materia perspirabilis putrescit et qua fermentum sana hucusque corpora inficit et corrumpit. Accedunt causae aliae, diacta nimirum incongrua, vt cibus mere animalis exsiccatus, falsus, vel putrescens, potus mere aquosus, aer calidus et humidus etc. Quam perniciosos autem exferat cumulata, stagnans et putrescens perspirabilis materia effectus, fatis testantur tristissima illa exempla quae Anglia a. 1577., et nuperius, anno nimirum hujus seculi quinquagesimo vidit. Cum enim ibi rei, antea in carcere

aere

r) *Observat. on the Diseases of the Army*. C. IV. p. 175. sqq.

aere libero non perflato detenti, in forum iudicii deducerentur, putridi ex iis nati vapores, multos iudicii affectores, multosque adstantium febre putrida correptos confecere *s*): et ex 146 hominibus in angusto carcere Calcuttae inclusis, 123 vna in nocte ob liberioris aeris penuriam vitam cum morte permutarunt *t*), sine omni dubio propter putridam aeris corruptelam, ortamque inde febrem putridam vehementissimam, quod ex symptomatibus l. c. enarratis colligere licet. Multa alia si opus esset, et aequae fere perniciose adducere possem exempla, noxarum e stagnante et vaporibus repleto aere oriundarum; qui tamen plura scire cupit adeat inter alios Ill. PRINGLE cap. cit. Sunt hae procul dubio praecipuae febris putridae simplicis causae, at omnia alia, quae putredinem in corpore animali ciere valent (§. II. enarrata), ad causas quidem febrium putridarum quoque pertinent, cum autem rarius modo recensitis occurrant, liceat mihi ulteriore illorum illustratione nunc supersedere. Contemplandae ideo nunc veniunt febres putridae complicatae. Coniunctos autem habere possunt *α*) *Catarrhos*. Haec febris putridae species omnibus ferme autoribus catarrhalium malignarum venit nomine, etsi hic quoque malignitatis vox multae sit ob-

M 2

noxia

s) Vid. PRINGLE *Observat. on the Diseases of the Army*. P. III. C. 7.

t) Conf. Illustr. ZIMMERMANN *von der Erfahrung* 2. Theil p. 181 sqq.

noxia ambiguitati. Verus quidem, suisque ex causis oriundus catarrhus, simul cum putrida febre adesse potest, at saepius simulacra solum catarrhalia, catarrhum mentientia adsunt, et malignitatis signis merito adnumerantur. *β) Inflammationes varias*, anginam nempe, pleuritidem, peripneumoniam et alias. In his febribus, licet alia verae putredinis signa adsint, nihilominus sanguis, cum e tusa vena educitur, crusta, inflammatoriam referente, obductus saepius reperitur, minus tamen densa ac in simplici inflammatione, pellucida et ubi major fuerit putredo variegata saepe. Vt omnis febris putridae indolis periculo plena est, ita putridae inflammatoriae reliquis plerumque multo sunt periculosiores, partim ob malignitatem cum iis saepissime conjunctam, partim inde, quod inflammatio remedia saepius postulet a putredine contraindicata, ut v. c. venae sectionem, temperantia etc., et putredo medicamenta requirat quae inflammatio non admittit, ut v. c. corticem peruianum, cardiaca, diaphoretica etc., partim quoque ob magis probabilem, propter magnam humorum acrimoniam et a sano statu recessum, gangraenae metum. Solet pulsus major esse duriorque ac in aliis febribus putridis non inflammatoriis. SYDENHAM, HUXHAM, SAVVAGES, TISSOT, CLIFT. WINTRINGHAM, aliique optimae notae autores febrium putridarum cum inflammationibus complicatarum

me-

meminerunt *u*), quas partim biliofarum, vel etiam malignarum et continentium putridarum nomine insigniuere. *γ*) *Exanthemata varia*, variolas puta, morbillos, scarlatinas maculas, purpuram, petechias et alia. Variolae et morbilli in tali etiam complicatione proprio contagio originem nunquam non debent, petechiae a sola sanguinis oriuntur dissolutione, vnde in febris decursu apparere primum solent. Vbi tamen putrida febris scorbuto superuenerit, ante febris initium adesse jam possunt, nam in vehementiori scorbuto haec exanthemata haud prorsus insolemnia sunt, licet morbus sine omni fuerit febre. Variolae et morbilli feбри, vel his etiam febris putrida superuenire potest. In variolis febris secundaria vel suppuratoria putrida haud raro fit, ob absorptum humoresque colliquans pus. Ceterum si febris putrida ante variolas aut morbillos, vel simul cum ipsis oritur, aliis sibi que propriis adscribenda erit causis. Purpura rubra melior esse in his febribus solet et critica, alba autem peioris semper indolis minusque critica est, et vix vnquam occurrit nisi adsint quoque malignitatis indicia. Bubones et anthraces in pestilentia vera aliisque pessimis febribus putridis solum occurrunt et exanthematibus vix adnumerari posse videntur, cum metastases ad glandulas, vel ad cutis substan-

M 3

tiam

u) Conf. etiam T. G. G. DE PREVAL thesin medicam, Ergo peripneumoniae putridae vomitoria Par. 1752. et DARLVC in Indiculo morborum epidemic. in VANDERMONDE Recueil periodique etc. T. VII: P. 55. 199.

tiam et subjacentes partes *w*), potius sint quam cutis efflorescentiae. Quo major diuersi generis exanthematum complicatio, eo periculōsior semper euadit morbus. Februm putridarum cum exanthematibus complicatarum exempla videre est apud SYDENHAM, DE HAEN, HUXHAM, PLENCIZ, et alios. *δ*) *Dysenteriam*. Haec ubi putridae fuerit indolis, easdem agnoscere videtur causas ac ipsa febris putrida, cur autem in altero casu vis morbi in intestina potius agat, in altero in vniuersum corpus, explicare nescio. In nosocomiis autem, castris, et alibi ubi aegrorum dysenteria laborantium adest copia, putridae faecum exhalationes febrem dysentericam putridam ciere facile possunt. Obstructo etiam adstringentibus alui fluxu, materia morbifica in humorum massam vniuersalem recipi et ita pessimi moris febres producere poterit. Exempla leges dysenteriae cum febre putrida complicatae apud DEGNERVUM, PRINGLE, ZIMMERMANNVM et alios. Sed complicatae etiam esse possunt febres putridae *ε*) *cum febris alius indolis*, biliosis nimirum, inflammatoriis et neruosis. Quum superius (§. sc. VI.) autem quid sit febris biliosa ostenderim, signaque abundantis et corruptae bilis exposuerim, vix opus erit fusius de his hoc loco disserere. Febrem vehementem in §. II. causis putredinis in corpore animali accensuimus. Cum autem inflammatoria febris vehemens esse, aut quoque
varios

varios per errores talis reddi queat, facile concipere est quomodo putrida huic superuenire possit. Meminit etiam Cel. HvxHAM x), complicationis lentae neruosae cum febre putrida, tali autem in casu haec forte semper vere maligna euadit.

§. VIII.

Sunt autem 2) putridae febres vel *continentes* vel *continuae remittentes*. Continentes, siue *συνόχες*, dico, quae aegrum sine vlla, vel cum vix percipienda affligunt remissione. Continuas autem remittentes, *συνεχείς*, voco, quae remittunt quidem a vehementia sua, at plenam tamen haud sistunt intermissionem. Non vnus tamen ejusdemque sunt typi continuae hae remittentes putridae, habent enim aliae exacerbationes quotidianas, aliae tertianas duplicatas, nonnullae et quartanas. Reperiuntur etiam febres intermittentes, quas haud inepte forte ad putridas retuleris. Sic febres illae cum dejectione multa subcruenta, quas ideo TORTI etiam subcruentas dixit, huc pertinere videntur. Quod tamen vt clarius pateat, liceat ipsius verba hujus febris indolem eleganter exprimentia hic inferere. Dicit autem: *solet ergo nonnunquam vel inuadente vel etiam declinante accessione suboriri placida quaedam frequensque ac copiosa dejectio, quae intra paucas horas nullo fere sensibili aegrotantis incommodo ad magnam molem et pondus increscit. Materia ista*

M 4 plane

x) Conf. ejus Dissertat. de febre lenta neruosa.

plane serosa videtur, sed subcruenta, aegrumque, primo nil tale timentem, breui deducit ad summam virium imbecillitatem cum pulsu minuto ac exili et extremorum notabili perfrigeratione. Vox attenuatur nonnihil, oculique concamerationem contrahunt. Ceterum sitis non molestat, mens est vegeta, nec de alia re conqueritur patiens, nisi de summa virium prostratione ac proclivitate in lipothymiam, quae facile quoque si e lecto surgere velit solet succedere *γ*). Haecce symptomata vix probabilius ex alia deduxeris causa, ac ex humorum colliquatione putrida, sola mens vegetior a communi signorum putredinis norma recedit. Alia species febris intermittens putridae oritur ex corruptione purulenta visceris cujusdam ab absorpto nimirum pure et colliquatis inde humoribus, hinc in phthisicis praeprimis frequens. Hujus faciunt mentionem TORTI *z*), et WERLHOF *a*). Cel. FR. CAS. MEDICVS dedit historiam febris intermittens, cum dejectionibus vehementer foetidis et frequentibus complicatae *b*), et alius magis adhuc putridae meminit, cui vehemens ptyalismus, et petechiae juncta erant *c*), et dein sectis cadaueribus, a febribus cum dejectione illa interemtorum, se magnam partium internarum corruptionem offendisse

γ) In *Therapeut. special.* P. 174.

z) *Conf. Therapeut. special.*

a) *Conf. Observat. de Febris.*

b) *Sammlung von Beobachtungen aus der Arznei Wissenschaft* 1. Buch p. 63.

c) In *libr. cit.* §. 39.

disse docet *d*), quo confirmatur hasce febres ex classe putridarum fuisse. Sanguineae autem illae dejectionis causam habet, bilem acrem et humorum dissolutionem putridam *e*). At perniciosissimae illae febres soporosae ad intermittentes putridas merito etiam referri posse videntur. Docet enim Ill. WERLHOF *f*) urinam crassam coloris intensi, subfusci, lixiui, et in quibusdam in nigredinem vergentis, valde foetentem, cum innatante pinguedine aliqua, hasce febres nuntiasse: sanguinemque vena secta eductum floridum repertum esse cum copioso sero viridescente, eumque interdum variegatos colores ostendere; et ubi causas harum febrium recenset *g*), illarum plurimas ejus indolis esse quae putredinem ciere valeant, nemo facile inficias ibit, dicit enim *h*), *Enasci potest hoc praecipue malum, ubi corpus senile est, ubi quod ex cholericumelancholicum esse, vel scorbutico calido laborare dixeris, biliosum simul, et succis crassis, acribus et ad putredinem vaporiferam pronis plenum etc.* Ex quibus omnibus patet, humorum in putridum vergentem constitutionem vel sociam saltem esse harum febrium causam.

M 5

§. IX.

d) Conf. 2. Buch §. 70. p. 138. sqq.

e) In ejusd. libr. §. 73. p. 146. sqq.

f) In Obseru. de febribus Sect. I. §. VI. p. 22. et 23.

g) Conf. §. VII. Sect. 1.

h) Pag. 26.

§. IX.

Diuidi 3) poterunt putridae febres in *sporadicis* et *epidemicas*. Sporadicae oriuntur α) *Ex vitio visceris cujusdam singulari*. Sic visceris corruptio quaelibet, si absorbetur materia acris, purulenta, corrupta, feбри putridae ansam praebere potest. Visceris istiusmodi vitium, sese vt plurimum aliis fibique propriis signis manifestare simul solet, at interdum id suspicari solum licet ex subito febris ortu sine alia apparente causa praegrediente. Sic hyeme proxime elapsa virginem vidi Wehndae peticulis subito correptam, cum magna lassitudine, febre parua, lingua impura, vomitu bilioso viridescente, animi magna dejectione, aliisque febris putridae licet mitioris signis. Aderat nulla apparens putredinis causa. Aer cum coelo sereno frigidus, diaeta bona, maximam partem vegetabilis quam seruauerat aegra, cum regimine iusto, vaporum putridorum defectus etc. febrem putridam nullo modo admittere posse videbantur. Nullus insuper alius tunc temporis grassabatur morbus putridus. Gauisa erat virgo bona satis ante febris accessum valetudine, si tussim, qua a primis ferme incunabulis laborauerat, excipias; de nullo tamen, nec in pectore, nec in alia corporis parte, antea conquesta erat dolore. Corripiebatur subito, sine vlla alia praegressa aegritudine, tumore vnus pedis, cum sensu quodam dolorifico, et paruo rubore; hunc, elapsis

elapsis horis aliquot, sequebantur maculae in crure pedis affecti, rubicundae primum, illasque mentientes quas pulex morfu gignit, mox autem fuscae et confluentes, sic vt totum externum praecipue cruris latus, plumbei fere esset coloris et contusum quasi videretur. Paulo post alter quoque tumere coepit pes, eodem ac primus modo, tumor deinde manus prehendit, et vltimo faciem. Nunc in lacertis etiam illae apparere incipiebant maculae, et brachia cum manibus introrsum spasmodice cum multo contrahebantur dolore. Palpebrae dein fuscae fiebant, at maculae purpureae mox totam hinc illinc obsidebant faciem. Vesiculae nonnullae sese sparsim per totum attollebant corpus, tenuem subcruentamque lympham fundentes. Dejectionis quoad numerum erat naturalis, pulsus vehementer inordinatus, nunc perparuus et alio iterum tempore satis magnus, at nunquam durus. In statu morbi vrina sedimentum deponebat purulentum. Curauit puellam Illustr. Praeses, et illam euacuantium, antispasmodicorum et antisepticorum praecipue ope, feliciter iterum ad sanitatem perduxit. Remanebat superato morbo debilitas, et pedum oedematofus tumor aliquis, quae tamen gradatim, exhibito cortice Peruuiano, euanescere, optime hodie valente puella: tussis illam quidem interdum adhuc vexat, at minori ac ante morbum ferocia. Febrem hancce vix pro alia ac pro putrida, ex laebe visceris cuiusdam orta, habere possumus, quamuis

uis praeter tussim nullis aliis sese manifestauerit signis, omnis enim alia nos fugit hujus febris causa. β) *Ex constitutione scorbutica.* Etsi enim scorbutus ad morbos febriles non pertineat, nihilominus cum magnum attigerit gradum fortissima cum eo conjuncta humorum dissolutio febrem ciere potest, saepeque re vera ciet, quam putridam esse nemo facile in dubium vocabit. γ) *Commisssa regiminis diaetaeue vitia.* Huc spectant corporis motus nimius, summa praecipue aestate, animi pathemata fortiora, vel diuturniora, carniū abusus, victus putrescens, inedia etc. Sed de his omnibus fusius in §. II., vbi de causis putredinis in corpore animali dictum est, egimus. δ) *Inepta curatio.* Ad hanc sectionem pertinent mercurius ante morbos febriles diu nimis vel inepta dosi exhibitus, abusus salium, medicamentorum terreorum etc. de quibus confer §. II. Epidemicæ autem febres putridæ sunt multæ, quæ aliquando sub nomine febrium catarrhaliū malignarum, petechialium, petechizantium, pestilentialium, nauticarum, carcerum, nosocomiorum, biliosarumque occurrunt, et quæ interdum simplices, interdum cum aliis affectionibus, aliisue febrium generibus complicatae sunt. Epidemicæ fere semper ex vaporibus putridis oriuntur; accedente aeris intemperie calida et humida.

§. X.

Differunt autem febres putridae 4) *ex occulta quadam corporum constitutione, morbiue epidemici genio abscondito*; nunc enim ad petechias vergunt, aliaue exanthemata, et alio iterum tempore, ad haemorrhagias vehementes periculosas, vel etiam ad gangraenas variarum corporis partium breui concipiendas inclinant. Petechiae quidem utplurimum in febribus putridis, aequae simplicibus ac biliosis, cum majorem morbus gradum affecutus fuerit, apparere solent. Sanguinis enim crasi per morbi vim dissoluta, humor hicce facile in varia cutis cellulosa spatia i), vel secundum Ill. PRINGLE k), ferum sanguine tinctum in cryptas vel cellulas cutis penetrat, per cuticulam pellucidam perlucet et petechias ita dictas constituit. Non tamen aequae frequens in omni febre putrida hoc exanthematum genus est, eam forte ob causam, quod aliquando mitior morbi epidemici genius, tantam humorum dissolutionem efficere nequeat, quum ferocior eam facilius, certius, citiusque gignat. Habemus exempla erumpentium jam primo vel secundo a decubitu aegri die petechiarum l), cum alias maximam partem post quartam demum m), vel secundum Cel.

i) Conf. Ill. v. HALLER *Element. physiol.* T. I. p. 37.

k) Conf. *Appendix to the Observ. on Army Diseases.* p. CVI.

l) Conf. PHIL. GOBBI *Diff. Historiam et curam epid. febris amplae*
Extens in HALLERI coll. Diff. Med. Pract. Tom. VIII.

m) PRINGLE *Observat. on Army Diseases.* p. 303.

Cel. HVXHAM *n*), inter sextum et vndecimum diem erumpere soleant. Forsitan et major solidorum laxitas, et varia putredinis humorum natura aut aliae nobis adhuc ignotae causae facere possunt, vt in vno facilius appareant aegro, ac in alio. Inualuit autem mcs illas febres in quibus interdum quidem, at rarius occurrunt petechiae, petechizantes dicere, illas autem in quibus maximam partem reperiuntur, petechiales. At alia etiam exanthemata, partim critica, partim minus, his nonnunquam superueniunt febribus, petechiis tamen minus sunt frequentia. Obseruauit ita cel. HVXHAM eruptionem erysipelaceam vel pustularem multis aegris angina putrida laborantibus accidisse *o*). Cl. STOERCK exanthematum miliarium feбри putridae post septimum diem superuenientium mentionem fecit, licet et in hac febre petechialia simul apparere solebant *p*). Cl. HASENOEHRL maculas grate rubras et criticas quarto vel septimo die in febre putrida vidit erumpentes *q*). Febris putridae, in qua efflorescebant in foeminis purpura, in puerperis sola rubra, in reliquis indiscriminatim alba et rubra, in potiori autem sexu petechiae, dedit historiam

Cl.

n) Obseru. de Aere et morb. epid. Tom. 2. p. 45.

o) Conf. Dissertat. on the ulcerous sore throat, annexd to the Essay on Fevers. p. 282.

p) Conf. Anni medici I. Vindob. 1760. edit. p. 48. sq.

q) Conf. Histor. med. febris petechial. quae ab a. 1757. ad a. 1759. Viennae grassata est.

Cl. WEITBRECHT *r*). Cl. DVHAMEL de febre continua putrida refert in qua nonnullis eruptiones herpeti fimiles in abdomine obortae funt *s*). Cel. HVXHAM febrem obferuauit putridam malignam faepe cum maculis paruis obfcuris vel fubatris, interdum cum luridis papulis per totum corporis habitum erumpentibus, interdum quoque pustulae largae erodentes illam comitabantur *t*). Alias etiam obferuauit vir cl. pustulas de quibus liceat ipfius verba proferre. *Jam nunc quoque* (morbi nempe ftatu) *interdum maximum attulit leuamem* *larga pustularum eruptio more veluti variolarum, quae tamen nil nisi tenuem et acrem ichorem continebant; erumpebant etiam aliquando multo minores, at vrentes admodum, quae vero in squamas mox abirent: salutiferae quoque et hae.* In quibusdam peralbas quasdam et latas maculas notauit, parum eminentes quasi ex urticae morfu, hae vero difficilis indicii *u*). Interdum, at rarius, occurrunt epidemiae in quibus omni fere aegro fanguis fufe, nec fine inanitionis metu ex naribus fertur. - Ita Cl. DVHAMEL notauit febrem continuam putridam, cui nono aut vndecimo die faepius accessit fanguinis per nares nullo modo compescendum effluuium, quod die duodecimo aut decimo

r) De febrili Constitut. petechizante, Petropoli 1735. grassante; in HALLERI Collect. Dissert. Med. Pract. T. V.

s) Vid. Memoires de l'acad. Royale des sciences de Paris de l'an, 1747.

t) Vid. ejus Obseru. de aere et morb. epid. Vol. alter. p. 137.

u) Vide libr. cit. p. 46.

cimo quarto lethale esse consuevit *w*). Descripsit cl. DARLVC febrem, quae, cum erysipelas faciei illam comitari solitum sit, ad exanthematicas quidem pertinere quoque videtur, at in qua etiam nonnullis aegrorum grauior narium accessit haemorrhagia *x*). Februm putridarum gangraenosarum plures habemus observationes. Ita variolas putridas gangraenosas obseruarunt inter alios SYDENHAM *y*), et HVXHAM *z*). Cl. ZIMMERMANN exemplum refert dysenteriae putridae febrilis, cui crurum gangraena accedere solebat, Flandriae a. 1673. in turmam equitum saeuientis *a*). Contemplanda etiam hic potissimum venit febris putrida cum angina gangraenosa conjuncta, quippe quae variis temporibus multisque in locis epidemice grassata est et permultos confecit *b*). De febre acuta militis, cui nasus, palpebrae, labia, lingua, et ungues tertio morbi die prorsus denigratae fuerunt, aegro summa anxietate,

vv) In *Mémoires de l'acad. Royale des sciences de l'an. 1747.*

x) Conf. *Indiculum morbor. epidem. etc. in VANDERMONDE recueil period. d'observat. de medec. T. VII. p. 55. sqq.*

y) Conf. *Opp. Tom. I. p. 124.*

z) *Obseru. de aere et morb. epid. Vol. 2. p. 122.*

a) *Von der Ruhr X. Cap. p. 341.*

b) *De pernicioſa huius gangraenosae anginae specie* Conf. MALOVIN *histor. morbor. epidemicor. Paris 1746. obseru. in Memoire de l'academie Royale des Sciences de l'an. 1746. et CHOMEL Diss. historique sur l'espece de mal de Gorge gangreneux Par. 1749. et GARNIER Quaest. med. An anginae gangraenosae emeticum. Par. 1750.*

tate, summisque doloribus hypochondrii dextri diuexato, et postridie mortuo, obseruationem habet cl. LENTIN c). In febribus et diarrhoeis saepe vidit cel. BALDINGER gangraenam in apice nasi incipientem, ad oculos dein et genas breui diffusam, morte horis quinque vel sex jam subsequente d).

§. XI.

Vltima denique febrium putridarum diuisio illas 5) dispescit in *primarias* et *secundarias*. Prioris sunt generis pleraeque febres putridae epidemicae, posterioris autem vel symptomatae, vel superuenientibus accidentalibus causis excitatae. Pro symptomatice haberi poterunt illae febres, quae ab exulceratione cuiusdam corporis partis originem ducunt, et phthisticae plerisque audiunt; absorptum enim in tali casu pus humores colliquat et ideo in putredinem vergere facit, hinc febris secundaria vel suppuratoria variolarum referenda huc etiam erit, quippe quae ex eadem potissimum oriri videtur causa. Miasma venereum cum humores vehementer corrumpat, febrem putridam symptomatice ciere etiam potest. Febres autem putridas ex accidenti superuenientes dico, quae ex regiminis, diaetae, curationisue vitiis fiunt.

§. XII.

c) *Obseru. Med. Fasc. I. Obs. X.*

d) *Von den Krankheiten einer Armee. p. 264.*

§. XII.

Ast absolutis putridarum febrium diuisionibus, superest vt de illarum contagio et curatione paucissimis verbis nonnulla superaddam. Contagium videtur esse subtile quid, quod vi pollet corporis humores, si iis applicatur, in materiam sibi similem conuertendi. Hoc, ab aegrorum corporibus, circa morbi statum praecipue, auolans, per pulmones et inhalantia cutis vasa in corpus ad infectionem dispositum receptum, gradatim in fluida animalia fermenti modo agere videtur, donec sufficiente ipsorum quantitate in similem massam conuersa, eundem demum producat morbum ac ille fuerat, a quo originem duxerat. Antiquior haec est et maxime forte recepta de contagio theoria. Contra hanc autem pugnant Ill. CAR. A LINNE *e*), et cel. PLENCITZ *f*), qui, et praecipue quidem cel. PLENCITZ, omne contagium animalculis deberi credunt, suamque opinionem permultis, haud leuioris quidem notae, argumentis defendunt. At multum etiam in aduersam partem dici poterit. Dum igitur lis adhuc sub iudice est, optimum erit expectare, donec vna alteraue opinio vltioribus comprobata fuerit experimentis. Videntur tamen infecta effectus potius esse contagii quam ipsius causae, si enim

ea

e) Conf. ejusd. *Diss. Exanthemata viua dictam resp. I. C. NYANDER Upsal. 1757. et Noxa Insectorum Resp. M. A. BAECKNER 1752. habitam.*

f) Conf. ejus. *Opp. physico medic. Traß. I. de Contagio.*

ea pro causis habere velis, aequè justum foret secundum Autorum argumenta omnem putredinem, omnemque vnius fluidi in aliud mutationem, quam fermentationis ope hucusque modo non omnes fieri credidere, ab infectis etiam deriuare, quae tamen opinio parum prae se ferre videtur probabilitatis. Neque etiam ipsae a laudatis autoribus adductae rationes tanti videntur esse ponderis, vt ad dimittendam alteram magis receptam sententiam attentum verique studiosum lectorem facile mouere queant. At manum de tabula, scopus non admittit, vires non sufficiunt meae, vt fufius in hanc rem inquiram, vt iudicem, cuinam harum opinionum debeatur laurus. Id solum addo vnum morbum magis contagiosum esse altero. Scabies v. c. mero attactu propagatur, lues venerea vix aliter ac per partes genitales, mammas, labia, aliamue partem tenuissima cuticula obductam. Variolae autem, febres putridae plures, dysenteriae, per solum halitum sana corpora, ad recipiendum contagium apta inficiunt. Febres putridae sporadicae non facile sunt contagiosae, nec symptomatae, nisi morbus ipse cui accedunt contagiosus fuerit. Omnium maxime contagiosus morbus pestis est, cuius etiam diu latere potest miasma, et nihilominus dein pristina vi agere, vehementissimosque exferere effectus.

§. XIII.

Dum autem curam putridarum intuemur, apparere primum incipit insignis vtilitas et necessitas exacte cognitorum discriminum quae hasce febres intercedunt. Omnino enim non poterit evitari error in curationis methodo, nisi putridas simplices a complicatis, praecipue a putridis biliosis rite distinxeris. Dilucidari autem inde poterunt perpetua et ingentia illa sententiarum diuortia, cur multi in putridis febribus euacuantia necessaria, et alii iterum eadem valde noxia, ambo ex propria observatione habuerint. Ill. DE HAEN dubia aduersus euacuantium usum in malignis, quae ex minus perpetua illorum in his morbis vtilitate collegit g), commodè forsitan hinc solui queunt, quum adductae illius observationes diuersi generis febres omnino sistere videantur, in quarum aliis faustum et exoptatum, in aliis aduersum noxiumque effectum euacuantia praestiterint; minimeque mirum, sub amplissimo malignarum genere, voce ad ill. Viri mentem vsurpata, quam plurimas acutas reperiri, in quibus emetica et purgantia, praesertim sine iusta cautione exhibita, variam facile noxam afferre potuerunt. Etenim quam facillime nocere utique possunt euacuantia in febribus putridis simplicibus, pariter ac in nervosis lentis; simpliciterque inflammatoriis: optimae autem sunt vtilitatis, iustas

g) Conf. *Rat. med.* T. III, C. I.

stas secundum cautiones exhibita, immo ad felicem medelam saepe maxime necessaria, in putridis biliosis, etiam magis ac vbi putrida diathesis in biliosis defecerit; in iis enim si biliosa illa et corrupta relinquitur colluies, paulatim in humorum recipitur massam, eosque inquinat, praesertim si cortex peruuvianus aliaue antiseptica calidiora, vel diaphoretica aegro simul propinentur, neque diaeta antiphlogistica et antiseptica sollicitè obseruetur. Haec ipsa autem proposita febrium putridarum discrimina, vt optime confirmari videntur obseruationis aliorum, qui talibus in morbis sub variis conditionibus, emetica et purgantia nunc proficua, nunc vero noxia, propria ducti experientia declararunt, HIPPOCRATIS, GALENI, FERNELII, SYDENHAMI, BAGLIVII, BOERHAAVII, FR. HOFFMANNI, MEADII, BRENDII, HUXHAMII, PRINGLI, GLASSII, TISSOTI et plurium; sic et eadem si accurate perspecta habeantur, quam maxime inferuiunt melius intelligendis, certioresque in vsum proprium vertendis aliorum obseruatis monitisque practicis etiam specialissimis. Facilius quoque praeterea ex hisce febrium putridarum diuisionibus dijudicari poterit, quando in putridis febribus venaesectio locum habeat, quandoque nociua sit, vbi porro acida vegetabilia, vbi spiritus vitrioli potius profit, vbi cortex vel solus, vel cum acidis, vel cum euacuantibus conjunctus, vbi camphora, vbi diaphoretica, vbi vesicantia, vbi demum regimen frigidius vel

paulo calidius, et quaenam in omnibus cautiones requirantur.

§. XIV.

Atque his nunc pro virium tenuitate expositis, quae B. L. aequi bonique consulat, proposito nostro, quantum angustiores finunt dissertationis academicae limites, nos quodammodo satisfecisse existimamus.

V.

Differtatio sistens circa variolarum distributionem inprimis ratione febrium cum iis conjunctarum quaedam analecta. Publice proposita Gott. 1770. Resp. Is, DAN. FELLINGER, *Aquisgranensi*.

§. I.

De argumento, quod, ex legum academicarum praescripto, inaugurali specimine exponerem, nec inutili quidem, nec minus tamen difficili, eligendo, mihi curatius meditati, de morbo tam saepe grauissimo ac difficillimo, plurimisque pernicioso, fere neminem mortalium a pluribus jam saeculis plane praetereunte, ac fere omnes semel modo affligente, notissimo nempe illo varioloso

fo, notatu digniora quaedam visa paucis explanare, consilium placuit, praesertim cum hoc ipsum ab ill. etiam Praefide, Praeceptore meo maxime colendo, valde probaretur. Ex hoc nempe, quoad perspicere mihi haecenus concessum, atque per angusti temporis, a studiis academicis, etiamnum interea simul persequendis, reliqui spatium mihi licuerit, veri sic dicti morbi variolosi, quoad febrium in primis cum illo junctarum, differentias, in praxeos commoda constitutas ponderare, meum in animum induxi.

§. II.

Licet enim quam plurimi atque suo merito celeberrimi Auctores inde ab ipso RHAZE ad nostra ipsa tempora in observandis atque describendis hujus morbi, generi humano prae multis aliis tam saepe infestissimi, varietatibus, et in definiendis secundum conditiones aegrorum discrepantes, medendi methodis diuersis, neque minus etiam certa in capita distribuendis; quo rationalem ejus curationem faciliorem redderent, ipsius morbi differentiis, praeclaram omnino et insignem, ut facile animaduertimus, operam posuerint, vix tamen ex artis tyronibus aliquem fore existimo, qui consultis Practicorum operibus iisdemque inter se sollicitè collatis, dolorem exinde singularem non sit percepturus, quod multitudo specialissimarum cautionum, ab Auctoribus optimis traditarum, atque dis-

sensus ille frequens, vt quoad alia multa, sic et quoad partitiones morbi varias, harumque momenta, obuius hanc etiam doctrinae medicae partem difficultate permolesta implicet.

§. III.

Ad magna artis haec incommoda aliquantisper imminuenda Medici dudum ex ingenti multitudine obseruationum specialissimarum, inter se quam maxime discrepantium, licet harum quoque notitia medico practico perquam simul utilis immo necessaria sit, variolosum quoque morbum varia in genera distinxerunt. Nos quidem praecipuas primum istarum partitionum bonis ab Auctoribus traditarum, breuiter proponemus, dein autem quanti quaelibet momenti ipsa in praxi videatur, quoad perspicere concessum fuerit, ponderare adnitemur. Notissima et perquam vulgata variolarum diuisio, etiam a RHAZE a) jam proposita illa est in *discretas* siue *distinctas* et *confluentes*, quae a recentissimis etiam aetatis nostrae Practicis prae aliis frequenter vsurpatur; harum vtrasque SYDENHAMVS b) et LOBBIVS c) aliique subinde vltcrius in *regulares* et *anomalas* siue *irregulares* distribuuerunt. Complures etiam Auctores generi inter confluentes et discretas intermedio peculiare *cohaerentium* nomen

a) *Ad Al-Mansor. Lib. X. c. 12. et de variolis et morbill. ex edit. IO. CHANNING Londini 1766. Cap. XIV. p. 191. 193.*

b) *Opp. vniuers. Edit. Leidens. 1754. p. 132.*

c) *Treatise on the Small Pox London 1741. p. 7.*

men imposuerunt. Praeter has differentias RHAEZES d) jam memorauit *variolas virides, violaceas, nigras et admodum paruas, albas, duras, verrucosas, humore vacuas, ad maturitatem difficillime peruenientes, atque duplicatas, materiae abundantiam significantes*. HALY ABBAS e) has omnes variolarum species quoque notauit, simulque mentionem illarum fecit, *quas petechiae comitarentur, atque vesicae illis similes, quas ambustio excitare solet*. AVICENNA f) easdem omnes species pariter memorauit primusque retulit *sanguineam urinam, similemque alui dejectionem*, quandoque in variolosis contingentes; mentionem quoque fecit speciei, quam vocat *duplices magnae, in ventre unius quarum est variola alia*. Sed praeterea etiam generalis illa, magni a multis recentiorum habita, morborum praesertim acutorum in *benignos et malignos* diuisio fere peculiari quodam jure variolis conuenire a non paucis perhibetur; cui distinctioni adeo fauent nonnulli, vti MORTONVS g) et ex recentissimis Scriptoribus ill. quoque de HAEN h) vt plurimum illam habere momenti ad prognosin et medendi rationem recte constituendam contendunt. CL. HILLARY i) vltiorem variolarum partitionem, praeter eam in *distinctas,*

N 5

con-

d) in locis citatis, et in libro edit. CHANNING p. 195.

e) Theoriae Lib. 8.

f) Canon. lib. 4. Fen. 2.

g) Pyretol. de febr. inflamm. c. VI. edit. Geneu. p. 37.

h) Rat. med. P. H. C. III. et alibi passim.

i) Essay on the Small pox. London 1740. p. 36. 37.

confluentes, contiguas, et illas, quas maculae petechiales et haemorrhagiae comitarentur, pro subtilibus potius ineptiis, quam vere utili doctrina habet, contenditque nominatim hisce speciebus singulis, ubi malignae essent indolis, crystallinas, siliquosas et verrucosas aliquando intermixtas esse. MEADIVS k), non contentus ordinaria variolarum in discretas et confluentes diuisione, quum non tam a purulentae materiae copia, quam ab aliis rebus circumstantibus exitium imminere, atque discretas confluentibus interdum perniciosiores animaduernerat, rectius illas diuidi posse existimat in simplices et malignas harumque differentias praecipuas sua ex obseruatione reperiri tradidit inter crystallinas, verrucosas, et sanguineas, siliquosas FREINDII crystallinis suis accensens. Prolixa autem prae aliis partitio est, quam cel. tradidit SAVVAGES l) praeter sic dictas spurias, et quidem lymphaticas, duodecim enumerans variolarum verarum species, discretarum nempe septem, 1. benignas s. regulares SYDENHAMI 2. anormales ejusdem, 3. ejusdem dysenteriodes. 4. vesiculares s. crystallinas Meadii. 5. hujus verrucosas. 6. hujusque siliquosas. 7. miliares HELVETII; postea et quinque confluentium, nempe 1. SYDENHAMI regulares, 2. crystallinas HELVETII. 3. cohaerentes illius, quae confluentium malignarum ejusdem Auctoris alteram speciem sistunt, cum interuallis miliaribus, aut purpuratis. 4. nigras

k) De variolis et morbillis libro, edit. Goett. p. 16. et sqq.

l) Nosol. method. Tom. II. P. I. p. 367. sqq.

nigras Sydenhami vel sanguineas MEADII 5. *corymbosae*, ab HELVETIO descriptas. Ratione Febris autem, quae pustulas variolosas comitatur et praecedit, alii nullam memorant peculiarem discrepantiam, nisi quae ex varietate vel corporibus aegrotantium inhaerentis conditionis, vel epidemicae constitutionis, annique temporum ac tempestatum, vel etiam diuersae miasmatum virulentiae, regiminis-que diaetae et medelae conditionis, quodammodo concipitur, certa tamen in genera febres non discescunt; alii harum etiam febrium discrimina, diuisionibus illis peruulgatis variolarum in benignas et malignas, siue meliores et peiores, siue regulares et anomalas, simul comprehendunt. Nonnulli tamen et ejusmodi varia febrium genera, quae et alias tum solitaria tum etiam cum inflammationibus, aliisque exanthematibus, atque catarrhis conjuncta occurrunt in variolarum decursu obuia memorant, quorumque accuratior idea aliquam curationi lucem affundere perhibetur; ita enim febris nunc inflammatoriae indolis, nunc vero ab hac aliena esse dicitur, nunc lentior quidem, nunc acutior, etiam verioribus quandoque praedita malignitatis characteribus, quibus scilicet periculum fere sola duce experientia innotescit, ex causis nempe non satis certe ac euidenter apparens, quique perturbatum insuper occultiori ex origine systema neruosum declarant, et e symptomatibus praesertim, nec sibi inuicem nec manifestiori aegrotantium conditioni

tioni respondentibus desumuntur, atque ex his in primis ingeniosus et accuratus scriptor, Io. HuxHAM *m*) laudari meretur, qui febres cum variolis conjunctas diuersas, nunc *inflammatorias*, nunc *lentas neruosas*, nunc *malignas s. putridas et petechiales* descripsit, atque variam his accommodare medendi rationem docuit, vbi semper magis ad hoc februm discrimen, quam ad reliquas differentias attendisse videtur.

§. IV.

Jam vero scrutaturi, quantae vtilitatis ipsa in facienda medicina sint istae variolarum distributiones, eam primum consideremus, qua in discretas, confluentes et cohaerentes distinguuntur. Vocabulorum, quibus hasce species denominare solemus, explicationem praetermittere licebit, cum notissimus sit illorum de hoc morbo vsus, idemque ex reliqua etiam illorum communi significatione facile colligatur, si modo obseruetur, pustularum faciei praecipuam hic rationem haberi. Si confluentes tunc variolas oriri assumamus, vbi densissimae in facie pustulae simul ac semel eruperint, quae auctae in vnam permutentur vesicam variolosam, in eam facile sententiam transibimus, numero saltem confluentes, cohaerentes atque discretas differre, morborumque integrorum iisdem conjunctorum discrepantiam, quod maiorem pustularum praeser-

tim

m) *Essay on Fevers Edit. 5. London 1767. p. 126. 127. 128.*

tim faciei copiam, grauior pluribusque et periculo-
 fioribus symptomatibus stipata febris comitari so-
 leat, vnice in vario ipforum gradu consistere.
 Quodsi etiam quis optimorum, qui de hoc morbo
 scripserunt, Auctorum historias et asserta contule-
 rit, eandem quoque sententiam ipforum obseruatis
 omnino confirmatam reperiet. Ita enim SYDENHA-
 MVS *n)* *symptomata*, inquit, *cum discretis communia*
habet et illa variolarum species, quas confluentes adpel-
lauimus, nisi quod hic atrociora sint omnia, febris scili-
cet, anxietas, atque aegritudo, vomituriatio etc. im-
manius adfligant, quibus signis Medico sagaci, etiam
ante eruptionem, confluentes se produnt. Quae prae-
 terea etiam accuratissimus hic ceteroquin obserua-
 tor memorat confluentium in morbo frequentius
 obuia phaenomena, minorem nempe ad sudores
 atque maiorem ad diarrhoeas, antequam erumpant
 pustulae, propensionem, et eruptionem ultra ter-
 tium diem rarissime dilatam, et quae sunt plura,
 nequaquam propria plane perpetuaque confluenti-
 bus esse, per ipsam abunde constat experientiam.
 Ex valde aestimatis, ipsoque a BOERHAAVIO etiam
 maxime laudatis de hoc morbo Scriptoribus, est
 etiam THEOPHILVS LOBB *o)*, qui de hoc discrimine
 ita sentit: *By the distinct and confluent small pox I do*
not apprehend two different species of Distempers to be
meant, but only that the most remarkable difference of
the

n) Opp. *uniuers.* Sect. III. cap. 2. p. 135.

o) *Treatise on the Small pox* p. 6.

the same kind of disease is thereby denoted; for in the confluent Pox it is only a greater degree of the morbid Quality, and of the Quantity of the variolous matter, which makes the various Appearances, and which produces the great variety of symptoms, according to the several Parts of the Body affected with it. Neque de hac differentia alia est sententia BOERHAAVII p) et HILLARY q) et MEADII r) et TISSOTI s) et Equitis de ROSENSTEIN t) quorum et aliqui, vti alii etiam plures, hoc discrimen haud magni aestimare videntur. Quodsi ergo sic se res habeat, nomina confluentium, cohaerentium, discretarum variolarum tantum inferuient majori medio et minori gradu, qui, sub reliquis paribus aegrorum conditionibus, locum habeant, distinguendis, nec rejicienda quidem sunt, quod hi gradus certos quodammodo limites habent, qui tamen nec pro solis assumi debent, cum quam plurimos habeant intermedios, nec vt gradus varias vere discrepantes morbi variolosi species sistunt, quae diuersas et cuique proprias medendi rationes postulent. Neque dubitauerit etiam in obseruando ac pro varia indole sua tractando morbo mediocriter versatus haud aliis artis praesidiis confluentes plerumque indigere ac discre-

p) *Aphorism. de cogn. et cur. morb.* §. 1397.

q) *Practical Essay on the Small pox* p. 42.

r) *de variolis et morbillis libro*, edit. Gott. p. 16.

s) *Avis au peuple sur sa santé* §. 209.

t) *Anweisung zur Kenntniß und Cur der Kinderkrankh. 2te Ausg.*
p. 111. 118. 122. 123.

discretas copiosiores ; eisdem quippe symptomatibus et grauitate ac periculo , quae illis frequentiora sunt , in has pariter non raro incidentibus.

§. V.

Verumtamen , si tum indolem ipsius confluentium eruptionis , tum frequentiore integri cum variolis hisce conjuncti febrilis morbi conditionem propius et accuratius intueamur , certam quandam variolosi hujus confluentium morbi naturam persaepe saltem aut plerumque esse , ex probabili et in usum praxeos proficua conjectura , sentiendum videtur. Ipso rerum usu confirmante , SYDENHAMVS docuit , ante confluentium eruptionem immanius affligere febrem , anxietatem , aegritudinem , vomituritionem ; diarrhoeam insuper etiam aliquando ante eruptionem accidere , illamque ad diem vnum alterumue post eandem protrahi ; tertio vtplurimum die et nonnunquam citius , raro ferius , hanc speciem erumpere , ob atrocius tamen aliquando symptoma eruptionem ad quartum vel quintum usque diem differri , verbi gratia ob acutissimum dolorem , quasi nephriticum , vel pleuriticum , vel in artubus rheumaticum , vel ob ingentem ventriculi aegritudinem , cum vomitu enormi ; in confluentibus etiam aequae febrem ac alia symptomata ad multos dies a pustularum eruptione aegrum discruciare ; variolas has nunc erysipelatis ritu nunc morbillorum erumpere , a quibus non nisi a Medico in his rebus

rebus versatissimo distinguerentur. Frequente praeterea obseruatione satis constat, saluationem confluentibus adultiorum, licet nec illa immunes permanere soleant copiosioribus discretis affecti, perpetuum se comitem adungere, ita quidem vt modo rarissime deficiat, ipseque SYDENHAMVS vnicum tantum talem viderit confluentibus laborantem, cui nulla superuenerit saluatio, eandemque frequentius longe abundare in confluentibus ac in discretis. Notatu quoque digna est illa infantum sub confluentibus multo maior quam sub discretis ad diarrhoeam pronitas, qua fit, vt fluxus iste in plerisque, nisi impediatur, sponte, nunc paulo serius, nunc vero citius, per tertium praesertim et quartum stadium, nec raro per integrum morbi decursum, et in aegrorum quidem salutem, succedat. Attentionem praeterea meretur SYDENHAMI consilium, licet nos quidem tam generaliter illud amplecti nolimus, vt, *si vel minimum suspicari liceat, variolas mox erumpentes e confluentium genere futuras esse, vt non solum sanguis mittatur, sed et emeticum propinetur u)*; quod alibi de confluentium pariter agens curatione sic proponit: *necessè erit sanguinem primum e brachii venis educere et post aliquot horas emeticum eradicatorium ex infusione croci metallorum exhibere, quod non solum materiam, a qua oriatur aegritudo ista insolentior, foras propellit, sed etiam aegrum ita refocillat,*
vt

u) Opp. uniu. p. 146.

vt jam quasi sanus lectulo abesse possit v). Faustum quoque hunc emetici exhibiti successum, et praegresso quidem spontaneo colluuiei biliosae vomitu, enarrata memorabili iuuenis, confluentibus variolis correpti, curatione confirmat *w*). Jam vero si haec ipsa, obseruationum instar, quas etiamnum experientia saepissime stabiliat, consideremus, facile persuadebimur, in confluentium variolarum morbo plerumque, si non semper vitiosum circa praecordia fomitem haerere, qui tum grauiora illa eruptionem praecedentia, comitantia, et subsequenta symptomata, tum et ipsam erysipelati aut morbillis aemulam eruptionem producat. Quem enim rerum in morbis febrilibus obseruandis frequentior vsus non defecerit, compertum facile habere poterit, quam saepe grauiora ista symptomata, quae confluentium variolarum morbum comitantur, et ipsa major febris vehementia, etiam alias ex primarum viarum colluuie morbofa et praesertim quidem abundantius biliosa, oriantur, nec forsitan magnam difficultatem is reperiet, in deriuandis eadem ex origine et minori gradu leuaminis, confluentium quam discretarum eruptionem plerumque subsequens, et saluationis citiori ac abundantiori in confluentibus impetu, licet vtrumque hoc malum alias etiam habere causas possit. Videtur enim

v) *Diff. epist. ad Guil. Cole. Opp. p. 370.*

vv) *ibid. p. 380.*

enim obseruatio omnino docere, saluationem, ceteris fere paribus, magis abundare in corpore quoad primas vias minus puro, et, ex pluribus causis febris, variis cum symptomatibus ab eruptione ulterius perseverantis, haud infrequentem esse, primarum viarum fordes, praesertim biliofas, secretionum et excretionum vitio in praecordiis collectas. Annon ergo hinc probabile, variolas confluentes prae discretis frequentius conjunctam habere vitiosam et praecipue biliosam ad primas vias colluuiem? Attamen et ulterius huic argumentationi aliquam addere fidem videtur ipsius confluentium eruptionis cum erysipellate et morbillis, quibus illa similis est, instituta comparatio. Quod enim GALENVS x) innuit, erysipelas a bilioso succo nasci, ejusque curationi medicamenta quae bilem expurgant, inferuire, recentiorum complurium obseruatione, quam et propria cujusuis probe attenti experientia facile confirmauerit, satis comprobatum reperimus. Ita enim de erysipellate agens docet MEADIVS y) *Non sane alius cuius morbus acutus facilius iteratam purgationem fert, praesertim ubi cum tumore inflammatio caput obsidet; similiterque fere cl. BROCKLESBY z) inter alia vtilissima de hoc morbo obseruata notat: no acute Fever whateuer bears artificial purging so early without disturbance as the*

x) *Methodi med. L. XIV. c. 1. et 11.*

y) *Monit. et praecept. med. edit. Goett. p. 17.*

z) *Oeconom. and Med. Observations London 1764. p. 143.*

the erysipelas. Etiam GVALT. HARRIS a) ad erysipelas paulo post institutam venae sectionem cathartica leniora commendat ad aestuantes humores euocandos et bilem praedominantem compescendam. Pariterque Io. FREIND b) satis mihi, inquit, experimentis esse edoctus videor, ut pronuntiem in capitis erysipelate si quando cerebro tentato oboriatur coma, delirium, neruorum distensio, aut nullam esse salutis spem, aut purgantia maxime profectura; neque in his rerum angustiis expectandum esse, quod et in variolis experimur, dum vel febris lenita sit, vel tumor plane subsederit. Eadem plane sententia est Io. BAPT. BIANCHI c) et TISSOTI d), qui ambo et quoad originem et quoad curationem GALENO plane, non quidem ex hypothesi, sed obseruationibus permoti, adstipulantur. Annon ergo secundum haec etiam valde probabile, confluentes variolas hisque propius accedentes cohaerentes aut contiguas morbum sistere ex variolis et erysipelate, praesertim faciei, complicatum? Haec autem, licet arrideat, sententia minime tamen nos permoueat, ut generalem curationis regulam ad confluentium nomen constituendam, nec in aegroto quolibet in praesentia indicantia, quae cautae non minus ac satis efficacis medelae normam praebeant, inquirendum esse, existimemus. Sed superest, ut nonnihil quoque de similitudine con-

O 2

fluen-

a) *Diff. Med. et Chirurg. VII. p. 123.*

b) *Comment. VII. in libr. epid. Hipp. edit. Paris. 1735. p. 51.*

c) *Histor. hepat. T. I. p. 423.*

d) *Diff. de febribus biliosis Lausann. 1758. p. 161.*

fluentium variolarum eruptionis cum illa morbillorum, a SYDENHAMO etiam asserta, subnectamus. Longissime quidem ab ea me abesse sententia fateor, aliquam ex hac similitudine complicationem horum ipsorum exanthematum, quorum nempe vtraque proprium suum postulare contagium extra omne fere dubium positum esse existimo, probabili satis consequentia colligi posse. Attamen cum haec etiam a SYDENHAMO aliisque proposita, et per autopsiam saepissime stabilita, conuenientia eruptionis confluentium variolarum cum illa morbillorum eandem quodammodo confirmet, quam declarauimus morbi confluentium variolosi naturam, nec plane indignam attentione hanc censuimus comparisonem. Obseruauit jam RHAZES *inquietudinem et nauseam et moerorem in morbillis abundare magis quam in variolis, nisi variolae sint pravae*, indeque concludit (secundum versionem Io. CHANNING) *e*), vel pro ipsa causa illorum symptomatum habet (ex interpretatione MEADII) *f*), *morbillos ex sanguine oriri admodum bilioso*. Huic vero vniuersali assertioni licet adstipulari nolimus, minime raro tamen biliosae indolis febrem, et quae vomitiones atque alui laxitatem commode ferat, quin etiam subinde postulet, morbillos, et frequentius quidem ac variolas discretas, comitari, complurium

Scri-

e) Lib. citat. p. 39.

f) Libell. RHAZIS latine redd. quem proprio suo adiunxit de variol. et morbill. lib. Goett. p. 96. 97.

Scriptorum fide dignissimorum testimonio, ipsoque rerum usu, facile confirmari existimamus. Ita enim SYDENHAMVS g) quoque symptomata inter ordinaria morbillorum regularium eruptionem praecedentia refert, aegros vomere, saepius tamen laborare diarrhoea, cum dejectionibus subviridis coloris. Vomitus quidem, addit SYDENHAMVS, post eruptionem morbillorum nunquam observavi, sed contrarium praestantissimus TISSOTVS refert, dicens, *J'ai vu quelque fois, qu'un vomissement de matieres bilieuses un ou deux jours après l'éruption soulageoit beaucoup plus que l'éruption même h)*. Non opus videtur plures adducere testes; praeterire tamen haud licebit, Ill. pariter Praesidem, prouti Auditoribus suis confirmavit, biliosam morbillosae febris conditionem et maxime salutarem vomitionum aequae ac diarrhoeae spontaneae successum frequentissime observasse, neque raro indicantia istas ciendi vacuationes reperisse, ubi etiam optima semper illarum viderit effecta i). Atque hinc jam satis constare arbitror, ipsa etiam illa eruptionis variolarum confluentium cum eruptione morbillorum similitudine quodammodo illustrari et ulterius confirmari, quod aliis ex rationibus probatum dedimus, biliosam nempe febrem et erysipelaceam

O 3

ple-

g) *Seçt. IV. C. V. Opp: p. 196.*

h) *AVIS au peuple §. 222. p. 252. Confer. §. 223. p. 253.*

i) Conferri meretur ipsius etiam sub praesid. a cl. FRID. LVD. MAY Gott. 1767, habita Diss. *de amplitudine generis febr. bilios.* §. XI. p. 51. sqq.

plerumque saltim, si non semper, illam habendam esse, quae confluentium variolarum, grauiusque cohaerentium, morbum comitatur, atque ideo praesertim peculiarem in praxi attentionem mereri, quae hunc inter et illum discretarum intercedit, differentiam; licet etiam hoc respectu minime accuratam esse hanc partitionem existimemus, quod, similiter ac biliosae multae occurrunt febres non simul erysipelaceae, ita quoque variolae subinde obseruantur cum biliosa febre conjunctae minime confluentes.

§. VI.

Liceat nunc etiam disquirere et paucis exponere, quid de variolarum discretarum aequae ac confluentium in *regulares* et *anomalas* distinctione sentiendum videatur. A multis hanc partitionem plane non vsurpatam, a quibusdam pro synonymo illius in benignas et malignas habitam reperimus *k*). Sydenhamus, ut constat, eam diuisionem primus introduxit, quasque sub regularium nomine descripsit, antea quoque *genuinas prae ceteris*, neque *mali moris* fuisse, *paucosque jugulasse*, dixit, easque Φαινομενα prorsus eadem exhibentes, atque sic incedentes ut *parili symptomatum agmine* omnes, quotquot adortae fuerint, impetiuerint, se obseruasse retulit, et ab illis, tanquam *in suo genere perfectissimis*, tum veram morbi historiam tum etiam medendi methodum

k) IO. IVNCKER *conspectus med. theor. pract.* Tab. LXXVI. p. 618.

dum defumendam esse iudicauit. Certis annis sic obseruatas, ait, *regulares ideo mihi licebit indigitare, ut ab anomalis subsequantium annorum valeam disspescere* l) pro synonymo regularium etiam nomine *legitimarum* utitur m). Facile igitur quisque animaduertit, Sydenhamum sub regularibus intelligere, quarum decursus ita bonus et facilis et mitis et ordinatus, periculoque tam immunis est, qualem exoptare permittat complurium diuersae indolis variolarum comparatio. Notat etiam ipse accidentia anomala, vbi minus recte tractetur morbus, eidem superuenire n). Ad anomalas refert variolas discretas, quarum eruptio in tertium diem incidit, ad eam magnitudinem ac alias non adsurgentes, sub diebus vltimis, vbi jam maturuerint, frequentius nigrescentes, atque saluatione instar confluentium stipatas o); aliasque nigras, minus putridas, naturae autem magis crassae et incoctilis, tardius periodum absoluentes, quam vllam aliam speciem p). Quae ipsa, cum pluribus aliis, minus ordinate minusque ex voto succedentibus, facile declarant quo sensu *anomaliarum* nomen SYDENHAMVS vsurpauerit. Si alios bonos Auctores conferamus, reperimus complures simili ratione, vel iisdem sub nominibus, vel sub aliis etiam, variolas quoad indolem

O 4

ac

l) Opp. p. 130. 131. 132.

m) l. c. p. 162.

n) l. c. p. 139.

o) l. c. p. 201.

p) l. c. p. 234.

ac decursum pariter distinxisse *q*). Omnino quoque asseuerare licet, *regularem* dari morbi variolosi decursum indolemque, si nempe natura vel sponte sua omnia, quae ad recuperandam salutem requiruntur, iusto modo, gradu, ordine, perficiat, vel etiam facillimum et rarum modo medentis consilium auxiliumque postulet; cuius conditionis variolae haud raro certe obseruare contingit; quasque, vt a curuo rectum, et a morbo sanitatem, ab anomalis quibusque diuersissimae fane indolis, accurate distinguere iuuat. Quemadmodum tamen nec ipsa sanitas gradibus et varietatibus caret, ita nec vna perpetuaque in regularibus variolis conditio assumenda erit. Ideoque nunc pluribus nunc paucioribus, nunc his nunc aliis, ad regulares consiliis locus erit, pro ipsarum varia, eademque maiori minoriue ad anomalarum certas indoles, seorsim omnino distinguendas, inclinatione.

§. VII.

Quod ad diuisionem variolarum in *benignas* et *malignas* supra allegatam attinet, pendent ideae horum generum ab illis, etiam alias cum vocibus benigni et maligni morbi generatim coniungendis. Manifestissime autem inter se multum dissentiunt Medici in vsurpanda voce malignitatis. Sunt quidem qui ejus in vsu respiciunt ad subdolam et insidiosam aliquam indolem, minus euidente praesertim

¹⁾ Conf. inprimis LOBB on the Small pox p. 7. §. 3. sqq.

tim ratione plus nocentem quam terrefacientem, quo in sensu ipse HIPPOCRATES vocem *κακονδεσ*, a latinis per malignum translata, minime raro sumit; videnturque praeterea pleraque ipsius de malignitate in acutis notata, perturbatas in primis ex occultiori origine, et majori simul cum discrimine, systematis nervosi functiones declarare. Maxime optandum esset, a generaliore isto, proprio et Hippocratico vocis usu feriores Medicos haud recessisse; longe diuersissima enim, quam plurimi dederunt, ejus explicatione, et praesertim dum certitas malignitatis causas constituerunt, peculiaremque illi opposuerunt medelam, detestandam certe noxam, multis optimorum confitentibus, medicae doctrinae intulerunt. Neque celeb. GAVBIO r), eleganti et accuratissimo ceteroquin Scriptori, plane assentiendum censemus, vbi malignum morbum definit *per insidiosè mitem, sub phaenomenis non ominosis aggressum, ex improuiso grauissimis symptomatibus naturae vires opprimentem*. An enim non ominosa dici possunt, quae maligna dixit phaenomena HIPPOCRATES, et post ipsum fere omnes; siquidem ideo maligna dicta sunt, quod periculum ominentur? Et annon datur secundum HIPPOCRATEM malignitas, praesertim in acutis, praeter illum a cel. GAVBIO indicatum decursum? Annon vero alii quoque celebres in arte viri ab hac idea multum recedunt? Sunt enim qui causae morbi vehementia

O 5

maligni-

r) *Inst. path. medicinal. §. 876.*

malignitatis in acutis veram significationem denotari tradiderunt s). Sed multi etiam medicorum longe specialius, neque tamen inter se plane consentientes, vtuntur vocibus illis latinis benignitatis et malignitatis, quam mos apud graecos fuit voculas κακονιδες et ευηιδες adhibendi. Sic enim haud pauci subitam in primis virium prostrationem pro malignitatis primario caractere assumerunt; cui tribui annumerare possumus summum BOERHAAVIVM t), eos *malignos* dicentem *morbos qui subito vires destruunt*, qui tamen alias fere nihili hanc diuisionem aestimauit; praeterea et MORGAGNV M u), et HOFFMANNVM v), et TISSOTVM w); eandemque sententiam alii etiam quamplurimi fouent. Sed an vere secundum HIPPOCRATEM tanti aestimandus est hicce character? Et an opus omnino est, vt ab illius mente hac in re multum recedamus? An autem malignus secundum illum esse non potest, sine subita virium prostratione? Quam saepissime enim de phreniticorum affectionibus malignitatem praedicat, quibuscum certe non semper illa virium prostratio quandoque ex causis oritur, quas absque difficultate tollere licet? *subitaneam virium consternationem*

s) ill. de HAEN *Rat. med. P. XI. p. 125.*

t) *Prael. in Inst. med. c. notis Halleri Tom. VI. p. 92.*

u) de sedib. et caus. morb. *Epist. 49. art. 23.*

v) *Med. rat. system. Tom. III. sect. I. cap. VII. §. 7.*

vv) *Avis au peuple. §. 243.*

x) conf. BRENDÉLII *Diff. de phrenitide, atque illa de cognat. paraphrenit. et febr. maligna.*

tionem cum SYDENHAMO y) saepe videmus emetico tolli z). Et *annon venaesectio toties suppressas vires erigit?* bene hoc notante, secundum vulgarem experientiam ill. v. SWIETEN a). Et quis medici nomine haud indignus plures non perspectas haberet etiam subitae et magnae prostrationis virium causas? Non solent vero manifestioribus ex causis ortas debilitates subitas pro malignitatis indicio habere. Annon igitur quo minor medici perspicacia quoad causas detegendas fuerit, eo frequentius malignitatem culpandam reperiet? Nonne optime BOERHAAVIUS: *ignorata symptomatum ratio inanes malignitatis fabulas produxit b)*? Ill. de HAEN c) quidem eos morbos appellat malignos, *quos symptomata insolita, aut solito grauiora et numerosiora comitantur;* et alio loco d) *pertinacem resistantiam aduersus selectissima optimaque artis praesidia,* ut signum malignitatis profert. Sed quis veri sincerus nec ineptus aestimator non maxime vagas, et summe fallaces has definitiones censeret, si non leuissime plane illas ponderauerit? Annon et his recte opponitur verissimum modo allegatum BOERHAAVII dictum? Minus autem prolixis nobis esse licet, cum quoad integram quidem de malignitate doctrinam, prae-

y) opp. vniuers. p. 56.

z) conf. v. SWIETEN Comment. T. II. p. 271. 272.

a) L. c. p. 285.

b) aphor. de cogn. et cur. morb. §. 950.

c) Rat. med. T. III. cap. 1. p. 4.

d) Libro cit. T. XI. p. 125.

praesertim vero quoad istos ab ill. de HAEN propositos characteres, ad solidam clar. HENR. MATTH. MARCARD Amici et ante paucos menses Commilitonis aestumatissimi tractationem nobis modo provocandum videatur *e*). Neque opus existimamus, illorum ceteroquin optimorum Scriptorum sententiam hic multis disquirere, qui in putrida febrium indole malignitatis characterem constituerunt, quod hoc ipso in laudato specimine *f*) et in illo cl. Doctoris AVG. EBERH. BRANDE *g*) jam satis expositum existimemus, quam facilis ad errores via etiam per hunc vocis malignitatis usum pateat, in quo praeterea nec omnes Medicorum celebriorum consentiunt. Ita enim v. c. cel. ELLER *h*) malignitatem, *istam febris indolem denotare*, docuit, *qua morbus febrilis vehemens per contagium communicari et epidemice grassari solet*. Per hanc definitionem omnes variolae verae, ubi modo epidemicae, etiamsi mitissimae et perfecte regulares fuerint, pariter ac morbilli, semper malignae habendae sunt. Sed an quaeso haec idea commendari meretur? certe neque consentit Hippocraticae nec Haenianae, neque Gaubianae, neque Hoffmannianae, neque Huxhamianae, neque Brendelianae, neque pluribus aliorum. Horum autem ideae omnium inter se quoque discrepant. Quam ergo eligamus, cum ta-

men

e) Specimen Exam. rigorosior. malignit. febrilis Goettingae 1770.

f) §. XI. p. 51.

g) de putridarum febrium differentiis Goetting. 1768.

h) obs. de cogn. et curand. morb. Sect. VI. p. 112.

men bona vox sit, cujus abusus verum rectumque
vsum non tollat? Libenter vteremur eo sensu,
quem sermo communis postulat, quo etiam intelli-
gendum videtur HIPPOCRATIS *κακονδεσ*, nisi me-
tuendum foret, hunc sic, illum aliter nostra dicta
assumturum esse; nisi asylum ignorantiae, vt multi
notarunt, vox illa saepius praeberit, ac etiamnum
praebeat; nisi eandem ideam, aliis etiam vocibus
commode exponere liceret; et nisi tandem accura-
tiores longe et practicis vsum magis accommo-
dae febrium diuisiones illam in benignas et malignas
plane superuacuum redderent.

§. VIII.

Licet equidem ex hisce jam liquere videatur,
nec in doctrina de variolis partitionem illam in be-
nignas et malignas satis tuto et sine damnosae falla-
ciae metu adhiberi, ex instituti tamen ratione pau-
cis etiam disquiramus, quomodo se habeat harum
vocularum, quoad variolas vsum, et num forte in
praxeos commoda probabiliori nitatur fundamento.
Ex primariis qui hanc diuisionem laudarunt, RICH.
fere MORTONVS *i)* est, qui quidem, pro praesente
spirituum vel veneni robore et praepollentia, be-
nignum vel malignum illarum morbum generatim
appellari voluit, attamen vltius et specialiora,
quae in dubia vel incerta et in certa vel demon-
stratiua distinxit, criteria proposuit. Prolixum ni-
mis

i) opp. med. T. III. p. 113. et 114.

mis foret, magnum utriusque generis numerum ex ipso memorare, singulorumque hoc loco ponderare momenta. Videntur autem plurima illa, quae tradidit, malignitatis indicia, omnia fere comprehendere, quae difficilia et periculosa sine manifesta externa causa, in morbum variolarum incidere possunt, et quae praesertim jam ab initio se declarent, et grauiiores sensim ac euidentiores noxas inferant. Diuersissimae ac saepe contrariae plane indolis criteria haec facillime reperiēs, quae non aptius medentem dirigere possunt, si malignitatis nomine illa comprehendas, quam si seorsim praetermissa plane hac denominatione, singula consideres, ut ideo secundum illum fere perinde sit, utrum nomine pejorum an malignorum nomine utaris. Et, si generalem ipsius ideam, antea jam memoratam, de veneni in malignis praespirituum robore praepollentiam attentius perpendas, atque hypotheses de spiritibus obrutis, dissipatis, irretitis, expansis, colluctantibus, deletis, veriores ad rationes exponas, ob conditiones tamen et causas debilitatis plures, in variolarum initio aequae ac in curationis decursu necessario distinguendas, certe non habebis, quod ex hac generali a MORTONO tradita variolarum in benignas et malignas partitione plus commodi quam ex illa boni et mali moris, vel melioris pejorisque conditionis expectes. Aequae fere amplam et diffusam malignitatis in variolis significationem a pluribus assumptam reperiēs, ex quibus FRID. HOFF-

MANNVM *k)* nominasse suffecerit, qui quidem in benignas, malignas et mediae inter utrasque naturae variolas distinguit, et pro malignis habet, et quae nimis cito et quae nimis tarde proueniunt, quae depressae manent ac suppurationem renuunt, quarum plurimae liuescentis et ex parte nigri coloris, vel nigro limbo stipatae fuerint, in quibus aegris post eruptionem sufficientem pulsus celer persistit cum inquietudine, qui erecti animo facile relinquuntur, quando petechiae vel pustulae paruae miliares se miscent etc. Scriptor hic celebris manifeste partem tantum difficiliorum ac saepius lethaliū variolarum, ita quoque discrepantium ut maxime diuersam postulent medelam, sub malignarum nomine memorat, quarum conditiones omnino accuratius distinguendae sunt, si aptam morbo medicinam facere velis. Bene quidem sua in partitione notauit MEADIVS *l)* quod tamen jam abunde a SYDENHAMO et Arabibus obseruatum reperies, discretas interdum confluentibus perniciosiores occurrere, et ideo diuisionem in discretas et confluentes non sufficere, eidemque illam in benignas et malignas, quasi synonymicam substituere sine errore haud licere. Jam vero perpendamus quoque an in illa, quam ipse tradit, partitione acquiescere nobis liceat. *Simplices variolas quas malignis opponit,*
per

k) Med. Rat. Syst. T. IV. P. I. sect. I. c. 7.

l) opp. med. T. I. Tract. de variol. et morbill. Edit. Goett.
p. 17.

per illas definit, *quae cum febre simplici cito desinente prorumpunt, facile maturescunt, in pus sincerum paucos post dies vertuntur et in crustas tandem decidunt. Malignae vero ipsi sunt, quae cum febre maligna se ostendunt, aegre ad maturitatem perueniunt et prorsus non suppurant, aut si aliquatenus id eueniat, calore febrili nunquam se remittente, non sine magna molestia in crustulas vertuntur.* In hisce corruptionem humorum et mixturam sanguinis ita perturbatam credit, ut materia purulenta in cutem abscedere nequeat. Denique quatuor malignarum species scilicet *crystallinas, verrucosas, siliquosas, et sanguineas* proponit, si tenuis modo, asserens, liquor aquosus exprimatur *crystallinas* gigni, si spissior et tenax is fuerit *verrucosas*, intus vero si recedat, et in canales, qui lympham vehunt, receptus, vesiculas, quas excitauerat, vacuas relinquat, *siliquosas*, oriri, ubi vero omnibus vitae officiis ineptus sanguis in ductibus suis obstruatur ac haereat, maculis nigris quae vere essent gangraenae cutim suffundi, cruoremque per omnes meatus corporis profluere; unde species haec *sanguinearum* nomen adepta fuerit. Sed primo ipsae generum traditae definitiones cognitae jam ponunt simplicis et malignae febris ideas, et quem quaeso Auctorem in hisce assumendis nunc ducem sequamur? Praeterea satis manifeste apparet, nec ipsum MEADIVM tanti, ac ab aliis quibusdam factum, suam in simplices et malignas variolarum diuisionem aestimasse, ut nempe ex malignitate

ad

ad peculiarem medendi methodum conluserit. Malignarum enim nomine difficilioris atque periculofioris indolis praecipuas tantum species quasdam, a fe obferuatas, a simplicibus fiue plane regularibus aut ab his non multum discrepantibus, diftinguere voluit, fatis clare docens, malignitatem pluribus quoque modis fe prodere. Quoad curationem simplicium, varias etiam conditiones aegrotantium attendit, et in illa malignarum, propriam ait animaduersionem defiderare fingula earum genera, horumque dein cuius peculiarem opponit medelam. In MEADII ergo doctrina variolae malignae funt genus grauiorum et periculofioris decurfus morborum varioloforum, vlterius in species certas partiendum, pro quarum charactere, praeter malignam febris indolem, ipfe tantum habitus et conditio puftularum affumitur. In curatione vero fingularum specierum, ad feri atque fanguinis certa vitia, viriumque vitalium defectum respexit, et fi HVXHAMI praecepta de lentarum neruofarum atque putridarum petechialium febrium discrimine probe animo tenueris, facile apparebit priorem in cryftallinis et verrucosis, pofteriorem in fanguineis MEADIVM obferuaffe. Verum an etiam confentit idea malignitatis Meadiana cum dictis Hippocraticis, in magno femper adhuc pretio habendis? annon haec vera etiam in variolis malignitatis indicia declarare poterunt, praeter nominatas a MEADIO puftulas malignas? Et an ad has puftularum species reftringenda malignitas cum pericu-

losior decursus etiam ante eruptionem, atque post illam sine crystallinis, verrucosis, sanguineisque variolis saepe innotescat? *m*) Annon quoque, si februm quoad humorum atque virium nervosarum conditionem discrepantia, secundum ipsum MEADIVM, in malignis variolis attendenda est, characterum plurium satisque certorum in distinguendis variolarum febribus aptius rationem simul habeamus, atque aliis potius, quae prostant, nominibus, sinistrae et multifariae, minus ac illa benignitatis ac malignitatis, interpretationi obnoxiiis utamur? Iam vero nec praetermittenda erit ill. de HAEN *n*) de malignarum variolarum a benignis discrimine proposita sententia. Memorauimus iam illum docere, eos solummodo morbos appellatione malignitatis recte insigniri, quos symptomata infueta aut longe solito grauiora, numerosioraque comitentur, atque malignitatem morbi acuti accidens quoddam, non autem ejus de essentia esse, quod ipso variolarum exemplo probare contendit *o*). Refert autem, certum ubi ad malignitatis gradum morbus peruenit, tam aliorum quam suam medendi methodum in multis defecisse, quare efficaciorum medelam expisca-

m) Conf. modo magnus numerus indiciorum malignitatis apud Mortonum superius citatorum, et tabulae bonorum atque malorum symptomatum apud Lobbium lib. laud. introd. p. 5. ut etiam apud ill. Equit. de ROSENSTEIN von Kinderkrankh. p. 120 -- 127.

n) Rat. med. p. III. cap. I. p. 3. 4.

o) Rat. med. p. IV. c. I. §. 1.

piscaturus, aliis secundum indicantia quoque exhibitis, corticem Peruvianum, vel declarante se malignitate, aliquamdiu post eruptionem exanthematicum, vel cum ipsa, vel ante ipsam vel ab ipso morbi principio, illico, summo cum effectu dederit *p*); quod remedium dein ob malignitatem exhibitum magnis encomiis extollit *q*) atque de sua methodo affirmat, quod sibi ea felicissime cedere soleat, aliisque in nosocomiis impense laudetur. Mitamus nunc generalem ab ill. hoc Viro assumptam malignitatis ideam, et attendamus modo, quoad variolas, ipsum ejus doctrinae sensum. Omnino docet, ubi ad certum etiam gradum in variolis peruerint symptomata infueta, aut longe solito grauiora numerosioraque, corticem Peruvianum illico exhibendum esse, neque nominatis ipsis symptomatis fuetis aut infuetis, neque declarato per aliquos characteres gradu solito grauiori, neque indicato numerosiorum numero, neque postulata ad symptomatum causas, quibus medela accommodari deberet, attentione. Suffecerit nobis hanc ipsius sententiam modo proposuisse, atque ad censuram cl. MARCARD jam allegatam iterum prouocasse. Sed nec reticere licebit assensum quem ill. TISSOTVS illi diuisioni prae-buit *r*). *Malignitatis signa, ait, plene in nouo de febris tractatu enarrata, malignitatisque species et vo-*

P 2

cis

p) Rat. med. p. III. p. 36.

q) Rat. med. ibid. p. 64. 73.

r) Epist. ad ill. Hallerum de variol. apoplex. et hydrop. p. 21.

cis excusationes hic non dicam; sit satis, summam debilitatem, pulsum minimum, febrem indefinentem, et anormale exacerbantem, leue sed continuum delirium, pustulas minimas, aquosas, ichorosas, nigras, maculas cutaneas, haemorrhagias ubique pororum et colorum, anxietatem continuam, fastidium, apathiam, malignitatis in variolis esse criteria hand aequivoca. Sane qui hujus optimi Scriptoris, summo cum studio et accuratione singulari non nisi sollicitè distinctis aegrorum quam plurimis conditionibus isto in libello egregie accommodata medendi praecepta, sub quorum demum finem haec de malignitate adjecit, probe perpenderit, facile satis munitum se perfentiet, quominus ista idea aliquem in errorem deduci se patiatur. Diuersam febrium cum variolis conjunctarum rationem tam exactè hoc in scripto exposuit, et aduersus illam ac ad ipsas quoque symptomatum et quorumuis phaenomenorum causas medelam semper ita bene dirigere docuit, ut hisce de malignitate subjunctis opus planè non habuisse, et modo in aliorum, qui hanc vocem amant, gratiam ista adscripsisse videatur. Quae vero proponit signorum malignitatis nomine, certe periculosioris morbi sunt indicia, praesertim quidem ad bina ista genera febrium, putridarum nempe sanguinearum et nervosarum lentarum referenda, quarum febrium et curationis ipsarum diuersitatem statim etiam postea breuibus repetit. Certe non desiderare potest Vir cel. ut pro definitione assumantur proposita malignitatis

gnitatis variolarum indicia simul sumpta; valde angusta enim haec esset definitio, cum nimis raro omnia illa vno in aegro conjungantur, et nonnullae conditiones aequae graues, malignitatis nomen forte non minus promerentes, praetermissae sint. *Pulsus minimus et summa debilitas et delirium continuum* ab. ill.

Tissoto requiruntur ad malignas. Quid vero sentiendum de illo statu, vbi variolae multae nigrae, reliquae pleraeque liuidae, et maculae majores liuido profundiori colore praeditae, cum pulsu arteriarum magno, calore vehemente, delirio plane nullo, saluatione immensa, exsiccatione a vigesimo demum die incipiente? annon etiam hae satis malignae? quales verissime obseruauit ill. Praeses. *Leue sed continuum* delirium ill. Tissotus postulat. An vero excludendum est vehementius et interruptum, sed facile recurrens delirium, quale cum pessima variolosi morbi conditione quandoque conjunctum certissime occurrit. Pustulas male comparatas modo nominat hoc loco Tissotus, cum tamen ipse alibi malignas etiam fieri posse tradat variolas optimae indolis s). Antea et ipse ad malignas retulerat diarrhoeam, vires cum animi defectionibus et extremorum refrigerio conuellentem, cui opium bono cum successu opponi dixerat t); quare vero hunc statum nunc praetermittit in suo magno malignitatis indi-

s) *Epist. laud. pag. 54. 55.*

t) *l. c. p. 36.*

ciorum numero? An ergo acquiescere licet in hisce vel ab ill. Tissoto propositis, malignitatis criteriis? An et vlla vera vtilitas ex constituto, secundum ipsum, certo malignarum genere expectanda est? Nec ergo vllas reperimus, quae nos moueant, rationes, ab ea quam sub fine superioris §phi proposuimus, sententia, quoad variolas, recedendi. Eo vero minus dubitamus, hanc illarum negligere diuisionem, quod a celeberrimis etiam in arte viris, quorum plures quoque grauem ab ea diuisione noxam siue doluerunt siue metuerunt, SYDENHAMIO, BOERHAAVIO, LOBBIO, HILLARY, HARRISIO, DE ROSENSTEIN, vel plane praetermissae voces istae, vel ad rationem communis modo sermonis vsurpatae sint; quod etiam perquam facile sinistre intelligamur vocibus istis vtentes, cum tam insignis differentia in ideis Auctorum, qui illis vsi fuere, reperiatur; quod nec illarum in arte vsus necessarius nobis videatur: licet omnino largiri teneamur, bonos ad Scriptores intelligendos operam adhibendam esse, quo cuiusuis mentem in vsurpatis illis vocibus accurate comprehendamus.

§. IX.

In variolarum autem distinctione, ratione februm hunc morbum comitantium, HUXHAMVS^{u)} permultum lucis attulisse videtur, dum harum tria a se inuicem discrepantia enumerauit ac descripsit genera,

1) *Essay on Fevers* p. 126. *sqq.*

genera, atque peculiarem cuiusuis, propria secundum obseruata, curationem studiose exposuit. *Primo* autem loco febrem memorat vehementem inflammatoriam, tunc plerumque oriundam, vbi contagium variolosum homines infecerit fibris fortibus ac tensis, sanguineque vberiori ac denso praeditis, in quibus inde nonnunquam pulmones, interdum cerebrum, alias quoque fauces vel aliae partes valde inflammarentur, ac sanguis detractus valde densus esset et inflammatorius, vbi et subinde repetita requireretur venaesectio, ad arcendum ex vehementi phrenitide vel peripneumonica inflammatione periculum. *Secundo*, ait, morbus hic interdum accedit cum consuetis lentae neruosae febris symptomatibus, et aegri saepe diu languidi sunt, febris exigua est, spiritus deficiunt, pulsus debilis, frequens et tremulus, facies pallida et languescens, vrina cruda et tenuis, nec fitis magna neque aestus ingens, vertigo et grauitas capitis continua cum tremore perpetuaque nausea et vomitione, vniuersalis inquietudo, debilitas, lassitudo etc. adsunt; hujus generis symptomata pluribus vicibus per septem vel octo dies vna continuare atque tandem in variolas transiisse obseruauit; quae, ait, fere semper valde malam variolarum indolem futuram designant, pallidas nempe, crudas, impressas et sessiles, nec bene adsurgentes, nec decenter maturescentes etc. *Tertio* addit, variolas interdum febris malignae vel petechialis indolis co-

mitatur, in qua sanguinis crasis plane dissolvitur, nigrae et lividae maculae apparent, haemorrhagiae sequuntur, et pustulae brevi post eruptionem fiunt nigrae, gangraenosae, et saepe cruentae, quod saepissime quoque contingit, ubi variolae valde paucae et distinctae. Propositum vero hocce febrium variolas comitantium discrimen experientiae conforme esse nemo forsitan dubitabit, cui occasio non defecit, plurium hoc morbi genere correptorum conditiones ipsos ad illorum lectulos explorandi, neque etiam, qui cum ipsa HUXHAMI relatione, eaque fide dignissima, et reliquae ipsius de febribus doctrinae congrua, aliorum quoque Scriptorum observata studiosius contulerit. Inflammatoriae indolis febrem, etiam a RHAZE jam bene descriptam v) illam haud raro deprehendimus, quae variolarum eruptionem praecedat, et interdum cum hac pergit, etiam quandoque in suppurationem pustularum extenditur, vel hac praesente superuenit; talem vero et a quibusdam auctoribus variolosam nimis generaliter habitam esse satis utique constat w). Praeterea vero nec opus fuerit ulterius confirmare, singularem aliquando citius feriusve reperiri cum variolosa febre putridam et dissolutam sanguinis crasin, qualem de tertia specie HUXHAMVS memoravit, quam et MEADIVS sub nomine *sanguinearum* de-

v) edit. Channing. p. 81.

w) conf. inter alias hac de re WERLHOFF. *disquisit. de variol. et anthrac.* p. 89.

descripsit x). Etsi vero longe rarius hisce binis, illius cum lentae nervosae febris notis conjuncti variolarum morbi conditionem, satis distincte propositam, et pro peculiari a reliquis pejoris indolis vere discrepante specie habitam reperiatis, minime tamen a bonis Scriptoribus praetermissa plane fuit. Annon enim huc referenda, quae habet RHazes y)? *Cum febris mitis sit et pacata in superficie corporis, anxietas vero et inquietudo diuturna, exitus etiam variolarum difficilis et ultra diem quintum cunctatus, tu profecto coactus eris iis uti remediis, quae exitum earum facilem reddant; oportet autem id a te fieri summa cum cautela et intelligentia; uti quoque haec z): Si videris variolas, post eruptionem cum difficili maturatione duras esse et verrucosas, nec amplius statum aegroti bene se habentem vel si aucta sit insuper ejus prauitas, certo scias variolas esse lethales. Etiam sequentia huc probabiliter referenda a), in illis variolis, quas comitantur febres, quibus non adest vehemens inflammatio, hae res sane et his similes, modo laudata nempe demulcentia et refrigerantia, morbum quam maxime reddunt tardum et morbi tempus protrahunt. Hujus indolis variolas etiam a SYDENHAMO esse observatas vix dubitare poterit, qui attenderit quasdam naturae magis crassae et incoctilis, tardius periodum ab-*

x) Conferri de hac specie meretur WERLHOF. l. c. p. 77, 78.

y) Lib. cit. cap. VI. p. 93.

z) Ibid. cap. VIII. p. 129.

a) Ibid. cap. XII. p. 165.

soluentes, ipsum descripsisse; in quibus ex regimine justo frigidiori noxam animaduertit, aegrumque in lectulo jugiter detinendo ne brachio quidem exserto, blando ejus calore pustularum eleuationem et faciei manuumque intumescientiam promouere studuit *b*). Hunc febris variolosae in quibusdam aegris genium quoque memoratum reperire licet apud MORTONVM *c*), MEADIVM *d*) ELLERVUM *e*) de ROSENSTEIN *f*); ejusdemque exempla etiam in variolis insititiis quandoque obseruata fuere, vbi praeparatio, viribus nimis debilitatis, ultra justos limites extensa fuerat *g*).

Et si vero secundum haec, prouti et vsus ipse satis euidenter declarat, de trium illorum febris variolosae generum ab HVXHAMO proposita differentia dubitandum haud sit, atque accuratior ejus notitia, habitaque in medendo ratio, certiore ac feliciorem curationis successum omnino promittat, longeque praestantius quam partitio illa in malignas et benignas ipsum ad vsu, et manifestissime quidem, accommodata sit, minime tamen in diuisione ista HVXHAMIANA subsistendum planeque acquiescendum videtur, si specialiores de variolosis morbis

ob-

b) *Opp. vniuers.* p. m. 233. et *sqq.*

c) *L. c. p. m. 59.*

d) *L. c. p. 35.*

e) *de cogn. et curand. morb. p. 136.*

f) *L. c. p. 136. 137.*

g) V. DAVID SCHVLZE *Unterricht von der Einpfropf.* 1769. p. 48. 49. et TISSOT. *Inoculat. justifiée à Lausanne* 1754. §. XC. XCI.

obſervationes exactius conſulamur, atque cum illis de affinibus aliis morbis ſollicite conferamus. Caueamus quidem nobis ab hypothefium fallacia, ſed operam quoque omnem demus ne quid verae et aegrorum ſaluti proficuae doctrinae, quoad perſpicere conceſſum, praetermittamus.

§. X.

Conſideremus vero primum earum febrium conditionem, quae inflammatoriae dici ſolent et poſſunt, conjunctamque vario gradu diatheſin ſanguinis inflammatoriam habent, qualesque, ſiue absque certae partis internae inflammatione, ſiue cum aliqua, haud raro in variolarum decurſu obſervari perhibentur, atque ipſum etiam primum ſiſtunt genus HVXHAMIANVM. Quodſi jam ab initio ad finem harum febrium non intermittamus, ea quoque ad phaenomena ſollicite attendere, quae vitioſam humorum in primis viis praefentem colluuiem declarant, minime raro, immo certe plerumque hujus indicia, nunc citius nunc vero ſerius demum, atque ſatis manifeſte quidem, animadvertere licebit. Aliquando nempe jam ab initio, quod tamen rarius vera in febre inflammatoria contingit, alias autem, atque hoc frequentiffime, poſt aliquot demum dies, circa quartum nempe vel ſeptimum, vel tardius etiam, ubi primum, vera ſecundum indicantia, ſanguinis miſſionibus, potu ex ptifanis largiori ſubacido, juſtis nitri doſibus, aliisque aptis

auxiliis antiphlogisticis, inflammatoriam diathesin oppugnavimus, imminuimus, sustulimus, saporem molestum, quandoque amarum, reddi, crassio rem et molliorem in lingua mucum colligi, nauseam oriri, dolore capitis, cum vertigine, peruvigilio, anxietate, etc. adhuc et quandoque fere magis affligentibus. Facile tunc animadvertimus, vbi primum aliquam hisce cum signis familiaritatem affecti fuerimus, plus minusue corruptae et vitiosae materiae, jam ab initio quandoque ad praecordia haesisse, licet morbus ceteroquin tunc mere inflammatorius apparuerit, eam vero materiam eo tempore minus manifestam, minus mobilem, minusque ad excretionem praeparatam fuisse, aut sensim emollitam, solutam, mitificatam, coctam, atque sic aptam redditam esse, quo varias per vias, vel naturae solius opera, vel eadem artis praesidio, conditionibus aegrorum accommodato, adjuta eliminari queat. Contingit quidem interdum, alio nec sollicitata, nec eadem praeter consuetudinem, quoad observamus, quid morbo si sponte egerente, cum vrina et sudore criticis minui sensim et abigivitosam primarum viarum colluviem: accidit vero saepius hoc vel nimis differri vel non satis ex voto perfici; et saepissime contingit eam rerum esse conditionem, ut eventum naturae soli non relinquendum esse atque ut purganti, vel etiam emetico, quibus naturae succurramus, omnibus probe pensitatis, aptissimum esse locum animadvertamus, successu

cessu tunc nostrae expectationi saepe quam felicissime respondente, ita quidem, ut si quid morbi reliquum sit, illud facilius longe ac alias credibile fuisset, vel sola naturae vi, vel eadem etiam artis ulteriori auxilio suffulta, nunc superetur. Minime quidem negamus, sed ipsa potius experientia id omnino confirmari largimur, nihil quandoque vitiosi, quod signis probabilibus innotescat, primis in viis per febrem indolis inflammatoriae colligi; attamen ordinarie, quo vehementior est aestus, quo grauius affligitur caput ac pectus, etiamsi quandoque fibrae corporis densiores, pulsus durus et magnus, lingua sicca, et licet haec etiamnum fere pura, saporque naturalis et vires animales vix aut parum labefactatae fuerint, eo probabilius, nisi alia rarior vehementiae febris ejusque symptomatum causa innotuerit, dein colligendam sensim et extricandam praecordiorum impuritatem esse suspicamur; quae ipsa tamen, quamdiu nondum praesens et naturae molesta certo cognoscatur, mobilisque sit et quodammodo turgeat, euacuandi nulla plane praebuerit indicantia. Materies autem haec alienata in praecordiis haerens, nunc certius nunc magis dubie, abundantem varioque gradu corruptam bilem, nunc meraciorem, nunc pituita et humoribus aliis mitificatam sistit, unde quandoque manifestius veriusque, nunc minus certe inflammatoriae indolis febrem cum biliosa complicatam habere licet. Attamen satis etiam constat, febres

vere

vere et majori gradu biliosas aliquando cum inflammatoriis quoad varios characteres multum conuenire, etiam inflammationes certarum partium veras conjunctas habere posse, licet a sola vere inflammatoriis propria medendi methodo in iis minus commodi quam damni expectandum sit; praetereaque et biliosas febres, aequae simplices ac variis cum exanthematibus atque catarrhis conjunctas, inflammatoriae diatheseos notis, ita quidem, ut vel a minus exercitato vix confundantur, persaepe quoque plane destitui. Haec omnia vero qui Hippocraticis doctrinis, aliorumque obseruationi conformia esse dubitauerit, consulat, si lubet, PROSP. MARTIANVM *b)*, et BAGLIVVM *i)* et IO. FREIND *k)* et SWIETENIVM *l)*, THOM. GLASSIVM *m)*, BARCKERVM *n)*, CORN. ALB. KLOECKHOFIVM *o)*, et TISSOTVM *p)*, ut quoque nonnullas a clarissimis ill. Praefidis

b) Hippocr. notation. explicat. passim.

i) Oper. omn. edit. Lugd. p. 37. sqq. p. 51. et p. 702.

k) epist. de purgantibus; oper. edit. Paris 1735. p. 106.

l) Comment. in aph. Boerb. in doctrina de febris passim, ut de causa febr. ard. §. 740. de exanth. febr. §. 732. p. 398. et 399. de diarrhoea febr. §. 719. sqq. de conuuls. febr. §. 710. de delirio febr. p. 327. et 331. etc.

m) Comm. de febr. VII. p. 88. sqq.

n) Essai sur la conformité de la Med. des anc. et des modernes à Amst. 1749. p. 159. sqq.

o) Opusc. med. Traject. ad Rhenum. 1747. p. 55. 61. 68. 190.

p) Diff. de febr. biliosis praesertim p. 121. sqq. et in primis quoque hujus optimi Scriptoris Lettre à Mr. ZIMMERMANN, sur l'epid. cour. à Laus. 1765.

fidis mei Discipulis, in artis exercitio nunc feliciter occupatis, editas tractationes q).

§. XI.

Quodsi jam ad aegros quoque sub morbi vario-
lofi decursu accuratius attendamus, eadem ipsa
certe, quae modo memoraui-
mus, vitiosae et no-
xiae, plus minusue biliosae, vel alius indolis mor-
bidae, colluuei in praecordiis haerentis indicia,
quae salutarem exhibendorum euacuantium succes-
sum, praeparantibus variis, vbi opus, praemissis,
nunc praesente simul inflammatoria diathesi, nunc
etiam hac deficiente, spondeant, non difficulter,
vt nos quidem arbitramur, animaduertemus. An-
tea quidem jam notatum, febrem confluentium va-
riolarum morbum comitantem plerumque biliosae
indolis videri, attamen dubitandum non est, etiam
cum discretis haud raro multum corruptae materiae
in primis viis collectum reperiri. Optime praestan-
tissimus TISSOTVS in aurea ad ill. HALLERVM episto-
la r), monuit, *pueros, qui abdomen cacochylia far-
tum habent, quo tempore calor febrilis has sordes cor-
rumpit, grauioribus symptomatibus, morbo alienis cor-
ripi, quae suam euacuantem medelam necessario exige-
rent; atque hanc anomaliae causam demonstrari, ad-
dit,*

q) CL. FRID. LVD. MAY *Diff. de amplitud. gener. febr. bilios.*
Goett. 1766. §. V. sqq. et cl. ELLERT *de pleuritidum partitione;*
ibidem. 1769. §. IX. sqq. quarum vtraque mei etiam ill. Praesi-
dis inscriptum habet nomen.

r) p. 76.

dit, 1) *cephalalgia aut saepe inexcussibili sopore supra vim febris*, 2) *oris foetore, fastidio et nausea, post eruptionem etiam superstitibus*, 3) *febre post benignam eruptionem remanente cum anxietate*, 4) *foetore faecum et saepe diarrhoea foetida sine depressione pustularum*, cuius generis sub casibus refert se vidisse aliquot aegros alium impune quadragesies et ultra intra nychthemera deponere; 5) *delirio*, 6) *lotio crudo turbido*, reliqua vero se tacere ait. Verissima certe subnectit, nempe *pulchre per aliquot dies pustulas eo etiam sub statu increescere solere, sub finem vero maturationis et ineunte suppuratoriae febris tempore omnia turbari*, grauissimaque confertim erumpentia symptomata aegrum benignis laborantem variolis orco breuiter tradere, *delirum, lethargicum, orthopnoicum, tympaniticum, cum foetida diarrhoea, pulsu abnormi, integra virium prostratione. Initio morbi accersitus, statim addit, quodque lubentissime largimur, funesta symptomata semper cauere potui aegrum quotidie purgando, etc.* Nolimus vero ad pueros vnice, et qui abdomen cacochyliam fartum habent, colluiei ad praecordia collectae noxas restringi. Animaduenteris enim aequae pueros ac adultos, ante febris initium quandoque sanissimos, vegetos, hilares, bene appetentes, digerentes, dormientes, prostratum breui a febris initio appetitum, cephalalgiam, nauseam, anxietatem, etc. sentire, atque dein saepe cum leuamine manifesto sponte vomere, nihiloque minus aliquando, praesertim vero cum natura minus

nus actiuosa fuerit, indicia vitiosae colluuiei ipsis relinqui, in qua iusto tempore educenda, artis auxilia optimo cum successu succurrere soleant. Annon ergo etiam in corporibus apparenter sanissimis eo persaepe inclinare videtur natura, vt per ipsam febris efficaciam vitiosa in visceribus separata materies ad alimentarem canalem deponatur, vnde illa dein, vario modo in aegrorum salutem eliminari queat? Annon ipsa frequens cacochyliae in variolis noxa, a bile abundante et acriori magna ex parte verisimiliter oriunda, maxime quoque confirmatur saluberrima toties reperta purgatione alui in praeparando corpore ad variolas aeque naturales ac insititias? Etsi ipsa nequaquam in vniuersum omnibus commendanda videatur. *Saepenumero se obseruasse, refert SYDENHAMVS s), reiteratam catharsin, sanguine nondum inquinato, subsequentes variolas laudabiles et distinctas vt plurimum reddidisse. Etiam HULLARY t) ex propria sua experientia id assertum pluribus confirmauit. Ita quoque TISSOTVS u) benedocuit : quoi que les purgatifs n'entrent pas dans la classe des remedes anti-inflammatoires, ils sont cependant absolument necessaires, avant que d'inoculer; parcequ'ils debarassent les premieres voyes, dont la plenitude rend toutes les maladies inflammatoires très dangereux-*

s) *Diff. epist. ad Guil. Cole oper. p. 361.*

t) *Pract. Essay on the Small pox. p. 60. 61.*

u) *L'inoculation justifiée §. XXXIII. p. m. 51.*

gereuses, empeche souvent et même entierement l'effet des autres remedes. Satis etiam peruulgatum, quam necessaria ad variolarum prophylaxin aequae ac ad ipsam curationem, purgantia iudicent celebres recentissimi Anglorum Infiores, SVTTON ac DIMSDALE v). Maxime praeterea confirmari videtur haec ipsa morbi variolosi frequens conditio, quae colluuii ad primas vias haerentis rationem in mendo habendam postulat, per obseruatam quam saepissime naturalium aequae ac artificialium euacuationum integro in decursu morbi vtilitatem. *Alui fluxus*, ait FR. HOFFMANNVS vv) *licet copiosus, non adeo pertimescendus; eundem enim per totius morbi decursum sine ullo periculo successisse vidi, tantum abest, ut eruptionem impediuerit.* Idemque, quo vltius suam confirmaret sententiam, ad similes ualde memorabiles AMATI LVSTITANI x) et BALLONII y) obseruationes prouocat. Notatu etiam perquam dignissima sunt, quae de alui fluxuum et medicamentorum laxantium per integrum variolarum grauiorum decursum insigni emolumento praeclare tradidit

v) Accuratam de methodo ipsis vtitata relationem publicauit Regius aulae Hannoueranae Medicus cel. WICHMANN, *Hannöv. Mag.* 52. et 53. St. 1767. Lectu ceterum dignissima ipsa tractatio est: *The present method of inoculating for the Small pox by Th. Dimsdale Londæ 1767.*

vv) *Med. Syst.* T. IV. p. m. 148.

x) *Cent. III.* p. 234.

y) *Epid et Ephem.* L. I. edit. TRONCHINI oper. T. I. p. 27.

dit CLIFTON WINTRINGHAM z). Etiam ipse jam RHAZES notauit a): *Ad aluum soluentia adhibenda quandoque coactus eris in variolis, interdum propter excessum caloris, et cephalalgiam, interdum etiam ut leuis reddatur natura, et minuatur materia variolarum, quando conjeceris istam esse abundantem.* Vomitiones autem ciere, ex optimis quidem nostri etiam temporis Practicis nonnulli plane dissuaserunt. *Vomitum*, inquit cel. TRALLES b) *recte mea sententia in variolarum therapia rejicit* de HAEN; atque hic ipse ill. de HAEN c) emeticis nunquam se usum fuisse, asserit, tum quod illa in vomitum propensio non magis emetico, quam sine eo ante eruptionem pustularum tollatur, et inter alia quoque refert, ipsam BOERHAAVII circa variolas doctrinam sibi adstipulari, altum de emetico silentium obseruantem. Ipsam certe ad vomitum propensionem solam, si nociuae colluuiei educendae nulla fuerit significatio, nunquam plane pro indicante emetici habendam, et laudandum potius esse BOERHAAVII monitum d), quo ipse *falsam et periculosam illam esse regulam, vomitus vomitu curatur*, docuit, nos quidem nulli dubitamus. Nimis breuem in hac doctrina magnum fuisse BOERHAAVIVM, quisque dolebit in illa vel

Q 2

me-

z) *Works of the late Clift, WINTRINGHAM Lond. 1757. Vol. II. p. 233. 234. et 235.*

a) *l. c. cap. XIII. p. 175.*

b) *De meth. med. variol. saepe insuff. p. 77.*

c) *Rat. med. P. II. C. III. p. 39. 40.*

d) *aph. §. 659.*

mediocriter versatus, ab emeticis autem, hujus in morbi curatione plane abstinuisse BOERHAAVIVM multum dubitandi ansam praebent *Boerhaaviana* SWIETENII supra laudata dogmata, et ipsius BOERHAAVII alibi traditum praeceptum e) : *Excrementum corruptum febrile ex humoribus prius sanis circa praecordia ludit suas tragoedias, ita ut per solam febrilem excandescentiam mutatum et quasi venenatum factum, praecordiisque affixum, producat morbos cerebrum afficientes, dolores capitis et deliria immania, quae, excremento hoc ablato, sanantur.* Sane qui Auctoris, BOERHAAVIO valde aestimati, THEOPH. LOBB f) indicantia exhibendi in febris variolosae primis diebus emetici perpenderit, atque dein haecce cum generalibus emeticorum indicantibus BOERHAAVII g) contulerit, non facile dubitabit, BOERHAAVIVM efficacis etiam hujus medicinae tutum in variolis usum satis cautum admisisse et commendasse. Notatum quoque jam supra fuit, magnum ex emetico, ubi confluentes metuendae, praesidium expectasse SYDENHAMVM, cujus summa fuit apud BOERHAAVIVM existimatio h), praesertim quoad hanc de variolis doctrinam i). Sed praeterea claros complures reperimus Medicos, eundem eo in consilio secutos, etiam ita, ut non vnice ad confluen-

e) *Praelect. de morb. nerv. p. 460.*

f) *Treatise on the Small pox, Part. I. p. 39. sqq. §. III. 116,*

g) *instit. med. §. 1202.*

h) *conf. erat. de commend. stud. Hippocr.*

i) *Aph. §. 1379.*

fluentium indicia restrinxerint; licet plures mitius emeticum antimoniacum illi SYDENHAMIANO praeferri maluerint *k*). Cum vero hinc, ut arbitramur, satis manifeste constet, peculiarem in variolis curandis attentionem postulare haud raro praesentem sensim collectam in primis viis vitiosam et praesertim biliosam colluviem, atque contra etiam, phaenomena quae hanc in aegris conditionem declarant, quandoque vel plane deficere, vel ita exigui esse momenti, ut nulla illius habenda ratio sit, ubi et purgatio ac diarrhoea pariter ac vomitiones nihil juuent, sed potius noceant *l*); omnino addenda est illi ab HVXHAMO propositae variolosi morbi

Q 3

diui-

k) conf. GVALT. HARRIS *Diff. med. et chirurg.* II. Londini 1725. p. 38. WERLHOF *de variol. et anthrac.* p. 94. not. 108. HILLARY *l. c.* p. 63. §. VII. HVXHAM'S *Essay on Fevers.* p. 142. ubi inter alia docet: *a gentle Emetic not only in Part thro' of the morbid Matter, which primarily affected the stomach, but also the heavy putrid bilious colluies, that may have been collected in it, the Liver, Gall-Bladder etc.* Etiam TISSOT, qui, licet in *avis au peuple* §. 212. p. 236. emetica et purgantia in morbi initio perniciose declarauerat, contra in *Epist. ad ill.* HALLERVM p. 82. asseruit: *non timenda nimis concussio ex leni ipecacuanhae dosi, quod remedium pulchri est usus in affinis morbis, et tanquam arcanum, ut me jam diu docuisti, in miliari febre famigeratum, feliciterque aliquoties infregi legem, qua me seuerè prohibui, quoad emesin in cura variolosa.*

l) conf. WERLHOF *l. c.* p. 30. not. 23. BALLON. *epidem. et ephem.* L. II. edit. TRONCH. T. I. p. 192. Quo et referri forsitan potest obs. 2. in cap. IX. tractationis IAMES BVRGES *von der Einpfropfung; Bremen* 1756, p. 39. 40. Licet pro certo non constet, annon potius hic Auctor emetica, ubi recte data profuissent, minus caute, minusque praeparato corpori data nocuisse obseruauerit. conf. ipse HVXHAMVS *l. c.* p. 143.

diuisioni haec modo exposita, quae nunc deficere, nunc vero et frequentius adesse tradit vitiosam sensum primas ad vias depositam, et majori quidem ex parte biliosam colluuiem, siue simul praesto fuerit inflammatoria diathesis, siue minus.

§. XII.

Jam vero circa putridas etiam febres, cum variolis subinde conjunctas, dispiciamus, annon et has differentia intercedat, quae in ipsa pariter praxeos commoda notari mereatur. De pluribus quidem factis constat phaenomenis et symptomatibus, quae putridam febris indolem designent, ita tamen diuersa illorum est conditio, vt ex discrepantibus corporis vitiis, in curatione quoque distinguendis, omnino deriuanda videantur. Si enim bilis et reliquae vitiosae praecordiorum colluuei aliquae sunt partes in grauiori producendo variolarum morbo, dubitari non poterit, quin et quandoque putrida cum variolis junctae febris indoles praecipuam eo ex fonte originem habeat. Ad insignem certe putredinis gradum solo fere bilis corruptae et putridae vitio corporis humores perducere, pessimamque etiam cum sanguinis valde dissoluti indiciis febrem, et maxime difficilem quandoque petechialem, saepe quoque cum perturbato multum variaque ratione systemate neruoso, plurimae veterum aequae ac recentiorum obseruationes facile quemuis edocere poterunt. *m*).

runt. *m*) Si hujusmodi autem febrium naturam accuratius cognitam habuerimus, veriore quoque conceptum putridae indolis frequentioris febrium variolas comitantium, minimum quoad aliquam, majorem minoremue, ipsius partem, forte affecuti erimus. Dubitandum fere non est, grauiorem illam putridam diathesin, cum incipiente praesertim exsiccatione confluentium variolarum plerumque inualescentem, cui prae aliis purgantia, juxta cum vitrioli spiritu, post maxime salutaria FREINDII et MEADII monita, felicissimo cum successu adhiberi, multorum obseruatio saepius docuit, etiam aliqua ex parte originem suam biliosae colluuiei debere, vtpote quae isto in morbi genere rarius deficere videatur, ac saepe factis certis indiciis vltimo illo in statu se manifestet. Sed praeterea etiam, vbicunque in varioloso morbo, praesertim tertio et quarto ejusdem stadio, vere putridae febris notas cum illis putridarum et biliosarum fordium conjunctas animaduertamus, quod non raro, ferius in primis nobis aduocatis, contingit, annon partem vniuersalis putridae corruptionis ab hoc venenato quasi fermento tunc oriri judicemus, cum idem et alias grauissima putridarum febrium phaenomena, praecipue vbi viridis abundabilis, maculas nempe fuscas, liuidas, et nigras, simi-

Q 4

lisque

m) De febribus putridis a bile praesertim conferri meretur TISSOTI *Diff. de febribus biliosis*. GLASSII *comm. de febr.* p. 122. *sqq.* p. 149. *sqq.* 155. *sqq.* HVXHAMII *obs. de aere et morb. epid. edit. Lips.* p. 59. 260. 322. etc.

lisque coloris pustulas, sanguinis dissoluti fluxus, stases inflammatorias symptomáticas, languores, spasmos, deliria, sopores, producere valeat?

Sed ab hac modo descripta maxime distingui meretur putridae illius in variolis diatheseos humorum origo, quam obseruamus, vbi grauior inflammatoria febris neglecta, et regimine, diaeta et medicamentis calefacientibus maiorem sensim ad vehementiam perducta fuerit. Haec putredo illa esse videtur, quam BOERHAAVIUS *n)* oriri dixit *a causis inflammatione simplici maioribus*, cuiusque genesin alibi prolixius exponit *o)*. Vt enim alias etiam calor vehementior, sanguinisque motus ordinario multum velocior, si diutius perseuerent, sine omni dubio crasim humorum inuertere ac destruere valent, ita idem quoque, et fere magis, in variolis, etiamsi febris modo simplex inflammatoria fuerit, experientia id manifeste confirmante, metuendum. Intermisso in variolis regimine refrigerante, motisque et conseruatis sudoribus, non raro phrenesin, petechias, ceteraque pessimi ominis symptomata sudores hosce mox excepisse, obseruauit SYDENHAMVS, quae non tam a morbi malignitate quam sinistro regimine oriri, multa edoctus experientia iudicauit *p)*; etiam vbi modo citius iusto ad lectum damnantur aegri, inde saepissime mictum oriri sanguineum, tum etiam macu-

n) aphor. §. 703.

o) aphor. §. 84. 100. et 689.

p) Sect. III. C. III. oper. vniu. p. m. 167.

maculas purpureas, aestiuo maxime tempore, atque in iuuenta adhuc florentibus, retulit *q*). Facile autem est intellectu, ipsa in praxeos commoda hancce, ex nimis increfcente, ac damnosis artis adminiculis magis euecta, inflammatoria febre oriundam, putridam diathesin merito distingui a priore, biliosae praesertim colluuiei tribuenda; siquidem prior illa euacuantia plerumque postulet, quae in posteriori, nisi alia conjuncta sit conditio, quam facillime nociua esse poterunt. Iam vero, tertio quoque loco inter causas putridae, et quidem secundariae variolarum febris, sine dubio ipsa quoque suppuratio referenda est, praecipue si confluxerint pustulae, vel si permagna etiam copia discretarum adfuerit. Suppetias equidem huic ipsi causae ferre possunt, ac fere semper solent, in augendo hoc malo, perspiratio in cute pustulis obsita impeditior, minusque libere succedens, vel cessans etiam nimis mature saluatio, neque raro his antea memoratae, quandoque et plures accedunt causae, attamen in eo etiam optimi Scriptores consentire videntur, putridam illam secundariam febrem praecipue tum ex nimis abundante materiae purulentae copia, quam ut sufficiens in pustulis cutaneis spatium reperire queat, tum quoque ex parte absorpta puris ad cutim jam depositi, cum pustulae exsiccari ac faciei tumor desidere coeperit, suam originem habere *r*) : siquidem

Q. 5

febris

q) *Diff. Epist. ad Guil. Cole. oper. p. 352.*

r) *Conf. LOBB. libr. cit. P. I. §. 449. ill. de HAEN Rat. med. P.*

febris illa se ita fere habere soleat, vt se habet paucitas et multitudo variolarum, purisque in iis contenti melior vel peior indoles s). Sanguini admixtum pus, praesertim copiosius et vbi corpus aliunde ad febriles motus dispositum fuerit, putridam excitare febrem posse, inficiari non licebit, cum ad putridam corruptionem is humor valde inclinet, et vltimae phthysicorum tragoediae hanc ejusdem potestatem fati declarent. Neque ideo mirum, eam ad febrem vel praecauendam vel minuendam, pro insigni etiam praesidio, maturarum pustularum pertusionem, qua pus collectum emittatur, a praeclari hac in doctrina viris habitam esse t); quae operatio jam ab Arabibus, RHAZE u) et AVICENNA v), commendata fuit. Plurimum tamen commodi, etiam hanc aduersus causam, secundum praestantissima FREINDII et MEADII praecepta, quae perpetua fere multorum obseruatione confirmata reperimus, ex alui repetita purgatione licet expectare, si modo
acidi

II. p. 46. *Totus, ait, panniculus adiposus tunc pure scatet, tumetque, immo pure adhuc saepe plenus sanguis est.*

s) TRALLES *vexatiss. insit. arg. Qu. V. p. 86.*

t) HILLARY *Pract. Essay on the Small Pox. p. 106.* de HAEN *Rat. med. P. II. p. 45. sqq.* HVXHAM *on Fevers. p. 149 150.* TISSOT *avis au peuple §. 218. p. 241.* Quas vero ill. TRALLES consilio huic opposuit, haud exigui momenti difficultates, *De method. med. variol. haët. insuff. p. 108. III.* minus hoc loco nos tangunt, quam vt a nobis jam ponderandae videantur.

u) *Cap. VII. ex edit. Channing, p. 123. 124.*

v) *Canon. Med. L. IV. cap. de variol.*

acidi vitriolici vsus fatis copiosus cum potu largo demulcente illi adjungatur, simulque reliquarum excretionum successus liberior studiose conseruetur.

Sed praeterea nec dubitandum, aliam a praecedentibus discrepantem, atque iis plerumque grauio-rem, rerum conditionem quandoque occurrere, a bonis fere omnibus Auctoribus quoque memora-
tam, non semper tamen quoad causas et vitiorum corpori inhaerentium indolem distinctam, quam nempe MEADIVS sub *sanguinearum variolarum* nomine et HVXHAMVS sub *variolis illis, quas febris malignae vel petechialis indolis comitetur, in qua crasis sanguinis plane dissolueretur*, descripsit; et HILLARY peculiari de his capite egit, sub titulo *the Bleeding Small pox, or those attended with purple spots and haemorrhages*. Qui bonas harum descriptiones accurate perpenderit, atque ipsis in aegris quaevis ad phaenomena, perquisitis etiam horum causis, sollicitè attenderit, eum quoque putridae hujus variolosi morbi indolis differentem a praecedentibus naturam saepe non difficulter esse reperturum existimamus. Alia enim plane ratio hac in morbi conditione est, ac in vehementiori et protracta inflammatoria febre, cum nimis dissoluti sanguinis praematura sint indicia, sanguinisque missio non modo nihil iuuat, sed incrementi potius putredini anam praebet; alia etiam ratio saepe est, quam vt primarum viarum colluiei putrescenti adscribi possit, cum ejusdem indicia nunc deficiant, nunc vero praesenti conditioni non respondeant,

deant, saepissime nec ab euacuantibus, nisi certo sub statu complicato, quid commodi exspectari liceat, verum contra multum haud raro noxae ex hisce metuendum sit. Nec nisi rerum plane ignarus cum suppuratoria putrida febre hunc de quo loquimur statum confuderit, quippe qui aliquando ante eruptionem, interdum quoque cum illa, alias breui post illam se manifestare, et licet suppurationis tempore increseat, tamen ab oriunda inde putredine se satis distinguere solet. Profundior saepe cutis in facie, pectore, dorso, artubus, rubor est, pustulae non eleuantur, sed in cute quasi retentae, nimis profunde rubrae, quasi cruentae, passim liuescentes et nigrescentes, haerent, maculae quoque profunde purpurei, vel castanei vel liuidi, vel atricoloris accedunt; etiam vesicae nonnunquam oriuntur velut ex ambustione, sero distentae, quibus subiecta caro nigra et quasi sphacelo affecta apparet, quandoque et integri artus liuescunt; in adultioribus quoque saluatio copiosa solito maturius accedere solet, eademque dein nonnunquam cruenta fit; praetereaque sanguis, varias per vias, isque tenuis et interdum liuidi coloris, quo citius eo maiori cum periculo, erumpit. A crasi praesertim globulorum rubrorum sanguinis maxime dissoluta et destructa pessimam hanc variolosi morbi conditionem perspicaces Viri deriuarunt *vv)*, eamque sententiam

et

vv) v. HILLARY *Lib. cit. ch. IX. P. VII. p. 127.* HUXHAM of *the Small pox, in Essay on Fevers, p. 128.*

et ipsa phaenomena et praestantioris curationis, per acida mineralia et antiseptica adstringentia praesertim perficiendae, successus confirmant. Sed testatur quoque experientia, quandoque haud subsequi hanc variolarum speciem, vbi ex corporis habitu vitaeque genere tenuem et aestuosum sanguinem colligere licuit, et contra quosdam illa corripere, vel sanissimos et caute viuentes, vel etiam quos ab eadem saltem alienissimos coniecisses. Infectionem ab optima indolis variolis hae quandoque pessimae praeter opinionem subsequuntur, licet nullis etiam putridis exhalationibus expositus aeger fuerit, nullisque de aliis tantae putredinis, dissolutioni sanguinis maiori conjunctae, causis constet. Metus ac terror secundum aliquas ill. Praesidis observationes in quibusdam visi sunt ansam illi corruptioni praebuisse. In his aegris nonnunquam bilis viridis multum, ita quidem, vt aliquamdiu ante retentum et corruptum hunc humorem fuisse, verisimile esset, vix vlllo tamen cum leuamine, aluo et vomitu redditum fuit. Quandoque vomicae occultae, ad sanguinem transmissa inde acri, ichorosa, putrida materiae; nonnunquam lumbricorum cadauera in intestinali canali collecta, x) copiosis purpureis, quandoque et fuscis et liuidis, immo quoque nigris, petechiis ansam praebent; quibus ex causis praesertim posteriorum cum variolosa infectione facile conjungi potest.

Ipfa

x) Conf. inprimis van den BOSCH *Histor. constitut. epid. verminosae*. p. 30 et seqq.

Ipfa debilitas systematis neruosi, ex nutrimento non satis reficiente, et ex morbo graui neruoso praegresso, atque scorbutica diathesis, praeterea diuturnus frequens aut largus medicamentorum resoluentium efficaciorum vsus, ex quorum numero HVXHAMVS praesertim lixiuia saponacea y), saliaque alcalica volatilia, et Mercurium, z) consentientibus aliorum obseruationibus a), damnat, ad pessimam hanc variolarum indolem multum quoque conferre videntur. Neque vero excludendae sunt tempestatum et constitutionum certarum epidemicarum conditiones, huic morborum putridorum generi nonnunquam magis minusue fauentes, in quibus aliquando το θειον Hippocraticum animaduertere licet b).

Peculiarem praeter haec indolem iis in febribus reperiri existimamus, quibus putridae ex cadaueribus, ex grauitate aegrotantibus, et praesertim iis, qui putridis laborant morbis, variisque horum excretis, atque ex aquis, aliisque rebus putrescentibus ortae exhalationes ansam dedere; dum integrum systema neruosum, quoad functiones vitales, motus reliquos spontaneos, sensusque externos et internos, diuersimode, in his magis ac alias, fere proxime

me

y) *Essay on Fevers Ch. V. p. 49.*

z) *Ibid. p. 46. et 133.*

a) Conf. TRALLES *vexatiff. instit. arg. p. 94. seqq.* TISSOT *Lett. a Mr. de HAEN p. 58.*

b) HVXHAM *l. c. p. 131.*

me affici, nunc opprimi, nunc incitari, nunc alia ratione perturbari solet c). Felicior etiam hisce febribus medendi methodus ordinarie longe maiorem ac alias attentionem ad affectum systema nervosum postulat; et grauiorem plerumque noxam in his ex omni debilitante remedio aut accidente, ac in aliis, metuendam esse constat. Vtque ideo et frequentior in his necessitas est adhibendorum excitantium calidiorum, vt salium volatilium alcalicorum d), vini, aromatum, theriacae, vesicantium etc. ita rarius iisdem conuenire videntur, quae in aliis praestantissimi sunt vsus remedia, adstringentia et refrigerantia efficaciora. Quumque sub epidemia variolosa non raro plures aegrotantes eodem in conclaui, eoque saepe valde angusto et valde calefacto et arctissime clauso decumbentes, eodemque in aere alios, in quibus adhuc morbus expectatur, viuentes offendamus, quum etiam necessaria munditiei cura tam saepe negligatur; fieri certe vix aliter poterit, quin putrida miasmata cum variolosa infectione indeque excitato morbo saepe coniungantur, atque ideo morbus variolosus de natura febrium, quae carcerum ac nosodochiorum dicuntur, magis tunc minus-

c) Conf. PRINGLE'S *obs. on the Discaf. of the Army* P. III. Ch. 7. *on the Jail or hospital fever.* HVXHAM *de aere et morb. epid.* edit. Lips. p. 268 - 271.

d) De horum vsu in febribus huiusmodi putridis in primis conferri meretur DONALT MONRO'S *Account of the diseases in the Brit. milit. Hosp.* London 1764. p. 32.

minusue participet, ac peculiare hanc ob rationem cautiones in medendo postulet e).

§. XIII.

Quod ad nervosae denique lentae febris in aegris variolosis interdum quoque obviae, indolem attinet, neque hanc eodem semper modo comparatam esse, sed notatu etiam dignas differentias admittere, ex ipsa aegrorum observatione persuasissimum habemus. Hujus quidem febrium generis, tot aliis cum febrilibus morbis subinde conjuncti, veram conditionem nunc cognitam ponere liceat, utpote quam plures accurati Scriptores, HUXHAMVS f) praefertim, GLASSIUS g) et LANGRISH h) et GILCHRIST i) satis clare descriptam dederunt. Neque nobis animus nunc est, complicationibus hujus febris cum aliis recensendis inhaerere, quas omnino dari cum diathesi praefertim putrida, rarius cum phlogistica sanguinis, interdum cum varia vitiosa ad primas vias colluie, extra dubitationem esse collocatum existimamus. Studiosam requiri attentionem, ne
vel

e) Conf. in primis HUXHAM *on Fevers* p. 131. 132. Docuit etiam saepe observatio, primum in una domo variolis correptum prae sequentibus mitius aegrotare solere; qua de materia conferri merentur quae cl. HIRZEL retulit in *Abhandl. der natürl. Gesellsch. in Zürich. 1 Theil* p. 195. 196.

f) *Essay on Fevers* Ch. VI. et VII. p. 72. et in *obs. de aere et morb. epid.* edit. Lips. p. 163. sqq.

g) *Comment. de febr.* VII. p. 120 sqq.

h) *The modern Theory and Pract. of Physic.* Lond. 1738. p. 329 sqq.

i) *Med. Essays and obs. of Edinb.* Vol. IV. n. 23. et V. n. 48.

vel in simplici tali febre dignoscenda decipiamur, vfu rerum non destitutus quisque facile largietur, cum nequaquam omnis virium grauis languor, sensuumque externorum ac internorum stupor, ac solito minor quoad reliqua naturae actuositas, hujusce febris praesentiam fati certo declarent; siquidem et summus languor cum tardante pustularum eruptione ac eleuatione, sola etiam ex plethora, nonnunquam ex nimis magna quoque et vehementius exaltata inflammatoria diathesi, praetereaue interdum ex collecta in praecordiis cacochyliis, certissime producat.

Contingit vero interdum signa neruosae lentae febris HVXHAMIANA, plane deficientibus etiam his alienis languoris vitalis et animalis causis, pustularum eruptionem praecedere, atque aliquot per dies perseuerare, vbi tamen eruptio ex voto succedit, integerque dein morbus decursus ita regulariter abscluit, vt meliorem non exoptes, licet eruptio nullis plane cardiacis aut stimulantibus, ab HVXHAMO et aliis eo sub statu commendatis, promota fuerit. In his ergo certe opus non fuit cardiacis et excitantibus. Probabiliter nocuissent. Ergone minimum cautissime, sub signis etiam neruosae illius lentae febris, cardiacis praesertim calidioribus vtendum?

Praeterea deficit aliquando, vera ex obseruatione, actuositas illa naturae, qua opus ad eleuandas ac maturandas pustulas, vt quoque crySTALLINAE et verrucosae fiant, haeque tandem, vix vlla prae-

sente febre, ac fere vnice ob defectum caloris vitalis, liuescant et nigrescant, licet in eruptione vires naturae deficere non visae sint, sed pustulae potius subito, perexigua tamen praegressa febre, quam copiosissime prodierint, cum et nihil plane cardiaco-
rum ac stimulantium adhibitum fuerat. Quem statum, vt praecedentem quoque, ab illo, quem HVX-
HAMVS describit, pariter discrepantem, aliquoties in tenellis obseruauit ill. Praeses.

Quodsi nunc ad neruofas febres etiam eas omnes referre liceret, in quibus symptomata neruosa, ex causis minus euentibus, ac peritiores quoque latentibus, oriunda prae aliis emineant, atque vel perseueranter, vel frequenter saltem, aut permutatis inter se vicibus, aegros corripiant, pluribusque ex manifestiorum numero phaenomenis haud respondeant; quam ad indolem febrium plurima pertinent Hippocratica malignitatis criteria; omnino etiam inter variolosos morbos ejusmodi reperi-
eas, quibus febrem neruofam tribuere queas, licet lentarum cognomen ex idea HVXHAMI et aliorum, quos laudauimus, Anglorum haud mereantur. Ad symptomata autem illa neruosa, in quorum origines quandoque frustra inquisiueris, cum cognitis non respondeant causis, praesertim referenda sunt, vehementior capitis, colli, lumborum et artuum dolor, delirium pertinacius post eruptionem, vrina praecipue limpida, pauca et saepe tunc emissa, cum inquietudine, peruigilio, floccorum lectione aut festuca-

stucarum euulsione; fitis defectus, potusque necessarii, praesertim subacidi detrectatio, ubi lingua sicca, aspera, fissa, fusca aut nigra est; auditus obtusus; respiratio luctuosa aut suspiriosa; vocis defectio; deglutitionis difficultas, praesertim cum spiritu tussiculoso; singultus; tendinum subsultus; frequens horror; caloris et ruboris permutatio crebra; artuum tremor; motusque convulsivi etc. *k*). Longe plura facile huc referre liceret, sed hic memorata pro exemplis abunde sufficere videntur. Et, cum ipsa coctio pathologica et quodvis criticum, magna etiam ex parte a systematis nervosi constitutione ac efficacia pendeat, potissimum quoque ista ad nervosa symptomata pertinere videntur, vrina praeter rationem cocta, pustulae in artubus prius ac in facie prodeuntes, deficiens capitis et manuum iustis temporibus intumescencia, nova pustularum copia post alteram erumpens *l*), salivatio in infantibus *m*); et quae sunt huiusmodi plura.



R 2

VI.

k) Plurima variolarum symptomata tum nervosa tum alia, probabilibus ex rationibus, quoad fieri potuit, maximam partem exposita, cum subiecta cuius medendi methodo, v. in LOBB'S *Treatise on the Small pox* P, I. ch. IV-VII. p. 55-120.

l) HILLARY *Pract. Ess. on the Small. pox* ch. V.

m) G. CLEGHORN'S *obs. on the epid. diseases in Minorca* III. Edit. p. 295.

VI.

Dissertatio de inflammatione diaphragmatis.

Publice proposita Gott. 1771. Resp. LEV.

ARNOLD. EBELING, *Hildesienfi*.

§. I.

Inflammationem Diaphragmatis, quanquam communiter a Medicis recepta sit, et Paraphrenitis appellata, tamen a nonnullis, video, vel ex toto diuersam a paraphrenitide haberi, vel ipsam in dubium adduci, refutari, planeque rejici. In his IOH. BAPTISTA BIANCHVS a), *Exulet*, inquit, a *saniore praxi Medica* illud Paraphrenitidis nomen, quod *sympathicis phrenitidibus*, veluti a Diaphragmatis Inflammatione *subortis*, arrogare cum Galeno fere omnes Hippocratis *asseclae consueuerunt*; — quum reuera, sicut audacter affirmare pergit, *in mortuis ab hoc morbo nulla unquam in transuerso septo propria inflammatio, sed semper in jecore affectio deprehensa fuerit*. Et THOMAS WILLISIVS b) hunc (paraphrenitidis) *affectum vix unquam a tali causa* (scilicet diaphragmatis inflammatione) *produci arbitratur*. Alii, non quidem negare hoc inflammationis genus videntur, sed tamen illud in tradenda vel facienda medicina ple-

a) in *Historia Hepatica*, p. 496. seq.

b) de *Anima Brutorum*. Parte 2. Cap. 10. p. 427. ed. Amst. 1674.
in 12.

plerumque praetereunt, negligunt, aut aliis partibus finitimis attribuunt; quapropter PETRVS SALIVS DIVERSVS c) hoc malum, conqueritur, *ab iis, qui praxin communiter docent, vel negligi, vel ignorari.* Contra grauissimus BOERHAAVIVS d), cuius merito magna est auctoritas, eum *morbum longe frequentior* rem esse, *quam vulgo quidem censetur*, existimat. Quum igitur tali ratione pluribus dubiis controuersisque diaphragmatis inflammatio subiecta sit, et ipsum tamen hoc argumentum non leuis in arte salutari momenti, quum praesertim SALIVS, loco posteriore, commoneat, propterea quod hunc morbum practici negligere consueuerunt, *ab iis aegros in perniciem et mortem saepe deduci*; dignum illud iudicaui, quod diligentiore disquisitione pertractarem, quo, quid de quaestionibus eo pertinentibus verum, rectum, certumque, vel saltem maxime probabile statuendum sit, appareat.

§. II.

Principio, quoniam morbus hic Paraphrenitis appellari consuevit, ratio reddenda erit, cur ego nihilominus illud Inflammationis Diaphragmatis nomen praetulerim. Igitur scire licet, antiquitus *Φρένας* dictas esse tum mentem prudentiamque, tum, quod postea, PLATONE primum auctore, diaphra-

R 3

gma

c) de *Affectibus Particularibus*, in Praefatione, et Cap. 8. p. 220. et 262. Opusculorum edit. Amstel. 1681. 8.

d) in *Aphorismis de cognoscendis et curandis morbis*, §. 908.

gma vocatum *e*): ex qua priore significatione superest adhuc, quod etiamnum Phrenica vocantur vasa diaphragmatis, arteriae scilicet, venae, nerui, caeteraque. Phrenitin autem Medici veteres, eorumque princeps HIPPOCRATES, appellarunt in vniuersum omnem insaniam quae et acuta, et in febre est, continuaque *f*). Sed quum animaduenterent, hanc

e) Hoc duplici sensu jam apud HOMERVM occurrunt *Φρένες*, et similiter apud HIPPOCRATEM; quorum loca dare poterunt Lexica, cum primis ANVTII FOESII *Oeconomia Hippocratis*, JOH. CVNRADI DIETERICI *Iatreum Hippocraticum juxta ductum Aphorismorum Hippocratis adornatum*; et alia. Idem antiquissimum diaphragmatis nomen fuisse testantur HIPPOCRATES *de Morbo Sacro* sectione XVIII. ARISTOTELES *de Partibus Animalium* Lib. 3. Cap. 10. EROTIANVS in *Vocum Hippocratis collectione*, PLINIVS MAIOR *Historiar. Naturae* Lib. XI. Cap. 37. RVFVS EPHESIUS *de humani corp. Partium Appellationib.* Lib. I. Cap. 9. GALENVS *de Locis Affectis* Lib. V. Cap. 4. Ratio, cur eadem vtramque rem voce, scilicet et mentem et transuersum septum, notauerint, est, quia hoc prudentiae particeps credidere, testibus HIPPOCRATE, ARISTOTELE, GALENO, locis allegatis; siue, vt PLINIVS dicto loco tradit, quod huic (diaphragmati) *refertur accepta subtilitas mentis; ideo nulla ei est caro, sed nervosa exilitas*: quibus verbis declarat, centrum diaphragmatis se solum intelligere. Hanc tamen opinionem jam explodit HIPPOCRATES all. 1. monendo, non magis has phrenas sapere, quam auriculae cordis audiant, PLATONEM primum diaphragma nominasse, docet GALENVS d. 1. fortassis autem in eo praeceuntem secutus est HIPPOCRATEM, qui nimirum *διάφραξιν* vocat *de Virginum morbis* Sect. 2. numero 8. et *Φραγμὸν τῶν Φρενῶν* *de Flatib.* Sect. 17. num. 6.

f) HIPPOCRATIS et GALENI loca dabit Foësius in *Oeconomia*, et Indices. Conf. CORN. CELSVS *de Medicina* Lib. 3. Cap. 18.

hanc ipsam in febribus dementiam in diuersarum partium morbis cum aliqua diuersitate accidere; quo distinctius agerent, hoc quoque monuerunt, adjeceruntque differentias locorum et symptomatum *g*): non tamen suum cuique speciei nomen proprium addidere. Quod recentiores demum facere aggressi sunt, aliamque phrenitin vocarunt idiopathicam, seu veram, aut exquisitam, quae ex cerebro ejusque membranis inflammatis oriatur; aliam sympathicam, siue per consensum, aut notam, ex diaphragmate aliisque partibus: aliam primariam, quae principem morbum semper comitatur: aliam symptomaticam, quae et quatenus morbis variis jam formatis postea se adjungit: adeoque, majoris distinctionis ergo, phrenitin proprie dixerunt illam cum inflammatione cerebri ejusque membranarum conjunctam insaniam; paraphrenitin, quasi leuiorem phrenitin, illam cum inflammatione diaphragmatis *b*): perinde ac pleurae, hepatis,

R 4 renum,

- g*) HIPPOCRAT. *de Morbis* Lib. 3. Cap. 9. disertè scribit, *Phrenitides fiunt etiam ex aliis morbis* (scilicet quam illa prior, Lib. 1. Cap. 23. seqq. descripta); mox pergens, *in Diaphragmate dolorem sentiunt aegri quidam, ita ut ne tangi quidem eum locum sinant.* GALENVS c. 1. similiter, et adhuc apertius, phrenitin quae ex encephalo est, et alteram quae ex diaphragmate, distinguit. Add. ALEXANDER TRALLIANVS *Medicinalium* Lib. 1. Cap. 13. PAVLVVS AEGINETA *de re Medica* Lib. 3. Cap. 6.
- b*) Hinc, LAVRENTIO BELLINIO iudice, *de Morbis Capitis*, titulo Paraphrenitis, post principium, p. 496. edit. Francof. et Lips. 1685. 4. *sunt etiam, qui ab inflammationibus aliarum partium internarum oriri paraphrenitidem asserant: sed nullius par-*

renum, pluriumque partium inflammationes propriis nominibus, pleuritis, hepatitis, nephritis, et sic porro, figillatim appellantur. Rursus autem obseruatum est, dementiam continuam, quae nota tam phrenitidis quam paraphrenitidis propria esse perhibetur, non in omni meningum aut ipsius encephali phlegmone, vel simili diaphragmatis affectione, neque in vna eademque ejus specie, semper euenire i). Denique multi sub paraphrenitidis nomine quamlibet intelligunt febrem acutam cum delirio fere quidem perpetuo, sed minus, quam in ipsa phrenitide, vehementi, manifestiusque sympathico k). Ex his apparet, paraphrenitidis appellatione saepius quidem significari diaphragmatis affectum; sed illam vocabuli vim, qua phrenes transuersum septum significarunt, partim jam obsoletam esse, partim propter alterum sensum, quo de

partis inflammatio, praeter septi transuersi, producit delirium perpetuum; et hanc solam appellauere veteres Paraphrenitidem.

At FR. BOISSIER DE SAVVAGES adhuc distinguit inter paraphrenesin *Diaphragmaticam*, *Pleuriticam*, et *Hepaticam*, *Nosologia Methodica* Tomo 2. Parte 1. pag. 444. seqq. quae tamen differentiae nequaquam omnem consimilium inflammationum numerum absoluunt.

i) Testes magno numero excitatos videre licet in Diff. Inaugurali CAROLI HENR. FEIN *de indole ac sede Phrenitidis et Paraphrenitidis*, Praeside Ill. Viro, qui mihi quoque praesidium praestitit, Gottingae 1765. defensa, §. XVI. XVII. XVIII.

k) Vid. allegata cl FEINII Disp. §. I. in fine, §. IV. V. XII. et alibi; quibus plures addi possunt, vt FELIX PLATERVS in *Praxi*: THEODOR. ZWINGER. in *Theatro Prax. Medicae*, caet.

de prudentia mentis accipitur, ambiguum: deinde patet, ea voce non raro febrem indicari cum continua leuiore desipientia, quae quidem febris diuersis ex locis, non ex solo praecise diaphragmate, proueniat: plerumque vero mentis alienationem intelligi, quae symptoma est, non ipse morbus, nec ipsa tamen semper suo, cui tribuitur, cum morbo conjuncta est. Has ob rationes illud Paraphrenitidis nomen non videtur satis aptum ad diaphragmatis inflammationem denotandam, aut ab aliis morbis distinguendam: contra ea, simpliciter inflammationem appellando, morbum ipsum, non symptoma, dicimus, ab aliis discernimus, et omnes antea propositas ambiguitates et confusiones vitamus: Quod etiam hoc confidentius facio, quo magis complures video Medicos ^{l)} illud nominis aut simile vsurpasse, vel retinuisse.

R 5

§. III.

^{l)} In his sunt praecipui, CLAUD. GALENVS pluribus locis, ALEX. TRALLIANVS *Medicinal.* Lib. 1. Cap. 13. IHERON. CARDANVS *de causis, signis, et Locis Morborum* Parte 3. Cap. 71. VIDVS VIDIVS *de Curatione membratim* Lib. 8. Cap. 15. FRANC. JOEL *Operum* Tomo III. f. *Practicae* Lib. 3. Sect. 4. num. 2. PET. SALIVS DIVERSVS l. c. p. 260. seqq. DANIEL SENNERTVS *Practicae Medicinae* Lib. 2. Parte 2. Cap. 14. CASP. HOFFMANNVS *Institutionum Medicar.* Lib. 3. Cap. 46. FABRITIUS BARTOLETVS *Methodi in Dyspnoeam* Lib. 4. Cap. 20. et Lib. 5. Parte 2. Cap. 19. ZACVTVS LVSITANVS *Medicorum Principum Historiae* Lib. 2. Hist. 24. JOH. RIOLANVS *Enchiridii Anatomici et Pathologici* Lib. 3. Cap. 5. p. 216. edit. Paris. 1658. 8. etc.

§. III.

Posset autem aliquis existimare, paraphrenitin cum inflammatione septi transversi conjunctam, diuersum ab hujus simplici solitariaque inflammatione morbum esse; ideoque etiam a practicis separatim tractari: Quemadmodum, exempli causa, FRANCISCUS JOEL phrenitin ex inflammatione diaphragmatis Libro I. *Practicae suae*, sectione 2. membro 2. exponit; at diaphragmatis inflammationem per se, Libro 3. sect. 4. membro 2. Enimvero, paraphrenitin quae leuioribus febrium deliriis, vel illis sympathicis viscerum contineatur, saepe sine propria septi inflammatione, vel vicissim hanc sine deliriis existere, non diffiteor, et hactenus distinctos esse morbos: sed eam paraphrenitin seu desipientiam, quae diaphragmatis comitetur inflammationem, siue cui proprium hoc nomen a Medicorum filiis attributum est, vnum eundemque cum ipsa diaphragmatis inflammatione morbum esse, cujus symptoma sit dementia, nemo, credo, negabit, qui, quid morbus sit, quid symptoma, et quomodo vtrique connectantur, speciatim in inflammatione cum febre, recte perpenderit. Ejusdem sententiae LAVR. est BELLINIVS; nam diaphragmatis inflammationem expositurus *m*), interponit, *Sed totum hunc morbum explicauimus sub Paraphrenitidis*

m) de *Morbis Pectoris*, articulo Pleuritis, in fine, p. 656. edit. Opusculorum supra dictae.

dis titulo, quum praecipuum ex conjunctis habeat phrenitidem, et Paraphrenitis vulgo nuncupetur. Ad eundem modum JOELEM quoque et alios, qui forte diuersis paraphrenitin et diaphragmatis inflammationem locis proponunt, interpretari fas est, id scilicet eos ideo fecisse, quod idem morbus, pro variis respectibus, pluribus in sedibus locum inuenire ponique potest, non quod reapse pro diuersis habuerint diuersis nominibus appellatos, paraphrenitidem et diaphragmatis inflammationem.

§. IV.

Quid igitur causae sit, merito quaerere videmur, cur magnum plerumque inter practicos de diaphragmatis inflammatione silentium esse soleat, vel adeo de ea saepe dubitetur, aut ipsa pluribus in casibus, vbi subesse communiter creditum est, a multis alteri morbo, praesertim jecinoris, locum suum tamdiu possessum cedere jubeatur: contra, cur alii sedem illi, quam olim occupauit, conseruare, restituere, creberrimosque casus adjudicare contendunt; quemadmodum initio monui. Equidem prius illud partim ea de causa fieri puto, quod antiquorum virorum scripta neglecta vel contemta sunt, aut eorum verba perperam intellecta, nouarum autem rerum excogitatione gloria quaesita: partim, quod confusi sunt inter se vicinorum locorum affectus, dum diaphragma cum tot partibus, praesertim pectoris et inferioris ventris, connexum est,

est, ideoque vel ipsius proprii morbi finitimis partibus adscribi possunt, vel hi cum connexarum quoque partium morbis complicari: partim, quod septi transuersi naturam, situm, nexum, motum, et reliquas functiones conditionesque Medicini minus, quam par est, attenderunt aut aestimarunt. Primum, veteres hunc morbum ab Hippocratis vsque temporibus cognouisse literisque consignasse, pluribus auctorum locis §. II. satis, arbitror, comprobatum est: constitit item, in Phrenibus ejus sedem fuisse positam, quo tempore phrenes diaphragma significarunt: postea vero quam Diaphragmatis nomen inuentum fuit, sub hoc ipso diaphragmatis nomine morbus idem indicatus; vt ergo pars eadem pro loco affecto semper habita sit, et diuersum ea tantummodo nomen gesserit. Sed, quia phrenes quoque mentem ac rationem denotarunt, et phrenitis ejus aberrationem; hinc prima confusioni anfa data: nam, quasi mentis laesio morbo nomen fecisset, ad phrenitin relatus est, et postea certioris distinctionis causa Paraphrenitis appellatus: deinceps illud amentiae symptoma, tanquam in omni diaphragmatis inflammatione semper se manifestaret, pro signo morbi proprio seu pathognomonico acceptum est. Jam vero, negare quidam sustinent, in locis HIPPOCRATIS, quos de hoc morbo interpretes exposuerunt, et phrenas ibi dictas de diaphragmate intellexerunt, nominatim in illis *de Morbis Lib. 3. Cap. 9. et de Affectionibus Cap. 10.*

prae-

praeter alios multos, non per transuersum septum istam vocem esse reddendam, sed potius per praecordia, id est, hypochondria, maximeque jecur: argumento esse, quod adjicit Hippocrates, phrenas ita dolere, vt ne attingi quidem se sinant aegri, quum autem diaphragma nullo modo in viuentibus contingi possit, aliud intelligi debere, nominatimque hepatis gibbum: deinde septum transuersum propterea locum non habere, quod Hippocrates in eo morbo vomitoria et purgantia commendat, quae tamen ad diaphragmatis inflammationem nihil sane valerent, quin potius non sine grauioris noxae periculo adhiberentur: denique, qui ex hoc morbo mortui sunt, in illis reuera nullam vnquam in transuerso septo propriam phlegmonen, sed semper in hepate labem repertam fuisse; et quae sunt aliae similes objectiones *n*). Vnde concludunt, diaphragmatis inflammationem ex falsa suppositione natam esse, precarioque assumtam.

§. V.

Quibus vt respondeam, quod ad Praecordiorum vocabulum attinet, nusquam, quod sciam, apud HIPPOCRATEM phrenes de Hypochondriis et Hepate occurrunt, sed omnibus locis, vbi pars corporis iis indicatur, de diaphragmate; quod etiam veteres vocum expositores Graeci *o*), Medici quoque

n) Vid. JOH. BAPT. BIANCHI l. c. et cl. FEIN alleg. diss. §. VI. et XIV.

o) quos nominaui supra §. II. annotat. *e*).

que ipsi, confirmant, qui quidem hac in re sine dubio majorem fidem merentur, quam recentiores, nec Graecanicae linguae scriptorumue tam gnari, et tantis temporum interuallis à vetustate remoti. Et eo minus de jecore phrenas apud Hippocratem exponere licet, quod ipse vtraque diserte separat, ut *Coacarum Praenotionum* Sectione 3. numero 387. diuisionis Joh. Antonidae van der Linden; *Aphorismorum* Lib. 6. Aphor. 18. de *Anatome* Cap. 3. de *Morbis* Lib. 1. Cap. 3. num. 4. de *Vitū Acutorum* Cap. 36. num. 3. et alibi. Similiter phrenas et Hypochondria distinguit de *Vitū Acutorum* Cap. 36, 1. Quodsi vel maxime praecordiorum vocem illi diaphragmatis substituamus, tamen ea non certius designantur hypochondria: nam praecordia antiquis aliquando solum septum transuersum significant, aliquando hoc iis simul cum hypochondriis comprehenditur. Sic CAJVS PLINIVS *Historiar. Naturae* Lib. XI. Cap. 37. clarissimis verbis pronunciat, *Extra homini ab inferiore viscerum parte separantur membranis, quae praecordia appellant, quia cordi praetenduntur, quod Graeci appellauerunt phrenas.* Et CORN. CELSVS locum definit, de *Medicina* Lib. 4. Cap. 1. pag. 184. editionis Almeloueenianae, scribens, *Stomachus* (id est, oesophagus) *circa praecordia cum ventriculo committitur*: et Lib. 8. Cap. 1. p. 503. *Os pectoris a praecordiis, jam ipsum quoque cartilagine mollitum, terminatur.* Qui distinguit etiam a praecordiis jecur, lienem, et ventriculum Lib. 2. Cap.

Cap. 8. p. 70. et 73. Lib. 3. Cap. 24. p. 176. Lib. 5. Cap. 26. p. 286. saepe vero simul hypochondria comprehendit, vt Lib. 2. Cap. 3. p. 49. eodem Lib. Cap. 4. p. 51. et 52. Cap. 7. p. 63. et 64. bis: Lib. 3. Cap. 22. p. 170. eodemque Lib. Cap. 24. p. 175. bis, caet. quibus locis fere praecordia reddit, quae Hippocrates, vnde sumfit, hypochondria vocauerat.

§. VI.

Quod, diaphragmati minus conuenire locum Hippocratis propterea, contendunt aduersarii, quia contactum ait refugere partem affectam, diaphragma vero putant in viuis a contactu plane remotum esse; hoc non arbitror magnum probandi pondus habere. Satis enim dilucet, illa verba non aliter accipienda esse, quam, in isto morbo loca, quibus transuersum septum adnatum est, scilicet anteriorem oram mucronatae cartilaginis costarumque spuriarum, scrobiculum cordis qui dicitur, etc. non sine summo dolore contrectari, manum aut digitos subijciendo, vel partes exteriores aut interpositas versus septum premendo; quali quidem modo ea loca tangi in ipsis viuentibus posse, quis non videt? cui non in semet ipso experiri licet? Neque jecur, quod substituunt, aliter in viuis tangi, nisi per intermedia ventris tegumenta, potest; vt tali ratione, quod de diaphragmate negant, de jecinore pariter confiteri necessum habeant, nimirum in viuis

uis plane tangi non posse. Praeter haec, eo minus hepar hic intelligere conuenit, quia satis constat, hujus visceris inflammationem nequaquam, nisi in admodum graui malo, tam acutum mouere suimet ipsius dolorem, vt omnem attactum respuat, sed fere tantum obscuriorem vel obtusorem ejus generis sensum afferre p), siquidem ipsum per se jecur non magna sentiendi facultate praeditum est: quodsi dolor vehemens in his locis percipitur, is vel ab exteriorum partium aut membranarum inflammatione proficiscitur, vel a calculis vesiculae fellis, et similibus.

§. VII.

Alterum argumentum, quo diaphragmatis inflammationem in loco Hippocratis euerti creditur, erat, quod emetica purgantiaque laudari non potuerint, si is morbus foret, cui nimirum ejus generis medicamenta inimica sint, contra hypochondriorum, et potissimum hepatis inflammationi quam maxime accommodata; de qua posteriore propterea locum istum interpretandum esse volunt. Verum, si contextum verborum Hippocratis ipsum oculis intuemur, manifeste cognoscimus, ibi definite praecipi, in morbo proposito, quemadmodum in peripneumonia, sursum excernere, ἀποκαθαίρειν, et

p) Vid. JOD. LOMMIVS in *Observationib. Medicinal.* Lib. 2. hoc titulo, FRID. HOFFMANN. in *Medic. System.* Tom. IV. Part. I. Sect. 2. Cap. 7. MICH. ETTMVLLERVS, etc.

et tussi sputoque per superiora educere, siquidem aptus fuerit aeger, ἢν μὲν οἷός τε ἦ· si vero hoc non liceat, ventrem inferiorem praeparare, vt subducatur. Itaque iubet auctor, curationem hujus, de quo agimus, morbi ad illam peripneumoniae curationem exigere, similiterque per supernas pectoris vias materiam rejicere, (hoc enim apud Hippocratem q) ἀνακαταίρειν significare consuevit), per tussim scilicet et sreatum; idque tum facere, si natura hominis ad eam excretionem vergit: sin ad hanc minus apta est, ventrem inferiorem ita disponere praecipit, vt materiam dimittat, sicut pariter in peripneumoniâ fieri solet. Nulla hic vomitoriorum aut purgantium proprie sic dictorum mentio, sed bechicorum, sed aluum mollientium, aut laxantium, qualia a cibis, potionibus, lotionibus siue clysmatibus petere licet, et conuenit; non a medicamentis vomitum aut dejectionem majore vimolientibus: nam priora, quae laxant, etiam in diaphragmatis inflammatione quam maxime locum inueniunt; vt tali modo septi transuersi phlegmon ipsa quoque remedia praescripta praesenti loco vindicent. Quodsi quis nihilo minus insistat, vera ibidem vomitoria et purgantia intelligere; eadem, dico, non magis hypochondriorum aut hepatis inflammatione

q) vt *Epidemicorum* Libro 7. Cap. 47. n. 17. alias ἀνακαταίρειν, vt *Aphorismorum* Lib. 5. Aphor. 8. et 15. de *Affectionib.* Cap. 8. num. 13.

flammationi, dum viget, esse commoda, sicut ex therapeuticis praeceptis constat, quam illi diaphragmatis: vnde consequitur, vt tali ratione neutrius partis inflammatio, nec jecoris, nec transuersi septi, locum hic tueri posset.

§. VIII.

Tandem in paraphrenitide, quae ipsam diaphragmatis inflammationem designare dicitur, negant vnquam hanc inflammationem repertam fuisse, aut reperiri, corporibus eorum, qui hoc morbo paraphrenitidis defuncti sunt, incisis, sed semper in hepate; quapropter septi phlegmonen perperam supponi contendunt. At enimvero, primum, etsi paraphrenitis absit, hoc est, leuior in febre deliratio continua, tamen nihilo secius septum transuersum inflammatum esse potest, siquidem non inseparabile illud accidens est; vt jam in superioribus §. II. et III. ostendi: Quamobrem, licet in corporibus ex paraphreniti mortuis non diaphragmatis inflammationem, sed jecoris, inuentam fuisse, concederetur, tamen aliis in casibus, vbi nulla paraphrenitis obseruata est, talis inflammationis vestigia deprehendi poterunt. Deinde, quanquam paraphrenitidis nomen diaphragmatis inflammationi tributum sit, tamen etiam sine hac in aliarum partium affectibus contingit, sicut pariter §. II. demonstratum et testimoniis idoneorum auctorum confirmatum est. Ergo, quandocunque paraphrenitis sine diaphragmatis inflam-

inflammatione fuit, alia species intelligenda est, quam quae inflammationem istam comitatur. Coniunctam autem per saepe reuera cum septi transuersi phlegmone paraphrenitidem esse, non tantum omnes illi, qui paraphrenitin in diaphragmatis inflammatione proprie versari volunt, et qui sane plurimi sunt, vt ex supra propositis cognosci potest, testantur, sed ipsi quoque illi, qui paraphrenitin non semper ejus phlegmones esse comitem animaduenterunt, tamen aliquando esse, simul fatentur *r*). Denique, paraphrenitide tantisper relicta, veram diaphragmatis inflammationem, tam tendinosi centri quam musculosae partis, reapse frequentissime obseruatam et oculis vsurpatam esse, praeter auctores §. II. annotatione *t*) prolatos, magno consensu etiam omnes asserunt, qui sine deliriis, saltem sine perpetuis aut euidentioribus, eandem esse defendunt aut repere-runt, et ex quibus complurium testimonia, suis quoque nonnulla verbis descripta, videri possunt in allegata dissertatione Clar. FEINII §. XVIII. p. 29. et seqq.

§. IX.

Altera causa generalis, ob quam inflammationis septi transuersi rarior, quam decet, mentio fiat, est, quod propter aliarum partium vicinitatem et con-

S 2

nexio-

r) Hi videri possunt tum supra §. I. tum apud Cl. FEINIVM *diff.* cit. §. XVIII.

nexionem, illis finitimis ejus affectus adscribi solent. Connectitur autem septum cum aliis partibus potissimum per membranas seu tunicas, tum per vasa sanguinea, neruosque. Sic vnam eandemque tunicam inuestientem, scilicet a pleura et peritoneo productam, habet cum mediastino, pericardio, thoracis cavo, pulmonibus, oesophago, tum inferius cum jecinore, ventriculo, splene, intestinis, caet. Cum iisdem partibus arterias venasque, communes, et ab vna origine propagatas, nactum est. Similis est neruorum communitas. Hinc, si diaphragma tumorem, inflammationem, dolorem, et quae conjuncta sunt, contrahit, partim per communia vasa materies in connexa quoque loca diffunditur, partim haec ab affecto septo pulsus, pressionem, tensionem, obstaculum, sensum molestum, et quae inde porro pendent, patiuntur: eoque magis fit talis affectionum communicatio, quo viciniore diaphragmati sunt partes, quoque latior et arctior est illarum cum hoc connexio. Quamobrem pleura, mediastinum, pulmonum tunica, jecur, et ventriculus cum stomacho, maxime in consensum trahuntur; et diaphragmatis inflammatio mentitur nonnunquam speciem aliquam pleuritidis, peripneumoniae, gastritidis, hepatitidis, et similium. Sic, ad pleuritidem refertur hic affectus ab AVICENNA s), a PAVLO BARBETTE t), a JOHIANNE PRINGLE u), pluribusque: simili-

s) *Canonis* Lib. 3. Fen. 3. Tractatu 4.

t) *Praxeos* Lib. 3. p. 70. edit. Amstelædam. 1693. 12.

u) *Observations on the diseases of the Army*, Part. III. Cap. 2.

militer ad alias congenerum morborum species. Idque vulgo frequenter admodum fieri videtur, dum in praxi tam raro septum transuersum accusari solet.

§. X.

Sed quoniam ad morbos recte cognoscendos atque curandos inprimis opus est, vt ab aliis, qui similitudinem cum illis aut affinitatem habent, probe distinguantur; notae tenendae sunt, quibus quique morbi proprie designantur, et quibus a caeteris differunt: quae quidem notae fere a locorum conditionibus et a functionibus partium sumuntur. Ergo, diaphragmatis inflammationem a reliquis discernunt, sensus tensionis dolorisque vehementis talis, qui instar cinguli thoracem inferiorem stringentis se gerat, et praesertim in inspiratione augeatur: adhaec, respiratio celeris ac brevis, seu parua ac frequens; crescente autem malo inaequalis, seu modo parua ac frequens, modo rara ac magna: hypochondriorum reuulsio versus pectus: nonnunquam conuulsiones, Sardonus risus, singultus idiopathicus, pulsatioque seu palpitatio circa scrobiculum cordis; et similia. At communia cum pleuritide, cum peripneumonia, cum pericardii et mediastini inflammatione habet caeterarum inflammationum febrisque comitatae symptomata et consequentia, nominatim aestum, dolorem capitis aliorumque locorum, pulsum durum et frequentem, dejectum appetitum, vrinam crudam, vigilias, inquietem, in-

omnia, suppurationem, caet. cum inflammatione ventriculi et hepatis, similia, praetereaue desipientiam paraphrenitin dictam; et sic porro. Ventriculi inflammationem, praesentibus reliquis notis, peculiariter distinguunt, locus, nausea vomitusque, praesertim quum aliquid ingestum est, anxietates, fitis, singultus sympathicus. Hepatitin veram, quaedam ex his, tum in loco grauitatis et obtusi doloris sensus, bilis vomitus, variaeque species icterici: tunicarum hepatis, peritoneae, musculorumque exteriorum phlegmonem, spuriam Hepatitin nonnullis dictam, similis quidem, vt in diaphragmatis inflammatione, dolor vehemens, at loco diuersus, quique ad latus dextrum et ad jugulum humerumque partis ejusdem perueniat; tum vomitus bilis: Pleuritin, dolor lateris punctim affligens: Peripneumoniam, mollis pulsus: Pleuropneumoniam, mixtum ex vtrisque symptomatum genus: Mediaстинi inflammationem, minor in inspiratione dolor, quam in pleuritide; etc. Praeter haec, in interstitiis, quae juxta xiphoïdem cartilaginem et infimas dorsi vertebrae a pleura et peritoneo formantur, potest fieri materiae collectio, et singulare morbi genus efficere, molesto loci sensu praecipue a diaphragmatis caeterarumque partium adjacentium affectibus diuersum. Prout autem aliqua ex his malis confociata sunt, id quod propter viciniam saepe fit, ita tum diuersorum locorum accidentia simul obseruantur et permiscentur. Sic inprimis pleuritis esse solet

let in inflammationis diaphragmatis societate vel primarius morbus vel secundarius: similiterque mediastini, vel ventriculi, vel jecinoris, vel peritonaei ab eoque productarum membranarum et externorum muscutorum inflammatio. Qualis permixtio vel consortium merito putatur frequentem dare occasionem, vt vnum inflammationis genus pro altero habeatur, nec, quae propriae sunt diuersarum partium affectiones, satis a se inuicem secernantur.

§. XI.

Praeter differentias, quas aliae partes in suis morbis a diaphragmatis inflammatione faciunt, etiam in ipso septo quaedam existit diuersitas. Nam vel ejus in superiore membrana, siue thoracis cauum respiciente, pleurae scilicet productione, contrahitur malum, vel in inferiore tunica, cum peritoneo coalita: in carnosa seu musculosa parte, vel in tendinoso centro siue nonnullis sic dicto speculo: rursus, quantum ad carnosam attinet, in antica parte lateribusque, vel in postica, cruribusue et appendicibus: vel denique in toto quaquauerfum diaphragmate. Pro hac igitur diuersitate partim locus, vbi sentitur vitium, varius est; partim gradus aut vis morbi, partim symptomata quaedam nonnihil differunt. Sic inprimis, si centrum quoque tendinosum inflammatur, vehementiorem fore morbum omniaque inflammationis accidentia, non obscurum est; siquidem, quum arctiora, quam reliquae partis,

magisque tensa sint ejus vasa, grauior quoque morbus huiusque motus esse debuit, qui in illa humorem inflammantem adegerit, neque hic inde facile iterum expediri poterit, aut viae, quantum ad transmittendum satis sit, molliri laxarique; quibus adeo rebus, necesse est, malum augeatur, et difficilius ad curationem reddatur.

§. XII.

Sunt etiam alii diaphragmatis morbi, qui cum ejus inflammatione cognationem habent, et cum eadem aliquando copulantur, proptereaque, ne rectam curandi rationem peruertant, et erroribus opportunitatem praebeant, rite distingui debent. Quo praecipue referendi *Tumores* appellati *frigidi*, qui quidem a materia non inflammata, neque vehementer commota, sed cruda, siue ad probi humoris indolem non satis perfecta, et longiore demum tempore congesta, conflantur, duritiem contrahunt, diuque perdurant, et magis magisque confirmantur, caeterum secum ferunt aliquid doloris, respirandi difficultatis, tensionis praecordiorum aut hypochondriorum, pulsum durum paruumque, sed fere non celeriore aut frequentiore quam antea consueuerat, et quae ex his pendent aut consequuntur; neque febris animaduertitur, certe non acuta, neque delirium, nisi quum hi tumores exacerbati tabem afferunt, jamque mors appropinquat, tum enim accedere quoque solent febriculae leuiaque deliria.

deliria. Quod valetudinis genus praeclare cumprimis, post GALENUM ac FERNELIVM *v*), explicuit PET. SALIVS DIVERSVS. *iv*) Ab his differunt *Steatomata* super septo nata, quae nonnunquam pugni magnitudinem aequant, et solo fere pondere molestiam et respirationis impedimentum afferunt *x*). *Vulnera* transversa septi per se quidem suosque proprios effectus, ut sanguinis spumantis sputum cum tussi, caet. satis ab inflammatione simplici distant, sed, quemadmodum alia vulnera grauiora, inflammationem post se trahunt cum suis accidentibus, in his praecordiorum sursum contractionem, respirationem laesam, mentis alienationem, interdum cum Sardonio risu, interdum cum furore; singultum, caet. De diaphragmatis *Ulceribus*, *Apostematibus*, *Abscessibus*, *Empyemate*, nihil addo, quia vel ex inflammatione consequuntur, ideoque tum decurso jam isto stadio satis distinguuntur; vel, si quid inflammationis conjunctum est, ut praesertim in nonnullorum principiis saepe fit, notis utriusque generis, id est, et inflammationis et abscessus, collectionis, tumoris, similiae se produnt.

S 5

§. XIII.

v) Is *Patholog. Lib. 5. Cap. XI. Tumores duros*, inquit, *diaphragmatis radici infixos nonnunquam deprehendi, qui sensim tabe laborantes consumserunt, citra ullam delirii speciem.*

vv) de *Affectibus Particularibus Cap. 8. p. 259. seq.* Opusculorum supra dictorum. Idem ibid. GALENI doctrinam hujus argumenti pluribus ex ejus locis collectam exhibet.

x) Vid. JOH. VESLINGIVS in *Syntagmate Anatomico, Cap. 9.*

§. XIII.

Si nunc quoque consideramus, ex quibus rebus diaphragma compositum sit, qua ratione constructum, quas actiones exerceat, quibus aliarum rerum, aut corporis partium incurfibus motibusque obnoxium; videmus, illud inflammationibus contrahendis quam maxime, sicut similes partes, aptum esse. Nam ex musculosa carne tendineqde, membranis, nervisque contextum est, et plurimo irrigatur sanguine; tum semper quodammodo tentum, perpetuis agitatur respirationis motibus, vnaque aëris in pulmones illabentis, nec non subinde ciborum ac potionum per gulam descendentium, contactum et frigus per medias viscerum membranas sentit. Dum itaque musculosa neruosaque et membranacea compages, et copiosus in eadem humor, qui quum per se caleat, tum a jugi fortique motu partis et ab adjacentibus, caloris augmentum accipit, istius frigoris accessum percipiunt, aut vicissim sanguis in minora, pro sua mole vel crassitudine, vasa vehementiore motu impellitur, sane continuo muscutorum, membranarum, vasculorumque contextus ad contrahendum, et humores ad spissescendum subsistendumque sollicitabuntur; et reuera sic contrahentur, compingentur, ab subsistent, si certum ad gradum frigus partem afficiat, aut motus humorem incutiat. Tum vero non potest non fieri, quin statim nascatur inflammatio, cujus nimirum conceptus versatur in sanguine feruido vasis contractiori-

bus

bus haerente, continuoque tum ipsius intestino motu, tum succedentis impulsu. Sic ipsa diaphragmatis natura conflando morbo velificatur; quo tamen, necesse est, accedant occasiones, quibus transuersum septum ita, vt dictum est, tanque grauiter afficiatur, vt res in ipsum morbum erumpat.

§. XIV.

His perspectis, multas quaestiones, dubia et objectiones, quae circa praesens argumentum moueri possunt ac solent, facilius soluere atque diluere licebit. Primo, *Raram* esse diaphragmatis inflammationem, quidam volunt, alii *Frequentem*. In qua dissensione vt ratio recte subducatur, meminerimus, quod §. XIII. expositum est, septi transuersi naturam ita comparatam esse, vt inflammationis morbum in aliqua sui parte facile promteque concipiat, si causae talis morbi praesto fuerint, atque ad septum accesserint, in eodemque constiterint; quae quidem causae sunt sanguis copiosus, calidior, aut crassior iusto, vehementius commotus et impulsus; frigus aeris aut ingestorum ciborum ac potionum; vicinorum locorum compressio, liberum humorum in septo fluxum intercipientis; vel consentiens circumpositarum partium malum, quod in diaphragma se diffundat, et similia. Pariter videmus, occasiones, quae causas istas admoueant, aut concitent, admodum frequenter incidere: quam enim saepe frigidus aer in pectus, solito magis calens, irrum-
pit?

pit? aut potio frigidior per stomachum descendit? aut validius haec mouetur? aut finitima laborant? Quum itaque res, quae diaphragmatis inflammationem inferre solent, saepissime incidant aut existant, eadem faciunt, vt iste morbus aequae frequenter existere possit, nisi vel in alia loca deriuetur, vel in ipso ortu, naturae vi aut idoneorum remediorum ope discutiatur; cuius generis remedia sunt abstinentia, sanguinis detractio, motus placidus, calor moderatus cum humore diluente, quo motus fluidorum aequabilis per vniuersum corpus adiuuetur; etc. Vt autem hic locorum, propositis ex rationibus, inflammatio persaepe fieri potest, sic eam ibidem non minus saepe reapse formari, suaque symptomata, graua quidem ac permolesta mouere, tum, nisi soluatur, aut in aliam partem transferatur, in pus clausum, aut deinceps apertum, vel in gangraenam sphacelumque verti, satis per observationes compertum est atque comprobatum; et testes ejus rei locupletes sunt auctores plurimi supra subinde citati, nominatim annotatione 3. 4. II. tum ad quos §. VIII. prouocatum est; ex quibus praecipuus et velut instar omnium esse videtur PETRVS SALIUS DIVERSVS y). Hinc concludere licet, minime rarum esse hoc morbi genus, sed admodum frequens: quod autem vulgo rarum existimatur, propterea fieri, quia posthabita diaphragmatis consideratione

y) de *Affectibus Particular.* cap. 8. Opusculorum p. 262. Add. ANTON DE HAEN *Ratio Medendi* Part. I. Cap. VII.

ratione, vicinarum partium morbis accensetur, qualis confusio jam antea §. X. pluribus exposita est.

§. XV.

Delirium siue *Paraphrenitin* cum inflammatione transuersi septi semper esse conjunctam, multi contendunt: alii, non eum indiuiduum esse comitatum, arbitrantur, sed etiam sine mentis alienatione hunc diaphragmatis morbum accidere stadiumque suum percurrere: rursus alii, paraphrenitin tum saltem euenire, volunt, quando media seu tendinosa septi pars incensa est; quod tamen alii pariter negant: item sunt, qui perpetuam hic esse dementiam statuunt; quam alii vero tradunt interruptam esse, siue per vices accedere et decedere. Enimuero, delirium non inseparabile esse cujuslibet inflammationis accidens, cognoscimus, si totam ejus historiam apud animum recensemus atque perpendimus; sed ejus demum inflammationis comitem, quae febrem moueat: neque in omni tali febre, neque semper, mentem alienari videmus, sed in ea, quae grauior sit, et eo fere tempore, quo vehementius vrgeat: denique animaduertimus, deliramenta ipsa non tantum in febribus contingere, sed etiam extra febrem, vt in ebrietate, in melancholia, in mania, similibusque. Quum igitur in his morbis, quibus bilis materiem dat, vt in mania, melancholia, furore vterino, caet. mens laboret: et pariter in illis

cor-

corporis conditionibus affectibusque, quibus sanguis feruentior, tenuior, acrior, concitatus et confusus ad caput fertur, vt in ebrietate, febribus, inflammationibus, caet. quo contra motu sedato, vel ad alia loca reuulso, deliria conquiescunt: vtrouque autem, id est, tam in febribus inflammationibusque, quam extra has, sanguis alibi, maximeque in praecordiis et hypochondriis morbique sede, difficilius promoueatur, quam versus caput; et ab hoc propter impeditam respirationem difficilius refluat; videtur bilis, quae sanguini permixta sit, quaeque vt ipsa feruidissima, acerrima, mobilissimaque est, ita maxime valeat ad sanguinem incendiendum, tenuem acremque reddendum, et commouendum, sic deliriis causam praebere, hoc est, talem turbulentum in cerebro neruisque motum efficere, qui sensuum internorum actiones, idearum perceptionem, ordinem, consequentia, nimis irritet, concitet, confundat, atque perturbet. Jam vero bilis propria sedes est hepar: hinc igitur ejus plus solito, vel acrius aut feruidius, ad sanguinem ferri oportet, quo ad caput rapto mens conturbetur: Bili autem exagitandae et in sanguinem infundendae satis et abunde sufficit ille humorum vasorumque et partium omnium motus, qui in febribus, inflammationibus, spasmisque fit; et quidem eo magis in diaphragmatis inflammatione febreque conjuncta, quo magis his locis accumulatur
fan-

sanguis difficiliusque progreditur z), quo vicinius septo jecur est, quo arctius cum illo connexum, quo propius et crebrius ab eodem premitur concutiturque. Delirium ergo mouebitur, quando non solum inflammatio septi sit validam febrem concitauerit, sed etiam bilis sit copiosa et acris fuerit: si secus alterutrum vel vtrumque se habeat, (habet autem nonnunquam in non biliosis, et minus calidis corporibus), non eueniet delirium; id quod consentit cum experientia, qua constitit, aliquando inflammatum fuisse transuersum septum, nec tamen vllam per totum morbum desipientiam obseruatam. Sic PETRVS SALIVS diserte negat a), in hujus inflammationis principio delirare aegros, sed *incresciente* demum *inflammatione* ita se gerere docet. Et, quod ad alterum attinet, videlicet totum aliquando morbum, dum ab initio ad finem decurrit, a deliriis vacuum esse, testatur hoc FERNELIVS, verbis annotatione v. jam descriptis: et WILLISIVS b), postquam hujus generis morbos binis exemplis enarrauerat, subjicit, *nec tamen laborans in tota aegritudine sua phreniticus, aut anima delirans fuit.* Plures dabit testes CL. FEINII dissertatio saepius allega-

z) Haec videtur esse sententia HIPPOCRATIS, dum in libello de *Virginum morbis*, Cap. 2. num. 8. et 19. seq. docet, feminis mentem alienari, quando sanguis prae multitudine ad cor et diaphragma congeritur; hinc enim lentius fluere, quia vasa sanguinis ibidem oblique posita sunt, ideoque locus opportunus et paratus ad aberrationem mentis ac furorem est.

a) l. c. p. 261. et 262.

b) de *Anima Brutorum* Part. 2. Cap. 10. p. 427. edit. alleg.

legata, §. XVIII. Rariores tamen incidere casus, autumare licet, vbi paraphrenitis abest, quam vbi confociatur, et, vt FRANC. JOELIS c) verbis loquar, *plerumque delirium adesse*: nam magis diaphragma per se vehementi patet inflammationi, quam leui, velut ex superioribus, praecipueque §. XIII. intelligi potest: et bilis plerumque tantum est, quantum ad turbendam mentem sufficiat: denique longe plures numerantur auctores, qui delirium huic inflammationi conjunctum asserunt, quam qui defuisse compererunt. Praesertim vero, centrum diaphragmatis si simul cum reliquo, (nam vix, ac ne vix quidem, fieri posse videtur, vt tunc reliquum transuersum septum immune maneat), inflammatione correptum fuerit, quo grauius tum, sanguine in exilibus tendinum vasculis haerente, malum est, eo minus delirio febriki destituetur: vnde permultis, tum demum, et tum quidem semper, insaniam oriri, persuasum fuit, quando nervosum hoc seu tendinosum medium inflammatur d). Quanquam nec tum illud inseparabile est, siquidem tum pariter aegrum vel ex toto non delirasse, vel non nisi leuiter sub mortem, aliquando cognitum est:

c) *Practicae* Lib. 3. Sect. 4. §. 2. p. m. 79.

d) vt AND. LAVRENTIO in *Hist. Anatomica* Lib. 9. Cap. 4. Quaest. 4. JOH. ARNOLDO FRIDERICI *diff. de Diaphragmatis vulnere*, Cap. 5. RVDOLPH. WILH. KRAVSS *diff. de Phrenitide*, p. 8. MICH. VAN DE WERKE *diff. de Paraphrenitide*, §. XVII. JOH. HENR. SCHVLZ. et AND. CHRISTIAN. BÉZEL in hujus inaug. *diff. de Paraphrenitide*, §. XXIX. XXXI. caet.

est: vt in exemplo CASP. GVIL. BEVSSERI e), qui hanc ipsam septi partem inflammata, indeque adeo iphacelo correptam inuenit, quum nulla per morbi decursum paraphrenitis animaduersa fuisset: et in obseruatione JOH. BAPT. MORGAGNI f), scribentis, *Conspexi ego tendineam quoque ejus (septi) partem, (quam vnā maxime attendunt, qui delirium ab diaphragmatis inflammatione repetunt), inflammata, quum vix confusa et subdelira morbi extremo tempore mens fuisset. Nec non in casu ANTONII DE HAEN g), quo transuersum septum in musculosa parte multa quidem, sed in tendinea vniuersa, adeo vehementer inflammatum fuit repertum, vt ipsa per artem injectione rubicundior reddi non potuerit, et tamen aeger in morbo non delirauerat, sed ipsam tantummodo sub mortem; pariterque risu Sardonio, conuulsionibus, furoribusque plane liber fuerat. Quantum ad infaniae perpetuitatem attinet, de ea similiter ex inflammationis gradu motuque et bilis acrimonia copiaque iudicandum est: nam si, verbi causa, vehemens est inflammatio, eaque loco suo, pari grauitate constanter inhaeret, vel adeo continuo increscit, et febris eadem ratione continenter durat,*

an-

e) in *Historia morbi et section. cadau. variolis confluentib. defuncti*, apud HALLER. in *syntagmate Dissertationum Medico-Practicar.* Vol. V. p. 580. et 582.

f) *de Sedibus et Causis Morborum per anatonem indagatis*, Epist. VII. num. 14.

g) *Ratione Medendi*, Parte IX. Cap. 1. §. 5. et Cap. 2. §. 7.

sanguisque simul sat biliosus est; perpetuum fore delirium, par est: At, si phlegmone leuior est, et per interualla quadantenus diminuitur, vnaque febris per vices remittit, nec bilis semper tantum humoribus additum est, vt cerebrum perturbet; tunc deliria non perpetua, sed interrupta erunt.

§. XVI.

Risum qui praeter rationem fiat, pariter in diaphragmatis inflammatione semper obseruari, quidam affirmant, ex quibus BELLINIVM *b)* nominasse sufficiat; de quo tamen alii dubitant. Mihi videtur, quum eiusmodi risus delirii species sit, de eo in vniuersum quidem similiter, ac de deliriis ipsis hunc morbum comitantibus, esse sentiendum, scilicet et accidere vtique posse, et non accidere, prout vehementia febris et actio bilis maior aut minor est. Idque experientiae respondet, quae docuit, aliquando ridere cum infania tales aegros, aliquando non ridere. Nam et complures ex allegatis auctores, inque his ipse HIPPOCRATES SALVSQVE DIVERSVS, dum symptomata morbi recensent, plerumque neutiquam vllum in eo risum commemorant, quod tamen, quum aliquando fecerint, sine dubio semper vel in vniuersum fecissent, si obseruassent; et nonnunquam ejus accidentis mentionem

b) Hic enim risum simpliciter ad ea refert, quae proprie cum morbo conjuncta sunt, lib. cit. p. 496.

nem injiciunt, vt idem HIPPOCRATES *i)* et PLINIUS MAJOR *k)*; et quidam diferte ponunt, delirium con-
fequi faltem *interdum cum rifu*, interdum cum tru-
culentia *l)*, non ergo femper. Tantoque minus
femper euenire rifum iftum credibile eft, quod nec
femper deliria contingunt, hic autem rifus folum
aliqua defipientiae fpecies eft, adeoque non tam
frequenter exiftere poteft, quam generatim deli-
rium quodlibet, fiue vniuerfum deliriorum genus
conjuncte computatum. Caeterum, rifum hunc ex
eo fieri nonnulli putant, quod transuerfum feptum,
ipforum opinione, fedes hilaritatis organumque ri-
fus fit *m)*, vnde, fi instrumentum illud grauius per-
cellitur, vt in inflammatione, vulnere, caet. rifum

T 2

mo-

i) *Epidem. Lib. V. Cap. 34. num. 2. edit. Linderfmanae, et Lib. VII. Cap. 58. num. 2. rifum accidiffe tumultuosum ait; non ergo, puto, Sardonium, vt quidam interpretantur: hic enim eft fpafmus oris, non verus rifus.*

k) *Historiar. Naturae Lib. XI. Cap. 37. milites in praeliis et gla- diatores in arena, vulnerato fepto transuerfo, mori cum rifu, narrat obferuatum: quod quum Hippocratis obferuationi con- gruatur, fimiliter nolim de Sardonio intelligere; quanquam THOMAS BARTHOLINVS, qui alia quoque exempla ex ARISTOTELE, SAXONEQVE GRAMMATICO profert, Sardonium fuiſſe velit, Anatome Renouata lib. 2. cap. 3. p. m. 346.*

l) *Vid. JOH. ARNOLDVS FRIDERICI in diſp. quae inſcribitur Diaphragma ex vulnere laefum, Cap. V. prope finem.*

m) *PLINIUS diſto loco: JOH. MAGIRVS Physiologiae Peripateti- cae, cum Commentar. Lib. V. Cap. 12. de partib. Medii Ven- tris, num. 5. pag. 409. Nam et mentis confors antiqui feptum credebant, vt ſupra not. 5. ſignificatum eſt; vnde facile col- ligi potuit, rifum ibidem ſuam capere originem.*

moueri: Alii rem per titillationem explicant, quam calor inflammationis concitetⁿ⁾; et qui sunt reliqui declarationis modi. Verum, illa de diaphragmate hilaritatis sede sententia inter veterum placita perperam assumpta referenda est, eodem jure quo altera de splene risum efficiente; neque alia ratione pars haec instrumentum risus dici poterit, quam quatenus ad risum sonorum suis succussibus repetitis maxime confert. Neque titillatum ab inflammatione exerceri credam, qui in risum erumpat, siquidem in superficie partium solum ad extrema neruorum fit ille titillatus, non intra sanguinis meatus, quibus inflammatio continetur. Potius ergo statuendum, risum hunc ex erroribus idearum mentis nasci, perinde ac delirium ipsum, tum a confusa cerebri actione septum transuersum in motus istis ridentibus ideis congruos fuscitari.

§. XVII.

Ab hoc proprie dicto risu plane diuersus est ille, qui *Sardonius* appellari consuevit. Quod nomen a Sardis, celebris insulae siue populo siue herba, in medicinam migrasse, satis constat. Quum enim veteribus Sardis in more positum fuerit, ut inutiles senes sui, ipsique grandaeui parentes, vitae pertaesi, Saturno sese maectandos, vel caesi

fusti-

ⁿ⁾ Vid. FRANC. VALLESIVS *Commentar. in locum Hippocratis ex Epidemicorum Libro V. modo excitatum*; ubi simul alias explicandi rationes in medium profert. Conf. THOM. BARTHOLINVS allegato loco.

ustibus in fossam praecipitandos, inter laetitiam et risum darent; hunc risum mortis prodromum, nonnulli putant, ad illum phreniticorum, similiter funeris praenuncium, esse translatum, Sardoniumque vel Sardium, Sardanium, aut Sardianum propterea dictum. Plures tamen tradunt fidemque faciunt, herbae cujusdam vim, qua comesa rictum oris in morem speciemque ridentis contrahit, et tali sub spasmō mortem infert, in Sardinia primum cognitam, ideoque herbam ipsam Sardoam aut Sardoniam vocatam, item oris illum habitum, ab eadem inductum, Sardonium risum: herbam vero istam, quam qui gustauerint, ridendo exanimantur, Apiastro similem esse scribunt, alioque nomine Sceleratam appellarunt, nec non Apiastellum, et Apium Risus, etc. recentiores denique botanici Ranunculum palustrem apii folio laeuem o); Linnaei sceleratum Ranunculum. Caeterum scire conuenit, etiam ab aliis herbis ingestis similem aliquando commoueri risum, nominatim ab aconito siue napello, datura siue stramonio, cicuta, vene-

T 3

nis

-) Vid. SALLVSTIVS apud SERVIVM in *Virgilii Eclogam* 7. vers. 41. APVLEJVS de *Herbis*, Cap. 8. PEDACIVS DIOSCORIDES de *Materia Medica* Lib. 2. Cap. 206. et Lib. 6. siue de *Alexipharmacis* Cap. 14. cum *Commentario* PET. ANDR. MATTHIOLI: ERASMVVS ROTERODAMVS in *Adagiorum Chiliade* 3. Centur. 5. Adag. I. JOH. BOECLER. in *Continuatione Cynosurae Materiae Med. Pauli Hermanni*, Parte I. Cap. 6. p. 287. BENJAM. SCHARF in *Miscellaneis Academiae Naturae Curiosor.* Decuria 3. Anno 2. p. 106. GEORG. FRANCVS in *diff. de Risu Sardonio*, §. 8. seqq.

nis aliis causticis, adeoque croco p). Est autem Sardonium risus, SAVVAGESIO q) Trismus Sardonicus dictus, spasmus siue conuulsio musculorum oris abductorum, siue angulos versus aures trahentium, inprimis zygomaticorum: et conuulsiones maiores praecedere solet. Eadem risus species accidere obseruatur in moribundis, in infantibus lentam mortem oppetentibus, in pueris dentientibus per somnum, et in castratione, similiterque conuulsiones grauiore, adeoque mortiferas praedicere r). Eodem modo muscoli labrorum et faciei trahuntur in Cynico spasm, risu Canino, Diafrophe, Tortura oris, vel quibuscunque nominibus aliis idem affectus donetur; et similibus malis s). Quae quamquam,

p) GE. FRANCVS *diff. diff. §. 17. 20. 21.* DAN. PARTHEY in *Append. Itiner. Indiae Oriental.* p. 136. ap. GEORG. WOLFG. WEDEL. in *disp. de Spasmo Cynico* p. 22. de fructu Chini insulae Bandae: LAVR. HEISTER. *Compend. Medicinae Pract.* Cap. 15. §. XI. GER. VAN SWIETEN *Commentar. in Herm. Boerhaave Aphorismos de Cognosc. et Curand. Morbis*, Tomo 3. ad §. 909. versus fin. Differre tamen Sardonium risum ab illo, qui ex aliis causis oritur, FRANCVS autumat §. 22.]

q) *Nosolog. Methodica* Tomo 2. Part. 2. p. 21.

r) THOM. BARTHOLIN. *Anatom. Renouata*, l. c. ex RIOLANO: G. FRANCVS alleg. *diff. §. 17.* GER. v. SWIETEN d. l.

s) CORN. CELSVS *de Medic.* Lib. 4. Cap. 2. num. 2 et alii plurimi recensiti a MATTHIA MORONO in *Directorio Medico-Practico*, tit. Oris affectus, et Spasmus: item a JOH. GEORG. WALTHERO in *Sylva Medica*, tit. Oris tortura: quibus add. JOH. RIOLANVS in *Enchirid. Anat. et Patholog.* Lib. 4. Cap. 5. p. m. 301. FR. BOISSIER DE SAVVAGES. l. c. p. 20. seq. etc.

quam, ex mente scriptorum, nonnullis forsitan rebus circumstantibus vel inter se, vel a Sardonio nuncupato risu differant, vt quod paucioribus aut pluribus musculis oris ac faciei, vel etiam finitimarum partium, exerceantur, quod fortius aut remissius conuellantur muscoli, quod in vtroque aut in alterutro tantum latere fiat distorsio, quod in vel ex aliis aliisque morbis vel causis eueniat, etc. tamen omnium eadem est natura, quae versatur in inuita siue coacta musculorum oris ac faciei conuulsione. Quapropter minus recte quidam *Sardonium risum a Spasmo cynico* eo distinguunt, *quod in hoc vnus tantum, in illo vero vtriusque lateris faciei muscoli spasmodice contrahantur* t). Nam nec hoc mori ringentium canum, quos scilicet os ab vtroque latere retrahere videmus, satis conuenit, aqua tamen similitudine nomen illud ductum est: et auctores ipsum Cynicum spasmus tam ab vtraque parte, quam ab vna, fieri docent u): denique Sardonium risum spasmusque Cynicum, vnum eundemque affectum esse tradunt v). Quandoquidem igitur

T 4

tur

t) vt pronunciat JOSEPH. ANTONIVS LINPRVNER in diss. inaug. praeside JOH. ANDR. SEGNERO hab. Gottingae 1747. de *Paraphrenitide*; §. XXVI. p. 34. add. FRANCVS d. c. §. 19. PANCRAT. BRVNO in *Castelli Lexico Med. renouato* voc. Caninus, et Conuulsio: RVD. GVIL. KRAVSS disp. de *Spasmo Cynico*, Cap. 2. p. 5.

u) vt ex gr. RIOLANVS all. 1. JAC. BONTIVS de *Medicina Indorum*, Obseruat. 1.

v) vt GERARD. BLASIVS in *Medicina Vniuersa*, Lib. 3. Sect. 10. Cap. 9. G. W. WEDEL disp. cit. Cap. 2. p. 8. HEISTER l. c.

tur spasma vocabulum naturam mali bene designat; alterumque cynici siue canini, sedem ac modum ejus in oculos incurrentem; vtrumque melius, quam caetera nomina; hoc Cynici Spasmi reliquis praetulerim, rejecto praefertim isto Sardonii risus, quod nullo praeter antiquitatem titulo se commendat: nisi cui SAVVAGESII trismus magis arrideat. Hunc vero spasmus non magis, quam delirium, semper in inflammatione diaphragmatis accidere, tum ex optimorum auctorum frequente silentio disci potest, tum ex obseruatione ANTONII DE HAEN, nota 32. prolata. At si inciderit, mortem prae foribus esse, quum obseruationum exemplis constitit, tum communis inflammationum et febrium ratio, hujusque ipsius spasma procreandi modus confirmant.

§. XVIII.

Etenim spasma seu conuulsiones in inflammationibus conjunctisque febribus, sicut in aliis morbis, eueniunt, dum per summam difficultatem superandi mali, nerui musculique irritantur, vt locis illis, quorsum fibrarum vaforumue nexus et humorum impulsus ducunt, vehementius agant. Jam, quod ad septum transuersum attinet, notum est ejus, imprimis per neruos membranasque, commercium cum musculis spasmus cynicum exercentibus, id quod complures, qui de diaphragmatis inflammatione vel paraphrenitide, deque risu in ea

con-

contingente, vel alias ab hac parte nato, scripsere, distinctius et particulatim exposuerunt *vv*). Ergo, si, sanguinis per diaphragma motu propter morbi magnitudinem interrupto, reditu autem a superioribus locis propter difficilem respirationem impedito, tum nervis septi grauiter affectis, sensus inde motusque propagantur ad nervos ac musculos oris, spasmus orietur cynicus: Si vero ad alia loca diuertitur motus, vel minor mali gradus est, non orietur. Simili ratione post cynicum spasmus etiam grauiiores aliarum partium conuulsiones sequi posse, vel has per se sine isto nasci, facile ad intelligendum est. Nec minus patet, ab aliis pariter nervorum et motuum irritamentis, vt a venenis in ventriculum delatis, a castratione, dentitione, caet. eundem spasmus ob easdem rationes concitari posse, et aliquando reapse concitari. Denique sub adeo turbatis nervorum et musculorum ministeriis, sanguinisque et spirituum motibus, vitam ipsam in extremo versari discrimine, quis ambiget, qui motibus ordinatis vitam contineri considerauerit?

T 5

§. XIX.

vv) vt JOH. RIOLANVS *Enchirid. Anat. et Patholog. Lib. 4. Cap. 5. p. m. 301. Thom. Bartholin. all. 1. HVGGO VAN DER HEIM* *diff. inaug. de Paraphrenitide, Leidae 1741. §. XX. SCHVLZ. et BEZEL* *diff. nota dd. dictae §. XXXIII. LINPRVNER* *diff. nota tt. citatae §. V. caet.*

§. XIX.

Hanc explicationem nobis ad rationalem artem demonstrandam sufficere credo, neque facile ulteriolem in causis indagandis dari progressum. SAVVAGESIVS quidem existimat x), cynicum spasmus esse conatum naturae ad deprimendum diaphragma et anhelitum cohibendum, ut in conatu ad egerendum, parturiendum, mingendum, quum maxima ad obices superandos requiritur virium intensitas; nec posse diaphragma vehementer depressum retineri, nisi, si contractis faciei musculis, chordae vocales, per musculos laryngis commodius contractos, glottidis rimam claudant, et sic aeris inspirati exitum praepediant. Verum ille vultus veluti nitentis, qualem in Flauio Vespasiano Imperatore conspectum fuisse SVETONIVS TRANQVILLVS annotat y), vel, ut VALERIUS MARTIALIS appellat z), *facies durum cacantis*, an spasmus cynico designando conueniat, jure dubitandum videtur. Namque vultus ille spiritum continentium, quo septum transuersum deprimatur, parum similitudinis habet cum habitu oris in spasmus cynico. Deinde iste nifus ad ventrem dejiciendum et similes actiones naturales brevis est temporis et interuallis distinctus, at cynicus spasmus per totum, quo hic morbi status est, spatium continenter durat: ut taceam, nifum istum esse voluntatis actionem, quam

x) Nosolog. Method. T. 2. P. 2. p. 20. seq.

y) de Caesaribus, Lib. 8. in T. Flauio Vespasiano, Cap. 20.

z) Epigrammatum Lib. 3. epigramm. 87.

quam in spasmō non sentit aeger; posset enim ab iis, qui quaslibet corporis actiones ad animam referunt, etiam hic occultum mentis consilium praetendi, quam vero controuersiam nunc discutere non attinet. Faciei seu potius oris musculis opus esse ad diaphragma depresso tenendum, eo refellitur, quod hoc non experimur, dum tentamus: neque, dum thorax in spirandi difficultatibus, dyspnoea, orthopnoea, asthma, caet. laborat, videmus. Denique tantum abest, ut transuersum septum in inflammatione sui cynicoque, qui tum accidit spasmodeprimatur, ut aegri potius, quemadmodum in pleuritide, cum qua multa habet communia, propter dolorem in adducendo spiritu, pectoris dilatationem ac septi descensum omni modo prohibere nitantur, vnde diaphragmate sursum sublatō, hypochondriorum quoque viscera eodem concedunt seu reuelluntur, ut in expositione symptomatum hujus morbi dictum est; quo minus ergo SAVVAGESII de depressione diaphragmatis opinio locum habet. Satis autem expedita sic videtur ratio, cur in hoc malo hypochondria sursum introrsumque retrahantur, siquidem ea cum diaphragmate connexa sunt, hujus motum sequuntur, et hoc leuato a ventris musculis versus pectus compelluntur; ut non opus sit eam retractionem a singulari musculorum abdominis et diaphragmatis cohaesione cum SCHVLZIO *) repetere.

§. XX.

*) Diff. modo dicta, §. XXXV.

§. XX.

Vt autem hic Sardonius risus, seu spasmus, neruorum propaginibus et communicationibus primam debet originem, id est, per sic dictum consensum neruorum primo cietur, ita tum deinde musculos ipsum spasmus perficere, putandum est, siquidem musculis vel ejus generis fibris propriam esse contractionis facultatem, neruis autem illam sensus, factis constare videtur. Qui enim contractionem exercere per se possent nerui, qui tam molles in suis principiis et extremis sunt, tam laxè per corpus pendent? Error itaque foret, neruis proprie dictis eorumue fibris aliquam ad spasmos efficiendos adscribere contractionem, vel ad tonum, qui vocatur, cohaerentium praestandum aliquam tensionem, ad atoniam laxitatem aliquam, ad motus quoscunque constringentes aut remittentes aliquam intentionem aut resolutionem, speciatim in praesente spasmu Sardonii casu, vt multi faciunt *a)*; sed haec omnia conuenit tribuere singulari generi fibrarum, quales si majore mole contextae sunt, muscoli nominantur. Quodsi nerui tenduntur, laxantur, trahuntur.

a) ex gr. LAZAR. RIVERIVS *Praxeos* Lib. I. Cap. 6. p. m. 217. THOM. WILLIS in *Cerebri Anatome*, et in *Pathologia cerebri*, passim: CASP. SIBELIVS A GOOR in *Dissp. inaug. de Motibus Convulsivis*, Lugd. Bat. 1678. p. 7. FRID. HOFFMANN in *Medicina systematica*, Tomo III. Sect. I. Cap. IV. §. IX. seqq. Tomo IV. Sect. I. *Prolegom* §. IV. seqq. et passim tum eo in opere, tum in *Dissertatt.* HVG. VAN DER HEIM in *Diss. dicta* §. XXVI. CL. LINPRVNER excit. *Diss.* §. XIII.

huntur, velluntur, aut simili modo quocunque moventur, vt fane faepe per actionem partium, quibus intexti sunt, fieri neceſſe eſt; non tamen ipſi ſeſe tendunt aut remittunt, ſed connexis fibris muſculofi generis trahentibus obſequuntur.

§. XXI.

Delirium quoque, diaphragmatis inflammationem concomitans, per ſolum neruorum conſenſum contingere quidam exiſtimant *b)*, ſenſu ſcilicet motuque peruerſo a diaphragmate ad cerebrum propagato. Et inordinatum quidem in phrenicis neruis affectis fieri motum, dum ſepti partes per inflammationem multiplici ratione laceſſuntur, premuntur, et diſtrahuntur, facile concipitur: hinc autem ad cerebrum eundem motum per ipſos neruos continuari, ibique ſimiles turbulentas actiones concitare, quae delirium conſtituant, difficilius ad comprehendendum eſt, ſiquidem nec per tenſas fibras eam rem explicare licet, quum in principiis finibuſque molles ſint nerui, nec per fluidarum ſuarum particularum ſeu ſpirituum qui vocantur animalium contactum productum, quum hic in fluidis eodem tenore ſeruari non poſſit, et ambientibus circumſtantibuſque neruorum ſubinde interrumpatur. Itaque potior multo videtur ea modi, quo delirium in hoc morbo

b) FRIDERICI Diſſ. d. Cap. 2. B. 2. M. VAN DE WERKE d. 1. §. XVII. H. V. D. HEIM l. c. SCHVLZE et BEZEL all. Diſſ. §. XXXII. et alii.

morbo conflatur, expositio, quam § XV. dedi, nimirum procreari ab acri vehementerque moto sanguine et bile ad cerebrum propulsis, ibique nervorum actionem perturbantibus, siue, vt SCHENKIVS STRVVIVSQVE loquuntur c) παραφρεσύνην induci propter utrumque, et nervos et vasa, si inflammatum fuerit transuersum septum.

§. XXII.

Quod attinet ad *Singultum*, quem etiam in inflammatione diaphragmatis incidere diximus, est is vehemens et brevis intra pectus concussio aeris, quae sonum edat, et quam spasticus septi transuersi motus, quo hoc subito deorsum versus trahitur, plerumque a simili superioris oris ventriculi infimique oesophagi motu concitatus, et cum hoc conjunctus, efficiat. Sonus enim in singultu manifeste percipitur, qui diuersus a ructu ventriculi sit, et alio loco, nimirum in pectore, contingat: neque tamen ventriculi pars superior et oesophagi inferior in motu singultus immunis est, sed hunc ipsum quoque, ructus aemulum, sentimus; et, dum videmus a deglutitis festinantius ossis maioribus extemplo nasci singultum, similiter ab ingestis venenis aliisque acribus, eundemque ventriculo curato statim compefci,

quid

c) cit. Disp. de Diaphragmatis natura et morbis §. 13. p. 21. Similiter, ob consensum quidem nervorum delirare paraphreneticos, existimat LINPRVNER c. Diss. §. XXIV. f. 29. seqq. simul tamen ob auctam inordinationemque sanguinis per cerebrum motum.

quid aliud inde concludere licet, nisi ventriculum irritatum commoueri? Igitur neque vsque quaque verum est, quod multi statuunt *d*), solius tantummodo ventriculi conuulsionem esse singultum: neque alterum, eorum scilicet sententiam, qui idem soli tribuunt diaphragmati, et in hoc tantum formalem singultus rationem ponunt *e*): nec denique eorum opinionem, qui inspirando fieri singultum contendunt *f*). Quanquam enim in singultu leuari subito costas apparet, eoque sonum istum oriri, dum deorsum conuulso diaphragmate thorax repente quadantenus dilatatur; tamen abdomen neutiquam simul expandi cognoscimus, vt illi volunt, et ad inspirationem necesse foret, sed contra potius sursum trahi ventris musculos et abdomen intro rapi; vnde per singultum non nouus adducitur spiritus, ideoque nec inspiratio proprie fit, sed ille, qui pectore jam receptus est aër, subito concussus, hoc motu sonum reddit; quem quidem cuilibet imitari simili motu, quandocunque placet, licet. Sic simul et septum transuersum et ventriculus oesophagusque conuel-

d) GALENVS, AETIVS, AVICENNA, locis facile reperiundis; tum communiter hos secuti: ipse etiam RIOLANVS *Enchirid. Anatomico-Patholog. Lib. 2. Cap. 23. p. m. 126.* HIPPOCRATI quoque haec sententia tribuitur, verum nullo certo iudicio.

e) vt FRANC. DE LE BOE SYLVIVS in *Praxi Med. Lib. 1. Cap. 22. §. 23. et Cap. 23. §. 7. seqq. p. 305. et 319. seq. edit. Lugd. Bat. 1671. 12.* hinc alii plurimi.

f) CL. LINPRVNER l. c. §. XXV. p. 31. seq.

conuelluntur in singultu g): quam ad rem vtraque tanto magis conspirare consentaneum est, quanto magis inter sese, eo quod oesophagus per diaphragma transmittitur, connexa sunt, ita vt vna pars conuulsa alteram quoque necessario trahat. Quod si singultus ex ipso septo nascitur, est idiopathicus; si aliunde, sympathicus seu per consensum: quatenus autem alteri morbo accedit, symptomaticus, qualem quidem, nihil vetat, simul aut sympathicum esse, aut idiopathicum; sicut in hoc ipso inflammati septi casu qui suboritur singultus, est idiopathicus, vnaque symptomaticus. Hunc vero singultum, inflammationi diaphragmatis superuenientem, mortem fere certam, eandemque propinquam indicare, quum ex praesagiis spasmi, cuius species est singultus, §. XVII et XVIII. propositis intelligitur, tum testimoniis obseruationum omnium satis superque confirmatum est, praesertim si septum transuersum per se laborat, et delirium coniunctum est, vt hic supponimus b).


§. XXIII.

g) Mecum faciunt H. BOERHAAVIUS in *Praelect. in Institutiones Med.* ad §. 808. LAVRENT. HEISTER in *Compendio Institut. Med.* edit. alter. in *Definitionib. Morbor.* et in *Compend. Medicinae Pract.* Cap. XV. §. XVII.

b) Vid. LOMM. *Obss. Medicinal.* Lib. 2. de Singultu, p. m. 136. THOM. FIENI *Semiotice*, Parte Altera, Cap. IX. §. 2. p. 255. seqq.

§. XXIII.

Tanti mali, quale diaphragmatis inflammatio est, curationem ancipitem quam maxime fore, per se patet, eoque magis dubiam, quo grauius ipsum vrget, peioresue notas, in superioribus commemoratas, ostendit; quum inprimis difficilem reddat curationem, quod septum semper irrequieto respirationis agitur motu, sanguinisque fontibus adeo propinquum est, adhaec propter loci recessum remediorum effectum e longinquo demum accipit. Optimum factu tamen erit, quantocius sanguinis missio- nibus morbo materiem detrahare: tum alui ductio- ne subinde ventri visceribusque liberiores laxiores- que reddere vias ac motus: simul soluentibus, di- luentibus, temperantibus sanguinem ad aequabilem per vniuersum corpus cursum reducere, perspira- tionem et caeteras excretiones expedire: denique symptomata consequentiaque suis propriis curare re- mediis. Quae omnia et singula nunc latius expo- nere, fere superfluum videtur, quandoquidem a cu- ratione pleuritidis et peripneumoniae parum aut ni- hil diuersa sunt.



VII.

Differtatio de haemoptysi in genere, et speciatim ejus nexu cum varia aduersa ex hypochondriis valetudine. Gott. 1766. Resp. GERH. ANT. GRAMBERG, *Jeuerensi*.

PROOEMIUM.

Haesi forsan diutius, quam par erat, in sectione prior de haemoptysi in genere, ita etiam, ut trita jam et recocta modo haecce nostra lectionis videri possint, neque satis, quod facile perspicio, momenta sectionis alterius, quae tamen exactiorem postulassent attentionem, exhausti. Sed partim necessariam illius ampliorem expositionem esse ad dilucidationem posterioris capitis vberiore, partim quaedam non indigna fore ulteriori disquisitione censueram. Quaedam etiam secundum naturam descripsisse mihi contigit, quum et ipse leuiori quidem sed pertinaciori quondam pneumonico sanguinis spuito laborauerim, cujus nec futuri metus plane deerat ob corporis mei altera in sectione declaratam dispositionem. Et hujus dictae aduersae ex hypochondriis valetudinis causa ignoscat B. L. minus accuratam minusque studiosam, quam ipsemet optarem, materiae praesertim sectionis secundae, elaborationem. Ill. Praefidi, aliis nunc maxime distento negotiis, nitidior

diorem huic scripto perfectioremque conditionem impertiri integrum non fuisse, maxime doleo.

SECTIO I.

HAEMOPTYSIS IN GENERE.

§. I.

Haemoptysis ab *αἷμα* et *πτόσιν*, sanguinem spue-
re, nomen suum habet; estque excretio sanguinis
per asperam arteriam; saepissime absque dolore,
cum sensu tamen grauatiuo et titillatorio in pectore
et faucibus percipiendo, subinde quoque praecedente
anxietate, cum tussi vel saltim screatu peracta.
Plurimi haemoptoici fluidum et spuma commixtum
sanguinem coccinei coloris rejiciunt. Nequaquam
tamen hujus color purpureus originem ejus ex arte-
ria, aut nigricans ex vena satis hic probare videtur;
etsi quidem fuerint, qui hoc ipsum statuerunt; a)
interdum quippe contingit, vt non modo nigrican-
tior sed vel coagulatus cum tussi vel screatu expel-
latur sanguis; interim haemoptysis dici poterit, mo-
do ex causis praecedentibus et conjunctis, vel sub-
sequentibus e symptomatibus, de sputo per asperam
arteriam, et ex pulmonibus facto, constiterit. Fal-
lere tamen aliquando medentem potest, ratione
ipsius loci affecti, sanguis ex naribus in pulmones
delapsus, vti bene praeter alios LOMMIVS b) nota-

V 2

uit,

a) BRENDDEL *Diff. de haemopt.* §. IV.

b) v. *Obseru. Medicinal.* p. III. (edit. Fft. 1722. 8.)

uit, qui ibidem coagulatus postea etiam tussi expellitur. Sed praegressa et subsequens narium haemorrhagia, et defectus signorum, haemoptoen ex pulmonibus et bronchiis praecise declarantium, de admissa fallacia optime testantur.

Generatim praeterea notamus, haemoptysin quoque, siue majorem siue minorem, cum spasmo conjunctam esse solere; cujus praesentiam euincunt pulsus, siue parvus ille sit et contractus, siue durus et magnus, aliquando etiam cum cordis palpitatione conjunctus, deinde pallor faciei, extremorum frigus, vagi per artus atque dorsum horrores, tremor aliquis membrorum, pectoris angustia, ejusque talis constrictio, qua costarum eleuatio difficilis fit, motus undulatorius circa praecordia, spasmi abdominis, tussis et ipsa denique medela, quae saepius veriora antispasmodica, immo et opiata, postulat.

§. II.

Signa haemoptoes ab auctoribus varia proponuntur, sed diuersi pretii: anxietas et oppressio pectoris, difficilis respiratio, spasmi circa septum transversum, sensus adscendentis calidi cujusdam liquidi ex pulmonibus in tracheam, cum pulsu paruo contracto, dein forti, duro, celeri, titillatio in faucibus, tussis, quacum sanguis educitur coccineus, spumosus, aliquando etiam cum vasculis et membranulis commixtus. En, characteristicas frequentiores haemoptoes notas. At constanter haec ita se non habent.

habent. Praecipue vero tussis fallaciis facillime obnoxia est. *a)* Inuenimus enim nonnumquam tussim in sanguinis isto sputo, quod faucibus et laryngi debetur, ob magnam nimirum in his partibus titillationem; immo tussis ista ob alias circumstantias, e. g. catarrhum ad fauces, validissima esse potest. *β)* Sanguis ex narium haemorrhagia in pulmones delapsus tussim ibidem excitare valet, vt haemoptysis videri possit. Tale apud *perill. van SWIETEN c)* legimus exemplum. *γ)* Accedit quod etiam verae obseruentur haemoptyses sine tussi. Talia *WEDELIVS d)* refert, et *RHODIVS, e)* et ipse ego in me aliisque saepius expertus sum. Tussis autem tunc demum cum haemoptysi conjuncta esse videtur: *1)* Si sanguis ex profundioribus pulmonum locis erumpit; *2)* si largior futura est haemorrhagia; *3)* si spasma vehementiores illam comitantur. Patet hinc nec illum *HIPPOCRATIS f)* aphorismum pro lege generali, secundum quam haemoptysis quaelibet vere dignosci posset, assumendum esse, quo dicit: *qui spumofum sanguinem tussiendo exscreant, his ex pulmone fit educatio.* Sic nec *LOMMIVS g)* satis accurate distinguere sanguinis sputa videtur, vbi, *qui ex faucibus, inquit, et gurgulione sanguis fertur, is sreatu*

V 3

pell-

e) v. *Comment. in Boerb. aph. Tom. IV. p. 3.*

d) v. *Act. N. C. Ann. 1670. Obs. 42. Ephem. N. C. Ann. 1719. Cent. VII. p. 305.*

e) *Obseru. Centur. VIII. p. XXXIII.*

f) *Aphor. 13. Sect. V.*

g) *Obseru. Medic. p. m. 108.*

pellitur; qui ex ipso ore, simplici sputatione; qui ex ventriculo, vomitu; qui ex gutture, tussicula; qui ex thorace et pulmone, valida tussi. Per modo recensita tamen signa, quae diagnostica sunt, haud difficulter haemoptysis a morbis cognatis distingui poterit. Huc referuntur: 1) Sputum cruentum, quod faucibus, palato, vuulae, gingivis, dentibus, naribus debetur. Hic saepe nulla symptomata spastica deprehenduntur, nullus molestus in pectore sensus, nulla rejecti sanguinis spuma, nulla tussis, atque citius hoc definere sputum solet. 2) Sputum subcruentum pleuriticorum et peripneumonicorum; hoc mucus plerumque est striis modo sanguineis commixtus, et exigua ejus rejecti copia esse solet. 3) Vomitus cruentus, ubi praecedente nausea sanguis plerumque nigricans et coagulatus per vomitum ejicitur.

§. III.

Constat ex principiis pathologiae, haemorrhagiam, seu sanguinis profluuium, tribus absolui modis; 1) *diaeresi*, dum latera vasorum rumpuntur, et sanguis plerumque copiose et cum impetu profilit; sique hoc ab erosione humoris acris fiat, vocatur *diabrosis*, 2) *diapedesi*, qua sanguis tunicarum poros permeat, non secus ac Mercurius corium; 3) *anastomosi*, dum vel ipsa ostia vasorum minorum vi liquidi irruentis et distendentis adaperiuntur, ut sanguinem transmittere queant; vel sanguis in eum gradum attenuatus est, ut liberius et sine distensione

ne

ne vasculorum ista permeare et sic effluere queat. Quibus etiam tribus modis haemoptysin oriri minime dubitandum. Quod si autem priori fiat modo, sinister semper magis metuendus erit euentus, ob ancipitem veri vulneris consolidationem; si altero, minus quoad pulmonum laesionem periclitantur aegri, pariter ac si tertio contingat, ex quo minimum quidem discrimen instare solet, quum imminutus saltem tonus fibris restituendus sit; etsi etiam, vbi labes in ipso sanguine delitescit, grauiorque conjunctus est morbus, magna subinde reperiatur in aegro seruando difficultas.

§. IV.

Ex dictis quidem jam patet variam esse haemoptoes indolem, varias causas, ideoque diuersam ejus requiri medelam. Operae autem pretium facere quoque videntur qui et illam vltius ratione gradus distinguunt: in *majo rem*, quae vehementior est et periculosior, Germanis *eine Blutstürzung* dictam, et *minorem*, quam vocant modo *das Blut-speien*.

I. *Major* illa et copiosa saepius supponit rupturam vasorum ac phthisin frequentius, vbi reliqua ponantur paria, pedissequam habet. Solent autem istam et praecedere et comitari varia symptomata, quae pro ratione causarum diuerso gradu et numero adesse observantur. Sunt vero haec: tussis sicca, lassitudo, opple-

tio pectoris, anxietas, respirationis difficultas, procliuitas in iracundiam, sapor oris nunc falsus, nunc dulcis, nunc amarus, pulsus celerior duriorque, varia plethorae incommoda, praesertim ex cessantibus quamcunque ob causam solitis periodicis sanguinis fluxionibus, alui obstructio. Haec omnia corporis ad haemoptysin grauiorem dispositi signa sunt, quae monent, praecauere insultum atrocis ac funesti tandem mali. Instantem praeterea haemoptysin fortiore etiam propius praecedere eandemque dein comitari solent: spasmi in abdomine, praesertim versus praecordia, respiratio anxiosa et anhelosa; constrictio pectoris spasmodica, artuum grauitas, pulsus nunc paruus spasmodicus, nunc maior duriorque, palpitantes cordis, sensus compressionis spasmodicorumque vagorum et caloris in pectore, interdum ardens aut pungens dolor, genarum rubor, motus undosus in hypochondriis versus septum transversum *b*), manifestior et grauior sapor oris falsus, vel dulcis, vel amarus, vel alius nonnunquam alienus, non facile semper verbis exprimendus. Fit tandem valida cum tussi, quae conuulsivae in quibusdam speciem prae se fert, sputatio copiosa crebra, sanguinis sinceri coccinei, spumantis, aliquando cum

b) Vid. HOFFMANNI *Med. rat. system.* Tom. IV. Part. II. Sect. I. Cap. II. §. 6. p. 203. (edit. Geneu. fol.)

cum vasculis *i*), fibris, membranulis, commixti; ac saepe tanta excreti sanguinis copia observata est ut libras excederet. Vbi vero sanguinis haec sputatio peracta est, statim saepe melius aeger se habet, respiratio fit liberior ac plurima symptomata cessant. Sequitur plerumque, et plures per dies continuat, sputum muci cum sanguine commixti, quo residuum intra pulmones cruoris effusi exscreatur.

II. *Minor* gradus est haemoptyses, quae per transfudationem aut modo per anastomosis peragitur. Fit autem is, dum praegressa anxietate, rubore genarum, frigore extremorum, spasms, horrore, cordis palpitatione vel pulsu etiam paruo sensus in pulmone et faucibus titillatorius oritur, levisque stertor, quo sanguis, in summo ad uncias paucas, purus fluidusque sine vehementia vel placida cum tussi similiue cum scretu ejicitur. Immo ex his dictis symptomatibus plura saepe defunt, ita ut solummodo praegressa pectoris angustia sub levi intra pulmones et fauces titillatione sensim in linguam adscendat sanguis; ad quae signa nisi caute attendamus, difficile interdum vera haemoptysis ab aliis sputis sanguineis erit discernenda. Immo fieri quoque potest, ut

V 5

hae-

i) Vid. GALENVS *de locis affect.* Lib. IV. Cap. VIII. (*Charter. Tom. VII. pag. 467.*) TVLPII *Observationes* Lib. II. Cap. XII. XIII. XIV. *Acta N. C. Ann. 1683. p. 218.*

haemoptoicus quidam fit, sine sanguinis ex pectore adscendentis sensu.

Diuidere porro haemoptysin commode possumus in *primariam*, quae morbum sistit alio non excitatum, et *secundariam* vel *symptomaticam*, quae symptomatis instar aliis se adsociat morbis, eosdemque sequitur. Velut symptoma quidem certius se exhibet haemoptoe in phthisi, scorbuto, variolis, morbillis, aliisque febribus cum tussi validiori junctis, vel etiam putridis, neque minus etiam in ictero chronico, hydrope, rachitide, aliisque morbis ex obstructione hepatis, lienisue, oriundis, aut quum et aliunde, ex morbo quodam, respiratio difficilis, et sanguinis motus per vasa pulmonum impeditior fiat, vt asthma, apoplexia. Velut epigenomenon autem in quemcumque alium morbum incidere haemoptysis potest, vt, si quis laborat febre acuta, ictum percipit ab alio in pectore, indeque sanguinem spuit; nam haemoptysis tunc non est effectus morbi, sed aliquod nouum superueniens, quod et in statu sanissimo ab eadem causa oriri potuisset. Alia haemoptoes diuisio est in *idiopathicam* et *sympathicam*, siue *consensualem*. In illa morbi causa haeret in parte affecta, scilicet pulmonum labe, a tuberculis crudis, concretionibus polyposis, exulceratione etc. In hac remotiores a thorace corporis partes causam mali proximam continent, siquidem obstructio hepatis, lienis, mensium et haemorrhoidum suppressio etc., quibus sanguis,

guis, ob denegatum per viscera inferiora iter, magis ad superiora determinatur, per consensum haemoptysi anam praebere valent.

§. V.

Dantur corpora, quae ad haemoptysin, praeter ceteris morbis, pariter ac ad hujus quoque pedissequam phthisin pulmonalem, peculiari ratione inclinant. Duplex autem facies est illius dispositionis, *hereditaria* scilicet et *adquisita*. Generatim vero notamus juvenilem illi aetatem maxime favere, quam LOMMIVS *k*) cum HIPPOCRATE *l*) ab anno aetatis XVIII. ad XXXV. posuit; BOERHAAVIUS *m*) ab anno XVI. ad XXXVI. Attamen in dispositis quoque ante priorem istum aetatis annum hic morbus incipere et cum discrimine vitae aliquamdiu continuare, aut etiam per periodos redire potest. Hereditaria autem illa dispositio parentes supponit eodem morbo affectos, ita quidem ut profundiores in illis radices jam egerit, aut saltem qui ad eundem valde proclives fuerint, quum prolem generauerunt. Eadem similitudo, quae quoad faciem, staturam, animi dotes et propensiones, parentes inter et liberos intercedit, ad ipsam quoque partium corporis occultiore fabricam humorumque miscelam aliquando extendi posse, multis constat morborum

here-

k) Vid. *Obs. Med.* p. 119. cf. p. 225.

l) *Secl. V. aph. IX. Secl. III. aph. XXIX.*

m) *Aph. 1198. γ.*

hereditariorum observationibus. Integrae saepius familiae fomitem hujus periculossissimi alunt morbi, ita vt fere certo quodam aetatis tempore, insigni licet adhibita cautione, illo implicentur *n*). Saepe autem naturalis illa et hereditaria corporum ad haemoptysin procliuitas se quoque manifestat, peculiari illo corporis habitu phthificis frequente, pectore nempe angusto et plano, collo longiore, scapulis prominentibus, cute corporis flaccidiore tenuiorique, pinguedinis defectu, carne spongiosa, vasis majoribus ac tenuioribus, systemate nervoso irritabiliore, vt affectibus animi facilius commoueantur, mutationes temporum ac tempestatum aegrius ferant, anxii reddantur a potu Coffeae, vini, et ab ingestis aromatibus, aliisque calefacientibus et efficacius nutrientibus; catarrhis quoque obnoxii sint, et iis quidem praesertim ad pulmones. Color illis faciei frequentius albicans est cum viuido nimis genarum rubore, vt amoene roseus et venustus appareat; aliquando tamen idem quoque in flauum quibusdam vergit. Facile iis etiam humorum ad superiora congestio contingit, ad pulmones nimirum et caput. Difficuler spirant et anxietatis nonnihil persentiscunt in scalarum aut montium ascensu. Pulsus fit celerior, imo palpitationibus cordis adficiuntur ac fatigantur a leuiori corporis exercitio. Hypochondriacae subinde compressio-

nes

n) Vid. LOMMII *Obs.* p. 119. cf. v. SWIETEN *Commentar.* Tom. IV. p. 80. 81.

nes circa pectus, crebra suspiria, fauciumque spasmus quasi hysterici, phlegmatis excreatio falsi, dulcis, amari, et sapor oris eodem modo varius nonnullis accedunt. Haec, vbi in corpore juvenili deprehenduntur, hereditariam adesse aut naturalem ad haemoptysin dispositionem merito existimabimus. Confirmantur ista indicia peculiari animorum conditione in multis observabili; quippe ingenio subtiliori et acriori, sensationibus acutioribus, imaginatione vividiori, ad hilaritatem, atque ad mitius de sui morbi discrimine judicium ferendum propensione. Proposita vero signa, quae proclivitatem connatam et ipsa inde cum generatione in prolem a parentibus derivatam, ad sanguinem e pulmonibus aliquando rejiciendum declarant, rarius quidem omnia vno in homine deprehendi solent; neque omnium conjunctorum praesentia, ob insignem corporum humanorum discrepantiam facile locum habere poterit, verum sufficiet ad diagnosis, vbi illorum modo adsint praecipua.

Adquisitam ad haemoptysin dispositionem istam voco, cujus fomes in ipsa parentum eodem morbo implicatorum labe quaerendus non est, sed qui aliis qualibuscunque ante vel post natiuitatem admixtis vitiis originem debet. Refero huc 1) omne illud, quod jam in utero vel dein prima ab infantia corpus debile reddit, ut imbecillis varia parentum valetudo, prava nati nutritio, corporis animique exercitatio, nimiae et frequentiores vigiliae, animique

mique affectus, aer humidus et calidus diu sic persistens, balneorum et pediluuiorum tepidorum crebriorumque purgantium abusus, medicamenta relaxantia sine iusta ratione frequentius adhibita, Venus immatura, nimiaque etc. 2) Omne illud quod conformationem pectoris laedit ejusque functionem difficiliorem reddit, ut vestes angustae, thoraces mulierum arctiores et rigidiores; 3) quodcumque humoribus acrimoniam rodentem conciliat et destillationes ad pectus crebras efficit, ut sunt potus spirituosus, victus aromaticus et quisquis nimis calefaciens, falsus; mutationes tempestatum ratione caloris et humiditatis repentinae; vapores varii putridi, sulphurei, arsenicales, mercuriales, sicci pulveres a caesis lapidibus per aerem dispersi; 4) quaecumque labem in visceribus hypochondriacis chronicam efficiunt, videlicet obstructionibus vasorum, nervorum irritamentis, impuritati primarum viarum ansum praebent.

§. VI.

Longa omnino series est causarum haemoptoes occasionalium, quarum pars aliis cum haemorrhagiis illi communis, pars autem illi propria est, quas tamen omnes figillatim recensere nimis prolixum foret; quare varia saltim, quae nobis quidem nunc memoratu videntur digniora, paucis exponemus. Omnis primo haemorrhagia, quae in consuetudinem transierat, praesertim ex genere magis naturalium,

lium, quum suppressa, ipsaque solita venaesectio quum intermissa fuerit, in dispositis haemoptysin accelerare valet. De menstruis quidem suppressis vulgatissima haec est observatio, etiam auctoritate HIPPOCRATIS *o*), ARETAEI *p*), DVRETI *q*), BENEDICTI *r*), et aliorum quoque plurimorum confirmata. De haemoptysi ex narium haemorrhagia suppressa etiam BENEDICTVS *s*) memorabilia exhibuit observata. Neque valde rarum est ab impeditiori haemorrhoidum fluxu sputum sanguinis ex pulmonibus excitari; isque effectus eo certius subsequitur, quo magis ita constituti homines motum sanguinis adaugeant siue corporis exercitatione, siue animi affectu vehementiori, siue calefacientibus ingestis, vel majori ejus in pulmonum vasis collectioni ansam praebeant, retento in pectore spiritu, ut in tubarum inflatione aut in aliis moliminibus, aut nimia ipsius pectoris commotione, ut in tussi. PLATERVS *t*) statim absoluto coitu in muliere vidit repetita vice haemoptysin nasci. Aeris variae conditiones multum quoque ad excitandum sanguinis sputum conferre communis observatio docet; quamvis etiam generatim auctores, malum hocce omni anni tempore et qualibet sub tempestate fieri posse,

o) De morb. mulier. p. 420. ed. Lind.

p) De causis, et sign. morb. acut. L. II. C. 2. p. 15.

q) Comm. in Coac. Hippocr. p. 289.

r) Theatr. tabid. p. 13.

s) Theatr. tabid. p. 14. 15.

t) Obs. Lib. III. p. 76.

posse, testentur. Interim ver et autumnus maximam frequentioris noxae suspicionem prae se habent. Pro varia tamen corporum diathesi, atque diuerso aeris nocendi modo, minus aduersa quibusdam esse potest aeris conditio quae alios grauius affligit. Indequē forsitan illarum sententiarum, praestantissimi quas habent obseruatores, discrepantiam non temere deriuaueris. SYDENHAMVS *u*) aestatis ac veris confinium accusat; LOMMIVS *x*) magis autumnum; pluuiosum, humidum, frigidumque aerem BENNETVS *y*). Sub intentissimo gelu facile hoc sanguinis sputum accidere HOFFMANNVS *z*) quoque docuit. Sane res notatu digna est, dari loca, vbi endemium fere deprehendimus istud malum, siue illud situi siue regimini, siue victui, siue peculiari aeris indoli siue aliis causis debeatur. Sic constat Londinum dispositis ad haemoptysin et phthisin periculosum esse; ac Celeb. BVRGGRAVE *a*) sputum illud cruentum inter morbos incolis Francofurti ad Moenum frequentiores recenset. Subinde concurrunt, situs loci, quoad varias aeris qualitates, huic malo generando aptior, frequentiores tempestatum vicissitudines, victus ratio, vini, imprimis vbi peioris illud et calidioris indolis fuerit, spirituumque ardentium, et similium potulentorum

inebri-

u) *Opp. Sect. VI. Cap. VII. p. 285. edit. Leidens. 1754.*

x) *V. Obs. med. p. 118.*

y) *Theatr. tabid. p. 109.*

z) *Med. syst. rat. Tom. IV. P. II. thes. pathol. §. XI.*

a) *Lib. de aere aquis et loc. urb. Francof. p. 71.*

inebriantium abusus, aliaeque causae ad haemoptyses crebriores producendas. Aliud caussarum genus sistit omnis injuriā manifestior pulmonibus illata; vti fit in cantu, clamore, tiliarum inflatione; vis externā pectori, dorso, abdomini admota; nixus in eleuando pondere vires superante, aut in edendo partu. Sic etiam HIPPOCRATES *b)* *tabes*, inquit, *frequētes a partu fiunt; prae violentia enim rupturas ac vulsiones habent.* Dein huc refero alui diuturnam et pertinacem obstructionem et nixum in leuando ventre; vestitum circa pectus et collum strictum, thoraces mulierum, tussim ferinam, iram vehementem, tum clandestinum ejus affectum, tum quoque excandescentiam manifestam; labores vltra vires continuatos, somnum nimis diu protrahitum, motus corporis vehementiores coelo sub feruido; adscensum in montem, turrim, scalas; vctionem citatiorem in equo vel curru. Hasque omnes causas eo facilius noxam grauiorem inferre, nemo dubitabit, quo pleniora sanguine vasa fuerint, quo magis aliunde jam idem turgeat, quo impeditior sit ejus ad pulmonum venas transitus, et quo magis vltimae arteriolae pulmonum, quacunque ex ratione, debilitatae, et ideo ad emittendum sanguinem pronae fuerint. Ex efficacioribus causis potius etiam spirituosus esse videtur vbi, corpus ex motu et animi affectu antea jam incaluit.

Sic

b) De aere aq. et loc. Tom. I. p. 332. N. VII. Edit. Lind.

Sic enim *Celeb.* VNZERVUS c) tres vidit juvenes ab equitatione vehemente calefactos statim a potu spiritus vini haemoptoicos. Multum quoque confert nimius potus Coffeae, victus aromaticus, quilibet alius calefaciens, nec non durus, aut qui humoribus acrimoniam conciliat, ut et qui tonum hypochondriacorum viscerum infirmit; praeterea vero et situs corporis idem diuturnus cum depresso capite, vel is quo abdominis viscera comprimuntur; hinc forte quoque eruditis haemoptyses frequentius contingunt. Nec excludendae sunt metastaticae causae, ut scabies retropulsa, clausa imtempestive ulcera antiqua, siue spontanea illa fuerint, siue artificialia; qua ultima ex ratione IOH. RHODIVS d) nasci vidit haemoptysin in puella nouenni. *Perill.* van SWIETEN e) potum aquae frigidae post inalefcentiam corporis ad causas etiam refert, cujus rei quoque exempla prodidit. Forfan eadem causa, quae in robustioribus et strictioribus corporibus pectoris inflammationem, in debilioribus nonnunquam haemoptysin inducere valet. *Celeb.* BURG-GRAVE f) Francofurtanorum crebras haemoptyses magna ex parte nimio esui asparagorum, et suctioni frequentiori fumi nicotianae inter vini potationes tribuit. Denique huc quoque referenda sunt emetica

c) Vid. *der Arzt* Tom. VII. p. 381.

d) V. *Observat.* 30. Cent. I.

e) *Comm. in Boerb. aph.* Tom. IV. p. 236.

f) *de aere aq. et loc. etc.* p. 73. et 77.

tica fortiora, et sine justis cautionibus adhibita, a quibus multi obseruarunt sputa cruenta. Et haec quidem causae mox conjunctim, mox separatim agunt; nunc vna sufficit ad haemoptysin producendam, nunc plures demum concurrentes aut sese insequentes ad hunc effectum satis pares reperiuntur.

§. VII.

Venio jam ad prognosin. Generatim notamus, haemoptysin minus ob periculum, ne purpurea euomatur anima, quam ob hujus pedissequam phthisin, metuendam esse. Rarissimi enim casus sunt subitaneae ex haemoptysi, per immensam sanguinis rejecti copiam, aut suffocationem, mortis, nisi in iis, qui tabe jam pulmonali laborant. Plurimum ergo periculi latet in labe, quam pulmones inde sensim contrahunt. Primo enim vasorum, quae rupturam passa sunt, consolidatio in pulmone difficillima est, ob continuum, quem sustinent motum, frigidique aeris accessum; dein etiam sanguis ex vas suis elapsus, nisi totus educatur, nonnunquam, ubi forte intra telam cellulosam nimis diu haeserit, putridam indolem accipere lentaeque suppurationi ansam praebere poterit, vnde febre hectica accedente pedetentim aeger conficiatur, aut inter cruciatus et anxietates atrociores suffocetur. Frequentius tamen, ubi pertinaciter malum resistit prudenti medelae, sputaque saepius cruenta, phthisin minitantiā, redeant; grauior inhaesisse jam pul-

monibus labes, a tuberculis inprimis aut crudioribus aut maturioribus, vel quoque conjunctum in visceribus abdominalibus chronicum subesse vitium videtur. Nunquam haemoptysis periculo caret, α) si corpus aggreditur ad hanc affectionem dispositum naturali quadam et haereditaria labe. Semper enim, quum procliuitas ad eam remaneat, metus est illam fore redituram; quod etiam frequenter, et leuioribus ex causis fieri solet. Et nonnunquam, quum omnia jam in tuto esse videntur, inopinato redit sputum cruentum. Aliquando typum seruat, vt e. g. alternis diebus, etiam cum febre quadam ingruat, quod sub vesperam saepius fieri bene monuit BRENDÉLIVS γ). β) Metuimus omnem haemoptysin copiosam; credibile enim quam maxime est, factam inde rupturam vasorum majusculorum esse, quae inflammationem quantulamcumque facile arcessit et phthisin plerumque subsequenter inducit. Sic HIPPOCRATES b) *quibus insignis, inquit, in pulmone venae ruptio fit, copiosus sanguis vomitione ejicitur, periculumque imminet. Idem alio loco i) tabes periculosissimas dicit, quae sunt a ruptura crassarum venarum.* γ) Ea inprimis periculo scatet, quae ab erosione interna acrium humorum oritur. Sane LOMMIVS k) *nullus, inquit, medicinae locus est,*

si

ϵ) Vid. Diff. de haemopt. §. II.

b) Coac. N. 433.

i) Coac. Prae. 438.

k) Obs. med. pag. III.

*si sputum cruentum ab eroso pulmone esse coepit. Idem perill. van SWIETEN l) confirmat. δ) Prae ceteris autem tunc de bono exitu desperare oportet, si effectus euincunt incipere jam pulmonis laesi exulcerationem. Sunt autem isti: dolores obtusi in certa pectoris regione permanentes, calor faciei et totius corporis post prandium vel coenam auctus, inappetentia quaedam, quam euacuantia et stomachica et visceralia non facile penitus tollere queant. Anxietas praeterea vel tussis breui excitata cum incertum latus aeger cubauerit et cum profundius respirare tentauerit; difficilior quoque in mediocri adscensu spiritus; levis motus cujusdam humoris in pectore fere continuus, quem et aures inter respirandum percipiunt; frequens et vaga inhorrescentia, faciles etiam corpore leuius tecto, matutini sudores. Sputum tandem ipsum cum tussi purulentum, ita quoque, ut materies excreta in aqua fundum petat, et prunis injecta peculiarem grauem foetorem spargat. Sane verissimum in plerisque sic laborantibus Cor m) dictum est: *a sanguinis sputo, puris sputum, malum*; etsi quoque, ubi reliqua omnia bona sunt, quod optime monuit van SWIETEN, paucis post sedatam haemoptoen diebus sputum puri analogum sensim imminutum sine periculo aegri nonnumquam obseruetur. ε) Metuenda tandem ea maxime haemoptysis est, quae phthisi pulmonali*

X 3

monali

l) Comment. in Boerb. aph. Tom. IV. pag. 7. 8.

m) Apsor. Sect. VII. Aph. XVII.

monali superuenit; ex hac enim vires vitae magis magisque prosteruntur, exulceratio et excretiones colliquatiuae augentur, saepiusque illa, subitaneam per suffocationem, celerem vitae finem facit.

Minoris autem periculi haemoptysis est: 1) ea quae corpus indispositum aggreditur ceteroquin sanum; sic e. gr. plethoricus bene pastus ab equitatione vehemente coelo calido statim a prandio haemoptysi poterit tentari; quae sublata causa sistitur, nec mali quid relinquit, nec facile iteratur; 2) omnis haemoptysis minor sine periculosis symptomatibus; hic enim plerumque anastomosis adest, quae facile corrigitur; 3) ea quae a vi externa ortum habuit, corpori sano et satis robusto inflicta; facilius hic ob bonos humores et vim vitae integriorem consolidationem vulneris natura init; 4) ea quae menstruorum vel haemorrhoidum vicibus fungitur. Frequentius illa desinit, cum restituta sanguinis profusio naturalis fuerit. Sunt quoque exempla ejusmodi sputi cruenti, diu et per annos sine ulteriori noxa sustentati. Sic FRID. HOFFMANNVS *n*) per annos aliquot notauit haemoptysin, et TYLPIVS *o*) in vno vidit per XXX. annos, sine noxa, in alio post sputum sanguinis XX. annorum demum accessit phthisis pulmonalis; 5) ea quae a sensiliori systemate nervoso spasmisque hypochondriacis

n) Vid. *Med. rat. system. Tom. IV. Part. II. p. 46.*

o) Vid. *Observ. Lib. II. Obs. 2.*

driacis fere vnice pendet; haec enim ex anastomosi aut etiam interdum ex diapedesi exorta facilius roborantibus cedit; 6) si sputo sanguinis sputum phlegmatis consueti subsequitur levis, absque odore, colore alieno, cet.; si nullus in pectore dolor oboritur, nullus sensus grauatiuus, nulli post coenam calores, nulla febricula; si vires integrae, si nulla sit profundius respirandi difficultas, sique cubare in vtroque latere sine incommodo aeger potest.

SECTIO II.

HAEMOPTYSIS EX HYPOCHONDRIIS.

§. VIII.

Venio jam ad id, quod alteram et praecipuam dissertationis meae partem attingit. Dixi nempe nexum intercedere haemoptysin inter et variam aduersam ex hypochondriis valetudinem. Dixi hypochondriorum vitia non solum praedisponere ad haemoptysin, sed excitare etiam illam posse. (§. VI.) Meum jam erit vt paulo fusius me in hunc campum diffundam. Et ea quidem sententia mihi quam maxime probabilis est, permultas nisi plerasque haemoptyses vitiis viscerum hypochondriacorum quibuscunque implicatas esse, et magna ex parte his ipsis existentiam suam et vim debere. Videamus nunc quotuplici modo se exhibeant vitia illorum viscerum et qua ex ratione majori ad sputum sanguinis ciendum efficacia polleant.

§. IX.

Triplicem agnosco speciem aduersae ex hypochondriis valetudinis hic attendendae, vnam, quae jecur ac primario systema venae portarum in illo et partibus propinquis contentum obstructionibus vexatur; alteram, quae consistit in debilitate et irritabilitate systematis nervosi iusto majori, ipsaque spirituum animalium ataxia; tertiam, quae colluviem variarum fordium, plerumque biliosarum in primis viis latentem agnoscit. Et huic quidem triplici fonti haemoptoes propinquiore causae, et symptomata, suam saepe originem debent, ita quidem, ut peculiarem postulet, pro varia hujus valetudinis indole, medelam. Atque hinc simul nexus patebit, qui intercedit ipsum malum hypochondriacum et sputum sanguinis pneumonicum.

§. X.

Vena portarum femiarteriosa, quae per hepar in ramos plurimos et valde exiguos dispergitur, docentibus aequae pathologia ac practicorum experientia, facillime obnoxia est, et stasi sanguinis lente per totum viscus mouendi, et ecchymosi, et vasorum concretioni, et parenchymatis indurationi. Sic vere LOMMIUS *p)* monet: *nullum aequae viscus obstructionibus, ut jecur, patet.* Sed cognationem et nexum, qui haemoptyses intercedit venaeque portarum

p) *Observat. med. p. m. 161.*

tarum oppilationes, vel frequentius illud sanguineum sputum in haemorrhoidariis probat, quod soli plethorae tribuendum haud esse, etiam patet ex conjuncto nonnunquam fatis copioso haemorrhoidali fluxu cum vera haemoptysi. Neque rarum, fluentes homorrhoides nondum expertis varia saepius molimina futuri fluxus accedere. Ex ipso autem impeditiori sanguinis per venam portarum progressu, ejus in toto corpore circulum valde turbare necesse est; inde congestiones oriuntur ad superiora, et inprimis si pectus naturaliter angustius fuerit, anxietas fit et difficilis respiratio, et calores faciei et spasmi, et alia inter mala haemoptyses quoque variae vehementiae pro diuerso gradu obstructionis. Praeterea sane multis jam ab auctoribus veteris et recentis, acui notatum est, plurimis haemoptoicis hypochondria dolere. Quod ipsum et propria mea fatis mihi comprobauit experientia, quum diu in hunc morbum, quo ipse aliquando affectus eram, attentionem direxerim. Memorabile autem Cor q) est effatum qui, *spumum sanguinem*, inquit, *spuunt*, *dextrum hypochondrium dolentes de hepate spuunt*, *et multi pereunt*. Quod quidem ita quoque intelligi poterit, ex obstructione hepatis et ex denegato liberiori sanguinis per illud itinere eundem sursum magis pelli, et alicujus ope spasmi sputum sanguinis ex pulmonibus

q) Vid. Coac. Praenot. N. 408.

excitari. Sic etiam ARETAEVS *r)* monet a liene et hepate prodire sanguinis sputum. BENNETVS *s)* apud illos saeuire maxime, ait, fluxiones — quibus a vasorum exilium infarctione partes remotiores imperuiae redduntur; et alio loco *t)*: magis periclitantur pulmones a pressura per denegatam epatis percolationem, quam a regurgitatione ab infarctis lienis vasculis. Spectat huc quoque obseruatio de motu quodam vndulatorio et grauatiuo et spasmis versus diaphragma, quos praecedere plerumque haemoptysin solere HOFFMANNVS *v)* affirmat.

§. XI.

Aliud hypochondriorum vitium latet in systemate neruoso, quod me iudice in haemoptysi non raro est accusandum. Neque enim tam facile robustos homines, quibus cutis et caro strictiores sunt, quam delicatiores potius, imbecilliores et sensiliores huiusmodi pertinacioris indolis malo obnoxios esse obseruamus. Sane medium excedentes gradum neruorum irritabilitas ac debilitas totum corpus facile aptum reddunt, quod leuioribus ex irritamentis diuersi generis spasmos concipiat, qui omnino ad sputum ex pulmonibus cruentum plurimum conferre valent. Plures illae spasticae affectiones,

r) De causis et signis morborum acutorum. Lib. II. Cap. II. p. 13.

s) Vid. Theatrum tabidarum. p. 13.

t) Lib. cit. p. 107.

v) Med. rationis systema. Tom. IV. Part. II. p. 6. Conf. perill. van SWIETEN comm. Tom. IV. p. 25. 26.

ctiones, quae haemoptysin praecedere et comitari solent, illae musculorum in dorso, pectore, abdomine et artubus tremulae contractiones, pallor quoque faciei, extremorum frigus, cordis palpitation, et subitanea pectoris angustia, etiam vertigo in eo utique facillime locum inuenient, qui suo mobiliori neruorum systemate ad spasmos prae aliis procliuus fuerit. Accedit quod ipsae neruorum sensiliorum spasticae affectiones vitiis variis et obstructionibus viscerum praesertim abdominalium plurimum causae subministrant. Spectat huc quoque obseruatio practicum tam veteris quam recentis aevi de phthisi pulmonali saepissime ex catarrhis ad pectus natis, quibus acrioribus et grauiorem tussim conjunctam habentibus et ideo haemoptysin quoque facilius arcessentibus, imbecilli et sensiliores, praesertim ad cacochyliam proni, maxime sunt obnoxii. Ipsaque tum incipiens tum adultior phthisis dein etiam haemoptyseos causa fieri poterit. Merito igitur systematis neruosi majori justo sensibilitati atque mobilitati multum culpaе tribuendum existimamus, vnde accedentibus varii generis irritamentis cruenta ex pulmonibus sputa excitentur. Confirmat hasce sententias FR. HOFFMANNVS x) qui, et frequens admodum, ait, in praxi est obseruatio, hypochondriaca passione laborantes, nec non pathematibus hystericis obnoxias feminas incidere in hunc sanguinis e pulmonibus fluxum.

§. XII.

x) *Med. system. Tom. IV. Part. II.*

§. XII.

Tertium, quod hypochondria exhibent, huc referendum vitium latet in ventriculo debili cibis male digestis, aut humoribus ad primas vias delatis ex viscerum culpa varie corruptis. Constat equidem jam experientia y) ad finem lautæ coenæ, vbi ventriculus bene repletus est, in conuiuarum vultibus omnia sanguine turgere, caloremque per totum corpus distribui, ac in delicatioribus anxiam oriri respirationem. Premit enim ventriculus diaphragma versus pulmones, qui dein sanguine turgent et angustantur. Multo magis hoc fieri credibile est, quum ventriculus diutius saburra quadam acri, calorem intendente, repletus fuerit; vnde praua digestio ex prauis humoribus, atque deintensionibus oriuntur spasmodicae in praecordiis, ac pressiones, et respiratio difficilis nauseae juncta reperitur, sanguinisque motus et impetus facile per consensum augentur, ejusdemque corrupta crasis stagnationi facile et ecchymosi ansam praebet. Sic BALLONIVS z) juvenem XX. annorum memorat, qui haemoptoen valde metuens ex improviso tangit hypochondria blanda manu, ac pulsum ibidem percipit; mox consecuta est haemoptysis; conualuit tamen expurgata copiosa ventriculi saburra. Ipsaque indicia peruersae humoris biliosi

secre-

y) Vid. van SWIETEN *Comm.* Tom. IV. p. 12.z) Vid. *Epidem. et Ephem. Lib. I.* p. 41.

secretionis, ejusdemque primas ad vias colluuei, cum haemoptysi non raro conjuncta, vel illius insultus infrequentia, veritatem quoad hunc morbum quoque declarant, ARCHIGENIS apud AETIVM dicti, medicos saepe decipi, aientis, ratos mali causam in pectore esse, quum tamen a ventriculo repetenda sit. Colligamus inde quantum facere possint euacuantia ad medelam et ad prophylaxin haemoptoes, si nempe causa latet in colluue ffordium intra primas vias haerentium, praesertim biliosarum. Dubitare non poterit de hujus conditionis vitiosae efficacia in haemoptoe excitanda, qui multorum pectoris morborum, observationibus practicorum comprobata, ex primis viis originem perperit a).

§. XIII.

Hac triplici ratione saepissime causam haemoptoes latere in aduersa ex hypochondriis valetudine facile erit probatu, si modo 1) attendimus ad dispositiones varias corporis ad haemoptysin, (§. V.) exhibitas, quae rarius sine labe viscerum hypochondriacorum inueniuntur; 2) ad causas procatacticas, quae in hypochondria valide satis agunt; 3) ad symptomata quae sputum istud sanguinis comitantur; (§. IV.) 4) accedit, quod causae, quae vniuersaliter sanguinem mouent, in corpore perfecte sano haemoptysin non facile excitare valeant.

§. XIV.

a) Conf. imprimis REGAE *diff. med. de sympathia* C. X.

§. XIV.

Ac primo quidem si ad varias corporum ad haemoptysin dispositiones animum aduertamus, facile erit perspectu, ex notis (§. V.) allatis, subiecta hujus mali esse homines junioris aetatis et adultos infirmiores, quos tempestatis, aeris, victus, vitae generis et regiminis, mutationes facilius affligant, et qui spasticis congestionibus a sensibiliore systemate nervoso, a pronitate tum ad affectus animi vehementiores, tum ad catarrhos ac ventriculi vitia prae aliis obnoxii sint. Cuius autem facile hinc liquere arbitror, rarius fieri posse, ut omne genus aduersae ex hypochondriis valetudinis a corporibus secundum experientiam ad haemoptysin dispositis abesse reperiatur.

§. XV.

Inter causas procatareëticas haemoptyseos multae sunt, quae manifeste satis in hypochondria agunt et per haec affecta demum sputum illud sanguinis excitare videntur. Sic omnino huc pertinere existimamus, quae de aeris mutatione subitanea et frequentiore ex calore in frigus, ex humido in siccum, et vice versa, ac de impedita etiam aliunde perspiratione obseruata fuerunt. Immo huc etiam refero thoraces mulierum, quibus quippe pariter abdomen ac pectus laeditur; situmque corporis cum abdomine compresso inclinatum, unde
spasmi

spasmi et obstructions et determinatio sanguinis ad superiora facile oriuntur. Pertinet huc porro ira praesertim celata et introrsum versa, de qua constat manifeste illam et violenter saepe in ventriculum et praecordia agere, bilisque effusioni ansam praebere, unde quoque sanguinis motus accelerari, neruorum functiones perturbari, et alia inter mala sanguinis varias per vias fluxus excitari experientia saepissime docuit. Cibus etiam potusque, copia aeque modum excedente, ac acriori et calefaciente indole, multum ad haemoptysin ciendam valent, de quibus vero negari minime potest eos prius in ventriculum et alia propinqua in viscera abdominalia agere, quam ad sanguinem ex iis paratus chylus vehatur. Spectant huc quoque emetica fortiora de quibus experientia practicorum constat, illa sputum istud sanguinolentum omnino efficere posse. Sane quid propius in hypochondria agere valet quam emetica, quae vim suam praecise in ventriculum, eidemque propinqua viscera exserunt; unde vero cum haemoptysis observata est, spasmus illa videtur adscribenda fuisse, qui ex ventriculo obortus pectus obsedit, respirationem interceptit, sanguinem intra pulmones accumulavit, vasaque minima pulmonum per vim pressionis vel dilatauit vel dirupit.

§. XVI.

Etiam symptomata quae haemoptysin concomitantur vitia hypochondriorum produnt. Sunt vero: spasmi in infimo ventre, motus undulatorius in hypochondrii quodam latere, dolor dextri praefertim hypochondrii, dolor etiam dorsi, borborismi in imo ventre, aluus adstricta, paroxysmorum typus, sapores varii in ore percepti. Accedit medelae efficacioris ratio, quam quidem in hoc schediasmate pertractare non constitui; interim notasse conueniet, illam saepe quidem palliative, tempore paroxysmi, sanguinis missione, temperantibus et antispasmodicis absolui posse; plerumque tamen, si a causa interna oborta fuerit haemoptoe, ista non satis ad mali reditum auertendum praestare constat, quum therapeutica etiam praecepta doceant, blandas quoque canalis intestinalis purgationes, et ejusmodi auxilia, quae liberiores humorum per viscera progressum restituant, quae secretiones expediant corrigantque, quae tonum denique nervosi et vasculosi systematis tutius roborent, saepissime requiri.

§. XVII.

Ultimo monendum mihi adhuc erit, ea quae vehementer sanguinem mouent, in corpore perfecte sano et bene constituto raro haemoptysin produitura esse. Si enim circulatio per omnes corporis

ris partes libera, si stomacho bene et nervis, sane a vehementiori corporis motu, majori quidem vi sanguis per vasa sua pellitur, isque magis tunc horum latera distendit, et corporis ad superficiem aequabilius distribuitur, sudorique potius vniuersali aucta circulatio quam haemoptysi ansam praebet. Hanc theoriam cum experientia optime conuenire multis, et praesertim quoque mihi, obseruatione constitit. Saepe celeriores sanguinis motum exercitio corporis excitatum practici viderunt haemoptoicis, quum insultus mali conquieuit, multum profuisse. Mihi ipsi, qui saepe leuioribus, maxime pertinacibus tamen, sanguinis ex pulmone sputis, per paroxysmos, alternis diebus certa hora redeuntes, cum febre tertiana intermittente, quouis intercalari die typum seruante, per aestiuum semestre anni 1765. affectus fui, nunquam istud ex motu, eoque vehementissimo, vt e. gr. equitatione sentire contigit. Quid? quod melius nunquam valuerim, et nunquam liberior a variis pectoris mei incommodis fuerim, quam inter motus corporis in equo etiam satis vehementes, quos, post sedata febrilia illa incommoda, institui. Nocebat mihi semper quies, inprimis cum abdomine compresso. Plus etiam, fateor, mutato a me vitae generi corporisque mei exercitiis debeo, quam exquisitissimis aliquamdiu mihi commendatis, e penu pharmaceutico, remediis.

VIII.

Differtatio exh. de apoplexiae ex praecordiorum vitiis origine analecta. Publice propofita Gott. 1767. Resp. GEORG PH. KOCH, *Wetzlariensi*.

§ I.

Ex acutis certe et sagaciori medico dignis magni CELSI nostri sententiis quisque facile illam habuerit: quum raro fallere medelam ait, nisi fefellerit cauffarum indagatio. Vbi enim de vera morborum origine plenior et absolutior doctrina in medentis potestate fuerit, idque ipsum, quod in corpore mutandum est, exactius innotuerit, utique tunc certior via minus difficulter detegitur, qua incedere conueniat ad malum praefens profligandum. Nulla ergo excufatione fui tentaminis opus habere existimo, qui ad acquirendam penitiorem absconditae originis morborum cognitionem, obferuando atque meditando quid conferre fufcipiunt. Non equidem arbitror a vero me longe recedere, fi et apoplexiam earum in affectionum numerum reponam, de quarum ortu fecundum vfitatiora medicorum dogmata quibusuis in aegrorum exemplis jam fatis constet; etfi me non lateat in variis etiam optimis ceteroquin practicae medicinae institutionibus eo modo de illo morbo

morbo agi, ac si vix vlllos ejus theoria hiatus admitteret, et quoad maximam saltim partem, vt quisque tiro facile exultaret, perfecta foret atque consummata. Verum tamen vt hanc modo ipsam in multis minimum exemplis meram hypothesein esse, et fallaciae maxime obnoxiam, sic aliam quoque corporum conditionem, quae omnino saepe medentis attentionem postulare, minusque sollicitate a multis notata videtur, caussae instar praecipuae in apoplecticis locum habere, tum ipsa per obseruata, tum et per accuratiorem analogiam comprobari existimo. Haec autem ipsa meditatus, quum ex legum academicarum praescripto inaugurale specimen mihi conscribendum esset, de apoplexiae origine ex hypochondriorum vitiis analecta quaedam, pro virium tenuitate, studiosius disquirere, atque paucis, quoad fieri poterit, exponere constitui.

§. II.

Minime quidem operae pretium fore existimo, externam hujus morbi speciem, quippe ex primis nostrae artis lineis jam satis cognitam definire, vel satis trita ejus nomina enarrare. Neque est, quod in exponendo illo satis cognito discrimine, quod inter sanguineam atque serosam, aut quod inter exquisitam apoplexiam et leuiorem ejusdem affectionis gradum intercedit, nunc haereamus. Breuibz tamen varium hujus magni morbi accessum indicare conueniet. Vt vero experientia satis constitit, ipse morbus attonitus

a) modo sine praeceuntibus signis et inopinato fere tanta vehementia impetum facit, vt vno temporis puncto quis, resolutis membris, omnique fere sensu priuatus prosteratur, vt etiam nonnunquam statim vel post pauca momenta lugubri succumbat fato, neque extemplo allatum auxilium hominem in praesentissimo periculo mortis existentem seruare amplius valeat. Ejusmodi exempla, inter alia, obseruationes WEPFERI a) de homine inter prandendum, et Cel. MORGAGNI b) de aethiope inter tuba canendum, apoplexia subito correptis et simul vita statim defunctis, referunt.

b) modo sensim increfcit malum post leniores insultus, quibus per interualla externi internique sensus cum voluntaria mouendi potestate subito vacillant, concessoque semel vel aliquoties vario leuamine, nisi tunc forte succurrat auxilium efficacius, per impetus morbi magis magisque exacerbatos in grauiorem et exquisitum, raroque tunc superabilem affectionis apoplecticae gradum transit.

c) modo diu antea prodromi imminentis apoplexiae, qui monent, illi tempestiue obuiam eundum esse, praecurrunt. Non solum vero pro certo constat, praesagiendae variis ex incommodis apoplexiae haud raro locum dari, immo praelonga hunc morbum initia, vt ARETAEVS jam asseruit, c)
nonnun-

a) *Histor. apoplect. I. p. 427.*

b) *De causis et sedibus morbor. epist. V. n. 17. p. 41.*

c) *De morbis diuturn. Lib. I. Cap. VII. p. 35.*

nonnunquam habere, sed omnino rarius repente non praemonitos homines affligere illam solere complurium observatio comprobare videtur.

LANCISIUS *d*) raro forti apoplexia quem prehendi, nisi ejus praeludia praecesserint, asserit. Et praestantissimus THIERY *e*) nullum forsitan morbum praenuntia antiquiora, quam apoplexiam idiopathicam antecedere, generatim tradit. Immo Celeb. TISSOTVS existimat, in iis etiam, qui sine vlla manifesta causa subito apoplexia correpti esse dicuntur, si aegrorum historiae modo attente perpendi possent, plura saepe symptomata se proditura fore, quae morbum, diu antequam inuaderet, praedicere potuerint *f*).

δ) modo conjunctim cum febre intermittente aut remittente, vel et illarum naturam saltim aemulando quosdam per paroxysmos affligit, et per intervalla desinit aut remittit; qualem hujus morbi genium aliquando esse clare docuere SYDENHAMVS, BAGLIVVS, MORTONVS, TORTI, WERLHOFFVS, SENACVS, TISSOTVS, F. C. MEDICVS et plures.

ε) modo et instar grauioris hysterici aut hypochondriaci paroxysmi suum exercet impetum, ac similiter aliquando cum hemiplegia aut minori paralysis desinit, ubi systematis nervosi jam adest imbecillitas, aut nimia mobilitas, et inanitio vel

Y 3

alia

d) Opera omn. Cap. XX. Lib. I. §. VI. p. 24.

e) Medecine experimentale p. 145.

f) Epist. ad Hallerum de variolis, apopl. et bydrope. p. 87.

alia debilitans causa accesserit. Praecipue vero referente SYDENHAMO, BOERHAAVIO, pluribusque hoc affectionis genus feminas confestim a partu, magna sanguinis vi simul ejecta, et vel partui laboriosiori vel vehementiori alicui animi commotioni debetur; g) attamen in aliis quoque, pari ex ratione, post magnam vasorum inanitionem, vel alio modo inductam nervorum imbecillitatem, similem apoplexiam incidisse, observata docuerunt h).

Nonnunquam ζ) ad instar morbi secundarii ad gravissimos alios accedit, tum chronicos, ut icterum, hydropem, phthisin, multum adauctos et fere insanabiles, tum acutos quoque, et hos quidem saepius cum indolis malignioris fuerint, atque tunc vix non semper in propinquo certa mors est.

Praeter has denique conditiones variarum apoplexiae originum etiam illius, quae forte notissima est, aliqua mentio facienda est, nempe, hunc morbum externam quoque violentiam capiti illatam aliquando, et post varium quidem temporis spatium sequi, ubi ex ista caput fortiter commotum et concussum, vel in encephali quadam parte compressio, aut laceratio, aut humorum stagnatio, aut eorum effusio, aut nimia vasorum extensio, aut verior in-

flamma-

g) SYDENHAM *oper. uniu. edit. Lugd. 1754. p. 388.* BOERHAAVE *prael. de morb. nerv. p. 538.* Conf. etiam LAZERME *de morb. capit. p. 37.*

h) BOERHAAVE *l. m. cit.*

inflammatio, suppuratio, corruptio excitata esse potuit.

§. III.

Memoratu autem maxime dignum videtur morbum huncce, internis ex causis sponte natum, secundum definitionem illam apoplexiae generalem, quae systematicis auctoribus arridere solet, quae nempe sensuum aequae externorum ac internorum usum, simulque voluntariam artus mouendi potestatem plane abolitam postulat, tum quoad initium tum quoad incrementa sua consideratum, rarissime contingere. Primum quidem animaduerto, sensuum internorum cessationem minus accurate ad morbum attonitum generatim requiri posse. Etsi enim aegri eorum, quae ipsis durante insultu apoplectico acciderunt, et quae praesertim ipsorum in corpore ad praesentem functionum animalium torporem discutiendum suscepta fuerunt, se minus conscios esse referant, malo vel superato, vel saltem rationis usu cum loquela restitutis; nimis tamen abscondita est internorum sensuum conditio, quam ut inde argumentari liceat insultus ipsius tempore ab illorum usu mentem plane vacasse. Et eo minus quoque pro certo ab aegris negata perceptorum recordatio ipsos earundem rerum apperceptionem aliquam habuisse plane refellit, quum et exempla prostant sublatae, per vim capiti applicatam, aut grauem systematici nervosi morbum, memoriae eorum quae sa-

nior adhuc mens ante perpeſſum iſtum peregit. Sed praeterea, ſi rariora excipiamus vehementiſſimae ſtatim apoplexiae exempla, aut ſenſim increſcentis maxime difficiliſ morbi maiorem vim, nec ſenſibus externis plane priuatos pleroſque reperiri maniſteſtiffime confirmant plurimae ſumme laudabilium ſcriptorum obſeruaciones, veluti WEPFERI, *i*) et MORGAGNI, *k*) quibuſcum et doctrina CAEL. AVRELIIANI *l*) et Auct. hiſtor. morbor. Vratiſl. *m*) et BOERHAAVII, *n*) VAN SWIETEN, *o*) ELLERI, *p*) et plurium conſentit. Eodemque plane modo ſeſe res habet ratione motus voluntarii; multis enim deglutiendi, caput artuſque nonnullos quodammodo mouendi, et vocem aliquam, licet intellectu difficillimam, edendi facultas permanet. Sunt, qui cum grauior inſultuſ remiſerit, per interualla ſubmiſſa voce delirant, ſunt, quibuſ artuſ nonnulli tremunt aut conuelluntur. Minime vero tantummodo in attoniti morbi initio, aut primis inſultibuſ, vel in decrementiſ adeſſe poſſunt ſenſuum externorum et motuum voluntariorum aliqua exercitia, verum et ejuſmodi reperiuntur aegri, in quibuſ iſta ſuperſunt, quum morſ jam ſatis maniſteſte appropinquat. Singulariſ ergo hinc apparet neceſſitaſ conſtituendi diſcriminis apoplexiam

i) Hiſt. apopl. IX. p. 318.

k) De cauſ. et ſed. morb. ep. II. n. 13. p. 13. et plur. aliis in locis.

l) Acut. morb. L. III. c. V. edit. ab Almel. p. 199. 200.

m) Ex edit. Halleri p. 289. 291.

n) Aph. de cogn. et cur. morb. §. 1015.

o) Comment. in aph. Boerb. T. II. §. 1015.

p) Obſ. de cogn. et cur. morb. p. 285. et ſeqq.

xiam inter fortem aut exquisitam, atque aliam debilem siue leuem, quam quoque parapoplexiam recentioribus, verbo satis accommodato, nominare libuit. Ideoque si morbi hujus ideam explicueris resolutione siue magna imminutione virium neruofarum, quoad mentis vniuersum cum suo corpore commercium, aut quoad ad omnes fere corporis functiones animales, vitalibus saepe manifestius perseverantibus; hacce definitione leuiiores quoque apoplecticae affectionis gradus commode comprehendendi poterunt.

§. IV.

Haud exiguis quidem difficultatibus adhuc implicatam esse omnem de encephali et systematis neruosi functionibus doctrinam, quisque veri his in rebus curiosior lubenter concesserit; attamen ad facilia certioraque referri deprehendimus causae generalis proximae, vnde omnis apoplexia ortum habere debeat, notitiam. Plurimi enim non dubitarunt, quum in attonitis fere subito et simul, vel plane, vel quoad maximam saltem partem, cesset externorum internorumque sensuum, atque illorum motuum, qui alias animi parent arbitrio, exercitium, ea ratione his in aegris affectam esse debere neruorum, illis functionibus inferuentium, originem, vt vel penitus vel ad tempus modo vnius aut aliquot dierum intercipiatur solitum illorum cum anima commercium, ita quidem vt hoc ipsum sem-

per, si modo tandem voti fiamus compotes, perquam difficulter restitui queat. Atque omnino de modo hujus affectionis vltcrius quam plurimis exemplis dissectorum, quae hoc morbo defuncta fuerunt, cadauerum certissime id constitit, encephalum, vel principaliorcm aliquam ejus partem per saepe qualicunque ratione affectam laesamque fuisse; siue effusus e vasis suis sub caluaria sanguis fuerit, siue ipsa modo illa vasa apparuerint nimis distenta, siue serum ibidem effusum stagnauerit, siue etiam pus aut ichor alicubi intra caluariam haeserit, siue in osseam duritiem vasa degenerata fuerint, siue ossis pars de sua fede mota, encephalum vllibi compresserit. Minime tamen satis tuto hinc ducenda videtur argumentatio, nunquam sine aliqua ejusdem generis causa, quae nempe comprimendo suam in encephalum efficaciam proxime exfereret, apoplexiam oriri. Neque enim exempla deficiunt, in quibus ejusmodi causa, etiamsi sollicitc quaesita fuerit, reperta haud est, in quibus nempe memorabilis nulla encephali labes detegi potuit, quam satis aptam censere licuisset impediendis sensorii communis functionibus; prouti e contrario quoque alia, vt satis notum, q) occurrunt, vbi vel ex insigni vasorum cerebri plenitudine, vel aliis grauioribus vel sponte natis vel aliqua externa violentia productis ejusdem vitiis,

q) v. PLATNERI *instit. chir.* §. 513. 531. 547. et inprimis MORGAGNI *de caus. et sed. morb. ep. II. n. 17. et ep. IV. n. 29. 34. 35.*

vitiis, apoplexiam facile suspiceris adfuisse, quum tamen ejus nihil ante mortem observatum fuerat. Conferamus modo, quae Cel. THIERY *r)* de hac doctrina difficiliore propriis ex observatis tradit: *J'ai ouvert 15 cadavres de personnes âgées de 60 à 90 ans; Les vaisseaux de la tête étoient très engorgés, quatre fois même j'ai trouvé des concrétions polypeuses dans les sinus longitudinaux et lateraux, dans d'autres les ventricules de cerveau étoient remplis de serosité; tels sont les effets, que j'ai rencontrés très souvent et exactement des personnes enlevées par l'apoplexie; et celles ci cependant étoient mortes sans la plus légère apparence d'apoplexie. D'un autre côté, j'ai ouvert plusieurs cadavres de personnes frappés et mortes subitement, ou le troisième ou le quatrième jour, d'une attaque d'apoplexie, et je n'ai trouvé qu'un très léger engorgement des vaisseaux, sans aucune espèce d'extravasation.* Retulit jam in morborum capitis natura inuestiganda celebris WIL-
LISIVS historiam senis valde memorabilem, corpore, quem ait, obeso, nec non collo breuiori, et toro-
so praeditum, diu valetudinarium et vitam sedenta-
riam agentem, cacochymiam valde scorbuticam con-
traxisse, respiratione etiam difficili et anhelosa, ca-
pitisque grauitate et torpore insolito affectum, vix
quicquam laboris aut exercitii praestare potuisse.
Is quodam mane, dum genibus prouoluitur, dere-
pente perculsus, et mox ἀφρονος et insensibilis fa-
ctus, a medicis ocysissime aduentantibus non modo
absque

r) Medec. exper. p. 142. 143.

absque sensu, pulsu et respiratione, sed etiam toto jam corpore frigus et plane rigidus, imo vere mortuus reperitur. In cadauere postridie aperto WIL-
LISIVS morbi licet atrocissimi ne vel umbram se fatetur animaduertisse: vasa nempe meninges irrigantia sanguine mediocriter repleta fuerunt, absque vlla tamen phlogosi, aut extrauasionem, cerebrum, cerebellum et medulla oblongata cum prominentiis illorum omnibus vbique firma et bene colorata tum extra tum intus per totum apparebant: et plexus choroideus integer omni culpa immunis videbatur. Nihil etiam reliquo in corpore alienatum obseruari potuit praeter pulmones discoloros et ichore spumoso per totum infarctos s). Non multum dissimiles, saltem ejusmodi apoplectici observationes, quae vitium euidens sub calvaria plane deesse posse confirmant, summus quoque habet MORGAGNVS t), qui etiam ipse exempla plura proposuit, collecti satisque copiosi in cranii cavo sanguinis aut puris aut feri, nullo suborto insultu apoplectico u). Ideoque et illud LANCISII adfertum in rem nostram vertere licebit: *frequens hinc erroris ansa apud minus in arte peritos, qui lympham in cerebri cavitatibus inuenientes, illam apoplexiae causam, cum*
tamen

s) De anim. brut. Cap. VIII. p. 143.

t) De caus. et sed. morb. ep. IV. n. 5. 6. 8. 9. 11. 28. ep. V. n. 17. 18. Memorabile adjicio VAROLII dictum qui in ep. II. de nerv. opt. sic locutus est: in apoplecticorum ventriculis cerebri (hoc quaeso mihi credas) non reperitur major excrementorum copia, quam communiter in omnibus aliis reperiri solet.

u) Epist. II. n. 10. cap. IV. n. 29. 34. 35.

tamen plerumque dumtaxat effectus fuerit, accusare solent v). Si ergo quaedam vniuersalis apoplexiae constituenda est causa proxima, vix aptius illa declarari poterit, quam ipsis magni MORGAGNI verbis: esse videlicet *intimorum, qui in cerebro fiunt motuum, cum nempe mouemus, sentimus, cogitamus, subitam imminutionem, tantam interdum, ut proxime ad cessationem accedat, aut in cessationem continuo transeat; eam tamen imminutionem multas esse et varias quae inducant causas, harumque ipsarum alias sensus omnino fugere, alias sub hos cadere w).*

V.

Satis frequente obseruatione dudum constitit, certas corporum diatheses dari, quae prae aliis apoplexiae magis obnoxiae sint. Etsi quidem a meo nunc instituto alienum sit, quaeuis huius morbi semina et alias illius causas pertractare, eorum tamen aliqua hic facienda erit mentio, quae praecordiorum vitiis in excitanda apoplexia certiore asserant culpam. Et huc primum referimus singularem corporis crassitiem et obesitatem, *pingues enim natura, humidos ac desides, hoc morbo facile corripitur, bene obseruauit ARETAEVS x); meritoque ad hunc morbum quoque extendendus videtur HIPPOCRATICI dicti sensus,*

v) Oper. Tom. I. L. I. C. VII. §. 3. p. 7. conf. WEPFER *hist. apopl.* p. 298. 299. §. III.

vv) De caus. et sed. morb. ep. II. n. 5.

x) De caus. morb. diut. p. 35.

sus, quum natura admodum crassos celerius interire perhibuit y). Et BOERHAAVIVS expressis verbis, ad hunc morbum procliuiiores tradit, *quibus corpus valde crassum et pingue est z)*. Plurimaque satis vulgaria, idem ipsum assertum satis confirmant obseruata. Qui autem eo praediti sunt corporis habitu, non raro aliis torpidiores reperiuntur, quieti et somno magis indulgentes, acriora et mentis et corporis sui exercitia saepius abhorrentes, atque difficilius respirantes. Ideoque nec dubitari potest, quum viscerum quae hypochondria occupant, ea inprimis ratio sit, vt deficientibus circulationis vegetioris adminiculis, functiones suas languidius obire soleant, neque solum humorum stagnationi obnoxia fiant, et liquores digestionis destinatos minus efficaces, minusque integros officinae chyli subministrent. Memorabile quod in historia morborum Vratislauiensium relatum legitur: *non facile recordor, quenquam apoplexiam incurrisse, ubi non vel manibus fuerit palpabile, inter assumpta et motum, corporisque exercitia nullam fuisse seruata proportionem, sed illa modum excessisse, haec defecisse a)*. Neque vero vel parum humanae naturae legum gnarus hinc non facile intellexerit, quam esse possit noxia praecordiorum in obesis quoad capitis morbos in iis excitandos efficacia; quae vtique incrementa capiet, concurrentibus

y) Aph. 44. sect. II.

z) Aph. §. 1010.

a) Edit. HALLERI p. 288.

bus, malo huic fauentibus caussis, et quum hypochondriorum vitia cachexiae jam et pituitosae cacochymiae ansam praebuerint, solitasque varias humorum depurationes impediuerint.

§. VI.

Praeterea vero nec vllus forte auctorum de hac doctrina vel mediocriter bene meritorum facile fuerit, qui habitualement rubri sanguinis abundantiam, quam BOERHAAVIUS *temperiei plethoricae* nomine memorauit *b)*, ad causas apoplexiae praedisponentes frequentiores non retulerit, siquidem obseruatio illius constitutionis in morbum huncce procliuitatem persaepe confirmauit. Non est quod ad exponendam rationem, qua siderationi ansam praebet habitualis plethora, vel verbum addam, quum hoc argumentum ab instituto meo alienum, et ab exercitioribus viris jam satis explanatum iudicem *c)*. In iis vero, quibus certiora sunt et euidentiora et minus interrupta plethorae indicia, magna ex parte peculiaris deprehendi solet ad bilis exsuperantiam diathesis, si hujus in signa exactius inquiramus. Pro ni nempe ad oris amaritiem, nauseam, atque cardialgicas affectiones multi reperiuntur, cum perturbatus quodammodo animus fuit, cum diaetae vitiis indulserunt, vel cum rigidioris tempestatis perpassi sunt iniurias. Facile tunc etiam capitis dolore, et
grau-

b) Aphor. de cogn. et cur. morb. §. 1010.

c) Conf. v. SWIETEN *comm.* Tom. III. p. 257.

grauitate, et vertigine conflantur, aut sanguinis turgescens impetus ad pectus ruit, varioque modo respirationis difficultatem inducit. Leuamen haud raro afferunt spontaneae sanguinis profusiones, praesertim ex naribus, et e vasis haemorrhoidalibus, et ex vtero, nonnunquam et ex pectore, quae dein saepius per periodos recurrunt, atque noxas ad commotionem proni sanguinis restituta maiori ejus copia saepius auertunt. Nonnunquam diutius persistentibus illis, ex abundante atque simul turgescente sanguine oriundis incommodis, etiam artis auxilia subueniunt, vel ebullitionis humorum causam ex praecordiis educendo, vel cruoris exsuperantem quantitatem ex incisa vena minuendo, vel commotionem ipsam antiphlogisticis temperando. Quos vero ita constitutos et naturae et artis auxilia defecerint, facile ex retento et in partem aliquam interiorum congesto, et vel e vasis effuso, vel saltem eadem ipsa nimis distendente sanguine, variis morbis acutis, et subinde quoque apoplexia corripi, nemo mirabitur, qui oeconomiae animalis leges accuratius pensitauerit *d*). Ipsam quidem secundum experientiam de illa omni habituali plethora asseri posse existimo, eandem vix non semper alienatis viscerum hypochondriacorum conditionibus et excitari et foueri; sed imprimis tamen valde memorabile, ut nunquam magis atque facilius graues ex plethorica

d) Conf. F. HOFFMANNI *Med. R. S.* Tom. IV. P. II. S. I.; C. VII. *Thes. path.* §. IX.

thorica temperie capitis morbi subnasci solent, quam ubi fueta ejus leuamina per narium haemorrhagias e), aut sanguinis per haemorrhoidalia vasa fluxum f), ob aliquod pertinacius impedimentum cessauerint, sic de his binis etiam haemorrhagiarum speciebus, prae ceteris euidentius certiusque constat, illas quam frequentissime à vitiata quomodocunque viscerum hypochondriorum functione vel penitus dependere, vel augeri saltim et foueri. Vbi enim in perceptiones et symptomata aegrorum, ingruentibus modo memoratis, persaepe tamen et aliis quoque periodicis sanguinis profluviiis, praesertim quum impetuosius et aliqua cum febre contingant, inquirimus, plerumque imminutum vel deficientem appetitum cum alienato sapore molesto, et nonnunquam doloroso tensionis aut pressionis in hypochondriis sensu, alioque difficiliore, et vario modo vitiata, deprehendimus. Et quamuis subinde haud magni esse momenti videatur illud in praecordiis latens malum, difficulter tamen plane tollitur, et per interualla suam variis excitatis incommodis praesentiam declarat, nouisque cum haemorrhagiarum accessioni-

e) Conferri poterit HILDANVS *obs. sent.* I. p. 69. VANSWIETEN *comm.* T. III. p. 276. LANCISIUS *oper.* L. II. C. VII n. 4. p. 7.

f) HIPPOCRATES *coac.* n. 478. F. HOFFMANN. *Dissert. de viro apoplexia ex inconsulta haemorrhoidum suppressione extincto.* Etiam BAGLIVVS exemplum refert apoplexiae lethalis ex haemorrhoidum euacuatione suppressa *oper. omn.* p. 339. §. II.

cessionibus euidentius adaugetur. Optime cum his consentire videtur assertio F. HOFFMANNI g) *experientia teste, inquentis, apoplexiam saepe incurrunt, qui spasms in abdomine maxime aliquamdiu fuerunt detenti, qui scilicet colicis passionibus, praesertim spasmodicis, hypochondriaco malo, doloribus ex calculo vesicae, item cystidis felleae, nec non diuturna alui stricture laborant.*

§. VII.

Frequentiori obseruatione confirmatum fere omnes boni auctores censent arthriticam pertinaciorē, inprimis podagricam corporum diathesin, apoplexiae quoque facile ansam dare posse, siue re-tenta in visceribus nec ad articulos detrusa materie arthritica, siue hac ipsa ex articulis retrocedente aut retropulsa. Fieri potest, vt nimis imbecillis natura sit, vel praeparandae illi materiae, quo commodiora in corporis loca deponi queat, vel satis efficaciter ad eadem ipsa propellendae. Nonnunquam vero et imminutae nimis vires, varia diaetae et regiminis vitia, vel inepta quoque exterius applicata medicamina id mali efficiunt, vt in vasa resorbeatur, quae extra humorum circulum jam constituta fuerat materies varie vitiosa et acris. His autem contingentibus horrenda facile mala producit, eorumque ex numero sunt etiam grauissimi
capitis

g) *Med. rat. syst.* T. IV. P. II. S. I. C. VII. *Thes. part.* §. X.

capitis morbi et subinde lethales apoplexiae *b*). Negari non potest, etiam his subortis, magnas vasorum encephali distensiones et effusiones quoque sanguinis ipsius obseruatas esse, attamen nec difficulter cuius, de veriori arthritidum natura instructo, atque conditiones hoc mali genere laborantium exactius perscrutanti, patere poterit, quanti momenti sint in excitandis et fouendis arthriticis affectionibus laesae viscerum hypochondriacorum functiones. Certe, qui attenderit, facile multum veri deprehendet in SYDENHAMI doctrina, labefactatam nempe humorum concoctionem in arthriticis adesse, eademque incrementa fumente malum adaugeri, correctae leuari, obseruabit *i*). Non iusto major modo voracitas extra paroxysmos frequens, et quidem ciborum duriorum difficillime digerendorum, solitaque vini compotatio liberalior, cum deficientibus corporis, contra vero continuatis acrioribus mentis exercitiis, unde illos morbos tam saepe excludi constat, metuendas chyli officinae corruptelas, praefagiunt, sed etiam praeterea fere perpetuo ipsis in paroxysmis vitiatus aut prostratus appetitus, alienatus sapor, atque inordinata aluus, conjunctae in multis affectiones haemorrhoidales, vomitiones pituitosae, et biliosae

Z 2

haud

b) VAN SWIETEN *comm.* T. III. p. 276 et T. IV p. 533.

i) *Tract. de podagra oper. uniu. edit.* Lugd. 1754. p. 444. seqq. Conf. HOFFM. *Med. rat. syst.* T. IV. P. II. Sect. II. C. II. p. 529. BOERH. *aph.* §. 1265, et v. SWIETEN T. IV. p. 335. seqq.

haud raro leuamini cedentes, fatis manifeste praesentem in praecordiis labem comprobant, quae ad malum sustentandum plurimum conferat *k*). Minime itaque dubitandum, quin ubi defecerit in dispositis sufficiens materiae arthriticae iusta praeparatio, et ejusdem in articulos depositio, aut si dolor jam natus praeter rationem iterum euanescat, attonitusque tunc suboriatur morbus, plurimum in eodem excitando culpaе in aliqua viscerum hypochondriacorum labe haerere possit. Memorabile inter alia exemplum, quod assertionis meae veritatem dilucidius confirmet, lethalis magni olim viri MARCELLI MALPHIGII apoplexia *l*) exhibere videtur. Quamuis enim proximam noxam ab effuso insigni copia sanguine et fero in cerebri ventriculos et a varicosis vndequaue sanguiferis cerebri vasis repetendam esse quam lubentissime largiar, vix vlli tamen dubitationi locus erit, quin varia praecordiorum vitia, quae morbi et sectionis historia declarat, cum podagrica et calculosa ejus diatesi, plurimum ad illam cerebri colluuiem producendam contulerint. Refert BAGLIVVS, MALPHIGIVM per decursum plurium ejus virilitatis annorum obnoxium fuisse vomitibus et secessibus biliosis, et post horum suppressionem vomitibus acidis, palpitationibus

k) Conf. inprimis BOERH. *apb.* §. 1257. et 1258. v. SWIETEN T. IV. p. 301. sqq. et Henr. Joseph. REGA in *tract. de sympathia*. C. XI. p. 135.

l) Cujus historiam cum sectione cadaveris, tanquam testis autoptes, enarrauit BAGLIV. *oper. omn.* p. 681. 682.

nibus cordis, calculis renum et vesicae, vrinis cruentis, et interdum affectionibus podagricis leuioribus, — dein priori vice, praecedentibus curis et animi passionibus, apoplexia correptum fuisse, cum totius dextri lateris paralyfi; a quibus cum liberatus esset, et praeter varias sensorii communis et neruosi systematis perturbati affectiones, etiam inappetentia et ventriculi indigestionibus per intervalla implicatus mansisset, post spatium quatuor mensium vehementiori succubuisse insultui apoplectico. Nemo forte manifestam hoc in exemplo, qualia etiam plura prostant, praeteruiderit hypochondriorum labem; nec facile quis abdominis vitio hic euidentem in congerendo ad caput sanguine et fero efficaciam denegauerit; etsi simul admittendum esse bene cognoscam, ex vere praesente grauiori encephali affectione partem imbecillitatis viscerum abdominalium omnino quoque dependere posse *m*).

§. VIII.

Plurimis praeterea atque certissimis constat obseruatis, neruoso systemate vndecunque vehementius affecto, viscera ad officinam chyli pertinentia quam frequentissime laedi, horumque vicissim perturbatis functionibus et sensorii communis et plurimorum corporis neruorum munia facile vltius alienari, vel etiam plane impediri. Hinc autem in-

Z 3

signe

signe argumentum efficacioris potestatis, quae praecordiis ita vitiatis ipsa etiam in apoplexia excitanda inhaeret, petendum existimo; quum frequentius neruofae affectiones prius in viscera praecordiorum agere soleant, quam grauiiores et pertinaciores insequantur functionum capitis et neruorum perturbationes. Verissimum obseruamus, vbi spasmi, dolores, curae, animi affectiones, aliquamdiu perseverauerint, aut maioris vehementiae fuerint, bilis colorem et crasin persaepe et facile permutari, spasmos in hypochondriis et anxietates excitari et chyli fabricam ita grauius laedi, vt non minus appetitus, quam ingestorum bona digestio imminuantur, vel deleantur, sensimque maxime refractaria et manifestissima fiant viscerum hypochondriacorum vitia, quae integram sanationem admodum difficulter admittant. Sed atrociora longe neruorum pathemata, quam quae praecesserunt, et excitari et sustentari solent, iis semel in hypochondriaca viscera inductis morbosis affectionibus. Attentior quisque facile deprehendit per ipsos mali hysterici et hypochondriaci repetitos insultus, etiamsi primum nulla in hypochondriis culpa reperiri potuerit, viscerum chyli officinae inseruientium functiones perturbari, impeditiorem fieri sanguinis per venae portarum systema progressum, primas vias humoribus vitiosis, acidis, biliosis, pituitosis, corruptisque ciborum reliquiis, frequentissime inquinari; atque sub hac rerum conditione multo
pejus,

pejus, longeque grauius memoratis malis neruofum systema affici solere. Tunc enim vehementiora pathematum genera saepius accedunt, lipothymiae, cephalaeae, melancholiae, asthma conuulsiva, epilepsiae, ipsaeque nonnunquam paralyfes et apoplexiae. Eo vero minus dubitari potest, in illis primarum viarum inquinamentis et humorum in praecordiis secretorum vitiis, quum suis se signis manifestauerint, multum culpae grauiorum pathematum haerere, quod insigne tunc leuamen et per-
 efficacem prophylaxin euacuantia ad morborum indolem accommodata, subjunctis praesertim, quae stomacho subueniant, roborantibus, largiri saepissime soleant. Ad ejusmodi conditionem et Hippocratica illa pronunciata pertinere videntur, quibus docetur: *melancholicum illud esse, si lingua derepente impotens aut pars aliqua corporis siderata fiat n)*; itemque hoc: *melancholicis morbis periculosos, vere et autumno contingentes, decubitus, alia inter mala, corporis quoque apoplexiam denunciare o)*. Morbum forsitan non ita rarum esse apoplexiam spasmodicam censet praestantissimus LORRY, de hysteriis praesertim et hypochondriacis affectionibus agens p), in cerebrum vero praesertim tunc facilius fieri spasmodicos impetus tradidit, ubi degenerata jam bilis crasis et perturbata viscerum hypochondriacorum

Z 4

fun-

n) Aph. 40. sect. VII.

o) Aph. 56. sect. VI.

p) De Melanchol. T. I. p. 115.

functio fuerit *q*). Quantum vero etiam animi affectiones ingratiore, ira, moeror, terror, in perturbandis praesertim praecordiis valeant, quantumque immodica quaevis et acriora mentis exercitia, vigiliae, curae, sollicitudines, nimis intensa studia, integriori chylopoiesi obsint, vix vllum latere posse medentium existimo. Plurimis autem observationibus ita etiam certo constitit, illas animi agitationes atque contentiones nimias apoplexiae ansam dare posse, vt nec elementorum doctrinae pathologicae quis auctor facile causam hancce praeterierit *r*). Ideo quoque ad illos animi affectus, praesertim iram proniores, quum reliqua consenserint, apoplexiae magis obnoxii reperiuntur. Ipsa autem praecordia tunc primum perturbata et bilis praesertim vitiata m crasin auctumque ad primas vias affluxum, forsitan et aliquando humoris ejusdem ad sanguinis massam regurgitationem, plurimum ad magnum illum capitis morbum producendum plerumque conferre, salutare levamen satis confirmat, quod vomitiones aluique dejectiones biliosae tunc saepius praestiterunt. Praeterea quum et aliquando ab haemorrhagia largiori et subitanea, prouti supra memoratum fuit, aliisue causis, quae necessarium sanguinis ver-

q) Ibidem p. 301. 302. Conf. HOFFMANNI *Med. syst.* T. IV. P. II. S. I. C. VII. *Theor. path.* §. X. et MORGAGNI *de caus. et sed. morb. ep.* III. n. 5.

r) Conferri tamen hac de re merentur ARETAEVS *de morb. diut.* L. I. C. VII. TISSOT *ep. de variol. apopl. et hydrop.* p. 89. 115. 116. *Histor. morb. Vratish.* p. 295.

versus encephalum appulsum imminuere solent, verae apoplexiae fuerint obseruatae, vix vllus dubitationi locus erit, quin etiam certae praecordiorum affectiones, eadem ratione, qua inanitiones imbecillitatem systematis neruosi totius, praesertim sensorii communis producendo, ansam apoplexiae praebeant. Verissimum enim, primariam quandoque vniuersalis neruorum debilitatis causam in praecordiis haerere, atque animi quibusdam affectibus, terrore praecipue, tristitia et metu continuatis debilitatem totius corporis aliquando satis insignem produci. Frequentiori et fere quotidiano rerum usu haec omnia satis confirmari existimo, sed accurate exposita et exquisitioribus exemplis illustrata reperiuntur praesertim a binis nostri seculi ornamentis, diuo BOERHAAVIO s), et perill. DE HALLER t), dein etiam a praestantissimo medico, Io. GEO. ZIMMERMANNO u). Pluribus etiam cum nostris haecenus propositis assertionibus bene consentire videtur obseruatio, additaque conjectura sagacissimi THIERY: *on ne voit guères d'apoplexie dans les villages, elle est presque réservée aux grandes villes. Seroit elle donc le fruit de la mollesse, de l'intemperance, et de la débilité du genre nerveux v)?*

Z 5

§. IX.

s) Praelectt. in instit. med. c. not. HALLERI T. IV, p. 446. sqq. et de morb. neru. p. 320. sqq.

t) Element. physiol. maj. T. V. p. 579.

u) Von der Erfahrung in der Arzneykunst II. Th. 4. B. II. Cap.

v) Medec. exp. p. 147.

§. IX.

Sed prodromos apoplexiae praecipuos nunc etiam paucis enarrare et expendere conueniet, quum et illorum indoles haud leue argumentum cul-pae, in praecordiis quoad magnam partem haeren-tis, praebere videantur. Ipsae quidem affectiones, quae atrocem istum, aegro saepe incio, prope im-minentem hostem complurium ex obseruatione por-tendere queunt, praecipue sequentes habentur: cephalalgiae nimirum grauioris frequentes paroxys-mi, externorum internorumque sensuum aliquis torpor, et memoria praesertim vacillans, vertigo saepius rediens varii sensimque aucti gradus, inter-diu somnolentia et pigritia, noctu vero insomnia terribilia, ex quibus cum anxietate ac tremore ex-pergiscuntur, dein et aurium tinnitus, imagines peregrinae et splendores oculis obuolutantes; illa-crymationes oculorum spontaneae; dentium stri-dores inter dormiendum insoliti; inprimis quoque linguae impotentia et titubatio, vocisque tarditas *w*); insultus etiam paralytici partiales, fugaci modo fre-quenter inuadentes citoque desinentes; pedum al-gor cum stupore, et subitaneum glaciale frigus in partibus, quas deinceps corripuit paralyxis *x*); ca-tarrhi diu fluentes saepeque reuertentes; respiratio
fae-

vv) Hanc linguae affectionem fere non fallacem apoplexiae metuendae

τηκμηρίον existere tradunt Auctores hist. morb. Vratisl. p. 288.

x) TISSOT ep. ad HALLERVM de variol. apopl. p. 88.

saepius anhelosa ; frequens indigestio γ), vomitus spontanei siue pituitosi , siue biliosi ; sternutationum frustranei conatus ; tandem quoque vrina fere aeruginosa , aliquando et atra , cum sedimento περιμῶδε. Quamquam nunc ejusmodi affectiones, vbi plures illarum pertinacius inhaeserint, et incrementa sensim sumserint, quadantenus oppressas totius nervosi systematis vires omnino vix non semper arguant, facileque aliqua nervorum originem propius laedens causa vere subesse possit, insignis tamen probabilitas quoque videtur admittenda, quod vitium haud exigui momenti in hypochondriis latens ad prodromos illos excitandos multum conferat, nisi et aliquando vnam atque solam earundem causam constituat. Non praegressae modo procatacticae causae, quas hi prodromi apoplexiae insequi solent, ex quibus nonnullas praecipuas exposui, manifestiorem visceribus officinae chyli destinatis vim inferre solent, sed etiam ipsa illa incommoda ex eorum sunt genere, quae et in aliis morbis ex hypochondriis affectis quam certissime ortum habent. Si enim vel HIPPOCRATIS observata, vel alius cujusvis boni auctoris medici dogmata experientia suffulta, quoad mali moris febrium symptomata consulamus, vix ullam reperiemus laesam functionem inter prodromos apoplexiae numerari solitam, quae non iis febribus subinde accidat.

Quod

γ) CAEL. AVREL. *acut. morb.* L. III. Cap. V. edit. ab ALMEL.
p. 199.

Quod ipsum vt facillimum foret vel pronuntiatis pluribus HIPPOCRATICIS, vel aliorum testimoniis allegatis confirmare, huic tamen labori, quod haec res maxime trita sit, mihi superfedendum existimo, si modo ad praestantissimi LOMMII obseruationes prouocauero, et vel vnum illud HIPPOCRATICVM adjecero: Ex hypochondriorum doloribus obortae febres malignae (κακοί'δεες); In his profundus sopor (το καρωδες) pessimus z). Qui autem accuratius indolem istarum febrium malignarum, quibus grauiora neruorum capitisque symptomata frequenter accidunt, et ipsa quidem secundum obseruata perscrutatus fuerit, non facile dubitabit, colluuiem humorum quadantenus corruptorum ad praecordia delatae et collectae, atque vitatae succorum chylopoiesi destinatorum secretioni, et febris vehementiam, et memorata symptomata praecipue deberi. Praeterea quoque cuius in doctrina morborum non plane hospiti fatis notum esse puto, magnam partem istarum affectionum, quae apoplexiae prodromos constituunt, permultos illorum affligere, qui paulo grauius chronico ex hypochondriis malo laborant. Quam enim saepe hos capitis dolorem in vertice, aut latere, aut occipite saepe valde refractarium, etiam vertiginem, oculorum caliginem, vexareprehenduntur? quam frequens est obseruatio sensuum tum externorum tum interiorum in hypochondriacis atque hysteriis per interualla

terualla torpentium. Sic etiam imaginum ante oculos apparentium et intercepta obsectorum visio haud alia subinde, quam ex stomacho, cruditate labefactato, vera origo deprehenditur a). Valde laudabilis quarundam vtilissimarum scriptionum auctor HENR. JOS. REGA, propria sua obseruatione permotus HELMONTIO adstipulatur, apoplexiam a stomacho praegrauato passim oriri ex iis probare contendenti, quae eandem communiter praecedere solent, symptomatis; atque suam dein sententiam sequentibus proponit: *sane, si ad singula animum reflectamus, si modum inuadendi, si causas occasionales et remedia spectes, quibus nonnunquam celerrime cedit grauissimus hic affectus, non dubitabis, quin saepius apoplexia ob ventriculi grauitatem et oppressionem ejus quasi a pondere incumbente inducatur b). Testatur etiam PROSPER ALFINVS c), nonnunquam aphonos reddi aegros solere ventriculo ab aliquo humore laeso, quo aut sponte aut arte rejecto liberarentur; neque minus frequenter a vermibus aphonias obseruari sine periculo. In colica biliosa ait BAGLIVVS d) contingit saepissime aphonia et vox rauca — haec eadem vox rauca obseruatur pariter in febris a bile ortis, quamobrem arguere merito possumus raucas voces et aphonias in acutis similibusque morbis subindicare nobis causam proximam illorum a bile, siue partibus*

a) LOMM. obs. med. p. 92.

b) Tract. de sympathia. Harlemi 1739. p. 92. 93.

c) De praesag. vita et morte. p. 220.

d) Oper. omni. p. 217. §. XI.

*bus acribus volatilibus sulphureisque pendere. Respirationis quoque difficultatem variam quam saepissime ex causa ejusmodi oriri, quae suam in praecordiis sedem habeat, siue mobilis et euidētiōr illa fuerit, siue magis abscondita interioribus in viscerum recessibus haeserit, ipse rerum vsus omnino satis manifeste testatur, idemque ipsum compluribus practi-
corum testimoniis propriisque obseruationibus satis clare comprobauit laudatus REGA e). Quanta pariter sit potestas praecordiorum grauius laborantium in artuum neruos plura facile argumenta declarant; quum neminem medicorum latere queant vel pares ex colicis atque dysenteriis grauioribus subortae, vel et artuum dolores ac lassitudines in biliosis febribus, inprimis quum simul malignae fuerint, frequentes, per euacuantia tamen primarum viarum saepe mitigandae tollendaeque, vel motus conuulsiui ac epileptici a vermibus varieque corruptis in chyli officina humoribus excitati. Quare et bene asseruit REGA f) *obseruare etiam est, dolores stomachi maiores desinere in conuulsiones vel artuum resolutiones.* Minime ergo arbitror, in dubium vocari posse, insignem partem causae prodromorum apoplexiae in affectis hypochondriis quam saepissime latere, ideoque et eidem regioni multum culpaē in excitanda, quae subsequitur, apoplexia rectissime tribui. Notissimum equidem est, capitis et ventriculi talem esse*

e) *Lib. cit. C. IX.*

f) *lib. cit. p. 135.*

esse consensum, vt quoque laeso aut repleto cerebro vicissim ventriculus et hypochondria inde perturbentur, siquidem vel capitis vulneribus per saepe accedentes nauseae vomitusque biliosi id clare comprobent g). Quamquam vero neque hanc ex quadam cerebri laeae ad ventriculum extensam sympathiam, neque reliquam cerebri idiopathice laesi efficacitatem in praedicendis et variis apoplexiae prodromis et ipso hoc atrocissimo morbo in dubium vocare mihi nequaquam sit animus; plurimum tamen interesse existimo, si et pro certo sciamus, in sponte subortis, sine omni externa violentia, apoplexiis multum culpa in vitiatis hypochondriorum visceribus haud raro haesisse, siue inde labes ipso in encephalo excitata, siue modo sympathice hoc affectum fuerit. Lubentissime largior illustri atque praestantissimo TISSOTO, aliquantum difficile saepe esse judicare, num ex ventriculo aut cerebro nauseae et vomitus ortum habeant, dum plethora cerebri fordes ventriculi saepe mentiatur. Concedo quoque non sine summa cautione aliquem emeticis locum dari, neque raro praestare, vbi certiora non adsint illorum vere tuti vsus indicantia, si ab iis abstineamus b). Etiam ipsi huic summo Viro plane adstipulor in rejiciendis ex hujus morbi, quum

san-

g) Conf. BOERH. *aph.* §. 267. et VAN SWIETEN T. I. p. 432. seqq.

b) *Epist. ad Haller. de var. apopl. et hydr.* p. 118. 119. Conferri quoque merentur de noxa emeticorum apoplecticis minus prouide exhibitorum obseruata MORGAGNI *de caus. et sed. morb. ep.* III. n. 11. 12.

sanguis ad caput nimis congestus fuerit, curatione stomachicis et spirituosis medicamentis omnibus, et multo magis, quae merito atro carbone hic notanda sunt, sopientibus et praesertim opiatis. Probandam in multis sanguineis atque calidis apoplexiis, immo summis extollendam laudibus ejus methodum credo, attamen inde minus recte colligendum, aliis mecum sentientibus, existimo, non aliquam et in illo ipso apoplexiae genere et in aliis pluribus vtilitatem remanere notitiae de sympathica hypochondriorum in encephalum quoad apoplexiae originem efficacia; quamvis minime putem ad emetica et stomachica roborantia ideo confugiendum esse, si medico etiam satis certo constiterit, nauseam vomitusque spontaneos ubi apoplecticum corripiant, non ex cerebro idiopathice affecto, sed ex hypochondriorum et ventriculi labe excitatos esse.

§. X.

Multum quoque lucis nostrae doctrinae affundere videtur singularis affinitas, quae apoplexiae verae cum febribus quibusdam intermittentibus perniciosiss, sensuum aequae internorum ac externorum functiones cum voluntaria artus mouendi facultate vel suspendentibus, vel multum imminuentibus aut alterantibus intercedit. Satis inter medicos nostri aevi de febrium hujusmodi indole, atque efficaci certaque iis medendi methodo constat, et quidem
tali,

tali, quae non respondet alicui causae, cerebrum per idiopathiam afficienti. Habent ejusmodi febres nonnunquam exquisitae apoplexiae speciem, aliquando et frequentius parapoplexias aemulantur, alias graui sopore, aut catalepticos insultu, aut stupore profundo, ipsis his affectionibus cum febre conjuncta intermittentibus, sese distinguunt. Si, quae de febribus hujusmodi, easque curandi ratione, a summis viris SYDENHAMO, *i)* MORTONO, TORTI, WERLHOFIO, SENACO, FR. CAS. MEDICO, tradita sunt, perpendimus, vix vllum dubitationi locum esse facile perspicimus, quin ex viscerum hypochondriacorum certa perturbatione, et bile praesertim abundante atque vitiosa, nec raro simul turgente, febres hae cum grauissimis suis symptomatibus vel vnice vel maximam saltem partem dependant. Hanc enim originem non solum observatio docet aegrorum, iis in febribus laborantium, qui de nausea, oris amarore et vertigine extra paroxysmos conqueri solent, nonnunquam sponte biliosos corruptosque humores cum leuamine vomunt, etiam a vomitu, veriora secundum indicantia, ipsis moto se melius habent, aliquando et pluribus quae idem praecordiorum vitium declarant, afficiuntur symptomatibus *k)*; sed ipsa quoque omnium fere inter-

i) Epist. ad Rob. Brady op. uniu. p. 307.

k) WERLHOF. obs. de febr. p. 24. ad 29. F. Cas. Med. Samml. von Beobacht. 2 B. p. 396. 397.

intermittentium natura, qui vtpote morbi praecipuam certe in hypochondriis causam habent, atque cadauerum, perniciosis hisce febribus defunctorum, institutae sectiones, memoratum illum hujus mali fontem quam maxime confirmant. Non reperimus mentionem, de aliqua memorabili cerebri labe in his cadaueribus reperta, bonis ab auctoribus factam, qua idiopathica cerebri affectio instar causae illarum febrium stabiliretur; attamen contra expresse notatum, sectiones defunctorum, pariter ac symptomata et procatareticas causas, bilis praecipue officinam crasin et directionem valde vitiata fuisse *l*). Iam vero et maxime notabile, veri, quem dicunt, attoniti morbi minime raram hanc indolem esse, ut plures per insultus majori vel minori intercedente remissione, et plerumque cum indicibus conjunctae febris, corripiat. Quum latere non possit medendi artifices peritiores, quanta sit febrium manifeste remittentium atque intermittentium cognatio, tum quoad causam praecordia occupantem, tum quoad curationem ipso usu confirmatam *m*); magni certe roboris argumentum haec etiam observatio praebet, quod in remittentibus et exacerbantibus apoplexiis

noxia

l) Conf. WERLH. *lib. cit.* p. 27. F. CAS. MEDICVS. Samml. von Beobachtungen aus der Arzneywissenschaft. I. B. p. 379.

m) MORTON *pyretol. exerc.* II. C. I. PRINGLE Beobachtung über die Feldk. p. 204. 199. WERLH. *obs. de febr.* p. 50. §. V. LOMM. *observ. medic.* p. 5. edit. Amst. 1761. WINTRINGHAM *comm. nosol. passim* ut p. 47. 50. 52. HOME *princ. med.* P. II. sect. VI. p. 90. §. 3. 6. 12.

noxia quaedam adfit praecordiorum dispositio, ipso in excitando morbo attonito efficax. Praeterea vero ut proteiformis interdum febris intermittens genius est, siquidem, asserente MORTONO, *inter innumera illa symptomata hasce febres comitari solita nullum est, quod non aliquando ita vehementer saeviat, ut vita aegri inde in praesens discrimen adducatur; et typus febris in variis suis stadiis, algoris, caloris et sudoris abscondatur penitus, et opprimatur, ita, ut neque ex urina, temperie, pulsu, vel alio quoque solito modo distinguui possit n)*; sic certe nihil impedit, quo minus periodicas typicasque apoplexias, a pluribus observatas, o) ad morbos, indole sua spasmodica ex affectis hypochondriis oriunda, febribus intermittibus per similes referamus. Neque MORTONVS ipse apoplexiam illis accensere dubitavit absconditae febris symptomatibus, quae propriis remediis incassum tentari asseueravit p). Etiam observatae nonnunquam epidemicae fuerunt apoplexiae; q) sed in epidemicis acutis quam frequentissime inquinatae humoribus corruptis et biliosis reperiuntur primae viae, ita quidem ut non modo plura hinc symptomata repetenda sint, verum etiam ipsi illi morbi ex magna parte saepe ab eadem causa dependeant. Et si HUXHAMIANA conferimus observata, illae, quas

A a 2

vir

n) *Pyretol. exerc. I. C. IX. edit. Genev. p. 73. 75.*

o) *Conf. F. CAS. MEDICVS Geschichte period. Krankh. I. B. p. 5.*

p) *Libr. cit. p. 73. 74.*

q) *v. F. HOFFM. Med. R. S. T. IV. P. II. S. I. C. VII. Thes. path. §. XIII.*

vir magnus descripsit, constitutiones epidemicae, apoplexiae cum certis aliis morbis fauentes, et unde locus est conjecturae, aliquam inter morbos ejusdem temporis atque regionis affinitatem, quoad modum affectionis corporum fuisse, omnino videntur confirmare, vitiosas ad praecordia colluies et laesas viscerum hypochondriacorum functiones multum culpaе iis in morbis habuisse. Sic de mense Majo 1738, alios inter morbos non dissimili conditione praeditos, retulit; *quosdam apoplexia, quosdam paralysis corripuit, addiditque: febres intermittentes passim r*). In mense Julio ejusdem anni, *graves capitis morbos adhuc passim, simulque colicam biliosam frequentem, et largissima mulierum menstrua, observavit s*). Porro Mense Majo 1743. *plurimi apoplexia correpti sunt, et plures erepti, simulque et febres quotidianae et tertianae creberrimae longe lateque fuerunt, etiam dysenteriae et febres catarrhales grassatae sunt t*). Neque multum ab his discrepant alia BAGLIVI, LANCISII, LOMMII, FORESTI, plurimumque observata. Denique vel paucissimis modo hic etiam indicasse suffecerit, ceterum omnino fatis notum tritumque, quam plurimis nempe et fere quotidianis observationibus certo constare de frequentiori origine vix non omnium sensorii communis et nervosi systematis affectionum ex aliquo, suis etiam e signis
per saepe

r) Oper. omn. T. I. p. 202.

s) Ibid. p. 203.

t) Ibid. p. 289-293.

perfaepe detegendo, praecordiorum vitio; siue ob-
rutae nimia ingestorum copia, siue aliena eorum et
acriori indole laceffitae fuerint primae viae, siue
interna ex causa colluies biliosa aut acrior alia ad
praecordia delata sit, siue quacunque alia ratione
nerui per hypochondria dispertiti grauius irritati
fuerint. Eo igitur minus dubitandum, quin potestas
ventriculi atque generatim chyli officinae perturba-
tae et inquinatae ad excitandum quoque aut facilio-
rem reddendum attonitum morbum plurimum va-
leat, quo certius et euidentius exploratum habe-
tur, cognatis in morbis insignem haud raro ejusdem
causae vim esse. Quibuscum optime quoque con-
sentiunt, quae Vratislau. medici tradiderunt: *cujus-
cunque fuerint temperamenti, qui vel hoc anno (1702),
vel etiam secutis temporibus apoplexiam incurrerunt, in
eo fere omnes conuenerunt, quod vel in potu, vel in ci-
bo, vel in utroque excesserint, id quod etiam alii scri-
ptores de suis apoplecticis diligenter obseruarunt u)*.
Memorabilis quoque LANCISII obseruatio, qui ne-
minem fere asserit, sobriae vitae addictum, apople-
xia corripui solere.

§. XI.

Ex praestantioribus argumentis, vnde morbo-
rum difficiliorum origines probabilius colligimus,

Aa 3

cada-

u) *Hist. morb.* Vratisl. p. 282. Conf. quoque F. HOFFM. *Med. R.*
S. T. IV. P. II. S. I. C. VII. *Th. path.* §. XV. et MORGAGNI
de caus. et sed. morb. ep. III. n. 26. 28.

cadaverum quoque sectiones habentur. Iam supra vero nonnullis auctorum summa fide dignissimorum testimoniis confirmare studui; non ita perpetuo in apoplecticorum cadaveribus aliquam sub cranio labem repertam esse, ut modum impeditae functionis nervorum, sensui motuique voluntario inferuentium, ubique inde satis tuto deriuare liceat. Qui allata et aliorum plura pensitauerit observata, assensum non facile denegabit ingeniosissimo medicinae experimentalis Auctori cel. THIERY jam superius laudato, ita inquiringi: *J'ai lu a peu pres ce, qui a été écrit sur cette matiere, je n'ignore pas les signes établies pour caractériser les différentes sortes d'apoplexies, non plus que les méthodes relatives qu'on leurs a opposées; j'ai suivi plus de soixante apoplectiques, je serois en état de rendre compte. Je n'ai point d'opinion à soutenir, ni à combattre par préférence; je n'ai appris à respecter que la vérité, et je la cherche. J'ai vu, j'ai observé, et je demande, qu'est-ce que l'apoplexie v).* Fere simili plane modo jam de occulta et sub cranio facpe nequaquam reperiunda, et aliorum cerebri morborum et apoplexiae origine valde et prolixè conquestus fuerat GVIL. BALLONIVS; w) ut adeo quis facile crederet, a binis hisce seculis longe minus observando secundoque medentes in accuratiori hujus morbi notitia profecisse, quam sperare omnino licuisset. Verum etsi negari nequeat, talem subinde causam

v) *Libr. cit. p. 144 - 146.*

vv) *Cons. medic. L. II. hist. I. comment. edit. Tronchini. T. III. p. 46.*

causam sub cranio vere repertam esse, quae pre-
mendo nobiliorem aliquam encephali partem apo-
plexiam omnino efficere potuerit, hujusmodi tamen
obseruatis eam haud refelli existimo sententiam,
quae multam hypochondriis vitiatis potestatem ad
producendam apoplexiam tribuit. Neminem enim
artis nostrae vel mediocriter peritum latet, quam
saepe ex impeditiori humorum per hypochondriaca
vilcera progressu, ex perturbatis, quae chylopoiesis
postulat, secretionibus, et ex collectis crudis et acri-
bus ad praecordia humoribus, biliosaque praesertim
colluue, congestio sanguinis atque feri ad caput
excitari soleat. Ideoque nec improbabile videtur,
originem grauiorum, quae in capitibus apoplectico-
rum reperta sunt, vitiorum ex diutius perseverante
viscerum hypochondriacorum alienata conditione
saepe repetendam esse. Eo vero minus hac de re
quis dubitare poterit, qui et animum ad varia me-
morabilia vitia, in hypochondriis apoplectico-
rum, per sectiones cadauerum haud infrequenter
detecta, probe aduerterit. Cujus adfertur veritatem vel
sola illa obseruata quae accuratissimus MORGAGNVS
de compluribus hoc morbo defunctis tradidit, fatis
manifeste confirmant. Enarremus exempli loco,
quae in prima ejus obseruatione, x) qua mulieris

Aa 4

annos

x) *Epist. III. n. 2. p. 16. plura vide in eadem epist. n. 4. p. 18. ep. IV n. 13. 14. 15. p. 28. n. 19. p. 30. n. 24. p. 32. n. 26. p. 33. n. 30. p. 34. n. 35. p. 36. ep. V. n. 19. p. 42. Refert etiam cel.*

annos LV. natae, et ex breui insultu apoplectico mortuae, sectionem exposuit, praecipue nobis notabilia occurrerunt. Intestinum Colon ad magnos tractus iusto angustius, foetor vt in gangraenis intestinorum incipientibus, intestina tenuia hic illic colore sanguineo saturatiori, calor in ventre, etsi frigida tempestas erat, et trigesima post mortem hora sectio instituebatur, etiam tum aliquis superstes, lien veluti guttulis sanguineis superficietenus distinctus, in hepatis vesicula, contractiore quam par erat, bilis quasi cruenta; hepar, non secus ac si olim inflammatione laborasset, pluribus quam consuevit nexibus septo transuerso adhaerebat, liquidum hic illic ea in facie, in altera fere vbique, splenica arteria ad latus habebat quasi diuerticulum hemisphaericum, idque osseum, et concreto vt videbatur sanguine plenum; etc. Haec omnia praeter naturam in infimo ventre comparata sine dubio magna ex parte jam antea adfuerunt, ejusque sunt indolis, quae magis magisque, prout etiam aliis in multis morbis liquet, vitia humoribus inducere, atque congestiones illorum vel ad alia viscera, vel ad encephalum, etiam cum varia fabricae illorum corrupte-

cel, F. CAS. MEDICVS (Gesch. period. Krankh. 2^{te} B. p. 299) ex propria sua observatione, de binis cada. eribus apoplexia periodica defunctis, quod illorum dissectione accuratissime instituta, encephala integerrima, vt nec in sanissimis meliora dari possint, reperta fuerint, contra vero praeter modum bilis in primis viis abundauerit, propinquaque viscera hoc humore inducta, et membranae illo penetratae, apparuerint.

ruptela, excitare potuerunt. Quemadmodum enim HIPPOCRATEM secundum experientiam adseruisse omnes confitentur: *non derepente morbi hominibus accidunt, sed paulatim collecti aceruatim apparent*, quam verisimillime alienata prius illa viscera censentur, vnde humorum crasis maxime pendet, quorumque perturbata functio imprimis cerebro frequenter nocet, quam grauior et lethalis laesio ipso in cerebro generetur. Quibuscum et exacte conuenit adsertio LANCISII, de causis repentinae mortis, in quas ipse singulari studio inquisiuerat, referentis: *hoc vero perpetuo est obseruatum, ultimum diem repente a nemine, quod sciam, visum fuisse, qui labe aliqua fluidorum, viscerum aut saltem canalium a multo tempore non laborauerit, quique simul non fuerit stationarius miles in castris Bacchi aut Veneris y)*. Plures etiam obseruationes, de grauibz vitiis in hypochondriis apoplecticorum repertis, modo memoratae similes recenset laudatissimus MORGAGNVS, quas breuitatis causa nunc omittimus. Sed notandum praeterea eiusmodi alienatam dari posse in visceribus hypochondriacis conditionem, quae quidem vix vel parum mutatum sistat externum viscerum habitum, colorem, fabricam, vt quoque facile praeterfugiat sensum inuestigantis anatomici, quae tamen satis valida polleat efficacia ad perturbanda systematis nervosi munia et impediendam sensorii communis functionem. Quis enim intermittentibus in febribus,

A a 5

etiam

y) Oper. C. I. §. V. p. 32.

etiam soporosis et apoplecticis, in quibus sanandis, quam necessaria praemissa fuerint, Peruvianus inprimis cortex insignem promeruit laudem, etsi tunc praecordia vitiosis humoribus inquinata, aut perturbata succorum, quibus chylopoiesis perfici debet, secretionem fuisse talemque facile continuare posse constet, memorabilem habitus, coloris et conformationis alterationem suspicaretur? Et omnino secretio bilis praeter naturam comparata esse potest, ut crasis aliena sit, et copia abundet, quamvis hepar sanissimum appareat z). WILLISIVS in ea, quam supra jam adduximus observatione incisi cadaueris apoplectici, nec in hypochondriis aliquam labem deprehendit, pariter ac vitiosi nihil in encephalo animaduertit; quod eo magis mirum, quum aeger diu inualetudinarius, referente WILLISIO, et capitis grauitate cum torpore insolito affectus fuerit a). Et ubi ex ingluuie aut ex nimis ingestis spirituosus vel aliis acribus, vel etiam venenatis rebus apoplexia suscitatur, forsitan fieri quoque facile poterit, ut ejusmodi causae nota sensuum ope nulla in cadauere obseruari queat.

§. XII.

Argumentum etiam praecipuum, quo doctrina nostra de consensuali praecordiorum in apoplexia exci-

*) FR. CAS. MEDICVS *Gesch. period. Krankheit.* 2. B. p. 290. und *Samml. med. Beobachtungen.* 1. B. p. 51. 67. 139.

a) *De anim. brut. part. path.* C. VIII. p. m. 143.

excitanda potestate, maxime stabiliri videtur, ipsi praebent salutare per saepe obseruati successus et naturae moliminum et artis auxiliorum, quibus expurgatae primae viae, quibusque a stagnationibus humorum liberata fuerunt hypochondriorum viscera. Ita enim per ill. VAN SWIETEN apoplexiae causam in ventriculo talem haerere posse docuit, quae per vomitum aequae ac per aluum expelli possit *b*). Suam adfertionem exemplo viri celeberrimi illustrat, qui subito in amicorum consortio incepit oculos hinc inde conuertere, mox obmutuit, et apoplecticus cecidit. Dum conclamatum crediderant summi in arte viri, post quadrantem horae nullo tentato remedio praeter sanguinis missionem, vomuit, praeter contentos in ventriculo cibos, ingentem copiam pituitae et quidem tantam, quantam humanum ventriculum capere posse vix credi poterat, statim redierunt sensus et motus, et blando somno refectus, sequente die omnino sanus fuit. Huic similis est obseruatio, quam tradit WEPFERVS, *c*) facillimeque plures adferri possent. Et hoc non mirabitur, quem insignis ventriculi cum sensibus internis consensus in morbis etiam apoplexiae affinibus manifestus non latuerit, aut euidentem plurium medicorum experientiam de ipsius apoplexiae frequentiori origine bene attenderit HENR. AB HEERS populares suos ingluuie commestationibusque apoplexiam incurrere solere,

b) *Comment. Tom. III. §. 1017. p. 236.*

c) *Lib. cit. p. 510.*

solere, et phlebotomia vix vnquam curari retulit *d*). Spontaneo alui fluxu aliquando solui apoplexias, quod fane notissimum est *e*), hisce cum obseruatis manifeste quoque consentit. Ideoque et permultos praestantissimos in medendo artifices, ipsum naturae tramitem legisse non dubitamus, quum certiora secundum indicantia, iustaque sub cautione, etiam praemissis, vbi opus, phlebotomiis, enematibus, scarificationibus, internisque digestiuis, emetica et cathartica in apoplexiae curatione vsurparunt, siquidem et insignem saepe vtilitatem inde obseruauerint. Ita HIPPOCR. medendi rationem ad veram apoplecticam affectionem tradens, inter alia quoque commendat *vsu enematis, quod bilem vehementer ducat, et quum sensum aeger receperit, thapsiae succi in multa calida aqua dati, quo quam citissime euomat.* *f*) Et vbi idem accuratae attoniti morbi descriptioni alio in loco *g*) curationem subjunxit, infernam quoque aluum purgare consuluit. Non dubitauit, gloriae HIPPOCRATICAE inprimis aemulus, diuus SYDENHAMVS, in concinnis suis processibus integris, post adhibitam satis largam sanguinis missionem, efficacioris, alia inter auxilia, vomitorii, atque dein etiam purgantis vsu commendare *h*). Idem quoque fuit

THOM.

d) *Obseru. med.* p. 173. *Obs. XVIII.* Conf. locus ex JOS. REGA
jam supra cit. C. VII. p. 92 93.

e) v. SWIETEN T. III. p. 285.

f) *De morb.* L. III. C. VII.

g) *De morb.* L. III. C. III.

h) *Oper. edit.* Lugd. 1754. p. 597.

THOM. WILLISII consilium *i*). Recentem apoplexiam multoties procurato vomitu se superasse, refert HELMONTIVS *k*). In euacuatione turgentis materiae aptis pharmacis, praemissis quae conditio aegri postulauerit, excitata multum spei ponit FORESTVS *l*). Post enematum usum, inquiunt Vratislauienses Medici *m*) vel ad venae sectionem vel ad vomitorium progrediendum esse censemus, et subjungunt conditiones quibus illud, vel hoc remedium magis aptum esse existiment. Eadem autem ratione hoc in morbo, ac pluribus in febrium generibus rem se habere, nobis haud improbabile, quum aliquando phlebotomia, et reliqua medendi methodus antiphlogistica, nonnunquam vero euacuantia, primas curationis partes teneant, saepissime vtriusque generis auxilia eodem in aegro requirantur. Ideoque forsitan haud inepte HENR. JOS. REGA serosae aut pituitosae apoplexiae nomine eas hujus morbi species comprehendendi voluit, in quibus V. S. minus conueniat, contra vero emetica, cathartica, et enemata acriora totam impleant paginam *n*). Ea vero praesertim sub conditione, quod serosa aut pituitosa sit apoplexia, catharticis et emeticis plures medicorum lubentius locum concedere videntur, quam in illis ejusdem specie-

i) De anim. brut. part. path. C. VIII. p. m. 141.

k) In cap. confirmatur morbi sedes in anima sensitiva. Op. omni. p. m. 533. Conf. quoque p. 321. S. 40. p. 587.

l) Obs. L. XXV. L. X.

m) Hist. morb. Vrat. p. 297.

n) De sympt. C. VII. p. 93.

speciebus, quae nomine sanguinearum comprehendi solent. Sic BAGLIVVS, apoplexias, ait. pituitosas, ubi pallor faciei, et pulsus exilis, vomitoriis et purgantibus optime cedere, a sanguinis missione ingrauescere; contra sanguineas, ubi rubore suffunditur facies, vasa capitis maxime turgent, nec pulsus exiles sunt, a secta vena in melius abeunt, et a vomitoriis exacerbari solent o). Similisque fere est sententia BOERHAAVII p). Attamen, quum frequentissima medentium attentorum obseruatione liquido constet, biliosa in praecordiis stagnante colluie, acribusque factis ciborum male digestorum et abundantius assumptorum recrementis, etiam turgentem reddi sanguinem, capitisque calorem et faciei ruborem facile excitari, eademque ipsa vitia nonnumquam apoplexiae originem praebere; neque cautus etiam vomitoriorum vsus ad apoplexiam manifeste pituitosam vnice videtur esse restringendus. Memoratu digna est historia, quam HENR. ALB. NICOLAI, vt, quas tragoedias luderet bilis, animi passionibus efferata, adiecto exemplo confirmaret, propria ex obseruatione retulit. q). Sexagenario major senex temperamenti alias vegeti, et ad cholericum accedentis, in publicis constitutus negotiis, plenaria

o) *Oper. omn.* p. 111. et 217.

p) *Aph. de cogn. et cur. morb.* §. 1023. 1026.

q) *Dissert. de direct. vasor.* §. XXIV. IN HALLERI *coll. dissert. anat.* T. II. p. 549. Conf. FORESTVS L. X. *obs.* 70. LAT-NEKVS *prax.* L. III. VERGELLONI in *epist. de bile aucta et imminuta in cripta* BIANCHO.

ria corripiebatur fideratione. Miffo primum sanguine, data fuit largior tartari emetici dofis, vnde infignem pituitae craffae, et porraceae bilis euomuit quantitatem, atque hinc fenfim fenfimque fui compos factus, poft vnum vel alterum diem priorem fuam recuperauit fanitatem. Redeuntibusque poft aliquot menses fimilis mali prodromis, vna cum exundantis iterum primarum viarum faburrae indi-
ciis, praeter alia auxilia inprimis emetico plane re-
ftitutus eft. In colica biliofa defideratiffimus nofter
WERLHOFFVS alia inter fymptomata neruofa, fre-
quentiffime quoque carum et ipfam apoplexiam a fe
obferuatam effe retulit r). Minime vero probabile
videtur, vbi ex turgente in praecordiis bile insultus
apoplecticus ortum habuerit, vulgaria pituitofi mor-
bi indicia in aegris reperiri; ideoque cum catharti-
cis et emeticis illis in biliofis apoplexiis ex omnium
fere confenfu locus fit, pariter ac in illis, quibus
ingluuies anſam praebuit, neutiquam folis manifeſte
pituitofis auxilia illa euacuatoria deftinata effe exifti-
mamus. Notatu dignum, quod affirmationes noſtras apte
confirmat, exemplum affectionis parapoplecticae fi-
mulque ſpasmodycae, tempore fluxus menſtrui in vir-
gine per iram excitatae, et copioſa materia bilioſa
per alium repetitis clyſteribus eduſta optime ſana-
tae, praefantiffimus ZIMMERMANNVS retulit s). For-
fitan

r) *Obſ. de febr.* p. 28. not. 1) Conf. loc. cit. e BAGLIVI *oper.*
omn. p. 217.

s) *Von der Erfahrung* 2. B. 441. Sect.

fitam nec b. ELLERO licuisset suae methodo ita praeclaram laudem tribuere, *quod fere omnes ex multis illis, qui apoplectici per seculi circiter dimidium opem suam efflagitarint, consiliisque suis morem gesserint, ex voto restituti fuerint t)*, nisi fatis valida auxilia, et expurgandis primis viis, et liberandis hypochondriorum visceribus aptissima, reliquis haud neglectis, absque vlla temporis jactura adhibere solitus fuisset u). Mihi vero nunc supersedendum existimo exponendis cautionibus, in cathartorum et emeticorum commendatione observandis; siquidem meum ad argumentum sufficiat frequenter observata illorum utilitate culpam confirmari, quam hypochondriorum vitia conferant ad excitandam apoplexiam.

IX.

Dissertatio de arthritide vaga. Publice proposita Goettingae, 1768. Resp. BALTH. DVGEND, Oldenburgico.

P R O O E M I V M.

Quanti sit in facienda medicina momenti exquisita accuratiorque notitia de vera indole et varietatibus arthritidum ac morborum illis affinitate juncto-

t) *Observ. de cogn. et cur. morb. praesert. acutis.* p. 289

u) *Ibid.* p. 293. seqq.

junctorum: quamque insignis pretii sit aestimanda methodus certior medendi hisce affectibus: ita certe peruulgatum est, ut multis haecce verbis exponere haud opus esse videatur. Neminem enim facile fore existimo, qui contrarium sustinere audeat, si modo animo secum reputare velit: diros hosce morbos non modo atrocibus dolorum tormentis, haud valde raro plures per hebdomades homines affligere, imbecilliores saepissime, et similis ad mali reditus, leuiore data occasione, procliuem, relinquere valetudinem, vel etiam modo mitescentem aliquo saltim gradu perseueranter, aut parua per interualla perfrequenter dein homines vexare; miserabili porro atque dolendo valde modo, quamdiu adfunt articulares illi morbi, membrorum, ad plurimas functiones, vitae commoditati et sustentationi atque tot erga alios officiis dicatas, necessariam flexilitatem, mentisque arbitrio subiectam mobilitatem, per varium temporis et nonnunquam valde diuturnum spatium, nec tam raro ad ipsum vitae usque terminum, tolli, vel multum saltim minui atque infringi; sed tam atrocem quoque huic morbo esse naturam, ut interdum per varias decursus sui anomalias et metaschematissimos vitae quoque discrimen facile adducat. Quamuis enim non desint exempla, nonnullis salutare postea euasisse membrorum morbos praecipueque articulares; at tamen, nec huic morborum generi vitae periculum plane deesse, adeoque ad ipsam mortem, nonnun-

quam lento progressu, aliquando autem cito et inopinato etiam, hosce affectus transiisse, infelicesque aegros trucidasse, plurimis profecto et prohdolor! nimis certis obseruatis edocti, scimus. Quare cum ab adspirante ad summos in apollinea arte honores priuilegiaque cum iis conjuncta, specimen inaugurale exposcat legum academicarum ratio, vix metuendum habeo, ne materia indigna censeatur, in qua enucleanda laborare possim, si hac in dissertatione arthritidis illius, quae vaga multis dicitur, naturam et medendi methodum pro viribus exponere suscipiam. In qua vero, si lectores forsan reperiant, quae taxanda minusque recte dicta videri possint, vel si qua alia adhuc addenda omissa neglectaque prorsus sint, veniam me vel ideo non difficulter impetraturum spero, quod de materia graui dicam, neque a tirone opus absolutum expectare fas sit.

§. I.

Arthritidis nomen apud veteres medicos latiore sensu quam in hodiernorum auctorum libris occurrere reperimus. Praeter eum scilicet morbum, quem hodie quidem plerique arctiori sensu arthritidem salutant, alias quoque affectiones, in quibus artus externi corporis dolent, sub arthritidis voce comprehendere consueuerunt optimi illi Medicinae antistites, id quod HIPPOCRATIS, ARETAEI, GALENI aliorumque ex antiquis medicorum, et hisce
multo

multo quoque recentiorum, libros euoluentibus facile patere arbitror. In dubium enim vocari vix poterit, minori cum accuratiōe veteres vt aliis quoque exemplis hāud paucis constat, morborum species, atque quodammodo affines, vere tamen inter se discrepantes, affectiones denominatione accommodata distinxisse, etiamsi res ipsas probe cognitās compertasque habuerint. Atque sic etiam, nī fallor, quoad arthritidis species variosque illis morbis affines rheumatismos, fere sese res habuit. ARETAEVS quidem a) arthritidem explicat per *communem omnium articulorum dolorem*, additque, *pedum dolorem podagram vocari, coxendicum ischiada, manuum vero chiragram*; docet tamen *morbi quoque transitum in dorſi thoracisque musculos fieri, et incredibile esse, quam malum serpat*, — etiam *tendines et musculos cum distentione dolorem pati, nec non maxillarum et temporum musculos; item communicari renibus et vesicæ, post omnia nares et aures et labia affici* — *uniuersam ossium compagem morbum populāri, hāud secūs atque pedis aut manus articulum. Etsi morbus differentiam ex calore et frigore præ se ferre videatur, sibi tamen placere, unicam esse morbi causam.* Explicare dein quoque conatur, quando frigidus et quando calidus affectus fiat. Sed omnibus hisce, et reliquis ab eodem Auctore subjunctis, non satis declarari specierum arthritidis differentias, cuius vel in pathologiæ recentiorum elementis mediocriter versato facile li-

B b 2

quere

a) De caus. et sign. morb. diut. Cap. XII.

quere existimo. Praeterea quisquis etiam fuerit Auctor libri inter HIPPOCRATICOS reperiundi, si non ipse HIPPOCRATES, ejus tamen disciplina probe imbutus, arthritidem describit *b)* instar morbi brevis, quem et acutum vocat, quamvis non lethalem habeat, quem quoque junioribus magis quam senioribus contingere dicit. Breuiter sic describit: *Articularis morbus (ἀρθρίτις ὁξεία) cum corripuerit, calor et dolor corporis articulos inuadit, corripit autem etiam acutus, et in alium atque alium articulum tum remissiones tum etiam intensiores dolores incumbunt, subjungit statim c) podagram violentiorem esse omnibus ejusmodi circa articulos morbis, diuturnissimum quoque et aegre cedentem morbum. Conducere autem ait et huic eadem quae morbo articulari. Mentionem simul facit doloris in digitis relictī. Utut vero haec aliaque ab Hippocrate de arthritide memorata fane vtilissima sint et experientia maxime confirmentur, minime tamen satis apte distinguendis istis affectionibus sufficere poterunt. Sed nec praetereundum, in definitionum medicarum libro inter Galenicos reperiundo, arthritidem aperte inflammationem dici, quae articulis accidit, nervisque magnum adfert dolorem. Ut hanc sententiam vsu receptam veteribus fuisse ipsa nominis ratio, exemplo pleuritidis, nephritidis, ceter. declarare videtur, ita et eandem curatio antiphlogistica, ab HIPPOCRATE, GALENO, posterioribus*

b) Scđ. XXXI. Lind. T. II. p. 120.

c) Scđ. XXXII.

bus Graecis et Arabibus aduersus arthritidem maxime commendata, omnino confirmat. Videtur ergo, si qua constituenda sit ad mentem veterum arthritidis definitio, notanda esse differentia inter generaliore et specialiore huius vocis significationem, quarum illa dolorem in articulis, siue membranaceis proxime ad iuncturas infra cutem ejusque cellulofam partibus, inflammatorium et cum aliqua febre conjunctum, non valde breuem ac transitorium, sed perseverantem, etiam idiopathicum, ex interna tamen causa sponte natum, designat. Specialior vero istum denotat, qui non fixam aliquam sedem habet, articulos quidem ipsos, plures vel pauciores, vere corripit, sed inaequali non solum vehementia, verum et de loco in locum migrat, partesque musculofas etiam subinde et membranaeeas varias, mouendis articulis non feruientes, pariter afficit. At vero notatu quoque dignum, veteres etiam Graecos affectuum illorum articularium originem nonnunquam a peculiari rheumate deriuare, vt videri potest apud HIPPOCRATEM: d) *Si modica fluxio fuerit, coxendicem et articulorum diuturnam affectionem* (κεδμχτα) *facit*; eamque originem pluribus dein verbis vlterius exponit. Similisque plane est GALENI sententia, quam aequae aperte proposuit e). Sic etiam GORRAEVS vbi arthritidem definit, tumorem articuli dicit dolorificum, quem flu-

B b 3

xio

d) *De loc. aff. Cap. XIX. Lind. Tom. I. p. 374.*

e) *De sang. miss. C. VIII.*

xio in eum decumbens excitauit. f). De hoc etiam auctore praeterea notamus, ipsum iis non adfentire, qui inflammationem in arthritide omni requirunt, etsi largiatur, in aliqua tumorem phlegmonodem censendum esse. Ceterum et ipse ex arthritide in longius ab articulis distitas partes, vt musculos cutemque, affectionis labem peruenire, idque magnitudine fluxionis contingere, docuit; et explicatis morbi speciebus, quae ab affecta parte nomen acceperunt, subiungit: *si vero in multos simul articulos iste humor incidat, tunc vere et proprie arthritidis nuncupatur.*

§. II.

Jam vero consuetudo recentioribus temporibus inualuit, peculiari nomine rheumatismi quendam morbum, quo articuli multo dolore infestantur, appellare, idque praesertim fieri coepit, ex quo GVIL. BALLONIVS de hoc affectu, quem apud antiquos pene *ἀρθρίτιον* dixit, cuique inter primos ipse rheumatismi nomen dedit, propria sua secundum obseruata tractationem euulgauit g.) Vbi autem ille hujus affectus descriptionem tradit, refert, partim corpora sana, et plethorica quidem, juvenilia, valida atque sanguinea, partim quae morbo longo, falsa et praecipite crisi solui viso, laborarunt, eidem obnoxia esse. In hoc morbo manifestam febrem haud esse, tradit, sed conclusam quodammodo,

f) *Definit. med.*

g) *Opp. omn. edit. Tronchini Tom. IV. p. 313.*

dammodo, vt vere sine febre succedat. Dum affectio haecce, ipso narrante, quem adoritur, totum corpus dolet, facies nonnullis rubet, circum articulos maxime faeuit dolor, vt ne minimum quidem vel pes, vel manus, vel digitus sine dolore et clamore, moueri possit. Cum partibus apprimitur manus, sensus est et perceptio, licet etiam h' inde attrectaueris, cuiusdam caloris acris. Si pulsus consulis, febris aut nulla aut exigua esse videtur, et tamen febris est reuera, sed non valde magna. Dolores quidem noctu exacerbantur, sed febris exacerbationes non habet manifestas. *Omne musculosum quoque et neruosum genus sero ac sanguine putri proluitur, qui in partibus istis ἐπιφλόγισμα, aut φλεγμονῶδες τι parit.* Postea subjicit: *quod arthritidis est in parte aliqua, id ipsum est iste rheumatismus in toto corpore, at arthriticus dolor certis periodis repetit, certisque temporibus, iste ἐσυματισμός non item, nisi quod in iis qui in vitae genere peccarunt, tandem habitum aut diathesin arthriticam afferre possit.* — Nec melius explicari describique potest hic affectus, quam proposita analogia et affinitate, quae est inter hunc et arthritidem, et hercle plerique, immo Medici, qui nondum hunc affectum cognitum habent, arthritidis vniuersalis nomine istum donauerunt. At curatio, a quo humore principium ducat, edocebit. Ea vero, quam tradit curatio, maxime antiphlogistica est, sanguinis nempe largiorem et saepe repetitam missionem, a qua medicorum vulgus abstineret, commendat, non tamen diffite-

tur, in paroxysmo etiam arthritico vtiliter secari venam posse; dein clysterum vsum frequentem, etiam cassiam et lenientia laudat, praeterea quoque haemorrhagiam, et sub finem sudores et vrinam crassam multum conferre, quae vero inflammationes augere solent, omnia nocere, docet.

§. III.

Ast, profecto, quantumuis magna sit merito BALLONII nominis existimatio, non tanti tamen momenti rationes illae, quas allegavit, habendae videntur, vt dimittendae vsitatae atque inueniendae nouae morbi istius denominationi vere sufficerent; praesertim cum hic ipse affectus haud obscure in libro *περί πλεθῶν* Hippocratico, passimque a veteribus, *ἀρθρίτις* appelletur, aliique recentiorum ante BALLONIVM et ipsa ejus aetate, LEONH. praecipue BOTALLVS et CAR. PISO, nomine arthritidis pro eodem affectu, cui et simili modo mederi docuerunt, contenti fuerint, contra vero rheumatis et rheumatismi nominis longe minus constans, sed maxime vaga, ipso concedente BALLONIO, eo tempore fuerit significatio. Et quamuis curationem aliam poscat BALLONII rheumatismus, quam arthritides frigidae et periodicae, non inde tamen desumenda fuisset nouae denominationis ratio, verum aptius, nomine generico arthritidis seruato, differentia speciei hujus ab aliis declarari potuisset cognomine vniuersalis et continuae inflammatoriae. Sed multos ta-

men

men magnos habuit BALLONIVS sectatores, qui vel simili plane, vel non nihil mutata ratione vocem rheumatismi vsurparunt. RIVERIVS jam quoad partes dolentes discrimen constituit, et cum in solis articulis dolor sit, arthritidem, cum vero non soli articuli, sed et media inter articulos spatia, muscoli, membranae, periosteum dolerent, rheumatismum vocat *b*.) SYDENHAMVS, BOERHAAVIUS, PRINGLIUS, TISSOTVS, aliique simili fere modo in rheumatismi descriptione ac BALLONIVS, dolorem ipsas juncturas artuum obsidentem memorarunt; at tamen et particularem quorundam saltem articulorum, et ab vna parte ad alteram quoque migrantem, eo nomine comprehenderunt, nec omnes illi febris et inflammationis in quouis rheumatismo praesentiam postularunt, sed eundem quoque frigidum et chronicum admiserunt. Alii autem seruatōe veriore et antiqua vocis arthritidis significatione, morbum ea denotarunt, quo ipsae prope juncturas partes, et, vt verbis vtamur F. HOFFMANNI *i*,) *ligamenta tendinosa neruea, quibus inuicem ossa coniunguntur, quatenus illa periosteo cohaerent, vehementius affligantur*; rheumatismum vero dicunt, cum dolor musculos, eorumque membranas et tendines, aliasque partes praeter articulos, occupat. Atque hac ratione nomina haecce, praeter F. HOFFMANNVM, alii quoque, vt BERGERVS, SCHVLZIUS, STAHLIVS,

B b 5

JVNCKE-

b) Opp. in fol. p. 419.

i) Med. Syst. Tom IV. P. II. p. 427.

JVNCKERVS, SAVVAGES distinxerunt; iisque facile adsenferit quisque, ad ea praesertim attentus, quod vterque istorum morborum sine altero vere occurrat, etsi propinqua inter se affinitate conjuncti sint, alterque alterum sibi saepius in societatem trahat, quodque difficilior plerumque sanatio esse soleat, quum ad juncturas articulorum dolor fuerit, quam vbi solas partes musculosas obsederit; siquidem frequentius cum articulorum dolore magis alienata humorum crasis profundiusque radicata illorum vitia quam in dolore musculorum, paribus quoad reliqua conditionibus, deprehenduntur. Quodsi vero conjuncti incedant isti affectus, quod omnino saepe fieri lubentissime largior, nil impedit, quo minus illos composito nomine, *arthritico rheumaticorum*, F. HOFFMANNVM, TRALLESIVM, aliosque secuti, appellemus.

§. IV.

Hisce nunc praemissis, primum notamus, diuersae omnino indolis arthritidem quoad febrem esse, cum alia ideo febrilis dici possit, alia febrem comitem non habeat; ex quibus prior saepe magis minusue simul inflammatoriae indolis esse reperitur, cum posterior vel plane nihil, vel vix tantisper inflammatorii ostendat. Ea vero praesertim febrilis atque inflammatoria est arthritis, in qua dolores in articulis residentes ita respondent conjunctae febri, ut istorum vehementia perpetuo pari passu in-

incedat cum hujus exacerbationibus. Quemadmodum quoque eodem fere tempore incipiunt et arthritis, et febris qua ista stipatur, sic et utrique morbo idem fere finis est, cum vel febrilis coctio et criticae permutationes a febre pendentes rite succedant, morbumque integrum auferant euacuationes criticae, vel hisce minus perfecte contingentibus aut succedente metastasi, arthritidem aequae ac febrim simul modo leuent. Jungitur videlicet arthritidi febris continua remittens, quam haud raro ad biliosarum naturam accedere deprehendimus, qua autem plerumque corporis internae functiones animique vires minus afficiuntur, ac aliis febribus continuis. Raro superatur morbus paucis diebus, plerumque vero per aliquot hebdomades corpus afficit, terminaturque vel sudoribus criticis, vel sedimentis crassioribus ex urina secedentibus, nonnunquam et suppuratione, in qua pus vel ex abscessu externe prorumpit, vel per urinam eliminatur. Quodsi vero contingat, alia peculiari ex causa arthritidi febrim superuenire, aut lentam quoque, cuius origini arthritis ipsa ansam dederit, cum illa coniungi, tunc minus apte morbus hicce complicatus illo arthritidis febrilis nomine appellaretur.

§. V.

Arthritis vero non febrilis, praeterea quod aegri ea correpti, nulla cum febre conjuncta arthritide laborent, in eo quoque a praecedente febrili differt,

differt, quod doloribus non plane tam atrocibus afficiantur miseri aegrotantes, ac in ista. Quamuis vero hac in re mitior quodammodo videri possit morbus, in eo tamen omnino conuenit cum febrili, quod voluntati pariter haud obsequiosi artus sint, et, cum etiam aliquem motum affecta membra admittant, eo tamen instituto vel dolor quasi quiescens denuo excitetur, vel cum alias tolerabilior fuerit, nunc molestior fiat et augeatur. Addimus arthritidem non febrilem tantum non semper diuturnius occupare articulos, ideoque inter chronicos pertinere morbos, etiam illam plerumque in curatione febrili pertinacior se praebere. Arthritidi febrili homines robustiores praecipue obnoxii sunt, cum chronica ii prae ceteris laborare soleant, in quibus magis languet vis vitae, propter senium, vel aliis ex causis.

§. VI.

Ad aliam, quae inter arthritidem obuia est, diuersitatem progredimur, quae nempe fixam et vagam intercedit. Fixam arthritidem dicimus, in qua dolor perpetuo in iisdem ossium articulis residet, quos prima vice occupauit; vagam vero, si dolor nunc in hac, nunc in ista obseruatur parte, sic ut nulla dolorum certa perpetuaque sedes dici queat. In utroque autem genere morbus vel febre conjunctus occurrit, vel absque febre incedit. Inde quatuor jam exsurgunt arthritidis genera; arthritidis febrilis

febrilis fixa, arthritis febrilis vaga, arthritis chronica fixa et arthritis chronica vaga. Eademque discrimina in rheumatismis quoque locum habent, utpote qui pariter fixi et vagi esse possunt, et cum febre nonnunquam conjuncta incedunt, aliquando vero et eadem vacant.

§. VII.

Missa autem in praesenti jam faciamus arthritidis fixae genera, quum de vaga praecipue disputare animus sit. Exponendum autem nunc est, quinam sit decursus arthritidis vagae primoque loco febrilis et inflammatoriae. Morbus est, qui vere et autumno praecipue homines corripit, eo videlicet tempore, in quo saepius majorique gradu tempestatum contingunt vicissitudines. Antequam ipse morbus manifestius se prodatur, per aliquot dies jam adfunt valetudinis in deteriorem statum mutatae signa. Frigus sentitur in corpore, et horripilationes cum lassitudine in artubus percipiuntur, capitisque grauitas ac dolor. Accedit nonnunquam ciborum imminuta appetentia, immo et nausea cum siti; animo deest sueta hilaritas, qui potius tristis est atque inquietus. Quo debilius autem sit hominis corpus, eo diutius durare hic status poterit, quippe, qui robustioribus in corporibus citius in ipsum morbum transit. Febris nunc incipit variae violentiae solitis cum suis symptomatibus, horrore nempe aut rigore, quem calor auctus subsequitur cum pulsu duro,

duro, simulque sitis, capitis grauitas, ejusque nonnunquam dolor, vigilia, respiratio quodammodo difficilior. Appetitus majori quam antea gradu imminutio, aliusque adstrictior, cum vrina varie cruda, accedere solent. Eodem fere tempore, etsi non praecise ad horam vel diem, quo febris incipit, dolor accedit sensim increfcens, et breui plerumque magnam ad violentiam perueniens in vno alteroue corporis articulo, ita vt motus artuum affectorum magis magisque intercipiatur. Non defunt exempla, altero tertioque die, postquam febris inceperat, dolorem istum superuenisse, sed et nonnunquam vno alteroue ante febris initium, tali dolore oborto morbum jam declarasse ingenium suum. Tunc quoque caloris augmentum in parte affecta plerumque simul ab aegro, aliisque, imposita manu, percipitur sat magnum saepe, rubore quidem non semper, at aliquando tamen manifesto eadem perfundi solet, simulque sensim plus minusue tumere. Frequentius contingere videtur, vt dolor primum in genu vno tantum vel etiam utroque percipiatur, verum vbicunque primam sedem habuerit, post vnum alterumue diem, nostro in morbo, saepius ibi sensim remittit, immo etiam desinit, vt aliquantum temporis de nullo dolore conquerantur aegri, mox tamen inopinato in alio articulo vel etiam in pluribus, similis aut grauior quoque dolor, paribus fere cum symptomatibus, et pari modo sensim cessaturus exoritur, occupatque pedum inferiores partes

tes vel coxendicem, vel lumborum regionem, vel humerorum articulos, vel cubiti flexuras, vel manus, vel nucham, vel maxillarum juncturas. Id vero huic morbo non perpetuum est, quod prior pars a dolore liberetur, cum alia vexatur, siquidem et nonnunquam, incrementum morbo plures quoque afficiantur, dolore in prius affectis partibus non cessante. Immo ad eam interdum vehementiam incrementum morbus, ut aliquamdiu omnes corporis articulos simul occupet aequalis fere ubique dolor, isque valde atrox, qui nullum plane ullius membri motum admittat. Sed ea plerumque esse solet doloris in hoc morbo vehementia, ut aegrotans articulos laborantes mouere, si aliqua ipsi adhuc fuerit mouendi potestas, nullo modo audeat, utque laedatur etiam tactu partium morbo laborantium. Quid? quod etiam aliquando leuissima aliorum per cameram suscepta obambulatio tam grauiter afficiat miserum, ut alias vix percipienda ejus corporis commotiuncula in dolorem nunc degeneret. Quare non mirum, multos etiam aegros moleste ferre stragularum lectuli sui pondus, quamuis leuissimum sit, ipsis in partibus dolentibus, et patientissimos etiam antea homines nunc animi corporisque valde irritabilis fieri, dum hoc morbo corripiuntur. Inprimis autem vehemens magisque molesta obseruatur arthritis haec, quando coxam, aut lumbos, aut nucham occupat. Nonnunquam et migrant vel extenduntur hoc in morbo dolores ad alias quoque praeter arti-

arti-

articulos partes, musculos nempe artuum, et simul genas, nares, aures etc. subinde occupant, vbi maior affectionis vehementia fuerit, atque tunc arthritico rheumaticae nomen meretur. Neque alias semper in mobilibus subsistit articulationibus, sed etiam aliquando ad futuras, harmonias, gomphoses, synchondroses, progreditur dolor, dein iterum his relictis aliorum migraturus. Versus noctem saepius nouae illae dolorum translationes animaduertuntur, eoque tempore et per magnam noctis partem, si non per illam integram fere semper acerbiores esse solent, vt somnum vix breuem et interruptum admittant; ex quo autem aegri expergefacti, tantum abest, vt leuamen percipiant, vt potius nouam doloribus violentiam inde accessisse persaepe et plerumque conquerantur, donec morbus manifestam in declinationem transierit. Non tamen ita semper vehemens morbi decursus reperitur, quippe qui et diuersi generis varietatibus, ratione febris, et dolorum atque sedis horum permutationis frequentioris obnoxius est. Sunt, quibus minor febris ratione dolorum apparet, et vicissim sunt quoque, quibus pertinacius ac diutius ad aliquam partem se dolores figunt.

§. VIII.

Quum ad suum morbus vigorem adscendit, quem conturbata vrina et ejusdem infecuta hypostasis indicare solet, quique saepius ad primae, nonnunquam

nunquam vero ad secundae vel tertiae hebdomadis finem incidit, sudores inprimis partium dolentium ac tumidarum leuamini esse solent, qui tunc dolorum exacerbationes fere plerumque subsequuntur. Tenacior aliquando materies in affectis partibus per cutis poros exprimitur, cui peculiaris subacidus et penetrantior esse foetor solet. Qui autem sub initio et incremento morbi vel sponte incidunt, quod non raro fit, vel arte mouentur, sudores, non facile quid conferunt, ut morbus reddatur tolerabilior, saepius vero efficiunt, ut pertinacior longiorque fiat. Aliter se res habet cum sanguinis profluuiis, praesertim ex naribus, et cum vomitionibus colluuiei mobilis corruptae, quibus utrisque vis morbi, antequam ad vigorem peruenerit, subinde infringitur. Porro autem declinante morbo, quem mitior dolorum gradus, breuiorque duratio, rediens melior appetitus, minorque a somno molestia facile designant, alia quoque incidunt, quae ad aegri salutem conducunt. Interdum scilicet aluus, quae per morbi initium et incrementum strictior fuit, nunc solutior fit, verique similiter tunc ad morbosam materiem e corpore eliminandam quoque iuuat. In aliis vero vrina manifestius morbum soluit, cum illa sedimentum plures per dies demiserit copiosum, quod flauescentis tunc plerumque coloris deprehenditur. Sanguinis quoque ex haemorrhoidalibus vasis, et ex utero in feminis profluvia, sanando morbo conferunt; tantum vero non semper largiores

fudores sub morbi finem accedunt, iisque inprimis tunc sensim febris omnis dispellitur, omnique dolore articuli liberantur. Dubii leuaminis sunt exanthemata purpurea, quae interdum ante morbi vigorem in cute efflorescunt, ubi major in fudores symptomáticos propensio est, neque criticis morbi perturbationibus semper respondent, siquidem nonnunquam morbo fere sanato et cum febris cessarit, adhuc superesse observantur. Vbi vehementior morbus fuit, et aliqui prae aliis articuli grauius, aut frequentius, aut diutius doloribus atque tumoribus affecti fuerunt, praesertim ubi crisis non perfecte absoluta est, manet facile aliquamdiu, postquam febris et atrocia dolorum cessarit, iis in articulis torpor, motusque difficilior, nonnunquam tumor, aliquando et dolorem creat flexio vel extensio membri istum ad articulum. Talesque reliquiae nonnunquam per aliquot hebdomades, immo et per menses et annos perseverant, pro varia indole sua, vel sponte et insensibiliter, vel per criticas peculiare excretiones aut metastases, vel per artis quoque adhibita auxilia, quae naturae subueniunt, demum auferenda; aliquando autem illae, si negligantur, vel peruerse tractentur, per integram vitam perdurant. Refractaria autem diuturnae huiusmodi affectionis indoles praecipue quoque declaratur nodis durioribus, ad articulos passim exortis, qui, cum crises non ex voto successerint, aliquando subsequuntur; atque tunc affectio haec eo fit pertinacior,

cior, firmioresque radices agit, quo diutius sibi relinquatur. Sed hinc etiam elucet, quia ratione fieri possit, ut arthritis fixa non febrilis, eam, quam descripsimus, febrilem, tanquam effectus, insequi possit. Ceterum quoque ex impedita ordinaria, quam antea indicauimus, crisi, ad partes internas, non sine insigni periculo, morbi vis nonnunquam vergit, atque inde capitis, pectoris, aut abdominis, inflammatoriae spasticaeque affectiones facile oriuntur. Ad suppurationem rarius affectio ista, etsi indolis sit inflammatoriae, deuenit; succedere tamen et haec ipsa potest prope articulos grauius affectos, experientia teste, praesertim laborantibus simul propinquis partibus musculosis.

§. IX.

Arthritis vaga non febrilis autem ad morbos chronicos omnino referenda est. Vbi febris aliqua cum hoc morbo complicetur, vel etiam lenta quaedam febricula illi accedat, magis dubie tamen morbo arthritico ita respondent, ut alicujus momenti auxilium ad ipsam soluendam arthritidem inde expectare liceat. Nonnunquam, ut modo dictum, febrilem arthritidem vagam ob minus perfectam ejus crisin insequitur; verum tamen et aliquando sponte sensim nascitur. Atque hujus generis vagae arthritidi praecipue obnoxii sunt homines debilioris constitutionis corporis, in quibus nempe languet vis vitalis, quibus serum aut pituita abundat, neruosi-

que systematis vigor vndecunque imbecillior fuerit, et quorum corpora ad febres minus esse procliuiua constiterit. Vbi ab origine vel nulla, vel perexigua et incerta febris in huiusmodi corporibus fuerit, dolor mitius vexare solet corporis articulos ac in priori specie; neque in his facile aliquis tumor, rubor vel calor praeter naturam deprehenduntur. Subinde arctis limitibus circumscriptus est locus dolens, residetque plures per hebdomades morbus v. g. in vno quodam digito, vel in costarum aliqua, vel in parte nuchae etc. alioque tempore aliam iterum afficit partem. Ad internas partes abire quoque potest, ibique varia mala creare; in pulmonibus tussim vel asthma prouocans, eademque saepissime pertinaciora, in ventriculo cardialgiam, in intestinis dolores colicos ac diarrhoeas grauiore, quae omnes periculo haud vacant, in vesica etiam, partibusque vicinis similes illis doloribus, qui ex calculo in vesica habitante prouenire consueverunt, ut et morbus pro calculo vesicae haberi queat. Quamuis autem ad haecce viscera delata morbi materies periculum subinde minetur, minus tamen ab his translationibus ex chronica hac et sine febre incedente vaga arthritide, quam ex altera, quum in illa ejusmodi decubitus anomali ad internas fiant partes, plerumque metuendum habemus. Sed probe distinguenda est arthritidis haecce non febrilis, quae lente, nec memorabili cum circulationis auctae impetu in debilibus exoritur, ab illa, quam relinquit

quit nimis cito desinens arthritis febrilis manifestius-
que inflammatoria, quum posterior minus indolem
vagae affectionis seruare, pluriumque saepe articu-
lorum pertinaciorē immobilitatem sistere, atque
nodosas frequentius in articulis protuberantias con-
junctas habere soleat. Praeterea et mitior illa len-
tior veriusque vaga sine febre incedens arthritis,
rheumaticis similibus affectionibus magis affinis, de-
prehenditur, cum hisce nonnunquam conjungitur,
vicemque permutat, quae certe longe minus in illa
locum habent, quam vehementior febrilis critice
non soluta relinquit.

§. X.

In causas nunc etiam praecipuas antecedentes
inquirendum esse existimo, quae hominum corpora
ad arthritides vagas, occasione data suscipiendas,
aptiora reddere et praeparare quasi antea possunt.
Et ideo quidem primo loco insigne discrimen maxi-
me notandum videtur, quod aetates atque sexus
quoad dispositionem ad arthritidem intercedit. Mi-
nus feminae arthritidi febrili et vehementius inflam-
matoriae, quam mares obnoxiae reperiuntur, etsi
nequaquam plane ab illa tutae sint. Eae autem fa-
cilis reliquis hoc morbo corripuntur, quae robu-
stiora et plethorica habent corpora, et consuetum
lunae tributum parcius soluunt. Non raro autem
chronica tali affectione vexantur, atque febrilis ar-
thritis apud illas difficilius perfecte et breui solui

solet, quam in virili sexu; eademque haec in feminis frequentius arthriticas affectiones chronicas relinquit. Neque facile arthriticis doloribus laborant pueri et adolescentuli; praecipue vero iis vexantur, qui in adulta et confirmata aetate jam sunt constituti. Rarius quoque in profectiori senectute corpus adoritur arthritis, nisi jam antea ea correptum fuerit. Illi autem prae ceteris facilius cum febre arthritici fiunt, qui magis irritabile habent systema nervosum, ingenio praediti sunt viuidiori, sanguinemque non valde tenuem in corpore gerunt non nimis laxo. Praeparat corpus talem ad arthritidem victus lautior, vel qui saltem commode digeritur, et majorem sensim nutrimenti copiam in corpus infert, quam ad id sustentandum alendumque requiritur. Ii vero facilius etiam arthritici euadere, pertinaciusque tunc affici, et chronica quoque ista labe corripri solent, qui frequentiore comissione, aliasque potu vinoso et spirituosissimo nimis delectantur, vinisque praesertim subacidis, ut Rhenanis, Mosellanis, Franconicis abuti consueverunt. Non enim solum vini acidum plus terrearum partium ex alimentis in sanguinem ducere verosimile est, quae postea in articulos deponi possint, sed et ipsa tartari, quae hisce vinis inest major copia, materiam quoque arthriticam forte suggerit. Quare ea quoque vina, quae in arenosis terris crescunt et minorem tartari copiam continent, non tam facile arthritidem creare observatum legitur, quam quae in terra argil-

argilloſa et pingui proueniunt, quibus major tartari quantitas ineſt. Eos etiam, qui a liquorum deſtillatorum uſu nimis cito ad tenuiores tranſeunt, magis arthritidi obnoxios eſſe, obſeruationum fide conſtitit. Non mirum igitur eſt, inter opulentiores magis frequentem eſſe arthritidem, quam inter pauperes, utpote qui non tam facile per luxuriam corpus ſuum laedunt atque ad hunc morbum diſponunt, quam iſti. Neque minus immoderatus Veneris uſus, aliaque, vnde pertinacior in ſyſtemate neruoſo imbecillitas oritur, ut curae et ſollicitudines, vigiliae, protractae nimis meditationes, et cet. inter cauſſas, quae ad arthritidem, praefertim chronicam, diſponunt, referri merentur, ſiquidem inde excrementitiae partes in humorum maſſa magis accumulatur, et pituitae inprimis et acori generandis colligendisque facile anſa praebetur. Simili ex ratione otio ac ceſſatione torpeſcentes in morbum noſtrum frequentius delabuntur, in his enim non ſolum chyliſſificatio, ſed etiam ſecretiones atque excretiones difficilius ſuccedunt, vnde major copia materiae, quae ad articulos depelli poſſit, facile colligitur.

§. XI.

Diſpoſitio haereditaria quoque ad chronicas arthritides vagas concipiendas plurimum conferre videtur. Parentes arthritidi fixae obnoxii, ubi ante generationem periodico tali malo jam labo-

rauerint, tantum non semper progeniem sistunt, ad hunc morbum magis dispositam, ita etiam, ut si vix vllas ex recensitis causas praegressas in sobole animaduertas, tamen opinione citius atque pertinacius haec isto morbo corripitur soleat, quod innumeris quidem veterum ac recentiorum testimoniis maxime confirmatum deprehendimus. Ob singularem autem affinitatem, quae utrasque inter arthritidis vagae species cum arthritide fixa observatur, metuendum quoque semper existimamus, ne grauior et manifestior parentum ad vagas arthritides diathesis cum sobole communicetur, sua aliquando tempore in hac ipsos ad morbos hosce ansam datura. Praeterea, cum praecipua quaedam visceribus hypochondriacis insit potestas, tum ad integritatem humorum conseruandam, tum ad variam iis adducendam labem; atque non solum complures ex memoratis antea causis primariam fere efficaciam in haec viscera exferere soleant, sed in ipsis etiam arthriticis affectionibus tam saepe alienata humorum in primis viis indoles reperiatur, hisque eductis hi morbi multum leuentur; non dubitamus, deprauatam, quae his in visceribus fit, secretionem, ita forsitan ut peculiarem ad acorem extricandum et colligendum iuuat, causis horum quoque morborum accensere. Etiam phthisticae diathesi, ubi debilitas pulmonum, et in catarrhos leuiioresque haemoptyses et sputa frequentia pronitas est, cum graciliori corpore, persaepe arthriticae affectiones, pra-

praefertim febriles, et in articulorum nodos transi-
turae, leuamini sunt, atque, cum nec difficulter
male tractatae arthritides aut harum, ex naturae
imbecillitate aliisue causis exortae, anomaliae
phthifi ansam praebeant, veram omnino deprehen-
dimus hos inter morbos cognationem. Minus re-
cte succedentes febrium tum continuarum tum inter-
mittentium crises, eademue mala medicatione im-
peditae, atque dysenteriae et biliosae diarrhoeae,
absque iusta cautione cohibitae, et generatim bili-
osae indolis morbi, quum vitiosa, quae primas vias
occupauerat, colluies educta haud fuit, non raro
in varii generis vagas arthritides degenerare solent.
Scorbuticam denique dispositionem, siue grauiorem,
vt in epidemico veroque scorbutico, siue mitiorem,
quae passim sporadice deprehenditur, rheumaticis
etiam et arthriticis affectionibus, cum vel sine fe-
bre oriundis, multum fauere, experientia omnino fa-
tis constat, etsi quoque saepius sine re culpa in il-
lam posita esse videatur.

§. XII.

In corpore autem, memoratis ex causis ad ar-
thritidem disposito, facilius saepe suscitatur ipse
morbus, accessu variarum causarum euidentiorum
occasionalium; etsi etiam illae, quas exposuimus,
in multis ad morbum euoluendum sufficere queant.
Ita nonnunquam culpa manifestior tribuenda est pe-
culiari tempestatum vicissitudini, qua frigidior cum

acriori, praesertim boreali, vento, praegressam calidiorē insequitur. Nonnunquam mediocre sufficit refrigerium, ubi corpus impurum et ad morbum valde dispositum fuerit, ad arcessendam arthritidem. Manifestius enim impedita perspiratio insensibilis, aut sudor cohibitus per ejusmodi aeris vitium, morbum hunc eo facilius producit, quo magis illa excretio impuriori corpori necessaria fuerit. Ceterum aer quoque humidus hic accusandus est, qui perpetuo quasi balneo irrorat fibras, easque laxiores simulque magis irritabiles reddit, ut majorem mutationem in iis producere valeat, alias minus sensibilis aeris, quoad calorem et frigus, vicissitudo. Atque in talibus tempestatum conditionibus causa nonnunquam evidentior haeret, quare et plures cujusdam regionis urbisue incolas subinde epidemice hic morbus corripiat, quamvis et lubenter largiar, occultiores aliquando, ut aliorum morborum epidemicorum, ita quoque arthritidum atque rheumatismorum aliquo tempore in populo vagantium, origines esse, quam ut ex his aliisque causis breui praegressis deriuari queant. Sed et post commissationem mox apparere possunt mali initia, morbo ipso subsequente, inprimis si alimenta magis nutrientia et aromatibus permista, copiosius ingesta fuerint, corpore ad morbum satis disposito. Dein et praecipue huc pertinet vehementior animi, quae in ira fit, perturbatio, inprimis cum studiose supprimatur vel celetur; et similiter ex perpeffa injuria grauis atque
su-

subita sollicitudo, quibus nempe celeriori hujus morbi generationi saepius ansa praebetur. Neque tunc maxime bilis varie corruptae ad praecordia major accumulatio deprehenditur. Quando quoque excretiones quaedam consuetae majoris momenti, pedum v. c. sudores, aut haemorrhoidales varii fluxus, mulierumue catamenia, aut puerperarum lochia, aut albus quarundam ex genitalibus fluor, aut solitae in nonnullis sputi ex pectore rejectiones, aliae talia intercipiuntur, vel exanthemata chronica intra corpus retropelluntur, vel ulcera corporis antiqua justo citius persanantur, arthritis breviori tempore inde nasci poterit. Pariter facile hic morbus brevi excitatur, cum sub finem biliosarum quarumcunque febrium, antequam appetitus ex voto redierit, atque signa stagnantis ad praecordia biliosae alienae materiae plane cessauerint, animalis victus et alia, quae roborandis aegri viribus efficacius inferuire queant, aegro conceduntur aut commendantur. Denique et alia plura ex recensitis jam causis citiorem promouere morbi hujus eruptionem poterunt, ubi ad hanc valde apta jam fuerit corporis diathesis, ut levis aliquando causa morbum effecisse videatur, quae tamen exiguum modo momentum aliarum praecedentium noxis attulit.

§. XIII.

Ad difficiliora progredior, de causa nempe acturus proxima, ipsiusque modo ac sede. Humo-
rum

rum conditio in febrili arthritide vaga eo magis ad eam ipsam accedere solet, quae et in grauioribus aliis inflammatoriis febribus deprehenditur, indeque phlogistica nuncupatur, quo manifestior continua febris, quo corpus robustius, quo durior pulsus, quo praeterea dolor et rubor et tumor et calor in articulis vehementiores fuerint. Atque hoc ipsum quidem, tum caussarum praecedentium indoles, tum conjuncta morbo phaenomena, tum quoque curationis, quem hic affectus cum illis febribus per saepe communem postulat, aequalis ac in hisce successus, omnino satis euidenter declarant. Non facile quis aliter HIPPOCRATEM intellexerit, ubi is arthritidis voce specialiter, ut supra indicauimus, pro arthritide nostra vaga febrili utitur *k*) Neque hanc ejus sententiam ab illa feriorum ex veteribus scriptorum, qui hos consuluerit, plane recedere animaduertet, quamuis hi ipsi omnino clarius frigidi quoque nec febre simul comitati hujus affectus mentionem fecerint *l*) Et obseruatione recentiorum, tum quibus placuit, rheumatismi nomen huic ipsi morbo tribuere, tum et qui arthritidis nomen seruauerunt, illud ipsum manifeste satis confirmatur. Similis est corporum, secundum hos fere omnes auctores, quae pleuritidi et huic arthritidi vagae febrili

k) Loco supra allegato, nempe Libro de affection. Lind. T. II. p. 180. Sect. XXXI. conf. PROSP. MARTIANI Comment. in HIPPOCR. p. 149.

l) v. AETAEVS de causis et sign. morb. diut. C. XII. CAEL. AVREL. Morb. chron. L. V. C. II.

brili inflammatoriae facilius obnoxia sunt, constitutio; utrobique aequa fere venae sectionis repetitae et antiphlogisticae curationis reliquae necessitas et salutaris efficacia, nec dispar sanguinis e vena missi conditio, neque naturae discrepans *ὑπεργαία* in criticis per urinam crassam atque sudores excretionibus. Sollicite praeterea notandum censemus, implicatam haud raro, si non semper, phlogisticae sanguinis in hacce arthritide diathesi, et magis quidem atque frequentius quam calido in simplici rheumatismo, colluiei bibliosae noxam deprehendi, quod omnino quouis in aegro, ut feliciori potiamur curationis successu, probe inquisivisse operae pretium erit. Prae euntem hac etiam in doctrina ipsum HIPPOCRATEM habere licet, qui *a bile et pituita, quum commotae in articulos incubuerint*, eandem arthritidem deriuat; typhique speciem alibi, *m)* huic ipsi morbo non dissimilem, describit, in quo *billem corruptam sanguini admixtam articulos maxime, licet etiam quandoque totum corpus reliquum, afficere, doloresque acutos exhibere*, docet. Addit, unde quidem arthritici morbi character magis declaratur, *multos ex huiusmodi morbo claudos fieri, cum bilis in articulis conclusa, in tofum callescit*. Ceterum et hoc ulterius confirmare videtur ipsa ejus doctrina, de variis alienatae viscerum, quae in praecordiis sunt, functionis indiis, in humerorum doloribus, in
ischi-

m) de intern. affect. C. XLIV. Lind. T. II. p. 249. Foes. edit. Genes. 1657. p. 554.

ischiade, et in doloribus articulorum non podagrico modo se habentibus. n) Ex quibus vel id adsertum notasse haud parum juuat, *hunc morbum his fieri, quibus in pueritia et juventute sanguis ex naribus fluere solitus, desit.* Cujus fluxus spontanei primariam et frequentissimam in praecordiorum vitio causam esse plurima et eidentissima veterum dicta, et quotidiana cujusque attentioris observata maxime omnino confirmant. o) Valde quoque hoc respectu memorabile est, quod eodem loco addit HIPPOCRATES: *quodsi foedus color in his hominibus appareat, interrogandi sunt, num capitis etiam dolor adsit, hoc enim fitebuntur.* p) Etiam BALLONIVS, cum docuerat, *rheumatismum et arthritidem ut affines sint causa, orgasmo, et symptomatis, ita paris etiam curationis esse participes*, hujus ultimae similitudinis primarias partes dum recenset, alia inter et haec habet: *caput falso in omni arthritide accusatur — hepatis, lieni potius est consulendum quam capiti. Et hic sollertia Medici requiritur. Color faciei saepe est index et judex pro origine mali.* q) Utque per *παλινδεσμεῖν* ad interiora plures enascuntur, vario gradu biliosi morbi, eosque inter et dysenteria, quae forte plerumque aliquo modo

bi-

n) *Prorrhēt. II. Sect. XLIV - XLVIII, Lind. T. I. p. 519 - 521.*

o) *Conf. LOMMII observ. medic. Amst. 1761. p. 36 et 96. et Perill. v. SWIETEN Comment in aph. Boerb. edit. Amst. T. II. p. 461.*

p) *Prorrhēt. II. Sect. XLVII. ad finem.*

q) *Quaest. med. an arthrit. et rheumat. congeneres. Oper. edit. TRONCHINI T. IV. p. 333. 334.*

biliosa, quam et arthritidi fixae HIPPOCRATES, r) et MUSGRAVE, s) ad aegri salutem et leuamen, instar ferocis autem et maligni affectus rheumatismo, quem a feruido hepate gigni putat, accedere FRANC. MANDAT t), adseruerunt; ita quoque similibus morbis praegressis, quasi per *μετάπτωσιν*, ejusmodi arthritidem oriri posse, complurium obseruationum fide fatis constat. Ita enim HIPPOCRATES: *intempestiue suppressa dysenteria abscessum (ἀπόσπιν) in costis aut visceribus aut articulis inducit; ac forte biliosa in articulis, sanguinea vero in lateribus aut visceribus.* u) Ali-bique, v) varia inter mala, quae dysenteriam fedatam insequi soleant, etiam *dolores ad crura et ad coxam* refert. Exempli quae horum veritatem euidenter confirmant, reperiuntur in accuratissima de dysenteria tractatione ill. ZIMMERMANNI. w) Neque vero quoad alios morbos, quos bilioso etiam humore acriori calido et abundante excitari constat, similes deficiunt obseruationes, quae illos minus perfecte solutos, critico quasi molimine, in arthritides haec febriles et similes rheumatismos transiisse declarent. Ita enim et erysipelati, et intermittentibus tertianis et quotidianis febribus, variisque

con-

r) *Proorrh. II. Sect. XV.*

s) *De arthrit. anom. C. V.*

t) *Quaest. Med. an a rheumatismo dysenteria παχονθήσ. BALLONII oper T. IV. p. 335.*

u) *Coac. 462.*

v) *De victu acut. C. LIV. Lind. T. II. p. 312.*

w) *Von der Ruhr unter dem Volke, VII. Cap.*

continuis biliosis, hujusmodi aliquando arthritides et rheumatismi, vbi illi morbi ad perfectam crisin non peruenerunt, et praesertim cum haec ipsa nimis nutriente diaeta, corticeue Peruuiano mature nimis exhibito, praepedita fuerit, haud valde raro succedere obseruantur. Ceterum et, vbi tales, quae biliosi morbi indolem declarent, origines plane lateant, in febrili tamen arthritide etiam primaria, ipso rerum vsu comprobante, vera saepiusprehenduntur delatae ad primas vias biliosae colluuei indicia, quorum qui cautam prouidamque in medendo rationem habuerint, de integriore sanatione procurata iis facilius gaudere licebit.

§. XIV.

Jam vero et ejusmodi aliquando, nec raro quidem, humorum tum ad primas vias confluentium, tum per vasa corporis distributorum conditio in vaga arthritide offenditur, quae manifeste distet a calidiori illa phlogistica et biliosa diathesi. Ita enim haud comparata esse solet humorum indoles, vbi tali arthritide corripuntur laxiora debilioraque corpora hominum, vitae sedentariae addictorum, neruorumque hypochondriacis hystericisue affectionibus obnoxiorum, quibus etiam chylopoiesis difficilius succedit, acidumque saepius in primis viis nasci solet, et eorum praesertim, qui vini subacidi, et spirituum ardentium potatione sibi nimis indulserunt. His deficit saepius naturalis densitas sanguinis,

his

his inertior bilis, his intricatior plerumque, quam tamen generaliter vix vnquam, nec in speciali casu satis plene, quis definiuerit, crasseos sanguinis et feri humorumque secretorum alienatio. Facile et frequenter in horum arthritide aliquis acor, primas vias occupans, suis e signis innotescit, cujus etiam dein circulantes in vasis humores vario gradu participes fieri poterunt; facile quoque praecipitatae quasi ex mixtione humorum pituitae signa in corpore apparent; facile praeterea viscerum in primis hypochondriacorum quidam in functionibus languor animaduertitur. Ejusmodi autem corpora vbi arthritide vaga cum febre corripiantur, eademque non nimis exigua, atque vbi atrociores dolores fuerint, difficilius ex integro soluitur morbus, frequentiusque nodi remanent in quibusdam articulis, quos dolor vehementior occupauerat, vnde rigidi fieri saepeque distorqueri solent, nonnunquam tamen, etsi perraro, aliqua in parte subsequi suppurationis poterit, x) aut alio modo modo quoque, sed post longius temporis spatium, natura, praesertim artis auxilio exactius leuata, per vrinam albam crassam, sudores, narium haemorrhagiam et haemorrhoides, vel per metastases criticas, vlcera praesertim

x) Hujus observationes inter alios habent: CAR. PISO *Select. obs. et consil. de praeternis. haet. morb. a serosa colluv. ort. edit.* BOERH. p. 339. BONETI *Sepulchr. L. IV. Sect. VIII. obs. VIII. IX. Conf. et* BALLON. *oper. T. IV. p. 336.*

fertim chronica et aliquam scabiei speciem y) ex incerto hoc atque difficili negotio in meliorem aegri salutem se extricat; aliquando vero rebus minus cedentibus, deficiente praesertim naturae vigore, et grauior facile alius insequitur morbus. z) Plurimae vero sunt hujus diatheseos cacochymicae in arthriticis varietates, ut nunc magis minusue simul ad phlogisticam inclinet, nunc magis minusue integriora simul viscera, robustioresque vel debiliores nervosi systematis vires conjunctae reperiantur, nunc major minorue ad pituitae, ad articulos depositae, tophacea concrementa pronitas adfit. Videtur tamen cum arthritide vaga, etiam manifeste et valde febrili, et quam inflammatoriam nominare nemo facile dubitauerit, saepius, et frequentius quidem quam cum simplici rheumatismo calido, siue vago siue fixo, aliqua conjuncta esse cacochymia, apparenter ad aciditatem quodammodo vergens, fero praesertim varie corrupto intertextam. Hujusque adserti argumenta complura attentior quisque passim deprehenderit, tum in minore pro caloris febrilis ratione siti, tum in copiosa magis et frequente sudoris, etiam sub temperato regimine profusione symptomatologica; tum et in linguae muco subflavo, laxius adhaerente, multos per dies colorem suum

y) V. F. HOFFMANNI *Med. rat. syst.* T. IV. P. II. S. II. C. VIII. *thes. path.* §. XVIII.

z) Multa, quae huc spectant, accurate et hodiernae adhucdum experientiae conformia proposuit HIPPOCRATES *Praedict.* II. *sect.* XLVII. FOES. p. 113.

suum haud mutante; tum etiam, si vomitus quacunque ex ratione inciderit, ex acido ejectae saburrae sapore, viridique bilis colore; tum in alui tarditate, majori quam ut aliis praeter inertiam bilis praesentibus causis respondeat; tum et praeterea in foetore illo peculiari subacido penetrantiori sudoris et squaloris, remittente articulorum dolore saepe observabilis; tum denique in perfrequente pronitate febrilis etiam vehementioris vagae arthritidis, cum haec ipsa vel sibi relinquatur, vel natura minus ex arte subleuetur, vel etiam per nutrientia et roborantia intempestiva, aliisque modis criticae excretiones impediuntur, in chronicam sensim cum durioribus articulorum nodis affectionem transeundi, nephritidemque a crassiori pituita, vel eandem sabulosa, in societatem sibi quoque arcessendi. Et hancce quidem materiem, quae in concrementa duriora facile transire queat, nonnullis tartarea, aliis tophacea, aliis calcarea dicta, ipsius arthriticae nomine plures distinguunt, ideoque similem alioquin arthritidi morbum, in quo materies haec defecerit, quod ipsum de rheumatismo BALLONII, SYDENHAMI, BOERHAAVII etc. creditur, alio etiam insigniendum esse nomine contendunt, a) Hanc si concederemus argumentationem, multas quoque alias utilissimas morborum denominationes ac partitiones abrogandas haberemus; tunc v. gr. nec pleuritis nec

D d 2

peri-

a) Conf. inprimis ill. PRINGLE *Observ. on the Diseases of the army* P. III. Ch. 2. §. 7.

peripneumonia nec angina vlli dici morbi deberent, nisi quibuscum ea, quam inflammatoriam vocant, sanguinis diathesis conjuncta foret; immo ne quidem tunc rheumatismus dicendus esset morbus, de reliquo illi etiam vere sic dicto, quoad partes dolentes et affectionis ex critico molimine originem, simillimus, qui non etiam inflammatorius foret, atque sanguinis missionem postularet. Et quot non mutationibus obnoxia essent generica morborum nomina, si haec ad doctorum de indole caussarum placita, semper noua quibuslibet affectionibus imponere liceret. Annon vero et ipse BALLONIVS, qui equidem et libenter pluribus in locis admittit, a se descriptum rheumatismum pro arthritide vniuersali haberi, b) sua, quam adducit, obseruatione, humorum in rheumatismo, suo quodammodo simile vitium esse ac in strictius a se dicta arthritide confirmat? dum nempe ait: *reuera qui istum rheumatismum bis aut ter sunt experti, vix (nisi sibi caueant consulantue) tormentum arthriticum vitare possunt, vt iste rheumatismus sit velut πρὸδεσμός et προπαράσχευς ad arthritin.* c) Neque vero, experientia teste, opus, bis terue quem isto BALLONII rheumatismo affligi, vt mani-

b) Libro de rheumatismo; opp. T. IV. p. 325. vbi de rheumatismo vniuersali clare dicit: *aegri eo se modo habent toto corpore, quo arthritici in suo paroxysmo in vno aut paullo pluribus partibus; videtur enim haec affectio esse arthritidis vniuersalis. Conf. ejusd. Quaest. med. an rheumatismus et arthritidis congeneres? Opp. T. IV. praesertim p. 333.*

c) L. c. p. 316.

manifestiori arthritide etiam nodosa inde corripitur, cum aliquando talis affectio, quae secundum illum aut SYDENHAMVM rheumatismus dici debet, vno morbi decursu quatuor vel sex hebdomadum spatio, qualia ill. Praeses aliquot exempla, sua ex obseruatione, mihi narrauit, subnascatur. Suffecerit autem praeterea SYDENHAMVM allegasse *d)*, et MVSGRAVIVM *e)*, qui similia de morbo nostro, quem rheumatismum vocant, retulerunt.

Vix ergo dubitandum censeo, quin et morbus hicce, inflammatoria nempe vaga arthritis, de humorum illa indole ad concretiones terreas prona, vnde veriore arthritidem dignoscere solent, quodammodo saepius participet; quamuis lubenter largiar, in suscipienda illius curatione, quamdiu praesertim in stadio et inflammatorio, vix quid vel parum haud raro interesse, num ad latentem illam humorum indolem simul respiciamus. Urinae quidem conditio eandem, ad concrementa tofacea idoneam, humorum indolem saepius et manifestius declarare perhibetur, vbi vel innatantia filamenta habuerit, vel ipsa etiam vrina gelatinosa aut mucosa fuerit, et instituta ejus exsiccatione pars residua in calcaream materiem transferit. *f)* Sed in ipsa quoque inflammatoria vaga arthritide, ad aliorum rheumatismos referenda, isti analogia in fero gelatinosi-

D d 3

tas

d) Oper. univ. sect. VI. C. V. edit. Lugd. 1754. p. 273.

e) De arthritide symptomatica C. II. §. VI.

f) Conf. ill. PRINGLE l. c. BAGLIVI oper omn. p. 117.

tas subinde reperta fuit. Refert ill. STÖERCK de sanguine hoc morbo affectorum e vena misso, quod serum post quatuor vel quinque horas inde secedens virgula eleuatum fila egerit, g) quod etiam ex apertis tumoribus, collecta in vno aliquo loco materie morbosa natis, serum viscidum, quod leni calore inspissari potuit, effluxerit. b). Copiosam gelatinam in vesica, emplastro epispastico in simili plane aegrotante ad furam summo cum leuamine excitata, se vidisse refert ill. ZIMMERMANN i). Quoad vrinam arthritide febrili vaga laborantium plurimae varietates occurrunt. Nonnumquam enim ad subsidentiam non peruenit, licet bene et ex integro solutus appareat morbus, nonnumquam illa sub cri-seos tempore sedimentum demittit furfuraceum, rubelli et subfului, vel albi coloris; quare ergo per saepe ex ejus conditione nihil certi de praesente illa materie ad concretiones duriores prona, colligendum videtur.

§. XV.

A multis quoque et claris viris inter frequentiores arthritidis, et vagae praesertim, sine febre affligentis, causas diathesin scorbuticam referri constat. Nimis procliues ad culpandam hancce morborum chronicorum originem, pariter ac ad malignita-

g) *Annus med.* II. de febre contin. arthrit. et rheumat. p. 115.

b) *ibid.* p. 117.

i) *Von der Erfahrung* I. Th. p. 390.

gnitatem acutorum, complures medicos, vbi de manifestiori caussa iis non constaret, olim fuisse, nullum plane dubium est. Etsi vero nequaquam statim ex aliqua caussarum praecedentium, et symptomatum scorbuti atque cuiusdam arthritidis conuenientia, neque ex medicamentis variis in vtroque morborum genere haud raro proficuis, a scorbutico humorum vitio hanc arthritidem pendere concludendum sit; quum tamen et vere scorbuticis arthritici rheumaticique artuum dolores non valde infrequentes reperiantur, atque tot taliaque signa scorbuticae affectionis, quibus arthritidis sponte superuenerit, nonnumquam occurrant, vt de illa temere dubitaretur; certe non est, quod originem illam rejiciamus, aut pro ficta dubiaque declaremus. Ipsi etiam ceteroquin maxime cauti in accusanda diathesi scorbutica, SYDENHAMVS et MVSGRAVE ex illa tamen hos artuum morbos oriri posse propria quoque sua obseruatione confirmarunt, et ille quidem de rheumatismo, k) hic de arthritide aequae vaga ac fixae l) id clare adseruit; etsi quidem de ea SYDENHAMI sententia cum ill. PRINGLIO dubitemus, num et longus ac repetitus corticis Peruuiani vsus vere scorbutico rheumatismo producendo par sit; libentiusque summo huic Viro assentiamus, ex minus perfecta et impedita crisi febrium pertinaciorum et irregularium intermittentium dolores hosce deri-

D d 4

uanti,

k) *Oper. uniu. S. VI. C. V. p. 277.*

l) *De arthrit. symptom. p. 32. et 34.*

uanti, illosque pro arthritide vaga potius quam pro rheumatismo habenti. MVSGRAVIUS vero in constituenda specie illa arthritidis, cui scorbuticae cognomen imposuit, primum respexit ad causas scorbuti remotiores, quae et huic arthritidi ansam praeberent, victumque inprimis memorat falsum et crassum, tum etiam huic morbo cum illo communem adducit *δυσπείψια*, dein ad acre, saltem alienum quoddam, in sanguine utrobique praesens, atque hunc valde inquinans, postremo ad naturae conatum graue quid eliminandi, et per glandulas quidem articulares in hac arthritide, per saliuarias autem et per cutem alias in scorbuto. Quam ipse quidem hinc oriundam obseruauit arthritidem, ad fixam potius, saepeque genuinam ad podagram, ubi aetas respondeat, sensim tendere adferit, licet alibi quoque aliter hunc morbum se habere, ut vaga saltem affectio sit, qua varii vicissim artus infestentur, simul referat. Etiam ejusmodi scorbuticorum dolores, ex vno in alium articulum primum transmigrantes, morbo autem ad statum tendente, in articulationibus inprimis genuum confidentes, bene describit cl. ROUPPE. *m*) Nihil impedit, quo minus et aliquam, in locis, ubi rarior est scorbutus verus, aliis saltem causis conjunctam, nunc grauiorem nunc vero mitiorem, diathesin scorbuticam ad arthritides et rheumatismos praefer-

n) De morb. na. ligant. C. II. S. II. §. XII, n. 5. p. m. 133.

praefertim vagos excitandos multum conferre statuamus; quum non caussae modo scorbuti variae, ut aer valde humidus et frigidus, corporum quies, diuturnior tristitia, victus durior, hujusmodi artuum affectionibus ansam praebere soleant, sed etiam haud raro aliqua cum chronicis hisce molestiis indicia scorbuticae humorum indolis, ex habitu cachectico, ex lassitudine, ex tenuitate sanguinis, ex maculis variis et exanthematibus scabiosis vel etiam purpuratis etc. conjuncta reperiantur. Neque valde obscurum haberi poterit, quomodo haec diathesis, quae deficientem ponit humorum depurationem, eorumque sponte hinc oriundam qualemcumque corruptionem, et secretionem deprauatam, oppilandis passim minoribus vasculis, atque in artus deponendae, ubi naturae vigor adhuc suffecerit, humorum vitiatorum parti, ansam praebere queat. Notandum vero hic maxime, et ipsum a MVSGRAVIO laudatum aduersus affectiones scorbuticas remedium, vini nempe pomacei potationem, quam apud Damnonios, ait, contra scorbutum mali moris, inueteratum, crudelem, magnum et difficilem, egregie valuisse, *n*) ubi idem nimis vsurpetur, immitte et acidum vinum, vehementem illud colicam excitare solere, ex qua etiam, ubi confirmatur et jam inueterascit, celebris idem Auctor subpullulare arthritidem docet, *o*) cum articulorum ἐν τοῖς ἔξω.

Dd 5

Deu

n) De arthrit. sympt. C. VI. §. V. p. 33.

o) Ibid. C. X. §. V. p. 65.

De dolore, tumore, ceteroque apparatu omni, ad purae genuinae arthritidis faciem ordinato. Graphice quoque cel. HVXHAMVS depinxit symptomatice hancce colicae Damnoniorum, et cum illa nonnunquam alternantem affectionem, quam tamen rheumatismum vocat, etsi juncturis praecipue defixum illum esse dolorem affirmet; in eo etiam a MVS-
GRAVIO dissentiens, quod ruborem vel tumorem, ipsis sub acerrimis cruciatibus, rarissime vllum dicat observari. p) Hoc igitur exemplo etiam apparet, quam dubiae ac infecurae sint generales morborum, quales de rheumatismo ac arthritide multis placuerunt, ex causis in corpore latentibus, praesertim ubi hae de quavis specie probatae haud sint, desumptae ac in medendo vsurpatae, definitiones. Hoc ipsum quoque specie illa arthritidis, tum vagae tum fixae, itidemque illis rheumatismis, quibus venerei morbi ansam praebent, etiam antisyphilitica fere sola medentur, quam maxime confirmatur. Facilem esse migrationem luis venereae in arthritidem testatur MVSGRAVIVS, qui et eo progressus est, ut arthritidis atque luis venereae miasmata, nonnullis ex rationibus, similia, et alterum alteri tamquam germanum existere crederet. q) Verum tanta non est argumentorum quae adducit vis, ut in hoc illi assentiri queamus, quum quae eorum praecipua sunt, utro-

p) *De morbo colico Damnoniorum opp omn. edit. REICHEL T. III. p. 58.*

q) *De arthrit. symptom. C. VI.*

vtrobique nempe praefens pertinacius quid, massam inquinans et corrumpens sanguineam, naturaeque molimen miasmata vtraque e sinu suo ad exteriora, nonnihil similibus cum symptomatibus, ablegandi, pari jure quoque ad alias ab arthriticis et syphiliticis diuersissimas διαθήσεis applicari possent. Non autem a recenti lue, nec a veteri nimis jam confirmata, carie et vlceribus horrida, sed mediae potius et occultioris conditionis affectione, et vbi puris effluxum propere nimis suppressere allaborauerint inepti ardeliones, arthritis haec, plerumque saltem initio vaga, sed post satis longum aliquando spatium, sensim suboritur. Pro varia constitutione aegrotantium, et conjunctas alias causas, magis minusue haec arthritis simul esse febrilis potest, vt quoque rubor, ardor ac tumor in juncturis deprehendantur; nonnunquam vero et sine febre, ac sine vlllo certo inflammationis in locis dolentibus indicio, incedit. Praeter alia autem nondum deuicti miasmatis venerei signa, quae hujus arthritidis originem certius denotare queant, etiam hanc ipsam inde suspicari licet, quum cognitis aliis arthritidum causis remotioribus, tempestatibus v. gr. vel diaetae vitiis, hujus morbi vicissitudines non respondeant, quum quoque dolores constantius noctu affligant, et quum singularis fuerit illorum atrocitas, neque hi ipsi vel optimis ad alias causas directis remediis, quantum exercitior merito expectauerit, obe-

obediant. r) Alias nunc specialiores arthritidis vagae, ex variis, praeter recensita, humorum vitiis origines, a MVSGRAVIO aliisque passim notatas, praetermittimus, quum ad jam expositas, praesertim priores, etiam reliquae, maximam saltem partem omnino, referendae videantur.

§. XVI.

Ex communi alias omnium et multorum adhuc dum sententia, doloris arthritici sedes assumitur praecipue ipsis in membranis, quae prope juncturas reperiuntur, easdemque firmant, ligamentis nempe et capsulis articulationum, et periosteo, praetereaque et aponeurosibus atque tendinibus, ad ossa vel membraneas ipsas partes defixis. Ita fere jam ARETAEVS mali hujus sedem definiuit, dicens: *initio vero nerui, articulorum vincula, et quaecunque ex ossibus orta sunt et in ossa inseruntur, dolere incipiunt.* s) Et maxime quidem memorabilis, quam subjungit, observatio videtur: *at istorum magnum est miraculum, non dolent quidem vel minimum, etiamsi quis secet aut collidat.* Vixque dubium apparere poterit sequentia ARETAEI verba perpendenti, quibus probabilem sibi explicationem tradit sensilitatis earundem partium diuersae, pro caussarum, in arthritide et vulnere, varietate, quin ipse argumentationem ex defi-

r) Conf. MVSGRAVE l. c. §. VIII. ASTRUC de morb. vener. L. IV. C. I. §. IV. p. 333.

s) De caussis et sign. morb. diuturn. L. II. C. XII. p. 65.

deficiente sectionis in membranis illis dolore, ad ejus iisdem in partibus defectum, vbi humorum ap-
 pulforum vi sollicitentur, infringere voluerit. *Prin-*
cipaliter quoque CAELIVS ait AVRELIANVS: passio haec
in nervis constituitur, qui sunt natura densissimi, et inter
articulorum nodos constituti, vel in eorum colligationi-
bus. t) Qui ad significationem veteribus vsitatam
 generaliore vocis *nerui* his in illorum dictis respe-
 xerit, ex adjecta hac voce colligere non poterit,
 eos etiam extra membranas doloris arthritici sedem
 collocasse. Sed nec recentissima aetate omnes hac
 ab sententia recesserunt. Ita inter alios etiam celeb.
 HOME rheumatismi causam proximam credit esse fe-
 rum viscidum acre vasa ferosa et lymphatica muscu-
 lorum, sed praecipue *membrantarum et ligamentorum*
 obstruens; u) idemque arthritidis sedem ponit in
 minimis vasis tendinum, ligamentorum, membra-
 narum, periostei, articulorum. v) Hujusque de
 sententiae veritate ne minimum quidem dubitasse
 videtur cel. CLIFTON WINTRINGHAM, w) qui vero
 et solidas omnes nostri corporis partes, BOERHAA-
 VIVM fere secutus, nervosas habuit. x) Neque ve-
 ro mirum, fere omnes in accusanda hac doloris ar-
 thritici sede tam facile consentientes reperiri, quum
 cutis vna cum subiecta cellulosa tela, vbi nullus ru-
 bor

t) *Morb. chron. L. V. C. II. p. 560*

u) *Princip. medic. Amst. 1766. P. III. S. III. §. 4.*

v) *P. IV. S. II. §. 7. p. 160.*

vv) *Tract. de podagra, Lond. 1752. p. 106.*

x) *p. 32.*

bor ac tumor adsint, plane infantes, alias et, hisce
 ferius et cum leuamine accedentibus, partes eae-
 dem symptomaticae saltem affectae, appareant; nec
 generatim praeterea cutanei et cellulosi habitus con-
 junctae mutationi doloris arthritici vehementia sum-
 ma satis respondere videatur; *) et ipsius denique
 tofaceae materiae saepius reperta sedes easdem par-
 tes, quae antea doluerint, probabiliter definiat. γ)
 Ast omnino tamen perill. de HALLER, quem hono-
 ris causa nomino, perpetuo successu experimento-
 rum, omni, quam quis modo postulauerit, cum ac-
 curatione institutorum, et quam plurimorum qui-
 dem, permotus, iis partibus sensum denegauit, quas
 alii pro sede doloris arthritici primaria habuerant.
 Ideoque de hac alibi omnino quaerenda Vir sum-
 mus sic argumentatur: *quare videtur ex enormibus*
torminibus, quae ferunt podagrici aut arthritici homi-
nes, ipsa cutis aut subjecti cuti nerui dolori sedem prae-
stare, quem ab insensibili capsula frustra expectes, et quem
denuo hic non quaeras, ubi nerui vel nulli vel aegerrime cer-
te demonstrabiles reperiuntur. z) Addit etiam alibi, a)
 se in podagricis tormentis, et cum muscoli a scala-
 rum in funiculos subterraneos ducentium multo usu,
 aut

*) Conf. v. SWIETEN *Comment. in Boerb. aph. §. 1259. T. IV.*
p. 311.

γ) Conf. cel. KRAVSE *Diss. de sensil. part. corp. hum. Lips. 1765.*

z) *De part. C. H. sensib. et irritab. in Comment. Soc. R. Sc. Goett.*
T. II. p. 123. vel Memoires sur la nat. sensible et irrit. des
part. du corps an. p. 22.

a) *Elem. Physiol. T. IV. p. 284.*

aut a longo praecipitum montium descensu acriter dolerent, *accurate percepisse, nullum omnino tendinum sensum esse.* Etsi vero plurimis quidem tum experimentis propriis, tum et aliorum similia expertorum testimoniis haecce confirmavit, et ipse tamen alios quoque adduxit, qui contrariam adhuc tuerentur sententiam. Hisque postea etiam accessit vir celeb. GVALTERVS VAN DOEVEREN, qui et compluribus singulari studio et accuratione factis circa sentiendi facultatem periculis, tendines eorumque aponeuroses, aliasque membranas, sensibilitatis manifestae signa sibi saepius exhibuisse memoravit. *b)* Inter alia vero, quae perill. de HALLER ad contraria quorundam vel argumenta vel experimenta respondit, hoc loco praecipue notabilis haec ipsius adfertio videtur: *eorum experimentorum quidem aliqua, et potissimum morborum historiae, sunt ejusmodi, ut in ipsis ligamentis dolorem fuisse nullo modo certum sit, cum passim, et in genu potissimum plurimi nervi cutem inter et articuli velamentum migrent, qui laesi sensum efficiunt.* *c)* Non ausim vero, hisce de meis quid conjecturis ad-jicere, quippe quas non nisi immaturissimas tiro exhibere possit, propriis praesertim experimentis circa rem, tantorum virorum studiis agitatam, adhuc destitutus. Rariores dari occasiones arthriticorum, quam ex aliis morbis demortuorum, cadauera fecandi, merito et ipse conquestus est ill. MOR-

GAGNI

b) Specimen observat. academ. Cap. XIV. p. 108. et seq.

c) Elem. physiol. T. IV. p. 286.

GAGNI *d*), quod nempe arthritidis morbus diuinitum sit, rarissime pauperum, horum autem non illorum corpora anatomicis tradantur, aut si quando illorum quaedam sint incidenda, viscera quidem, vix vnquam artus examini permittantur. Neque miratur Vir idem summus, cui fere nihil relatarum ac aliis sectionum incognitum fuit, nullum peculiarem in Sepulchreto mentionem rheumatismi factam esse, quod vix meminert in aliam rheumatici dissectionem incidisse, quam in illam ex DRELINCVRTIO auditam et ab HAVERSIO memoratam, qua dissectione DRELINCVRTIVS inuenit gelatinam concretam in superficie musculorum duos aut tres ducatos densitate adæquantem. *e*) Quisque autem facile, arbitror, largietur, rarissimas praecipue esse corporum ex arthritide vaga demortuorum sectiones, quae nempe ipsius articulorum affectionis modum declararent, quum haud lethalis hicce morbus esse soleat, nisi materies ex perniciofa metastasi ad partes nobiliores internas deferatur. In hoc modo defunctis reperit ill. STOERCK copiosissimam flauam gelatinosam materiem inter membranam pulmones ambientem et inter ipsos pulmones; talemque valde copiosam intra piam matrem et cerebrum atque cerebellum, et in anterioribus cerebri ventriculis; *f*) qualem gelatinam alias etiam iisdem in visceribus, primaria inflammatione affectis, pluribus videre contigit. In vno, cui dolor

ad

d) De caus. et sed. morb. epist. LVII, n. 1.

e) Ibid. n. 16.

f) Ann. med. II, p. 119.

ad lumbos acutissimus ad optima quaevis refractarius fuit, mortemque tandem intulit, vidit ill. STOERCK ultimas lumborum vertebrae, ex parte, qua medullam spinalem ambiunt, penitus putridas et in nigrum foetidum ichorem solutas. g) Quas autem MORGAGNVS recenset cadauerum arthritide defunctorum sectiones, quasque adjungit vtilissimas epicrises, arthritidis quidem fixae et pertinacis ac inueteratae naturam potius quam vagae et recentioris cujusque illustrant, notabilia tamen et hoc loco ejus obseruata videntur, de repertis aliquando in cadaueribus arthriticorum, cartilaginum, membranarum, ossiumque vitiis vnice intra capsulae caueam, ibidemque concreta, quae ossa sensim diduxerit materia tofacea, b) alias et materia tartarea ad articulos digitorum, cute sublata, illico in membrana tendines obuolvente deprehensa. i) Quae ipsa cum eorum sententia quodammodo quidem, sed minime tamen demonstrationis vice, conuenire videntur, qui dolorem arthriticum in membraneis articulorum vinculis praecipue residere existimant.

§. XVII.

Jam vero minimorum vasculorum siue sanguiferorum siue lymphaticorum prope artuum juncturas oppilationem, humorisque alienati cellulosa in
spati-

g) *Ibid.* p. 124.

b) *De causis et sed. morb. epist.* LVII. n. 2. 3.

i) *Ibid.* epist. XI. n. 2.

spatiola effusionem, vnde nimirum dolor arthriticus, saepiusque illi accedentes tumor ac rubor, excitentur, cujusdam instar criticae metastaseos succedere, et molimine salutari naturae actuosioris ex reliqua sanguinis massa huc delatos humores separari, ita exploratum habetur, vt in dubium id vocare nemo facile ausit. Atque hoc ipsum satis patere arbitror, tum ex molestiori aegrotantium, quoad reliquum corpus et munia viscerum, conditione, antequam dolor ad juncturas artuum percipiatur, pariterque si hunc iusto mitiorem succedere contingerit, aut si, quae illum creauerat materia, iterum in venas recipiatur; tum quoque ex meliori valetudine, quae dolore isto praesente, quoad functiones capitis, pectoris saepiusque et abdominis animaduerti solet; tum denique et ex ipsa critica eorundem dolorum indole, vbi aliis succedant morbis, dysenteriae, febribus biliosis varii generis, aliisque pluribus jam memoratis affectionum generibus. De doloribus ex morbo illo, quem rheumatismum primus fere dixerat, ipse sic censet BALLONIVS: *tanti autem dolores fiunt ob materiae acrimoniam, et quia natura eam in cutem deponere vult nondum mitificatam, nec viis adhucdum praeparatis; k)* alibique morbum cum ἀπόσας comparat, immo et hoc nomen illi ῥευματισμῶν, licet dubitanter, praefendum arbitrat, l) etiam varios morbos, hoc ipso superuenien-

te

k) L. c. p. 316.

l) p. 322.

te finiri vel minui docet. *m*) De simili morbo SYDENHAMVS refert, febrim sensim euanescere manente dolore, quin et nonnunquam immanius faeuiente, *materia scilicet febrili in artus translata*; quod satis argueret febris ipsa saepius recrudescent, ob materiam morbificam, ab intempestiuo externorum usu reperiussam. *n*) Quum autem febris haec, docente ipso rerum usu, aliquot per hebdomades haud raro simul cum doloribus, articulos varios laceffentibus, pergat, *o*) tunc modo minus perfectam, et praematuram nimis, ratione ipsius febris, metastasin eos dolores creare, sed eo facilius quoque ex integro, ipsa febre opitulante, per faustiores crises eandem superabilem fore, colligemus. Ideoque et eo certius atque constantius leuamen ex chronicis aliis vel molestioribus vel maiori cum periculo coniunctis malis expectandum, quo firmiorem, quam semel occupauit, sedem dolor certas ad iuncturas seruauerit. Ita b. BRENDELIVS, de salutaribus agens naturae moliminibus, quae sub studio phthi-
seos spastico nonnunquam obseruantur, hoc optime notauit: *ipsas, inquit, arthritides, ad tofaceas et exulceratas usque, quin et utrisque compositas, his indiciis, quibus perfectius vix aliae liberant, esse adscribendas, experientia haud obscure docet.* *p*) MVS-

E e 2

GRAVI-

m) p. 314 et 316.

n) Oper. uniu. Sect. VI. C. V. p. m. 272.

o) Conf. modo ill. STOERCK. ann. med II. p. 112 sqq.

p. Diss. de tabescentibus ad nares ducenda fluxione. §. 6. p. 15. conf.

et § 9. p. 17.

GRAVIUS de pluribus morborum generibus leuamen simile ex arthritide accedente exposuit, ex cujus obseruatis, breuitatis causa, exemplum saltim arthritidis melancholicorum, quo nomine hoc loco et complures hypochondriacos hystericasque comprehensas voluit, allegasse suffecerit; de qua refert: *esse vero hanc arthritidem puram putam symptomaticam, ipsa melancholiae causa continente et proxima generatam, satis, ut opinor, eo constat, quod illa quoties exoritur, et ad gradum eleuatur quantumcunque, rata haec et perpetua proportionem deducitur.* q) Pauloque post facillime tradit symptomaticam hujus arthritidis indolem dignosci, si aeger diu melancholia, atque demum arthritide laborauerit; et hac quo magis eo remissius illa, maxime si hoc iterum saepius comparuerit. r) Ea vero humoris, in arthritide vaga, de vna parte ad aliam quasi oberrantis, sine dubio fere indoles est, ut, quamuis alicubi ad unam pluresue artuum iuncturas in vasculis haerens, et ex his in cellulosa spatiosa transfudans, sub circulantis humoris vitalis appulsu, fibrarumque tritu, quodammodo digeratur ac dissoluatur, ad perspirandum tamen aptari vna vel altera hujus mali accessione satis nequeat; sed mobilior modo factus, in venas recipi, derelictis sensim, quas affecerat, partibus, ad commune flumen sanguinis reduci possit. Remanet ergo tunc in vasis materies, quae similem iterum in aliis articulis tra-

goedi-

q) De arthrit. symptomatica Cap. V. §. III. p. m. 23.

r) ibid. §. V. Conferri quoque meretur ROB. WHYTT von den Nerven ansetzen p. 116. sqq.

goediam ludere apta sit; etiam subinde secretionum, praesertim in hypochondriis, nec non diaetae, regiminis, medendique rationis vitiis adaugeatur, magisque alienetur, donec sensim, vbi tandem ex voto res cedat, perspiratione, criticisque aliis excretionibus, ex corpore exterminetur. Quaeri vero praeterea hic utique posset, qui fiat, ut quotidie plerumque in febrili arthritide vaga dolorum tormenta redire, ut alias fere semper, quam proxime praecedente vice, artuum juncturas occupare, ut materies juncturarum partibus ita esse amica soleat, quo minus aequae facile ac aliis in febribus per sanguinis massam ad crises usque dispersa maneat, aut etiam ad viscera, glandulas, musculos, etc. deponatur, etsi hoc nonnunquam, sed raro tamen, fieri lubentissime concedamus? Verum peritioribus haecce, quae nos quidem experientia satis constare gaudemus, explicanda et clariori theoriae luce collustranda potius relinquimus, quam ut nostras, minusue maturas conjecturas nunc ornare periclitemur. De vitiosa vero materia, morbo hoc ipso jam cessante, in visceribus et in humorum massa quid nonnunquam retineri; etiam dolorum vi cum febre post faustas crises, ex voto finitis, nonnihil adhuc tumoris in partibus antea grauius praeter ceteris ac diutius afflictis, et aliquam in ligamentis laxitatem vel debilitatem, quae primos ex quiete motus difficulter, nec sine quodam obtuso dolore aliquamdiu ferat, remanere; praeterea et in non-

nullis, vbi actuosior quidem natura metastasi ad articulos perficiendae par fuerit, minus vero ad materiam excretioni accommodandam suffecerit, nodos in articulis duriores nasci; quisque, arbitror, pathologiae elementis imbutus peruulgatis cum rationibus tam facile conciliauerit, vt eorum dilucidationem hic adjiciendam plane superfluum habiturus sit.

§. XVIII.

Non est quod in exponenda prognosi prolixissimus, quum plurima, quae huc spectant, praecedentibus doctrinis, de arthritidis vagae decursu ac differentiis ejusque causarum potestatibus, interspersa jam exhibuerimus. Nonnullis tamen memoratu dignioribus, quae praetermitti antea debuerunt, nunc adjiciendis locum esse arbitror. Valde molestum sed raro periculosum morbum esse arthritidem vagam febrilem, etiamsi multa adsit vis phlogisticae atque biliosae diatheseos, vbi modo accurate tractetur morbus, aegerque se secundum eas leges, quas mali ejus natura postulat, exacte gerat, jam notauimus; s) sed addimus nunc; magni facile momenti ac periculosi euentus fieri posse errores, etiam minores visos, in methodo huic morbo medendi commissos; et vbi funestus forte hujus morbi exitus fuit, vel grauius eidem discrimen accessit, ab
ea

s) Conf inter alios meretur FRID. HOFFMANNVS *Med. syst. ration l. 3. p. 437.*

ea ipsa ratione haud raro, siue quoque inde, quod aeger aut ministrorum officiis fungentes, in qua re peccauerint, illud repetendum videri. Quum valde abundauerit in robusto corpore phlogistica diathesis, quod in his aegrotantibus haud infrequens est, visceribus nobilioribus insigne tunc periculum impendere, non dubitandum, si quis opem laturus frigidi instar catarrhi morbum considerauerit, sectionem venae metuat, sudoresque mouere studeat; qualem errorem BALLONIVS a medicorum vulgo sui temporis committi solitum refert, eundemque merito quam maxime damnat. *t)* Dum augmentum febris hac ratione, et ipsius praesertim inflammatoriae diatheseos, admittitur, vel etiam victu et medicina calefacientibus promouetur, nunc ita opprimi natura poterit, quo minus ad artus ablegando materiem interioribus prospiciat, nunc ita irritari, vt perturbato molimine receptam ex articulis materiem ad viscera depellat; quod quidem vtrumque malum summo semper cum periculo conjunctum deprehenditur. Inflammatoriae vehementiores interiorum affectiones inde ortum habere possunt, etiam colica similis indolis; qualem ex propinatis sudoriferis calefacientibus in robusto homine, doloribus antea in brachiis et genu infestato, excitatam, ita quidem vt aeger post atrocissima triginta sex horarum tormina, suborta gangraena exspirauerit, ill.

E e 4

Tisso-

t) De rheumatismo, in Opp. T. IV. p. 325.

TISSOTVS *u)* obseruauit. Summi ergo momenti est, humorum in his morbis indolem probe attendisse, ne difficiliori et perniciosae affectionis permutationi, errore qualicunque commisso, ansa praebeatur. Alias vero et incongrua ex medicatione vagarum istarum arthritidum pertinaciores persaepe fiunt certas ad iuncturas materiae vitiosae decubitus; vnde anchyloses, claudicationes, contracturae, affectiones paralytodes, spontaneae luxationes, abscessus, tumores duri, vel oedematosi ortum subinde habent. Nonnunquam tamen et valde pertinax et refractaria occurrit hujusce mali conditio, vbi febris exigua et incerta, phlogistica diathesis in sanguine vix vlla, vbi etiam is status, quem HUXHAMVS obseruauit, adsit, vt nempe venaesectio magis obsit quam profit, *v)* vrinaque fere semper tenuis et aquosa mittatur, doloribus licet iuncturarum atrocissimis; quo casu difficilis plurium hebdomadum morbus aliquando, vel exactissime tractatus, perquam facile aliquam, ex illis aliisque chronicis, affectionem relinquit. Sed inter alia quoque insignem praecipue cautionem postulant aequae diagnosis ac huic innixa prognosis arthritidis illius vagae, quam omnes hoc nomine insigniendam volunt, quae nempe fixam arthritidem haud raro praecedat, nonnunquam et hujus paroxysmos subsequitur, etiam aliquando, praesertim cum virium naturae vigor defecerit, diu vel
semper

) *Avis au peuple* §. 164. p. 192.

v) *De aere et morb. epid. edit.* REICH. opp. T. I. p. 364.

semper talis manet, quae vagis incertisque articulorum aliarumque partium per intervalla doloribus et spasmodis molesta sit, neque tunc facile ad vehementiores paroxysmos perveniat; ne forte hanc cum altera, quam nempe et rheumatismum saepius dicunt, confundamus. Illa quidem, lithiasi magis affinis, roborantibus saepius indiget, difficulter penitus in aegri salutem profligatur, diutiusque talis permanens in graues chronicos morbos lubentius transit, et aegrorum in commodum plerumque cedit ejus in fixam arthritidem regularem, ad quam sponte sua tendit, confirmatio; quae omnia vero in eas, quas phlogistica diathesis, vel conjuncta huic biliosa quoque excitauerint, et in chronicas ab his relictas, multo minus rariusque cadere observantur.

§. XIX.

Ad medendi denique praecipuis illis arthritidis vagae speciebus consilia, quae fida observatio satis confirmaverit, breuiter subjungenda, nunc transaturi; de illa quidem, quae cum febre incedit, vero rheumatismo magis affinis, et cum hoc nonnunquam conjuncta est, sanguinisque diathesin phlogisticam plerumque sistit, saepiusque integram solutionem admittit, primo nobis loco agendum censemus. Quum robustos, plethoricos, lautius viuentes, saltem penuria sanguinis haud laborantes, similibus sub conditionibus ac aliae grauiore inflammatoriae febres, frequentius inuadat, atque impetuosior sanguinis ipsius ad partes dolentes appulsus plerumque hoc in

morbo manifeste animaduertatur, summa omnino curationis integrae antiphlogisticae, et hujus quidem efficacioris, vtilitas merito maxime celebratur. Non aequè vero variorum, quae ad hunc medelae modum pertinent, ratio adesse deprehenditur, ut ergo nec vna perpetuaque ad omnes hoc morbo correptos methodus adcommodari queat. Phlebotomia praesertim saepissime, aliquoties etiam repetita, opus est, et eo magis quidem, quo propius morbus ad eam, quae in rheumatismo vniuersali BALLONII est, vehementiam accesserit; aut quo pertinacius dolor iisdem et pluribus, quas corripuit partibus inhaereat, paucis aut vix vllis vitiosae ad primas vias colluuei indiciis simul praesentibus; quo pulsus durior, plenior, celeriorque, quo dolor atrocior, quo magis conspicua diatheseos phlogisticae continuæ febris juncta signa. Praestantissimum est ALEX. TRALLIANI consilium, *si humorem, inquietis, qui in articulos confluxerit, sanguinem esse suspicemur, ubi quidem nihil prohibet, vacuationem, quae per venae sectionem adhibetur, tentato; hac enim ratione multos noui, aut in totum morbo liberatos, aut raro fluxionibus correptos.* vv) Habet BALLONIVS, qui et impendio laudauit phlebotomiam, eamque saluberrimum esse remedium testatur, valde memorabile exemplum Andegauensis Comitissae, qui eo affectu per sex integras hebdomades laborauit, qui quæ decies missò sanguine a sudorificis adhuc deterius

rius habuit; qui vero, vt olim haemorrhagiis copiosis obnoxius fuerat, sic tandem, morbo paene desperato, superueniente tam copiosa haemorrhagia, vt de funere cogitaretur, conualuit. SYDENHAMO raro vsu venit eodem in morbo, vt vltra quartam vicem venam incidi iusserit; et ill. PRINGLE, cui minor apparuit morbi huius in aegris suis vehementia, siquidem raro tumorem notabilem et inflammationem in iuncturis aegrorum deprehendit, celerem obtinuit sanationem, venaesectione non nisi bis vel ter instituta. FR. HOFFMANNVS, licet maxime hoc remedium extollat, mature tamen vsurpatum, et vrgente necessitate, circa quartum diem repetitum modo commendauit. HUXHAMVS, qui de rheumatismo et arthritide obseruatis nonnunquam conjunctim tractat, x) rheumatismos etiam memorat, qui leui cum febre at saeuo admodum dolore multos discruciarunt, et quos ipso modo initio, ait, largiorem postulasse venaesectionem. y) Non autem initio tantum alias, sed altera etiam hebdomade et ferius quoque eandem saepissime adhuc summe proficuum esse, e SYDENHAMO disci potest; idemque et indicantia phlebotomiae generalia, tunc saepius obuia, rerumque vsus euidenter docent. Sed si quae deprehendantur ex linguae sapore, praecordiorum sensu, peruulgata cujusdam vel incipientis modo colluuiei bilioso pituitosae ad primas vias

as

x) *Opp. T. I. p. 55. 56.*

y) *Ibid. p. 365.*

as indicia, minus properandum iterato instituenda phlebotomia censemus, quum minus tunc iuuet, minusque ad sanationem ex voto perficiendam necessaria sit. Interim et hoc casu, et alias quoque, cum repetenda ulterius venaesectio fuerit, multum commodi obtinere licet salibus mediis, vel diureticis vel catharticis, his tamen exigua modo dosi initio exhibitis, ut aluum vix tantillum, vel plane nihil quoque stimulare queant; utpote quae hoc tempore aptius per clysteres et saepius repetitos, a BALLONIO jam et SYDENHAMO merito laudatos, tunc molliatur. Vbi tamen situm corporis, quem clysteris usus postulat, dolorum ratio haud admiserit, nec tamen metuendae antiphlogistici laxantis, ut cremoris tartari, vel pulpae tamarindorum aliusve similis, minores doses, donec speratus ex hisce effectus sequatur, aliquoties per diem repetitae. Nec facile negligendus hoc tempore nitri usus, cui summa etiam hic, pariter ac aliis in febribus inflammatoriis, tribuenda laus est, PRINGLIO, MONROO, BROCKLESBY, pluribusque optimis viris, testibus. Salibus mediis admistas ita exiguas camphorae doses laudat PRINGLE, ut neque calefacere nec sudorem extorquere queant; nos praecipue tunc multum commodi ex hocce remedio expectamus, ubi secundae ulterius venae nulla fere necessitas fuerit, nec vitiosa in primis viis colluies deprehendatur, anomalique phlogisticae materiae ad interna corporis decubitus subnasci videantur. Inter haec praestantif-

stantissimae vtilitatis est, largiore vti potu aquoso, vel emulsivo vel decoctione ex ptisanis parata, cui citri succum, vel oxymel, vel et aliquando, vbi pertinacior morbi vehementia, vitrioli spiritum admisceri conueniet; simulque ab omni alio, qui motum sanguinis vel parum modo concitare et calorem corporis augere solent, plane abstinere. Seri etiam lactis hoc in morbo, vel pro potu ordinario vsurpati, singularis in diluendo ac temperando praestantia est, testibus praesertim FR. HOFFMANNO, TRALLESIO, TISSOTO, eodemque potu solo BOERHAAVIVS, dum acerbissimis rheumaticis doloribus excrucietur, per duodecim dies vixit. 2) Magni pariter momenti consilium est SYDENHAMI, PRINGLI, TRALLESII, TISSOTI, pluriumque, diaeta semper tenui et vegetabili, carnibus praecipue quibuscunque, eorumque iusculis, ouis et aromatibus, plane euitatis, vti, quamdiu quid febris, atque diatheseos phlogisticae superest, vel et quamdiu morbus nondum penitus est sublatus, nisi forte in longinquitatem protrahatur. Neque regimen aliud conuenit, quam temperatissimum, pariter ac aliis in febribus continuis et inflammatoriis, ambientis quoque aeris puritatem curae habendo, etsi omnino quoque subita in regimine mutatio, et quisque perflatus frigidior, noxam aegro adferre, nouosque, vel jam declinante morbo, atque atrociores dolores excitare queant. Sunt qui etiam ab initio,
faltem

2) Van SWIETEN *Comment, in aph. Boerb. T. I. p. 552. §. 336.*

saltem quum nulla secundae vltius venae ratio superfit, diaphoretica suadeant. F. HOFFMANNVS eum in finem varia commendat, sed vix vllius efficaciae. SAVVAGES sudores, si parci sint, ptisana calida de cichoreo et capillis veneris promouere suadet, sine memorata temporum morbi distinctione. Ill. PRINGLE in mitiori quidem morbo diaphoresin post phlebotomias, per antiphlogistica promotam, curationem absoluisse, sed in grauiori ejus genere et manifestius inflammatorio, sudores haud proficuos fuisse retulit. Similisque fere est ill. STOERCKII obseruatio, qui tamen paulo efficaciora, cum leuiorem morbum in principio profligare adnissus est, elegit, *necessè nempe habuit, vt aeger mox in lectum se conferret, et moderato tegminum pondere et copioso infusi florum sambuci, vel trium santalorum, vel ligni sassäfras, vel foliorum leuistici etc. potu sudorem prouocaret;* quod institutum tamen saepe euentus ancipitis esse poterit. *Sub finem sudores modo conuenire,* jam bene BALLONIVS notauerat. Eos autem, quo tunc satis moueat natura, si antea, prout morbi conditio postulauerit, exactius leuata fuerit, raro efficaciori quodam stimulo indiget. Sed antequam eo res in paulo difficiliore morbo peruenit, fracta per sanguinis missiones et antiphlogisticorum vsum febris vehementia, pulsuque nunc molliori reddito, ac dolorum tormentis nonnihil mitigatis, neque tam pertinaciter amplius quibusdam articulis inhaerentibus, sed quum relictis plane his, ad alios saepe demigrent; insignis tunc plerumque

que deprehenditur purgantium antiphlogisticorum, minori quidem sed repetita dosi, in exacerbationum praecipue interuallis, bis vel ter in hebdomade exhibitorum, vtilitas. Similia huic fere consilia sunt SYDENHAMI, BOERHAAVII, F. HOFFMANNI, MONROI, TRALLESII, TISSOTI, STOERCKII; omnino manifeste plerumque dolorum vehementia, febrisque impetus hac ratione, praesertim interposito, tempore exacerbationis dolorum, nitri cum camphora vsu, magis magisque sensim vltius imminuuntur; atque leuata sic natura tandem exacerbationes critico cum sudore plerumque finit, vel sponte sua, vel mitiori adjuncta diaphoretico; quali virtute et ipsa camphora excellit; quo ipso etiam fine aliis mitissimis, vt Mindereri spiritu, sic dicta mixtura simplici, etc. commode tunc potiri licet. Tunc etiam saepe vrina bonam demittit hypostasim, doloresque sensim plane cessant; restituta etiam haud raro, tum reliquarum functionum corporis, tum et motus artuum, plenaria integritate.

§. XX.

Sed variae supersunt, quae notatu dignae videntur, ad sanationem hujus morbi felicius perficiendam cautiones. Accidit equidem, neque valde raro, etiam in hoc de quo agimus morbo, colluuii biliosae ad praecordia delatae, sensimque saepius, vbi sibi aliquamdiu morbus relictus fuerit, magis adaugendae, signa deprehendi, siquidem
nempe

nempe nonnunquam in lingua sordes, cum sapore aduerso et quandoque amaro, praetereaue nausea, vertigo, color oculorum et faciei subflauus, aut saltem nimis pallidus, vel quodammodo jam a primis morbi diebus, vel demum post vnam, alteramue, aut saepius quoque repetitam sanguinis missionem, vbi et aliquando flauescens aut virescens in hoc sanguine crusta phlogistica emergit, atque vsurpatis per aliquot dies antiphlogisticis, vario gradu appareant. Praesentibus autem hisce signis, non dubitandum, quin aliqua pars causae, quae dolores in artubus, ipsamque febrem efficiat, in colluue ista vitiosa, et secretionum in hypochondriis labe, tunc haereat, et quo majori gradu signa illa praesto fuerint, eo plus commodi ab educatione illius materiae, modo satis mobilis illa fuerit, turgeatque, eo minus vero ab ulterius repetenda sanguinis missione sperare liceat. Atque hoc casu praesertim vtique certior adest ratio continuandi vsus purgantium, ad cuiusuis aegri conditiones sollicitè accommodatorum; quibus tamen interponere per vnum alterumue diem, vbi minor purgantium ad eliminandam praecordiorum impuritatem efficacitas appareat, salis ammoniaci minores doses, maxime conueniet; dein semper ad leniora purgantia redeundum, vel etiam, si nihil vetuerit, eorum loco emeticum, cuius tunc saepe insignis utilitas est, exhibendum erit. Insignis praesertim G. MVSGRAVE in posteriori hoc euacuante remedio, *ad duras et perti-*

pertinaces rheumatismi reliquias praeuertendas, fiducia fuit; qui etiam, ad dolores rheumatismi minuendos, ad sanguinem alterandum, et τὴν γλισχρότητα deuincendam, supra quam quis exspectaret, vomitionem et quidem vehementem ac iteratam, conducere asseuerat. a)

De simili pertinaci rheumatismorum conditione agens HUXHAMVS, emetica pariter laudat, sed breuiter modo, *est etiam, ait, ubi per initia morbi vomitus excito. b)* Sed jam ab his digrediendum, et nunc ea quoque expendenda censeo, quae ad leuamen dolorum, exacerbationis illorum tempore, externe aut interne commendari solent. BALLO-
NIVM topica laudasse non reperiō, praeter hirudines, in quo ill. PRINGLIVM imitatore habuit, atque hic multum inde leuamen se obseruasse refert, tribus quatuorue ad iuncturas dolentes apposis, ubi dolor tumorque, imminuta per missionem sanguinis repetitam febre, perseuerauerint. FRANC. MANDAT inter topica oxyrrhodinum et oxycratum ad morbi contumaciam expugnandam inferuire testatur. c) SYDENHAMVS ad dolorem sedandum, cataplasma e mica panis filiginei et lacte croco tincto, vel fol. brassicae, parti affectae adplicandum et saepe renouandum curauit. Fomenta etiam antiphlogistica BOERHAAVIVS et STOERCKIVS ac TISSOTVS

a) *De arthrit. Symptom. c. II. §. VIII. p. m. 9.*

b) *Opp. omn. T. I. p. 364.*

c) *BALLONII Opp. T. IV. p. 336.*

TVS pluresque commendarunt, et vbi dolorum atrocitas talia non admiserit, balnea tamen vaporosa, quae efficaciter leuent, TISSOTVS adhibere suadet. FR. HOFFMANNVS autem et PRINGLE, quamdiu febris et inflammatio adsunt, ab hujusmodi topicis plane abstinere jubent. Et omnino, si cum illis PRINGLIO incommoda laxitatis attendamus in affectis partibus, quam applicata inducunt emollientia, dum non modo vigente morbo, vehementiori materiae phlogisticae ad illas accumulationi, sed eodem quoque finito, difficilius abigendis tumoribus ad juncturas mollibus, quibuscum dolor obtusus, si membra moueantur, praesertim post aliquam corporis quietem, conjunctus esse solet, ansam facile praebent; habebimus recte, quod praestantius FR. HOFFMANNI consilium sequamur, et per inflammatorium illud stadium, moderato tantum et aequali lecti ac tegumentorum calore partes dolentes fouere suadeamus. Quoad opiatorum usum, optimum censemus esse monitum SYDENHAMI, qui eo religiosius ab iis eo tempore abstinendum tradit, quod illa morbi felicior curationi non solum contraria sint, dum et effusionem sanguinis missionem postulent, et illorum usu morbus figatur, sed etiam, quod ne quidem eam quam titulo pollicentur, ἀναλγησίαν praestare valeant. Atque sollertissimo huic obseruatori assensum merito praebuerunt summi Viri, BOERHAAVIUS, PRINGLIUS, TRALLESIUS, TISSOTVS, alique plures. Et eo minus quidem ab his remediis vllum exspecta-

ſpectare commodum licebit, quo manifestius plerumque vel ab ipſo naturali ſomno, quod bene TISSOTVS obſeruauit, antequam veram in declinationem morbus tranſierit, dolores exacerbari ſoleant. Attamen SYDENHAMVS, quum ſatis mitigato inflammatorio hoc ſtadio mane purgans exhiberet, dein eadem vesp̄ra liberaliorem ſyrupi ſui de meconio doſin ſubjunxit, quo, vt ait, ſanguinis orgaſmus penitus ſupprimatur. Quod conſilium complures, etiam BOERHAAVIVM et ipſum TRALLESIVM, ſecutos eſſe deprehendimus. TISSOTVS quidem, ſub hac etiam conditione, ab omni plane vero narcotico abſtinuiſſe videtur; neque forte eſt, quod vllum orgaſmum vel aliud quid mali a purgantibus mitioribus et veriora ſecundum indicantia, ſi virium et integrae conſtitutionis aegri ſimul rationem habeamus, exhibitis et repetitis, metuamus, quod narcoticum ſubjunctum poſtulet, niſi aliquando, quod raro fit, neruoſa vel hyſterica ſenſibilitas ſimul conjuncta fuerit. Neque facile quis praeſtantiffimum illud SYDENHAMI conſilium, quo et ſub morbi finem aegris a vino et a liquore ſpirituoso quolibet, et a cibis aromate conditis, diu plane abſtinere ſuadet, cum illius narcotici vſu conſentire cenſebit, qui hujus vires ſatis perſpectas habuerit. Epifpaſticis in morbi hujus decurſu haud ſaepe opus eſſe videtur, vbi reliqua exactius obſeruentur; attamen vbi ſanguinis miſſionibus atque aliis quae conuenerint vacuationibus caute vſurpatis, aut ſub

horum vsu, ex deficiente naturae vigore, phlogisticae materiae ad interiora decubitus fiant, iis vere aptissimus nonnunquam locus est; dein et vbi febre vel jam finita, vel modo satis mitigata, dolores pertinacius quibusdam juncturis inhaeferint, neque per diaphoresin sensim abigantur, multum commodi ab istis, tum rubefacientibus modo, tum et vesicantibus ad partes ipsas dolentes applicatis exspectare licebit. *d)* Nonnunquam vero tunc et lenes frequentes frictiones iuuant et linimenta volatilia, qualia FR. HOFFMANNVS *e)* et MONRO *f)* aliique commendarunt, quibus tamen semper, ne ad interiora repellatur nondum ad excretionem parata materies, cautissime vtendum existimamus.

§. XXI.

Sub morbi finem peculiarem nonnunquam curam postulat restituendus functionum omnium, praesertim chylopoieseos vigor, artuumque grauius laceffitorum robur ac flexilitas, etiam cum satis bene omnia processerant; quo fine nunc magis ad soluendum et diluendum, quod reliquum fuerit nimis spissum, nunc ad excitandas firmandasque vires magis attendendum. Polychrestum inprimis censemus connubium Peruuiani corticis cum fero lactis aut.

d) Conf. MONRO von Feldkrankheiten. p. 123. TISSOT avis au peuple. p. 204. TRALLES vsus opii P. II. p. 312. STOERCK Ann. med. II. p. 121.

e) Med. rat. syst. l. c. p. 454.

f) L. c.

aut aqua Selterana, vel alia ex mitioribus minerali, ad aliquot hebdomades rite administratum. Vbi forte ad intermittentis genium accesserit febris cum arthritide vaga conjuncta, praemissis, quae rerum conditio postulauerit, aliis, praestantissimum inprimis auxilium ab hoc ipso cortice expectare licet; quod ipsum exemplo memorabili febris arthriticae cum typo duplicis quartanae incedentis, hoc remedio perfectissime sanatae, confirmatum legitur apud b. WERLHOFIVM. g) Nonnunquam vero in aliis aegris differendus potius erit hujus corticis vsus, vbi de necessitate vel vtilitate talium excretionum, ad reliquias febriles vltcrius educendas, constiterit, quas ille forsitan in aegri noxam remoraretur. Atque tunc saepe insignis vsus erit amarorum aliorum et antiscorbuticorum, a SYDENHAMO, BOERHAAVIO, STOERCKIO, aliisque, merito hic magni habitorum; neque dubium, quin aptissimus etiam hic vsus esse possit noui illius ligni, a perill. Equ. DE LINNE *quassiae* dicti et accuratissime descripti. h) Sapor huic amarissimus est, sine vlllo plane stiptico aut adstringente, quae praecipua est ejus a cortice Peruviano

F f 3 diffe-

g) *Obseru de febr. P. II. §. V. p. 55. 56.*

b) *Amoenit. academ. T. VI. Quoad vsum, formulam, quae Auctori maxime arridet, adduxisse forsitan iuuabit. R. lign. quass. rasp. drachm. I. aqu. font. bull. libr. I. Stent in digest. per hor. et infusi detur saepius uncia una pro dosi. Dari autem conducit quoque, ipso docente, in puluere, in pilulis, electuariis, tinctura, infuso vinoso. Nec metuenda dosis est, sed porrigi potest ad duplum, immo quadruplum sine omni formidine violenti effectus.*

differentia. Seruus nigrita, nomine *Quassi*, cui ligni hujus notitiam debemus, eo ad mali moris febres intermittentes et remittentes optimo cum successu usus fuit, neque sine graui ratione ipse perill. DE LINNE idem ad alios quoque morbos, qui amara efficaciora postulare solent, eosque inter etiam ad arthritidem commendauit; inserto simul reliquis suis experimentis exemplo viri, ex podagra asthmatici et ligni hujus usu ex voto plane fanati. Cum hisce optime quoque consentiunt, quae cel. TISSOTVS de vtilissima hujus ligni efficacia, propriis etiam suis obseruatis suffultus, recentissimo in excellenti scripto iudicauit. i) Ceterum vero, vbi forte pertinacior quibusdam in articulis rigiditas, tumoresque subduri remaneant, jam finita aut maxime mitigata febre, multum commodi ex gummi guaiaco, ad R. MEAD et PRINGLI et HVXHAM k) consilia usurpato, expectare licet, cui, vt aliis etiam, cum fructu sociatur vel pro potu ordinario, vel certis quoque horis adstringendum, decoctum ex vna aut altera radicum, bardanae, lapathi, herbae britann. saponariae, chinae, sarsaparillae, lignorumue, juniperini, fantalorum, guaiaci; aut similia, aquae calcis ostrearum vel cochlearum infusa; tali cum regimine, quod liberiores diaphoresin impedire nequeat, potius ad illam excitandam quid conferat. Locus etiam

i) *De la Santé des gens des lettres. à Laus. 1768. p. 233. 234.*

k) Conferri meretur integra et efficacissima hujus Auctoris celeberrimi methodus de aere et morb. epid. Vol. II. a. 1745. mens. April. Oper. edit. Reich. T. I. p. 364.

etiam tunc non raro erit adhibendo, necessaria cum cautione, calomelani, praesertim ad HVXHAMI aut PRINGLIJ methodum, quam et cum fructu imitatus est MONROVS, *l*) datis nempe tertia, vel quarta quavis nocte, aliquot ejus granis, nonnunquam majori dosi, dein proximo mane leniora semper subjungendo purgantia. Insignis etiam vsus hic variorum esse poterit antimonialium, purgantibus interpositorum, vel iis etiam aliquando admixtorum, tum crudi ipsius antimonii, a pluribus, *m*) etiam a MONROO laudati, omnino etiam vere efficacis, tum sulphuris ejusdem aurati, *n*) tum vini, praesertim HVXHAMI methodo parati, *o*) tum ipsius quoque tartari emetici, perexigua dosi, quae vomitum excitare vix queat, cui et nonnihil theriacae, aut apti alius opii addere conueniet, quo similis fere indolis fiat cum celebratae pariter hoc in morbo virtutis pulvere DOVERI, ex combinatis praesertim ipecacuanhae radice et opio parato. *p*) Permulum quoque boni, ex CLERKII praesertim obseruatione a PRINGLIO relata, largiores ac diu satis continuatae sapo-

Ff 4

nis

- l*) Libro cit. p. 124
- m*) Conf. I. F. FÜRSTENAV *Diff. de antimonio crudo ejusque usu interno salutifero. Rintelii 1742.* et DE GELDEREN *Diff. de antim. crudi usu interno tuto et efficaci Duisb. 1742.*
- n*) Praeter alios, de hoc etiam consuli meretur Cel. FABRICII *Diff. de sulphuris antimonii aurati eximio usu in arthritide. Helmst. 1758.* TISSOT *kermes minerale commendat, avis au peuple. p. 233. §. 182.*
- o*) *Opp. omn. T. III. p. 129*
- p*) *Edinb. Versuche II. 13. p. 536. MONRO l. c. p. 120.*

nis veneti doses, praestare poterunt, vbi pertinacior aut neglecta fuerit, et nunc sine febre incedat, arthritis vaga, aut quoque firmitus impacta quibusdam articulis appareat materies, quam calcareae indolis esse vrina denotauerit. Etiam in refractario ad vnum alterumue articulum decubitu, ex obseruatione MEADII et MONROI pluriumque, insigni adjuumento esse poterit fonticulus aut setaceum prope adfectam partem applicata; satisque explorata quoque praesertim in ischiade tunc est actualis cauterii magna utilitas. *q)* Sed molestis hisce ac terribilioribus auxiliis raro, quod laetamur, opus est. Mitiora gratioraque saepe sufficiunt, ex quibus externe applicatum ceratum viride, MUSGRAVII, *r)* TISSOTI, *s)* pluriumque consilio, laudem meretur singularem, et ex internis praestantissimam expectare opem licet ab aquarum mineralium efficaciorum, praesertim quidem Pyrmontanarum, diu satis continuato usu. *t)* Balnea etiam valde commendata reperimus, tum tepida, tum frigida. Tepida quidem vsitatoria sunt, quibus praesertim fontes minerales arte calefacti ac thermae inseruiunt, atque multum omnino probatissimae efficaciae ab vtrisque sperandum, si aquae delectus et illa vtendi modus ad peritioris medici consilium instituantur; quum certe,

q) Conf. modo TRALLES *l. c. p. 314.* et TISSOT *l. c. p. 205.*

r) *De arthrit. Symptomat. C. VI. §. XI.*

s) *Avis au peuple. §. 183.*

t) Conf. I. P. SEIP. *Beschreib. der Pyrmont. miner. Wasser, und Anhang der Pyrmont. Kranken Geschichte.*

certe, frequente ex obseruatione, plurimum praesent in meabilibus reddendis humoribus tenacioribus, qui minoribus ad juncturas vasculis inhaerent; siquidem etiam pertinacissimae juncturarum ex arthritide reliquae affectiones nunc balneis vaporosis, nunc stillicidiis quoque, nunc et vtrisque simul vere sublatae fuerunt. Frigida autem balnea multi quoque optimi Viri maxime extollunt, quibus vero tunc praesertim aptissimum esse locum censemus, vbi sola fere laxitas, in partibus antea grauiter affectis reliqua fuerit, febris et inflammatio post faustas crises plene cessauerint, corpusque bene expurgatum sit, licet quoque nonnihil expectandum esse concedamus, ab increcente post balneum frigidum perspiratione. Et haec quidem, nostra sententia, conditiones respexerunt, qui frigida balnea sub morbi hujus inflammatorii finem commendarunt **BAL-LONIVS**, **PRINGLIUS**, **HVXHAMVS**, **MONROVS**, et plures; quorum consilia tamen, **TISSOTO** etiam bene monente, non sine cautione sequenda fore existimamus, praesertim in sensibilibioribus, et huic remedio minus adfuetis.

§. XXII.

Ad haecce vero simul etiam redeunt praecipua et probatiora consilia, quae aliae et pleraeque arthritides vagae, vel sine vlla memorabili, vel sine inflammatoria saltem febre incipientes, postulant; si modo, quoniam istorum multae sunt differentiae,

ad cuiusvis morbi singularis indolem, integramque aegrorum naturam sollicita habeatur attentio. Accidit haud raro sub arthritica perexigua febre, immo et hac deficiente, phlebotomia opus esse, vbi modo nimia vasorum plenitudo, et aliquis in sanguine orgasmus adfuerint, iisque alia vacuatione minus apte mederi liceat, praesertim et vbi suppressa soliti sanguinis fluxus aut mittendi sanguinis consuetudo deprehendatur. Attamen nec minus contingit, contrarias hisce corporum dispositiones deprehendi, quae nihil commodi, saltem minus certi, minusque stabilis quam alia indicatiora auxilia, ex venaesectione promittant. Ceterum etiam hic saepe antiphlogisticis, secundum variam rerum conditionem eligendis, nunc diureticae efficaciae, opus est, quo febris forte praesens, pro gradus causarumque suarum ratione, in aegri commodum dirigatur. Semperque adnitendum, ut morbosae corporum dispositiones, quae ansam huiusmodi arthritidi praebuerunt, aut illam fouent, et augent, ordine modoque aptis, quoad fieri poterit, imminuantur, tollanturque. Qua via humorum depurationem natura facilius admittere, vel etiam ipsa moliri videatur, ea etiam in medendo praecipue legatur, nisi fida satis observatio ab illa recedendum, vel illi non nimis insistendum docuerit. Hinc si sputa, praesertim vbi falsus aut dulcis illorum sapor fuerit, in dolorum leuamen, ut aliquando fit, successerint, quam maxime saepius e re erit, juxta usum demul-

cen-

centium, pulmonibus liberandis, et sero isti acriori alias per aptiores vias, nonnunquam et per vlcuscula artificialia, educendo, sollicitam adhibere operam. Vbi ad acidum in primis viis facile generandum pronitas adeste deprehendatur, saponibus praecipue medicatis, amarisque et antiscorbuticis, deinde etiam roborantibus locus erit. Et quum vere praesens fuerit ad podagram dispositio, eadem ipsa aliquando similibus aut antea memoratis penetrantioribus, quae praesens aegri conditio postulauerit, vel adhuc auertetur, si modo firmiores nondum radices egerit, aut vbi virium defectus roborantibus indigeat, in quo saepe culpa refidet oberrantis in corpore podagricae materiae, illa quoque, si promouendus sit ejusdem ad pedum articulos decubitus, sub eorundem et excitantium atque deriuantium remediorum usu, remotis primum, si quae supersunt, obstaculis, cum solito paroxysmi sui apparatu, erumpet. Vbi minus plene praeparata materiae, naturaeque deficiens robur, mitiori, neque corpus reliquum fatis liberanti, paroxysmo podagrico ansam praebuerint; aut quoque hic non fatis ex voto fausta perspiratione et diuresi finiatur; vel retineri pars arthriticae materiae in reliquo corpore, hinc inde oberrans, vel rursus, idque grauiori plerumque cum periculo, resorberi, similemque tragœdiam ludere, aut ad nobiliorem partem quoque depulsa, pertinacius illi tunc inhaerere poterit. Sed haec potius ad specialiores de arthritide fixa doctrina-

nam spectant, quae nostri nunc non est instituti. Quare ergo, quum et reliquae vagae arthritides a venerea labe et a scorbuto vero, symptomatum instar, oriundae, parte curationum hisce morbis primariis conuenientium, saepissime indigeant, harum pariter expositione mihi supersedendum atque speciminis mei inauguralis nunc finem esse constitutum existimo.

X.

Dissertatio de puris absque praegressa inflammatione origine. Publice proposita. Gott. 1766. Resp. Io. CHR. GRIMMANN, *Hadelnsi*.

§ I:

Vulgaris medicorum sententia est, frequens istud malum, quod Latini inflammationem, Graeci vero φλεγμονην, s. φλογωσιν vocant, pro diuersa liquidi in vasis minimis haerentis natura, varia ista humorum a tergo alluentium celeritate, vasorum, in quibus obstructio nata sit, maiori vel minori rigiditate, sanguinis denique ipsius vel acriori vel blandiori indole quatuor diuersis modis terminari: ita nimirum, vt materia stagnans vel propitioris naturae beneficio absque vllis pristinae labis reliquiis solua-

soluatur et in societatem circumacti sanguinis rapiatur; vel in liquamen quoddam albidum, puris nomine insigniri solitum, degeneret; vel iniquiori forte vna cum vasis, quibus coerceatur, in tumorem doloris omnis expertem indurescat; vel etiam deleta omni cum parte affecta humorum commercio, in gangraenam seu sphacelum transeat. Quibus postea venerabile istud academiae nostrae decus, illustris RICHTERVS *a)*, ingeniose duos alios inflammationis exitus, alterum, qui rigescendo, alterum, qui desquamando absoluitur, adiecit.

§. II.

Vtut autem verum sit, inflammatione praegressa, abscessum, scirrhum et gangraenam, saepe enasci: non temere tamen originem istam extendere licet, sed e contrario sine ullis inflammationis vestigiis, haud raro vitia ista emergere, fatebitur mecum quilibet in naturae tramite premendo sollertior. Nec mihi firmiori talo illa de eorum natalibus theoria (si nempe de originis constantia sermo est) stare videtur, quam quae inflammationem a liquidorum in angustiora justo vasa impulsione, errorem loci vulgo dicunt, deriuat *b)*, vel quae venae sectionem *c)*, in inflam-

a) V. Progr. de duplici nouo inflammationum exitu rigescendo et desquamando 1748. Gött.

b) Quae huic hypothese aduersentur, abunde exposuit Ill. ab HALLER in Elem. Physiolog. T. I. p. 114. sqq.

c) Quanti vero sit hac ipsa in re non nimis auctoritati fidere bene docuit cl. KLOECKHOF in diff. de venae sect. termino in aen-

inflammatoriis morbis intra exiguos tridui cancellos coercet. Hanc vero originem in abscessibus BOERHAAVIVM vbiuis accusasse, ex capite de inflammatione, de abscessu, de febre, de peripneumonia et pleuritide, de phthisi, in primis apparet. Vnde non mirum quod tot alii, et inter hos famae sane haud exiguae viri, HEISTERVS, PLATNERVS *d)*, GRASHVISIVS *e)* aliique eandem sententiam amplexi sint.

§. III.

Tum vero ex inflammatione pus generari dicunt, *f)* quando materia vascula obferans adeo impacta haereat, vt per conuergentes canales liquidi posterius irruentis efficacia non possit in venas impelli, sed quouis cordis ictu arctius firmetur; vnde vascula tenerrima ista sensim diuellantur, adeo vt effusio liquidi fiat, quod dein vna cum vasis, quibus comprehensum fuerit, loci calore in liquidum album

tis, opusc. med. p. 117. sqq.; quod ipsum quoque cel. olim BRENDÉLIVS in praestantiss. diss. de seriori vsu euacuantium in quibusdam acutis, memoriae reliquit; nec non cel. TISSOT in Avis au peuple, a Lyon p. 43., vbi dicit praemissis momentis, quae seriores venae sectionem suadent: il faut sans s'embarrasser du jour, faire une saignée, fut ce le dixieme.

d) b. PLATNERVS non solum in Chirurgia sua, sed etiam in Diss. de noxis ex cohibita suppuratione (Opusc. I. p. 226.) se pro ista stare ostendit.

e) Diss. de generatione puris, praemio condecorata (p. 8.) vbi suppuratio, inquit, est consequens vel exitus inflammationis, posterior necessario requiritur, vt fiat prior (p. 10.)

f) BOERH. aphor. 387.

album homogeneous resoluatur g). Ast aberrare ab ista norma haud raro naturam obseruamus, quin eousque vt ipsa suppuratio, inuersa rei conditione, inflammationem nonnunquam gignat, prout in phthificis obseruamus, quorum pus ad latera vlceris nouam saepe inflammationem accendit, et pulsum antea suppressum et mollem attollit durumque reddit, et veram febrem acutam suscitatur, nonnisi sanguinis missione, temperantibusque commodius compescendam. Nec minus communi sententiae aduersum est, quod scirrhusa glandularum durities saepe in verum pus vertatur, quod exemplo tuberculorum s. scirrhorum in pulmonibus repertorum, in quorum medulla pus natum fuit, satis patet. Hinc etiam, qui iniquius de cicuta vi sentiunt, ill. STÖRCKIO obiecerunt, infauito euentu eandem suppurationem in glandulis internis facile posse contingere, de qua in externis scirrhis practicum nonnulli gloriantur; cuius vero effectus noxii immunem omnino stirpem pronunciat ill. ille Vindobonensis medicus h).

§. IV.

Fatendum sane est, in hoc ipso, prout in multis aliis argumentis, quae non ratiocinii sed fidae obser-

g) V. etiam ill. v. SWIETEN. *Comment. ad Aph. cit.* et GRAS-
HUISIUS *loc. cit.* p. 14. sq.

h) *Libell. II. de cicuta* pag. 285. Eandem vim HAENIUS tribuit
Belladonnae, quam vero se obseruasse in aegra sibi commissa
negat cel. ZIMMERMANNUS (*Periculum de Belladonna* p. 28.)
V. HAENII *Rat. med.* 2. p. 36. sq.

observationis et experientiae fulcro nituntur, ex veterum monumentis fruges colligi posse praestantissimas; quo tota imprimis de crasibus doctrina pertinet. Ne vero quae de abscessuum, s. αποσσεων v. αποσεμκτων origine dixerunt, maligne interpretemur, notare oportet, variam istis veteres tribuisse significationem. Sic HIPPOCRATES transitum vnius morbi in alium hoc nomine insigniuit, docente isto loco, quo ex aliis febribus et morbis abscessus (αποσσεως in quartanas fieri refert. i) Frequentius vero per apostasin intelligit secessum materiae cuiusdam ad aliquem locum per varia coctionum molimina, siue verum pus ista fuerit siue liquamen quoddam isto crudius minusque elaboratum. Hanc speciem ita veteres distinxerunt, vt alios abscessus fieri per effluxum (κατ' εκρευ) si e. gr. per alui deiectiones vel mictu crassioris lotii, inflammatorius quidam morbus solueretur, alios per decubitum (κατ' αποθεσιν) k) dicerent, cuius loci sunt parotides, abscessus ad inguina, coxas, aliasque partes. In denominandis abscessibus internis frequenter empyematis v. εμπυησεος nomen occurrit, quod saepe idem praecise vitium, quod Latini vomicam dicunt, denotat l), licet haec vox quoque ad effusionem puris intra pulmones et thoracem m) extendatur. Ratio

i) Epidem. I. Text. 21. CHARTER Tom. IX. p. 44.

k) GALEN. Comment. 2. L. 1. Epid. Hipp. Text. 44.

l) Hipp. Epidem. L. 3. Aphor. V. 8. CAELIVS AVREL. Acut. L. 2. cap. 12. Tard. pass. I. 5. c. 10.

m) Galen. Lib. de tumoribus cap. 3. Aegineta. L. 3. c. 32.

tio quoque abscessus ad nervos; visus auditusque variis vitiis, apoplexia, paralyfi, spasmis etc. sese manifestantis, sedulo ab istis habita est. Generatim igitur ad veterum mentem abscessus in duas classes dispesci possunt, quarum altera liquido quodam vel in loco primum laeso, vel in remotiori, collecto absoluitur; altera in nervis per consensum plerumque modo affectis sese exserit. Paucis ipse HIPPOCRATES rem expedit, dum, *abscessus*, inquit, *fieri aut per cutem, aut ad ossa, aut ad spinalem medullam, aut secundum alias effluxiones (ἐκροας), os, pudendum, aures, nares, ex utero menses n)*. Ego vero abscessus significatum ad verum pus conceptum restringo, siue istud aliquo loco decumbat, siue, in quo praeceuntem GALENUM habemus, per patulas corporis vias effundatur, et quid de hujus praecise origine statuendum sit, disputo.

§. V.

In vniuersum criseos genus abscessus esse scimus, quibus natura in praesidium sanitatis vtitur, ut quidquid vitii in humoribus nostris contractum sit, subigatur, subactum denique ex corporis sinu eliminetur. Quum vero eadem causae aduersam valetudinem gignant, quae secundam sustentant, nec inter sanitatem et morbum aliud quam gradu discrimen obtineat: in sano alioquin homine nec

prae-

n) Epid. 2. Sect. I. p. 688. Edit. Lind.

praegresso alio morbo afflicto aliquando oriuntur; vt ex furunculis oris, scabie, capitis tinea aliisque exemplis constat. Crebrius tamen post acutum morbum pullulare solent, nisi iste sub declinatione febris sudore largiori vel vrina solutus fuerit, nec rarius intermittentes febres vel chronicos morbos excipiunt; licet pro temporis ratione haud exiguum discrimen sit. Lentius obrepunt, quibus febres longae soluuntur, nec continuo sed partito molimine et febriculis acutioribus haud raro interrupto isti perficiuntur. Quas ipsas latentes insidias occultas istas phthises experiri satis certum est. interdum istud molimen modo in viscus aliquod internum vel externam quandam corporis partem vim suam exserit, aliquando autem totam massam sanguinis inquinat et in consensum trahit. Saepe quoque fit, vt purulenta materies, quam primum occupauit sedem, relinquat, aliorum confugiendo. Quod vero huius in primis loci est, differre in eo abscessus videmus, quod quidam inflammationis effectus sint, alii autem sine isto symptomatum fatellio, quod phlegmone sibi vindicat, procedant; de quibus omnibus jam dispiciendum est sollertius.

§. VI.

Quisque nouit inflammatione istam partem dici affectam, quam doloris sensus grauat, in qua calor percipitur, rubor quidam apparet, et quae ultra superficiem reliqui corporis prominet, quibus
febrem

febrem tanquam aliud idque indiuulsum symptomā nonnulli addunt o), quam vero SWIETENIVS haud sine limitatione admittit, ita ut vel in toto (scil. corpore) vel in parte tantummodo, (quod nihil aliud quam consueta ista pulsatio est) sese manifestet, respiciente nempe illustri viro ad doloris conubium, quem veram febris causam habet, et quo mitius affligente, febrem saepe deesse affirmat. p) Cui SWIETENII effato equidem non omnino subscriberem, quum in dirissimo dolore colico inflammationem comitante pulsus debilis, nec ita ut alias fit, acceleratus sentiatur. Et licet largiendum in minori inflammatione deesse posse febrem, ad maiorem tamen requirimus. Neminem autem latet, quatenam ex dictis signis ab inflammatione interna excludenda sint.

§. VII.

Quod verò veteres ad puris prouentum iam perspexerint prodroma haecce signa non absolute requiri, ita tamen ut appareat iis hoc non omnino vulgare visum fuisse, non vno indicio palam est. Docuit quidem HIPPOCRATES circa puris generationes dolores et febres magis accedere, quam ipso facto. q) Interim ipse id non semper contingere

G § 2

aperte

o) PLATNERI sunt: omnes, qui inflammatione laborant, febricitant.
Chirurg. p. 27

p) *Comment. T. I. p. 649.*

q) *Aphor. 47. Sect. 2. De ulcer. 11. 3. et Praenot. 17. 6. et alibi passim.*

aperte testatur, r) sed, nonnunquam *in morbis abscessus sine febre et facile ferri*. In cujus loci interpretatione etsi MARTIANVS s) et VALLESIVS t) interfese dissentiunt, dum ille istum de suppuratis, hic vero de iis qui suppurantur intellectum cupit: ipse tamen Cous exemplo Leambii cujusdam in progressu mentem suam explicat, de quo quum *intestinum ulcerosum esse putaretur in dysenteria pharmacis curata, humerum et sedem ulcerata fuisse in sinistra parte citra febrem*, refert. GALENVS autem abscessuum duo genera manifeste constituit, his nimirum verbis: *transmutantur autem in abscessum inflammationes quaedam, atque ex inflammationibus erysipelatis participantibus et ex erysipelatibus inflammationis participantibus non pauca*. Sine his vero etiam abscessuum dispositio consistit *ex multitudine quorundam humorum aut spirituum vaporosorum, siue in ipsis partibus in medio generentur, siue ex aliis confluant u)* Memorabilis quoque locus est, quo, non solum, inquit, *ex inflammationibus generatis abscessibus est, sed etiam statim ab initio nonnunquam propter alium aliquem humorem spatio temporis excoriantem et abducentem a subjectis ea quae continent*. x) Et alibi eodem modo abscessus distinguit, duplex eorum genus esse perhibens: *unum cum phlegmone in pus versa pus ipsum tanquam in sinu aliquo est*

col-

r) Epidem 4. 23. p. 760.

s) annotat. ad hunc locum.

t) Comment. ad eundem locum.

u) De arte curativa ad Glaucon. Lib. 2. cap. 7.

x) Lib. de tumoribus, cap. 4.

collectum, alterum cum nulla praecedente phlegmone humor aliquis statim ab initio isque alias specie alius, ceterum omnino acris, in parte aliqua colligitur. Nec potuit effugere haec ipsa res perspicaciam veterum, qui adeo analogiam intra sedimentum urinae, quod FERNELIVS materiam puri finitimam appellat, et ipsum pus cognouerunt. Hoc nempe instructam urinam jam dudum HIPPOCRATES purulentam libro Prognosticorum vocauit, vbi ait: *solaere etiam purulentam urinam album et laeue sedimentum habentem*, eamque illi vim tribuit, quod abscessibus alias nascituris praeuertat. Pertinet huc elegantissimus locus: *z) quibus spes est abscessum fore ad articulos, eos abscessu liberat urina multa et crassa et alba reddita, qualis in febris, in lassitudine, quarta die quibusdam fieri incipit; et alius: a) quibus febre iudicatorie desinente tumores ad aures in febris cum doloribus suborti neque conquiescunt, neque suppurantur, eos profluuium ut intestinorum difficultas, aut quod in urinis crassis subsidet, liberat.* Illustrat rem cl. A. I. SCHMIRT ad mentem praeceptoris sui, ill. BRENDELII, in dissertatione *de coctione pathologica*, consilio suo, quo iubet praefocare abscessum ad aures in cunis adhuc latentem, repellere tempestiuus emollientibus, materiam stagnantem, quibus factis fore ut plurimum, ut albo sedimine urina sca-teat, affirmat. Et FOESIVS in locum praenotionum

z) Aphor. Sect. 4. 74. V. et Epidem. Lib. 6. Sect. 4. p. 807.

a) Epid. Stat. 3. Lib. 1. Sect. 2.

coacar. (Loc. CL.) HIPPOCRATIS commentans *Erasistratum* quondam refert sedimentum vrinae in febrientibus pro pure habuisse. Contrarium autem iudicium veteres ferebant, si vrina tenuis et cruda mingeretur, praelucente eodem diuino viro, cuius effatum est: *qui vrinas tenues et crudas mejunt multo tempore, sique cetera salutaria signa sint, illis abscessum ad loca, infra septum transuersum expectare oportet* b) Quae de abscessuum in vrinas purulentas commutatione dixi, fatis docent eandem vtrique criseos generi esse originem, et eodem naturae molimine vtrumque perfici. Nec negare ideo licet, verum pus emanasse cum lotio, quod istud in apostemate haerens crassius apparet magisque elaboratum, quod nimirum morae et quieti in loco calido et resorptioni tenuiorum partium tribuendum esse censeo.

§. VIII.

Mirandum igitur quam maxime est, quod in tanta quam veteres circa abscessuum primordia accenderunt lucem posteriorum medicorum plerique de hoc suppurationis genere vel omnino taceant, vel in isto refellendo moram hectant; vnde pauci isti, qui illius meminerunt, refutare potius recentiorum placita, quam veterum nouis argumentis confirmare videntur. Ex seculo 16 inter fautores hujus

b) *Prognostic. IV. 78.*

hujus sententiae FRANCISCVM VALLESIVM, c) commentariis suis in Hippocratis libros de morbis popularibus, inconcinna licet dictione exaratis, inprimis celebrem, repono, cujus verba de hac re sunt, *abscessus ad articulos fiunt aliquando citra articulorum dolores ac tumores, qui solis effeminationibus seu luxationibus cognoscuntur*; cui ex medio seculo 17. adjungendus est ANTONIVS SANTORELLVS, quem breuiter hanc rem attigisse refert MARCVS AVREL. SEVERINVS. d)

§. IX.

Commodissime autem abscessus isti sine inflammatione in 3. Species dispesci me iudice possunt.

Species prima.

Prima haec esto, in qua *pus eodem quo collectum reperitur loco, originem suam cepit*, nec aliunde, nisi per latens et occultum sanguinis vitium, illuc delatum fuit; locum vero, quo emerfit, sensim vi morbi exundante, exulcerat. Haec saepe ex acuta quadam febre orta est, a qua tam longo nonnunquam intervallo distinguitur, vt vera ejus origo omnino fere delitefcet. Nonnunquam vero sponte subnasci videtur in corpore ad eandem concipiendam per naturam, vel peculiari corporis conformatione vel haereditaria quadam labe, accedentibus caussis procatarteticis, apto.

G g 4

§. X. Sub-

c) Epid. Lib. 6. Cert. I. Text. II.

d) De recondita abscessuum natura p. 24.

§. X.

Subdoli hi sunt natales plerarumque phthisium, quos miror BOERHAAVIVM silentio praeteriisse, ad originem earum vel ex haemoptysi vel ex peripneumonia praegressa vnice respicientem. Excludit istud phthiseos genus vulgares illas causas, haemoptysin, febres pectoris inflammatorias, exanthematicas vt variolas, morbillos, malignas denique: et intermittentes, vitio vel naturae vel artis male retropulsa, strumas infantum suppressas, rel. Sed inter varias viscerum debilitates et symptomata varia spastica cum corporis extenuatione obrepit. Hi ipsi spasmi doloribus variis, affectionibus hypochondriacis, rubore isto genarum siue fugaci siue constantiori, quin veris nonnunquam motibus conuulsiuis sese produnt. Quo in statu aegri diu saepe vitam, quin per complures annos protrahunt, ita tamen vt certis periodis et pro varia anni tempestate dirius afficiantur. Nec statim ab initio febris sese effert, quae eadem subdola vi emergens catarrhalem subinde refert nec constanter sed per intervalla quasi affligit. Sub hisce insidiis tandem suppurationis molimen manifestius redditur doloribus inprimis circa thoracem humerosque mox obtusis, mox acutioribus, respiratione molestiori, pressionis circa pectus sensu, quocum tussis interdum conjungitur, habitu cachectico, aliisque ejus generis signis. Et ne nunc quidem febris semper molestiarum co-

mes est, licet aliquando accedat, eaque plerumque valde recondita, et vt ante jam dictum, inducias vel longiores vel breuiores relinquens, vel mitius aegrum grauans; vsque dum rupto abscessu verum pus egeratur, et in apertam phthisin malum transeat. Stadium hocce, suppuratorium merito dicendum, saepe febre alius generis etsi mitiore a catarrhali vel intermittente acceleratur, notante jam Hippocrate: aliquos febre qualicunque ad suppurationem perducit. e) Ad rariora autem exempla pertinere videtur, quod vlcus in pulmonibus per totum tempus nihil doloris vel tussis excitauerit, cuius exemplum, ex NICOL. MASSA, BONETVS f) recenset.

§. XI.

Saepe hectica labes praecedat, a variis pulmonum obstructionibus, scirrhis, tuberculis crudis, vt HIPPOCRATES illa vocat, apostematibus, calculosis vel calcareis concrementis, materia sabulosa g) tuberculis s. vomicis non pure sed tenaciori liquore h) muscoso alioque repletis, pituita corrupta flacciditatem inducente, i) atonia singulari, k) osteogenia, steatomatibus, vt taceam alia vitia, repetenda. Scite veteres inter hecticam et phthisin s.

G g 5 tabe.

e) Praenot. coacar. 3. 333.

f) Sepulchret I. 731.

g) Solenander Consil. med. sect. 5, c. 16. WIERVS de praestig. daem. L. 3. cap. 3.

h) Bonnet. Sepulchret. L. II, Sext. 7. Obs. 24. HEURNIVS Obs. hist. 21.

i) SEVERINVS de abscess. pest. 2. cap. 36. p. 269. qui GALENO succenset, semper vlcus accusanti,

k) Bonnet theatr. tabid. E. ere 23.

tabescentes et empyos distinxerunt, licet diagnosis saepe nonnisi post mortem pateat, tanto magis si vomica clausa aeger laborauerit. Nec opus fuisset WILLISIO *l)*, qui ejusmodi tubercula haud raro se obseruasse refert, si ad istud discrimen attendisset, erroris istos redarguere, qui vlcus pulmonis semper in phthisi supponunt, eamque per totius corporis contabescentiam a mala pulmonis conformatione ortam definire. Hinc quoque RICH. MORTON *m)* reprehendens istos, qui in vlcere pulmonis tantum acquiescunt, multas alias phthises recenset, scorbuticam scrophulariam, icteritiam, asthmaticam, melancholicam aliasque, quarum non ita arctum cum vlcere connubium. Multa tuberculorum in pulmonibus repertorum, quibus tabes inducta fuit, occurrunt exempla, quorum autem ea natura est, vt, licet duriores materiam, cretaceam quasi seu gypsaceam initio contineant, sensim tamen in mollius liquidum, quin verum pus resoluantur; vnde hecticæ in phthisin transitus cognoscitur. Quod inde euidentius fit, quod in vno eodemque corpore materia iis contenta diuersae naturae fuit, mox durior digitisque comprimantibus resistens, mox scissilis, mollior et pultacea, quin aliquando vere purulenta. Sic in actis medicorum Edinb. *n)* quadriennis puer sistitur, qui conualuisse perfecte ex incipiente phthisi visus fuit, post

mor-

l) *Pharmac. rational.* Tom. II. Sect. 1. c. 6. p. 87.

m) *Phthisiolog.* L. 2. ab initio p. m. 35. de diuisionibus vero agit. L. 3. c. 1. 2. 3. 4. 13. etc.

n) *Medical. Essays* T. 2. p. 298.

mortem vero conuulsionibus acceleratam, pulmones exhibuit tuberculis scatentes, quorum quaedam crassam materiam instar casei recentis, alia pus tenue incluserunt. De milite BARRERIVS o) refert, macilento viribusque valde prostrato, perque octo fere menses tussi valde afflicto, et febre lenta decumbente, qui post sputorum tenacium alborum ejectionem sudoresque molestos tandem succubuit. In hujus pulmonibus magna tuberculorum copia apparuit, diuersae magnitudinis et duritiei; quaedam discissa emiserunt materiam gypseam, et vnicum adfuit pure plenum. Quae nec SYDENHAMVM p) latuerunt, vtpote qui in aegris phthisi decedentibus glandulas et tubercula adnasci, sanie vt plurimum distenta, dicit. Quibuscum etiam MEADII q) et PRINGLIJ r) obseruationes conueniunt. Et hi aegri sine dubio sunt, quos HIPPOCRATES s) subtabescentes nuncupat, et quos dein ingruente epidemica, eaque austrina aeris constitutione vere tabidos euasisse refert, addens: quandoquidem multis etiam dubie sese habentibus tabes tunc confirmata fuit. Possunt ista tubercula per aliquod tempus pus pus eructare, et sputis intra reliqua verae phthi-

o) *Obseruat. anatom. p. 124. seq.*

p) *V. Process. integr. Op. Ed. Lugd. p. 638.*

q) *Monit. et praec. med. Sect. 10. p. 27. Ed. Lips.*

r) *In the bodies, inquit, vvhich I dissected of those vvho died of the phthisis pulmonalis, I found the lungs full both of tubercles and ulcers. V. DISEASES of the army 1764. p. 169.*

s) *Epid. I Text. 18.*

phthiseos signa, effundere, dein vero minuto sensim riuo iterum consolidari, redeuntibus iterum postea nouis puris screatibus. Quod innuit istud practicae sapientiae Coum oraculum, dum suppuratos ex tabidis et vicissim ex suppuratis tabidos fieri notat. t)

§. XII.

Nonnunquam vero etiam sine prodromis hisce vitiis suppurationis negotium peragitur, ita vt protinus ab initio in pulmone pus concipiatur. Quod frequenter in istis hominibus, quibus peculiaris opportunitas ex structura corporis dependens ab HIPPOCRATE in Coacis elegantissime descripta, accidit. Hos *Φθισώδεις* vocauit GALENVS, quoniam isti, phthiseos etsi adhuc expertes, procliuitatem ad eam habent, scapulis prominentibus, pleniori et angustiori thorace, collo longiori carnisque teneritudine, ex placitis medicinae antistitum, cognoscendam,

§. XIII.

Vix opus est operose testimonia auctorum conquirere, qui hancce latenter obrepentem phthisin obseruarunt, quum ill. SWIETENIVS u) nullum medicum esse putet, qui lautam praxin habuerit, quin similes casus viderit. Pluribus locis, in veterum monumentis obuiis, eandem istis cognitam fuisse,

t) De lecis in hom. XXVII. 8.

u) V. Comment. T. 4. p. 3.

isse, constat, in quibus tabescentium, latenter phthisicorum etc. mentio fit. Huc quoque respexisse eos existimo, dum pituitam intra pulmones collectam accusant, et hanc causam ab aliis manifeste distinguunt. v) Adponere huc iuuat locum Galeni x) notatu dignissimum: duae namque, inquit, sunt ejus differentiae maximae, vna quidem ex capitis defluxionibus constat; altera vero, quae ex ipsis pulmonibus affectis ortum ducit, prorsus quidem ex cruentis sputis, maximeque rupto vase, saepius et rheumate affecto viscere, ob aliam quandam ex aliis partibus, non ex capite causant. Diffidium quod inter medicos obtinere dicit FERNELIVS, y) an sine haemoptysi praecua aliquis contabescere posset, ex propria Observatione dirimit, dum complures se vidisse affirmat, quos tabes consumisset, licet ne vllum quidem per totum morbi decursum sanguinis vestigium exstiterit. Magni ponderis est assensus LOMMII, z) fidi veterum practicorum interpretis, qui alios latenter etiam, sine sanguinis sputo, sine signis momentaneae destillationis praegressae contabescere ob infirmos natura pulmones notat. Facile patet, haec non potuisse effugere attentum tabidorum scrutatorem BENNE-

TVM,

v) Hipp. de internis affect. c. 2. CAELIVS AVREL. de morbis chron.

l. 2. cap. 14. p. 410. Cels. l. 2. cap. 7.

x) Comment in 1. Libr. Epid.

y) Pathol. l. 5. c. 10. V. Ed. Geneu. uniu. med. p. 458.

z) Obseru. Med. Ed. VVed. p. 135.

rum, a) qui et curatius modum, quo ejusmodi abscessus erumpit, definire ausus est. Nec perfunctorie hoc ipsum phthiseos primordium descripsit ELLERVS; b) vt taceam varias egregias disputationes a BRENDÉLIO editas, quae aliquid commercii cum hocce argumento habent.

§. XIV.

Negari quidem nequit, quod praeter pulmones alia quoque viscera latenti isti corruptelae, quae exulcerationem parit, obnoxia sint, prout phthises ex vlceribus in jecore, renibus, splene, mesenterio, tibiis, gutture, aspera arteria aliisque partibus natae manifeste docent. Sed ne sub hisce quidem labis expertes esse solent pulmones, adeo vt rarius in exitium aegri vergant, nisi hi ipsi communi vitio afficiantur. Hinc post febres acutas, quando ex suis signis abscessus expectare fas est, nisi in parte quadam externa emergant, phthiseos pulmonalis metus merito concipitur. Fauere isti, etiam si nulla in ipsa thoracis compage labes accusari possit, non structura solum spongiosa pulmonum, sed et copia ista perpetuo alluentis sanguinis videtur. Quum enim, quicquid humorum in corpore reperitur subigi, misceri, densari a pulmonibus debeat: non possunt non vitia, quibus isti laborant, vna inferri et vim suam ad istos dispergere, cui
vero

a) *Theatr. tabid. p. 32. n. 34.*

b) *Obs. de cognosc. et curand. morbis p. 208.*

vero injuriae tanto minus resistere possunt, quum mollities ipsius visceris ad fouenda ista adeo apta sit. Eo nempe videmus diathesin purulentam facile ferri, quo minima resistantia est. Hoc quoque in causa est, quod contagio varioloso hausto plurimae pustulae iis in locis erumpant, quae lanceola hinc inde per cutem leuiter ducta, debilitauimus; et quod in infitione variolarum plurima pars puris per vulnus inflictum effluat. Hinc retropulsa materia arthritica pulmones imprimis afficit. Hinc quoque pectoris oppressiones et anxietates, quae ex retrocedentibus exanthematibus nasci obseruantur. Quae vero labes dum semel in pulmones translata fuit, ob languescens in commodo nutrimento parando officium, totam humorum congeriem vitiari nimium et primo fomiti nouos semper igniculos addi, necesse est, tanto magis si inquilinum quoddam pulmonum vitium praecesserit.

§. XV.

Nec desunt alia, praeter phthisin, puris citra inflammationem concepti exempla. Variolas aliquando sine febre, saltem leuissima, prodiisse, easque vero pure repletas, in variis practicorum libris legimus. c) Et etiamsi cum Wratislauiensibus medicis, d) *Forestum*, *Rhodium* aliosque, qui ejusmodi obseruationes consignarunt, errasse dicendum esset,

c) V. DRELINCVRTIVS *L. de variol. et morbill. op. p. 649.* FOREST. *L. 6. Obs. 49. 50. Huxham de Variol. T. 2 p. 123. Ed. Reichel.*

d) *Const. epid. 1700. p. 161.*

esset, quum haud facile distinguatur leuissima febris a nulla: haud tamen raro videmus ex contactu pustulas quasdam variolosas enasci, absente omni febris indicio, in iis nempe, qui variolas jam superarunt, inprimis si cutem mollem et teneram habent. De abscessibus spontaneis externis autem cel. ACRELL *e)* tres nobis exhibet casus, in quorum duobus nulla morbi antecedentis suspicio fuit. In altero abscessus mollis in dorso inde a dorsi spina usque ad scapulam dextram fere, ejus diameter quartam cubiti partem constituebat, natus erat. Per complures tamen annos infirmæ valetudinis ægra fuit, et doloribus vagis conflictata; abscessus vero ipse doloris expers fuit. Tandem autem, priori licet abscessu sanato, ob diathesin purulentam, novio postea abscessu sese manifestante, occubuit. In alia femina pariter nec febris nec alius vllus morbus præcessit. Non valde dissimilis casus est, quem SWIETENIVS *f)* sistit; viri nempe mediæ ætatis sani et alacris meminit, in quo sine manifesta causa ortus tumor mollis in latere sinistro circa os ilei fuit, cui tandem hectica febris accessit, eaque lethalis. Alio loco *g)* mentio fit ægræ, in qua vigesimum morbi diem jam transgressa, subito, quum pridie nulla ejus nota adesset, humoris fluctuantis copia percepta fuit in brachio, nec, quod expresse addit, toto morbi ambitu, vllum topicæ inflammationis

vel

e) Chirurgicalische Händelser: p. 142: 599.

f) Comment. T. I. p. 718.

g) Tom. 2. p. 18.

vel suppurationis vestigium apparuit. Ad hoc Cl. BILGVER vero *b)* praeter istos abscessus externos, quos immediate praecedens inflammatio; febris, rubedo, et acutus dolor indicat, alios quoque exsistere aperte monet, et magna copia pus sub cute et pinguedine accumulari, absque omni extrinsecus apparente indicio. In tanta observationum copia non potuit non quoque veri amantissimus ill. MORGAGNI *i)* hanc ipsam abscessus originem agnoscere, qui dum de illa agit, se imprimis collegae sui PVIATI observationibus firmari in ista dicit, qui adeo in hominibus in firma et florente aetate constitutis et semel in robusto viro illam observavit. Ad hoc abscessuum genus quoque refero ulcera varia venerea, cariem ossium variam, quae si temere supprimitur, haud raro veram phthisin generat, epiphoram purulentam, gingiviarum ulcera, linguae fistulosa ulcera, *k)* ulcera varia mali moris crurum, aliorumque membrorum. Furunculorum, qui nonnunquam deuictis variolis exsurgunt, adficiente HAENIO *l)* eadem ratio est, ita ut nonnisi a pure cutis tendatur, et vnica die nascatur, augetur tumor iste, apertus vero nonnunquam eodem die pus fundere incipiat.

Speci-

b) Wundarzneykunst in Feldlazarethen p. 826.

i) De sed. et caus. morb. 55. p. 341.

k) Hildan. Observat. Chirurg. Cent. 4. p. 43.

l) Rat. med. 2. p. 17.

Species secunda.

§. XVI.

Jam vero in secunda abscessuum specie consideranda occupabor, quam in eo colloco, quod pus non fixo quodam loco colligatur, eundemque lenta vi depascat, sed *libere in sanguinis massa oberret*, data vero occasione per patula corporis loca effluat. Quicquid in hocce difficili argumento lucis nobis affulget, decursus morbi cum iis quae in cadauere post mortem obseruantur comparationi debemus. Nam in sanguine ipso, dum e vena mittitur, nihil purulenti apparet, sed omnia in eo accurate commista et homogenea reperiuntur. Haud raro vero inciso cadauere circa cujusvis generis viscera crustas subflauas albidas easque instar lardi compactas conspiciamus, quibus quum nullae aliae viae, quam tenerrima exhalantia vasa patuerint, ex ipso sanguinis penu promanasse credibile omnino est. Annunt observationes, quae, licet magna aliquando copia puris per quaedam loca in vita effusa fuerit, nullum tamen peculiare ejus receptaculum post mortem sub scrutinio anatomico inuentum testantur.

§. XVII.

De phthisi exempla hujus generis varia in scriptis medicorum obuiam mihi venere. Pluries se vidisse fatetur b. BRENDÉLIUS *m)* phthificos, quibus

m) Diss. de tabescentibus ad nares duenda fluxione p. 5.

bus ne vestigium quidem vlcēris jam elaborati pulmonum vel alius visceris fuisset, sed profusa quaedam per pulmonum substantiam inque interstitiis mediastini extra vasa collecti liquoris proluuies ichorodes spumosa, subcruenta pallida et aliorum colorum. Sic BENNETVS *n)* hominem sistit, qui per longum tempus sputum subdulcē summe emaciatus eiecerat, in cuius pulmone praeter laxitatem notabilem nihil alieni visum fuit. Nouum rei fulcrum HAENIVS *o)* dedit, dum variorum aegrorum sibi commissorum historias nobiscum communicat, qui sputorum purulentorum ingentem copiam excrearunt, vnde consumptionis insignis vel vomicarum haud exiguarum suspicio nata fuit; cuius vero labis adeo insontes post mortem pulmones inuenti fuerunt, vt ne tantillum quidem vel puris vel vomicarum detegi potuerit. Nec quantum scio alius originis illa puris per os excretio fuit, quae aliquando in ipso phthiseos decursu citra febris conubium, ut passim legitur, nata fuit. Quod et jam HIPPOCRATI probabile visum, vtpote quum iis hoc sputum familiare esse pronunciet, quibus consuetae sanguinis excretiones per commodiores vias substituerint. Singulare autem est, quod in quibusdam formae quidam vigor et torositas inter tantae colluiei corruptae euacuationem remaneat. Huc

H h 2

perti-

n) Theatr. tab. hist. ad cap. 23. p. 89. aliisque locis.

o) Rat. med. T. I. p. 86. sqq. Tom. II. p. 12.

pertinet matrona ista, quam CVMIVS *p*) in Ephemeridibus naturae curiosorum describit, quae menstrui fluxus parcius promanantis loco, singulis mensibus insignem ad tres saepe libras puris foetentis copiam sputis eiecit et nihilominus vigorem formae suae seruauit. Prout aliud ejusdem tenoris fere exemplum a BARTHOLINO *q*) memoriae proditum reperitur, iuuenis nimirum, qui inter purulentam colluuiem, quam in adstantium haud exiguum molestiam et intra lentae febris insidias exspuerat, adeo tamen in dies carnosus euasit, ut vestimenta arctiora sensim fieri sentiret.

§. XVIII.

Non vnice vero labe ista purulenta per pulmones sese liberare studet natura. Interdum ad nares redundare illam animaduertimus. Veteres inter phthiseos causas defluxum pituitae ex capite accusarunt, quem licet, quum nullae viae, per quas descendere possit, ex cranio pateant, hodie haud aliquis amplius reum facturus sit; ex catarrho tamen veram phthisin efflorescere posse, certo certius est. Vnde perspicacissimus et Hippocraticus practicus, ill. PRINGLE *r*) adeo de tussi ex refrigerio contracta apud milites metuit, ut neglectam tussim pro initio

p) Dec. I. A. I. O. 94. p. 223.

q) Histor. anat. 14. Cent. 2.

r) A recent cough from cold may be considered as the lowest degree of a peripneumony, and an old neglected cough as the beginning of a consumption. Vid. Diseases of the army Ed. cit. p. 169.

initio phthiseos habeat. Non vero adeo mirum, quod veteres, in ista anatomiae infantia, in hunc errorem incurrerint, quum in hominibus ad phthi-
sin procliuibus affluxum muci ad nares copiosiore
obseruarent, sub quo pectoris molestiae leuaban-
tur; cui rei et recentior Cel. b. BRENDÉLII expe-
rientia non mediocriter fauet s). Neque ideo sine
re consilium ab ipso jam HIPPOCRATE captum esse
videtur in tabescentibus reuellendi stillicidium istud
ad nares, vt praepediretur suppuratio, vel jam prae-
sens imminueretur. Cur vero adeo proficuum istud
aliquando defluuium sit, exinde apparet manifestius,
quod saepe ad puris naturam proxime accedit. Nec
contrarium est, quod nonnunquam mere mucosum
quoad adspectum sit, quum discrimen totum in ma-
jori vel minori coctionis gradu tantum consistere
videatur. Memorabilis est SALMVTHI t) obserua-
tio, qui nares vidit, quemadmodum aliis sanguine
stillant, sic pituita tenui cuidam stillare integrum
triduum, per interualla tamen; et ipsius venerabi-
lis MORGAGNI u), in lectissima Veneta muliere fa-
cta, quae sub corporis conspicua extenuatione per
complures menses tale profluuium experta fuit.
Non solum autem stillicidium ejusmodi contingere
ad nares, sed veros ibidem abscessus gigni, idque
nulla febre, minimo dolore, vel solum FERNÉLII v)

Hh 3 testi-

s) v. BRENDÉL de tabescentibus etc. p. 23.

t) BONETI sepulchr. Sect. 17. Append. 2. ad Obs. 10.

u) de sed. et caus. morb. Epist. 14. Art. 20.

v) Pathol. L. 5. cap. 7. Ed cit. p. 439.

testimonium docere potest, qui ex ruptis ejusmodi abscessibus pus sincerum per nares affatim profluere perinde atque e purulentis auribus, et quidem nullo valetudinis incommodo, animaduertit. Constat simul, quid de diuturna ista puris per aurium meatum euacuatione, in praesidium aegri, cum difficultate licet auditus conjunctum, adstantium autem ob foetorem et turpitudinem fastidium, contingente, sentiendum sit. Et fane quae supra de vrinis purulentis ex ore veterum attulimus, haud leue oberrantis saepe vage puris documentum praebet. Morbos quidem praecipites praeter alias euacuationes vrina purulenta ac vitrea affatim reddita solui HIPPOCRATES innuit; sed et ad ipsos sanos integraque valetudine vtentes eandem extendere licet, quod probe quoque FOESIVS x) in annotationibus ad hoc Coi effatum monuit, voracitate et otio peccantibus illam quoque adscribens. Ego vero citra istas causas eam etiam agnosco, lenibus istis abscessibus in perfecte ad speciem sanis haud raro propullulantibus innixus. Eandem fluiori albo originem tribuo, in quo muci sensim in pus degenerantis haud obscure ratio cognoscitur, et qui morbos non acutos modo sed et chronicos imperfecta crisi solutos frequenter excipit. Affinitatem vero praeter dicta habitus cachecticus febrisque lente corpus depascens diriori malo accedens satis denotat.

§. XIX.

x) Praenot. Coac. loc. cit.

§. XIX.

Multum praeterea lucis suppuratio ista ingens vulnerum majorum, ut ex amputatis membris, accendit, quae nonnunquam omnem vitae conseruationis spem, ex febre hectica, quae suscitatur, et virium summa prostratione, abscindit. Non potest tanta puris et tam diu excreti copia ex loci tam parui inflammatione nasci, sed diathesin quandam puri generando commodam et per inflammationem quasi seminio quodam inductam supponit. Hanc igitur potius, quam resorptionem puris, quae vulgo accusatur, febrem in his accendere existimo. Par quoque abscessuum extrinsecus natorum est ratio, qui mirum est, quantam nonnunquam puris copiam comprehendant, quod apertura facta cognoscitur. In iuvene, dolore lumborum, et ad inguen natesque dextri lateris praegresso, tanta, sectione facta, puris copia effluxit, ut non solum ad plus quam 6 libras aestimaretur, sed totum lectum inundaret, respectu ne quidem ad eam quantitatem, quae sequentibus diebus effluxit, habito. y Eadem de ortu puris adeo copiosi mirandi occasio MORGAGNIO z) sese obtulit in Archidiacono quodam, cujus cruris sinistrum dolor primum, dein abscessus corripuit, ex quo tanta copia prodiit, ut de vita desperarent, redeunte tamen sensim, licet in viro jam decrepito et febricula jam valdopere exhausto, summi MOR-

Hh 4

GAGNI

y) de la Motte *Traité complet de Chirurgie* Tom. I. p. 357. 199.

z) *Loc. citat. Epist. 55. Art. 14.*

GAGNI peritia, pristinae sanitatis vigore. Circa coxas praecipue ejusmodi collectiones purulentae crebrius videntur obseruatae esse, haud raro per telam cellulofam, fauente fascia, quam vocant, lata, vndique serpentes; vnde et ipsum potius os corrodi, quam, vt alias fieri solet, foras eleuata cute abscessum emergere videmus. Hinc diuinus COVS *a)* jam vstionem laudauit, vt ne in coxendicis morbo vexatis coxa excideret, crus contabesceret et claudicatio fieret. Ideo quoque vesicatoriis tempestiue vti in dolore ischiadico experientissimus TRALLES *b)* post alios tam serio injungit.

§. XX.

Nec momento suo vacat ad exulcerationem istam attendere, quae a leuioribus saepe causis, contusione, vulneribus, puncturis exiguis, in quibusdam hominibus nascitur. Quod quum adeo crebro multi in semet ipsis experiantur, testimoniis firmare amplius superuacaneum, et ne ill. MORGAGNI *c)* quidem, nisi toti, de quo agimus, argumento tantopere accommodatum esset. In senatore nimirum jam aetate prouecto, post leuem contusionem in tibia, quam exiguum ibidem erysipelas et modica febris consecuta fuerant, tumor emerfit, sine peculiari febre, sine rigoribus vllis, vel doloris caloris pulsationisque sensu, cujus tumoris naturam flu-

ctuans

a) Aphor. 6. 60.

b) *Vsūs Opīi Sect. 2. p. 314. §99.*

c) *Loc. cit. Epist. 55. artic. 16.*

Et uans intus materia deinde detexit. Et addit fenex amabilis ab expertis Chirurgis sibi similes abscessuum ex leui caussa externa ortorum relatas fuisse historias.

Species tertia.

§. XXI.

Sed praeter duas istas huc usque recensitas abscessuum species, tertiam constituo, in qua nimirum *pus, aliquo loco in corpore jam collectum, ad remotiorem quendam nullo antea vitio affectum, deferitur.* Est metastaseos genus ab alia quadam cujuscunque originis enata. Nolo illam cum ista primaria confundi, quae acutis morbis crisi perfecta non solutis, superuenit. et vel externum corpus ad aures, axillas vel inguina plerumque, vel peiori omine internum aliquod viscus occupat. Nam licet nonnunquam crisis ista imperfecta subito fiat, nec prodromis illis inflammationis signis stipata prodeat, *d)* saepissime tamen illa futuri decubitus praenuncia sese adiungunt. Vnde prisca ista in decursu morborum scrutando industria, quibuscunque ex morbo resurgentibus aliqua pars doluerit, illis abscessus expectandos esse *e)* docuit, tumque praecise decubitus istos oriri monuit, si viginti dies febris detinens superet. Transitus vero puris, de quo loquor, non vna solet esse ratio. Mox enim ex vno viscere in

Hh 5 alterum,

d) SWIETEN *Commentar.* 2. p. 593.

e) HIPPOCRATES *Apb.* 32. *Secl.* 4.

alterum, vel interna quadam parte ad externam sese transfert, mox, postquam extrinsecus aliquo loco sedem fixit, ex hoc intro redundat. Néc adeo rarum est, pus, quod interne alicubi haesit, per emissaria corporis vasa euacuari.

§. XXII.

Ad pulmones purulenta ista colluuius ex alio quodam viscere creberrime transuehitur, in cujus rei causam supra jam inquisiui. Ex ulcere vteri, cui obstetricis cujusdam in secundinis extrahendis imperitia ansam dedit, jam sexto die experientissimus MVZEL *f*) sputa purulenta idque copiose prodire animaduertit. Et in alio aegro sputorum causam apostema in peritoneo natum esse constitit; quod sagax MVZELII experientia jam initio ex liberiori respiratione decubitu supino, et quum respirare aegrum profundius juberet, tussis absentia praeuidit, dein vero abdominis intensione, dolore dorsi aliisque notis, et sectione tandem, quae ingentem puris copiam elicuit, apertius cognouit *g*). Translati ex hepate in pulmones puris exemplum memorat ill. VOGELIVS *h*), quod inopinato sub metu suffocationis prorupit, morte pedissequa, post quam pulmones quidem omni vomica vacui reperti, trachea autem pure repleta fuit inuenta.

f) *Medicinische u. Chirurg. Wahrnehmungen, zweyte Samml.* p. 6. *seqq.*

g) *loc. cit.* p. 9.

h) *Diss. de vomica pulmon. sine cystide resp.* S. H. A. Keiser.

uenta. Vix vero alius illi similior casus exstare potest, quam iste a MVZELIO consignatus de aegro, cuius hepatis in externa superficie faccus quasi putrido pure refertus, adnatus erat, pulmonibus omnis cul-pae insontibus i). Quod autem pus foris alicubi collectum non minus internas corporis sedes affe-ctet, vel vnica MORGAGNI k) narratione palam est, quae scilicet feminam adducit, cuius crus ob vlcera cacoethica ante praecidere necesse fuit, quod eo quidem effectu factum est, vt primum parotis in-gentem in molem intumesceret, postea autem apo-plexia corriperetur, cuius causam anatome dete-xit; nempe insignis puris copia in sinistro cerebri ventriculo latuit, absque vlllo ceteroquin cerebri vlcere.

§. XXIII.

Sic quoque inuerso ordine decubitus puris ex-trinsecus haud raro ex abscessu interno contingunt; prout de empyemate ex pleuritide nato et per vlcus brachii iudicato in Ephem. naturae curiosorum l) historia lectu digna occurrit. Non magis autem mirum, quod nonnunquam abscessus ante extra nati subito dispareant. In exanthematicis morbis, va-riolis, scabie etc. hoc fieri saepissime obseruamus. Vnde et SYDENHAMVS m) bubones in peste lubri-
cam

i) V. loc. cit. p. I.

k) de sed. et caus. morb. Epist. 4. 5.

l) Dec. I. A. 6. 7. Obs. 147.

m) Oper. vniuers. Lugd. 741. p. 116.

cam et aleae plenam morbi judicationem existimat, vtpote quum, quamuis interdum laudabiliter et cum symptomatum remissione protuberarint, saepe ex improviso euanescent. Fit nonnunquam subita ista metastasis aegri commodo haud mediocri, dummodo malum non nimis vetustum sit, nec loca nobilioribus functionibus destinata occupet. Fuit quidam *n*) abscessu ad coxam correptus, quem aperire constituerat chirurgus proxima die, sed per noctem disparuit pus et alui dejectionibus secessit. Pejus cecidit diarrhoea in alio homine jam phthisico, quae pariter consilium abscessus ad thoracem sequenti die incidendi frustraneum reddidit. *o*)

§. XXIV.

Tandem et illam puris translationem trutinare oportet, quae ejus per excretoria varia corporis vasa ejectione absoluitur. Possunt quae de metastasi secundaria nuperrime dicta sunt, huc referri. Nec minus autem crebro ad intestina et vrinarias vias pus ruere animaduertimus, GALENO *p*) jam praeunte, qui pulmonis vomica per vrinam, thoracis autem per intestina et aluum expurgari retulit. Est haec ista diarrhoea colliquatiua phthisicorum, qua scena malorum plerumque claudi solet, et qua ingruente homo tandem lampadis instar oleo
orbae

n) *Misc. Nat. Curios. Dec. 2. A. 9. O. 49.*

o) HAEN. *Rat. med. 2. p. 9.*

p) *de loc. affect. lib. 6. cap. 4. ad finem.*

orbae exstinguitur. Naturae tamen beneficio dejectiones aliquando purulentas fieri, tum observatio paullo ante ex ephemeridibus naturae curiosorum deprompta indicat, tum alia, qua tumor brachii insignis hac ratione sufflaminatus legitur. *q*) Hisce vero in casibus videtur non arcta puris cum sanguine miscela, sed fluctuatio modo locum habere, ita ut pus sanguinem quasi ad intestina vel vias urinarias modo comitetur, quem casum vero tam rarum censet ill. Eques et Archiater ROSEN A ROSENSTEIN *r*), qui varias historias lectu dignissimas diarrhoeae purulentae recenset, ut inter eorum millia vix semel incidere pronunciet. Idem forsitan accidit, quum rariori spectaculo pus verum in urinis non fundum petiit, sed in superficie natans conspicitur *s*). Sic refert SCULTETVS *t*) in homine, cuius abdomen perfossus fuit, cum leuamine omnium symptomatum urinam copioso pure mistam se vidisse.

§. XXV.

Non alienum est in modum inquirere, quo ista translatio puris peragatur. Triplex me iudice constitui potest. Resorptionem plerumque vnice accusant. Nec equidem nego vasis bibulis eam vim esse,

q) V. *Decur.* 3. *A.* 3. *Obs.* 2. p. 6. *Cfr. etiam A.* 5. et 6. *Obs.* 281. p. 635.

r) V. Ei. *Anweisung zur Kenntniss u. Heilung d. Kinderkr. versch. cel. Prof. Murray* p. 119.

s) BRENDDEL. *Diss. de tabesc.* p. 25.

t) *Armamentar. chirurg. Obs.* 61. p. 245.

esse, ut haurire queant stagnans aliquo loco pus subtilius vel liquidum illi analogum, quod dum sanguini admiscetur, illum corrumpit et quasi eliquat, febremque istam lente corpus consumentem suscitatur. Non vero tam auidè resorbere, prout plerumque putant, ex mora, quam pus saepe concipit diuturna apparet. Nec spissum adeo humorem, prout in abscessibus plerumque reperitur, a tam angustis vasis imbibere vero simile videtur. Et quodsi resorberetur, cur non aliquando puris vestigium in ipso sanguine conspiceretur? Resolui putredine quaedam ex mora et tum resorberi ais? sed scimus in repentinis istis metastasibus verum pus colligi non ut sanies resolutum, in remoto isto, quem occupauit postea loco. Alium igitur translationis modum agnoscere debemus, cui miror, quod tum modo subscribant, quum acrimonia sua vicinam plagam consumere pus incipiat. Transmigrationem puris per telae cellulosaë cauernulas intelligo, quam acuum, spinarum, globulorum plumbeorum, in remotissimos recessus transitus, et aquae in hydropicis effusio per vulnus alicubi inflictum probabilem reddit. Ea nempe telae cellulosaë natura est, ut nifum perpetuum sese contrahendi exerceat. Tum et tertio pus per erosam telam cellulosaë adipe consumto transfertur; cuius rei apud auctores occurrunt multa exempla ^{u)} et in praxi creberrima. Fit hoc

^{u)} V. in SWIET. (Com. I. p. 105.) casus parotidis cuius pus viam sibi parauit ad cubiti flexuram vsque, ubi anchylosin generauit. Cf. et HAEN. T. 4. cap. 4. de coxario morbo.

hoc acrimonia, quam pus ex mora in loco calido et miscela rancidae pinguedinis contraxit, quae adeo valida est, ut ne ligamentis quidem, nec musculis, nec ipsis ossibus pareat. Hinc istae fistulae in distantibus saepe locis, et ulcera ad ossa usque serpentina, et illa puris abundantia ex tumore etiam si minori prorumpens.

§. XXVI.

Multa ex hisce deduci possunt in praxi latissimum usum habitura. Ita alteram suppurationem altera leuari, quin omnino sufflaminari notatur, quod tum sensui aegri tum rationi conforme est. Crurum ulceribus bene manantibus scabie leniter eaque sicca modo afficiebatur iste MORGAGNI v) aeger, exsiccatis vero istis mox foedae pustulae cutem ferme uniuersam deturpabant. Elucescit simul, quantum in ulceribus artificialibus, vesicatoriis imprimis et fetaceis, inter feri lactis vel absente febre, ipsius lactis, et succorum ex herbis antiscorbuticis et balsamicis, connubia, temperantibus interpositis praesidii sit. Nec minus patet quatenam phthises curationem facilius admittant: hasce nimirum existimo, in quibus nulla adhuc vomica formata fuerit, et in quibus natura sponte in metastases istas secundarias inclinat. Vnde quoque detrimentum illud insigne intelligitur, quod pure alicubi collecto, si repellitur, siue

v) De Sed. et caus. morb. Epist. 55. Art. 13.

siue male prouida arte, siue sponte id fiat, nascitur. Hinc vitia ista cerebri, cordis, pulmonum, visus, etc. ex scabie, s. alio exanthemate retropulso, consolidatis intempestiue vlceribus etc. Hinc reuocatis et resuscitatis istis salus.

§. XXVII.

Pedem hic sistere possem, nisi loci commoditate ad quaedam de ipsa puris generatione tangenda inuitarer. Idque ideo fiet, quod sub meditatione de hoc ipso argumento et sub lectione auctorum sententiam de ejus ex ipso sanguine origine, quae hodiernis quibusdam medicis tantopere placet, et quam nouissime modo, ii auctoris sui insignem gloriam conceptam haud pauci existimant, non esse nouam, sed antiquis, et multis posterioris aetatis jam cognitam comperi; nouis quamuis argumentis confirmari illam ulterius posse absit, vt diffitear. Quid de puris ex inflammatione origine sentiendum sit, quae plerisque maxime probatur, ex superioribus apparebit satis euidenter. Alii vero pus ex adipe in loculis telae cellulosae contento deriuare conantur. Cujus hypotheseos patronum modo cel. GRASHVISIVM x) cito, qui eam studio deditaque opera exsecutus est, sede puris nimirum cum adipe communi, colore, tenacitate, natura inflammabili, pondere, consumptione pinguedinis in vlceribus, ejusque

x) *De generat. puris* p. 18 - 28.

que in febribus mutatione suffultus. Plerosque abscessus externos in tela cellulosa adipem coercente generari verum quidem est, quin fomentum quasi quoddam ex adipe adipisci pariter largior. Sed quum multis quoque locis adipe destitutis, pulmonibus, hepatis carne, testibus, omnibusque aliis visceribus, pariter nascatur, non sufficit in hac sola causa acquiescere; unde etiam singularis ingenii vir, ill. AB HALLER y) ad veros suos limites illam restrinxit. Tutissimum vero videtur natales puris in ipso sanguine cordis vi per sua vasa agitato quaerere. Hos veteres quoque agnovisse, quae de quadam humorum putredinis specie, quae de urinis purulentis nisi abscessus ad articulos fierent, oriundis, et quae generatim de abscessibus ex acutis memoriae prodire, innuere videntur. Memorabilia quam maxime GALENI z) verba sunt, dum *putredo*, inquit, *humorum, quae fit in vasis, similis est illi in inflammationibus et abscessibus, et aliis tuberculis*. Quid per istam putredinem intelligat, ipse postea explicat, duplex ejus genus constituens: *alterum nempe fieri, vincente natura, ubi in inflammationibus et tuberculosis omnibus tumoribus puris fit; in humoribus autem arteriarum et venarum illud, quod subsidet in urinâ puri analogum*. Haec autem putredo non simpliciter putredo est, sed aliquid coctionis habet. Manente enim concoquente facul-

tate

y) Element. Physiol. T. I. p. 45.

z) De febribus L. I. cap. 7.

tate vasorum, putrescens tunc humor ad talem alterationem deducitur. Ab hoc FERNELIVS *a)* nomine quidem non vero ipsa re discrepat, puri inter putredinem et corporis nostri substantiam mediam naturam tribuens. Eandem tamen utrique adjudicat originem, prout ad tenorem veteris doctrinae dicit: non aliter calorem corporis alimentum, aliter putridum humorem concoquere. Praeter pus autem et aliam materiam, quam vocat puri finitimam gigni pronunciat. Pergit nempe eodem loco: venarum majorum succus putrescens in aliquid mutatur, quod est puri finitimum, hujus in urinae sedimento conspicuae sunt notae. Ex variis quoque locis BENNETVM, cujus in observatione rigor, quicquid stilo inconcinni insit, abunde compensat, puris ex sanguine ortum perspexisse colligo. Nam liquores naturae congeneres, ut et alienatos et redundantes, non diuerso distrahi motu, sed iisdem importari vasculis, (sunt ejus verba) *b)* existimat. Quam suam sententiam fusius alio loco *c)* explicat, quum omnigenae fluxionis materiam sanguini importari dicit, et dum quoquouersum ei innatauerit, haud grauare. - aliquando autem tumultuose agitari et in partem magis susceptiuam deponi. Conferendum quoque ejus *Auctarium d)* est, quod dicta antea corollarii instar
colli-

a) Method. med. Libr. 3. cap. 12. p. 218. Ed. cit.

b) Theatr. tabid. cap. 9. p. 31.

c) Cap. 10. p. 34.

d) Loc. cit. p. 87.

colligit, ex quibus prono alueo fluere putat: sanguinem liquoresque alienatos συνόδευσιν i. e. vnā iter facere. Referendus huc quoque illustris SWIETENIVS e) est, qui subita ista et inflammationem excludente abscessuum origine inductus existimat causam materiales febris per febrem sic subigi et mutari posse, vt puris analogam naturam acquirat, licet adhuc cum reliquis humoribus per vasa fluat, et deinde deponi illud pus jam factum in quaedam loca corporis, in quibus collectum inuenitur. Quae et eximii BRENDÉLII sententia fuit, vt ex pluribus notis manifestum est, ex nulla vero manifestius, quam vbi f) aliquando sine vlla solutione continui, quibusdam ex organis secretoriis nisi pus, saltem aliquid puri analogum in statu praeternaturali secedere ait. Et ill. MORGAGNI variis locis supra citatis eandem pariter amplexum esse, cuilibet eadem relegenti constabit. Tandem ill. HAENIVS g) novum rei robur proprio scrutinio addidit, qui et curatius, quidnam esset in sanguine, quod generationi puris faueret, rimatus est.

§. XXVIII.

Quod vero ex ipso sanguine producat, tum ex difficultatibus, quibus ceterae recensitae hypotheses laborant, tum aliis haud infirmis argumentis
Ii 2
elucet;

e) *Comment.* 2. p. 81.

f) *Diss. de tabescentibus ad nares ducenda fluxione* p. 25.

g) *Tom.* 1. cap. 7. *sqq.* *Tom.* 2. cap. 2.

elucet; quorum quaedam ex superioribus huc adducenda sunt. Sane haud parum me mouet copia ista puris, in quibusdam morbis, vt variolis, lepra, scabie exundantis, et ista, quae abscessibus apertis vel vulneribus maioribus sub deligatione in conspectum venit, quae, vt bene monuit ill. HAENIVS, etiam sub prodromis inflammationis notis loci affecti ambitui non respondet. Nec minus aliter sentientibus celeritas, qua pus nonnunquam contrahitur, nec non ista, qua repente et improuiso aufugit, aduersatur. Nam licet in vulneribus externis nonnisi tertio vel quarto die puris notae appareant, longe citius id fieri in multis aliis casibus superius indicauimus.

§. XXIX.

Quidnam autem istud sit in sanguine, ex quo pus nascatur difficillimum dictu est. Speciosa ill. HAENII conjectura est, pus ex eadem sanguinis parte pullulare, quae in crustam inflammatoriam, sanguine vase excepto, coit, et huc quoque ante eum inclinasse SAVVAGESIVM exponit. Eandem etiam esse existimat, quae tam saepe post mortem non acuta solum, sed et lenta febris decumbentium circa viscera reperitur; cuius rei argumenta lectores velim ex ipsis HAENII monimentis petant. Quodsi vero ita esset, causa tamen, quae hanc ipsam diathesin pariat, et particulas sanguinis puri generando fauentes euoluat, nos etiamnum latet. Praestat hac in re igno-

ignorantiam suam fateri, quam hypothefibus suum aliorumque animos demulcere. An miasma quoddam subest, quod non extrinsecus solum inferri possit, sed et intra corpus ut in rabie spontanea generari, quod fermenti instar totam sanguinis massam inquinet, et exundanti per quaedam loca puri novum semper pabulum praebeat? An hisce fauent variolae istae malignae, quae puris copia jugulant? An ideo phthiseos ex consortione cum aliis illa afflictis diuturniori haud adeo rara origo?

XI.

Programma exh. experimentorum ad verio-
rem bilis cysticae indolem explorandam ca-
ptorum Sectionem primam. Gott. 1764.

§. I.

Ex variis animati corporis humoribus, medico-
rum attentionem, et ab ipsis quidem artis in-
cunabulis, plane singularem, bilis promeruit, fuc-
cus, quem propriis suis characteribus, errori mi-
nus obnoxiiis, quisque facile, etiam quo tempore
parum culta fuerat anatome, ab omni reliquo di-
stinguere nouerit. Quod solertissimum in Graecis
medicis laudatur obseruandi studium, id ipsum in
vitiis etiam bilis compluribus, horumque frequen-

tioribus noxis sollicitè notandis, occupatum saepe fuisse neminem certe latere potest, cui cedro digna illorum monumenta accuratius perlustrare libuit. Neque nostro aevo facile fuerit, vel parum etiam in artis salutaris exercitio versatus, aut quodammodo saltim ad fideliores morborum historias attentus, qui non compertum aut persuasum habeat, maxime ancipitem esse bilis alienatae efficaciam, neque raro perniciosam. Vtut vero non ipsa modo haec obseruata, sed iisdem quoque saepissime exoptato respondentes curationum successus, ita videantur esse peruulgata, ut exinde vberius declarandis, aut plura per argumenta stabiliendis hujus doctrinae momentis me nunc supersedere posse existimem; etiamnum tamen varia medicorum theoremata, quibus commoda noxasque bilis explicare contenderunt, suis laborare difficultatibus, quemlibet edoceri opinor, cum ipsis aegrorum phaenomenis illa sollicitus conferentem. Suffecerit nunc exempli loco submonuisse, quam dissona saepe experientiae communis illa sententia de maxima et singulari bilis ad putredinem, eamque foedissimam, procliuitate, cuius omnino videri debeat, qui auriginem, diu sine ullis putredinis humorum indiciis, ab aegro toleratam obseruauerit. Et quis de hoc vniuersalius recepto dogmate non dubitaret, cum quoque meditetur bilis turgentis et abundantis ad hebdomades protractam aliquando retentionem, in febribus praesertim intermittentibus, nec non aliis

in morbis manifeste biliosis, sine ullo praesente putredinis aut multum auctae acritatis signo, neque raro quidem deprehendi, ubi forte neglectum vel intermissum fuerat optimum, quod HIPPOCRATES tradidit, hujus colluiei noxiae, artis auxilio tempestive excutiendae, monitum? *a)* Verumtamen etsi videatur ex pluribus etiam exemplis de veritate minus firma dogmatum, ad explicandas bilis vires receptorum, constare, atque fere vnice per phaenomena, ipsis in aegrorum corporibus obseruabilia, praecipua certioraque hactenus innotuisse, ad usum satis tuto vertenda: minime tamen ideo rejiciendam aut parui habendam esse cautam argumentationem ex naturali bilis indole, ubi aliquando illa satis euicta fuerit, ad eandem vitiatam, et ex officiis, quibus in valetudine integra destinatur, ad eandem in morbis varie laesa vel impedita ducendam, ipsa vtique scientiarum natura, sanaque ratio, quam apertissime declarant.

§. II.

Quaecunque autem bilis constituatur indoles, et qualicunque ratione ejus officia explicare medicis libuerit, utilitatis tamen, quam sanis praestat, insignia esse monumenta, sine dubio omnes largientur, qui vel apparatus secretionis eximium, vel peculiarem loci, quo deuehitur, nobilitatem, *b)*

I i 4

vel

a) De vet. Med. n. XXXIV. et aph. XVI. Sect. IV.

b) In omnibus animalibus, ait perill DE HALLER *el. physiol. T. VI. p. 611.* bilis in principium intestini affunditur.

vel grauiam etiam damna, ab impedito ejus primum in intestinum accessu, fractaeque efficacitate, oriunda, meditati fuerint. Ipsam vero illam bilis indolem, efficaciam, et quas ab aliis rebus mutationes pati possit, complures quoque praestantissimos viros per experimenta jam inuestigasse constat; habitaque ad ea omnia, quae natura vnquam de his docere visa, attentione, ingenii ac doctrinarum principes viri certas bili functiones dudum attribuerunt, quarum de veritate satis euicta vix quidem sine opprobrio dubitandum quis existimaret c) A confutatis enim HELMONTII SYLVIIQUE sectis, et ab immortalis praesertim BOERHAAVII tempore, cum accuratiori modo et frequentius instituerentur humorum animalium examina, vnanimem fere omnium applausum illa promeruit sententia, quae saponaceam bili naturam, cum singulari validaque acrimonia, et insigni ad putrescendum procliuitate tribuit. d) Ipse quidem BOERHAAVIUS, alique, etsi bili efficacissimas adscribant saponaceas vires, non minus tamen alcalicam quam acidam indolem differ-

tis

c) Auctores experimentorum, cum bile captorum, recensuerunt b. BOERHAAVE et perill. DE HALLER in *meth. stud. med. emacul. et access. locupl.* p. 144. et 374. Singulari autem studio omnia, quae aliquam fidem mereri Viro summo visa sunt, etiam recentissima experimenta, selegit, proposuitque perill. DE HALLER. in *elem. physiol.* T. VI. p. 542. et seqq.

d) V. BOERHAAVE *instit. med.* §. 99. et *praeloc.* c. *comment. perill.* DE HALLER T. I. p. 432 et seqq. Conferri quoque merentur summi Viri v. SWIETEN *commentaria in aphor. BOERHAAVII* ad §. 63. et 69. n. 3.

tis verbis illi denegarunt; contra vero complures, etiam recentissimi, nominisque magni, Scriptores sal omnino verum alcalicum in bilis mixtione contineri, idque cum inflammabili parte arctissime junctum, proprie dictum saponem constituere, per experimenta comprobatum esse contenderunt. e) In eo autem vtriusque sententiae fautores conveniunt, quod bilem aptissimum iudicent humorem, oleis aquae miscibilibus reddendis; gummi et quibusque tenacibus resoluendis, attenuandisque; indoli alimentorum acidae magnam partem corrigendae, superandae; dissoluendo lacti coacto; abstergendo superfluo nimis glutinoso muco; intestinorum denique motui peristaltico, acrimonia sua irritante excitando. Atque ita suffultam esse hanc doctrinam firmissimis experientiae fundamentis, laudatos apud auctores reperiundis, quisque lector facile crediderit, ut operae facere pretium forsitan haud videatur, qui novis ulterius periculis bilis naturam, quae omnino cognita jam satis appareat, investigare, temere quasi suscepit.

e) Perill. de HALLER *prim. lin. physiol* §. 693. et in *Comment. ad BOERH. trael. T. I. p. 433. n. 9.* ad offam Helmontianam propius bilem accedere affirmat, si e sale ammoniacali volatili et ex oleo humano conflatum dicas saponem. Omnino tamen conferri merentur *elem. physiol. T. VI. p. 557. 578.* Vbi quoque alcalinam aequae ac acidam bili naturam denegavit, veruntamen et p. 610. alcalinae naturae utique proximam esse bilem asseruit.

§. III.

Verumtamen, quae proprietas esse rerum solet, ab opifice infinito elaboratarum, vberem nempe semper manere notitiae mortalibus concessae campum, quo addendorum aut corrigendorum spicilegiis animus humanus exerceri queat, illam quoque ipsam in bile locum obtinuisse, clarorum virorum tentamina, cum eadem vltius instituta, omnino confirmasse videntur. Quae sagacissimus Vir, Jo. PRINGLIUS, in appendice laudatissimi sui de morbis exercituum libelli, a se capta enarrat pericula, quantum ad aliam de chylopoiesios modo doctrinam inclinant, tantum quoque fere sententiae haëtenus receptae videntur detrahere, quae nempe soluenti et attenuanti succorum, pro saponaceis habitorum, potestati plurimum in digestionis negotio tribuit. Viderat autem exercitatus ille naturae scrutator, in rebus quibuslibet vegetabilibus, ad alenda animalia destinatis, inprimis quidem in cibis farinaceis, etiam in ipso pane, quamuis hic fermentationem jam passus sit, vbi cum partibus aut succis animalium variis vnam in pastam, aqua dilutam, intritae essent, isque caloris gradus, qui homini et affinibus ipsi animalibus naturalis est, applicaretur, veram sponte fermentationem concipi, et quod memorabile, manifeste vehementiorem, cum addita bilis recens fuerat, quam sine hac admista f) In quam ipse quoque conjecturam incid-

rat,

f) Exp. XXXVIII.

rat, ea nempe ciborum genera, quae facilius in ventriculo digeri constaret, ad fermentationem forte citius admittendam procliuia fore, sua per experimenta se dein omnino confirmatam deprehendisse asseuerat *g*). Immo praeterea contrariam variis in rebus conditionem, impediendae videlicet alimentorum fermentationis potestatem, se obseruasse refert, quae concoctioni perfectiori, vbi debilis est ventriculus, obesse plerumque solerent *h*) Quodsi autem veritatem concesserimus a PRINGLIO traditis experimentorum successibus, eorumque singularem cum naturali et vitiata digestionem consensum, quem exposuit, *i*) probe meditemur: minimum quoque annexi summi Viri de modo digestionis confectariis, isti bilis efficaciae, quae saponi responderet, vix quid vel nihil tribuentibus, illud fidei et mementorum esse largiendum videtur, quo lectori, nulli addicto hypothese, sententia de bilis functione magis recepta dubia reddi queat, donec eandem aliamue, vltioribus confirmari experimentis manifestius deprehenderit.

§. IV.

Sed omnino directius efficaciam bilis saponaceam quibusdam suis experimentis dubiam reddidit cl. GEORG. GOTTLÖB KÜRCHELBECKER *k*), etsi tantum

g) *Exp. XXXV.*

h) *Exp. XXXVII. n. 5.*

i) *Exp. XXXVI. n. 2.*

k) *In diss. inaug. de saponibus, Lips. hab. 1756. §. VII.*

tum is quoque tribuerit illustrium virorum, qui eam bili naturam adscripserunt, auctoritati, ut simul *nimis forte durum in bonam bilem, ejusque virtutis saponatae optimos patronos fore, existimet, omnem omnino oleum aquae committendi vim bili denegare, atque hinc illi nihil*, quae auctoris argumentatio est, *quod ad chylopoiesin una conferat, relinquere velle.* Admittit etiam lubens, ad instar saponis forte tunc agere illam posse, cum admista reliquis esset humoribus, qui ad primas vias confluerent, praesertim auxiliantibus tum ciborum salibus, tum viscerum, quae cibos continerent, blando calore et motu. Utique vero memorabilia sunt, quae ipse instituit experimenta, et purae bilis cum sapone comparationi certe contraria, talisque successus, qui, ut ipsi auctori, sic aliis forte plerisque, horum peritis, minus expectatus apparere potuit. Vidit enim vir clarissimus ex commixtis bilis bubulae semuncia, olei amygdalarum dulcium guttis XX, et aquae frigidae fescuncia, hisque una bene agitata et in locum temperatum per octo horas repositis, oleum rursus extricatum, eodem fere modo, ac in aqua fieri pura solet, mixturae innatare, coloremque bilis ab aqua affusa dilutiorem quidem factum, ceterum non mutatum. Cum vero hujus mixturae drachmis tribus spiritus salis ammoniaci vnam drachmam admiscuisset, multa enata spuma, etiam post horas quindecim perseverante, non modo contentum

tentum oleum distinguere non potuit, sed instillatas quoque denuo pressi olei guttas quinque, post leuam concussionem, ocysime absorptas esse, deprehendit. Commixtis praeterea bouinae bilis et salis culinaris, singulorum drachma, et olei amygdalini guttis XX, cum aquae duabus vnciis, hisque manu agitatis, perfecte aequalem obtinuit mixturam, emulsioni, ex colore lacteo viridescenti, analogam, quae post horas duas, praeter cuticulae variegatae paruas areolas, vix quidquam, quod superficiei innataret, ostendit, olei vero nullum ulterius vestigium praebuit. Dein etiam olei terebinthinae semidrachma et bilis bubulae integra drachma confusis, oleum subigi vidit, atque superaddita frigidae aquae vncia, concussione peracta, mixturam obtinuit spumescentem, obscuram, et viridescentem, cujus in superficiei olei nihil apparuisse retulit. Axungiae canis tandem scrupulum cum bubulae bilis, ad medium inspissatae, drachma in mortario contriuit, et cum inter se misceri viderentur, aquae fescunciam affudit. Sed quum dein binas per horas reposita haec fuisset mixtura, eandem emulsioni similem viridescenti, atque pinguedinis quid solutum verisimiliter continenti, simul tamen hujus quoque plurimum, squamularum forma albarum, partim vitro adhaerescens, partim superficiei liquoris innatans, tunc deprehendit. Adnectit autem hisce propositis vir cl. assertum vniuersale, neutiquam per se fel bubulum aquae oleum

misci

§ 10 Ej. Programma exh. experimentorum

miscibile reddere posse, neque sibi, longo etiam adhibito motu mechanico ac tepore temperato, mixtionem veram successisse.

§. V.

Verum et, qui ex instituto in bilis naturam et efficaciam inquisiuit, cl. ROBERTVS RAMSAY eos quoque retulit experimentorum suorum, cum cystica bile bubula captorum, successus, quibuscum sententia plerumque recepta conciliari posse non videtur. l) Summa vnice confectariorum, quae ex ipsis experimentorum historiis elici potuerunt, haecenus mihi saltem innotuit, nondum ipsius tractationis inspiciendae copiam nactus. Et confectaria quidem sequentia esse accepi, „ bilem non facile putrescere, ex ejus mixtione partem per „ acida praecipitari, saponem vero illam non esse; „ ex intime commixtis constare partibus, resinosa, in vini spiritu solubili, gummosa, quam „ aqua solueret, et peculiari alia, quae mucosissima, neque in aqua nec non in vini spiritu solui posset; haud parem esse aquae cum pinguibus rebus vniendae; neque acidis illam resistere, aptam tamen videri, irritandis ad contractionem, aluique dejectionem, intestinis. m)

§. VI.

l) In diss. de bile, Edimb. habita 1757.

m) v. Götting. gel. Anz. 1760. 33. St. et Erl. gel. Anm. 1761. Beytr.

§. VI.

Minime tamen propter haec veri atque certi quisque cupidus plane statim rejiciendam facile existimauerit receptam illam de bilis virtute saponata sententiam, vtpote quae tot experimentis, vt summi ajunt viri, maxime jam stabilita sit, nisi plurium repetitis periculis de contrario manifeste constiterit. Quum ideo singularem hujus materiae dignitatem esse judicarem, quam quoque artis exercitium mihi maxime confirmare videbatur, et quum tanta, ipsis etiam in constituendis phaenomenis, cernerem sententiarum diuortia, quae ad neutram partem inoffenso pede transire lectorem permetterent, me quoque ad explorandam, quo liceret studio, bilis naturam conuerti. Sperare saltem poteram, me αὐτόπτην, quae veriora essent, proprios in vsus, non penitus inauspicato, fore affecuturum, siquidem nihil impedire videretur, quo minus de ipso experimentorum successu fatis euidenter, et hisce meis propriis sensibus, demum conuincerer. Quum autem acciderit, vt ex multis haecenus a me institutis experimentis, haud exiguis etiam numerus fuerit, quorum longe alia euenta deprehenderim, quam quae secundum receptiores auctorum sententias expectari potuissent, operae me pretium esse facturum existimaui, si memoratu illorum digniora quibusdam in speciminibus proponerem. Vt vero mea ad pericula eo minime animo accessi, qui certam ornare stabilire hypothese[m] gestiret, sed potius euidentius

dentius verum discendi vnice cupido: ita quoque nunc, dum illorum aliquam partem enarrare aggredior, a me longissime abesse adsero iniquum omne, sententias aliorum, nedum magni nominis virorum, qui a meis diuersa tradiderunt, refellendi studium. Sed quamuis nunc etiam quisque facile animaduertit, enarrata hic pericula nondum sufficere pro constituenda, de veris bilis officiis et potestatibus, certiori quadam sententia, non ideo tamen sine omni illa doctrinarum commodo fore putavi, etiamsi modo aliqua, ex errore pro certis saepe habita, potius dubia aut falsa esse, quaeque dubia esse creditum fuit, veritate non destitui, manifestius edocere valeant.

§. VII.

Ad experimenta autem, quae sanae bilis, etiam in homine, indolem et efficaciam declarare queant, illam, ex bene valentibus recenterque mactatis animalibus domesticis desumptam, humanae praeferendam esse, quam cadauera largiuntur anatomicorum dissectionibus destinata, nemo non concesserit. *n*) Nimis enim raro contingit, hominum, violenta morte extinctorum, cadauera, prius ad disseccandum concedi, quam aliqua corruptionis initia bilis concipere potuerit; ideoque paucissimis saltim bonis experimentis humana bilis locum dare potest.

Et,

n) Quod ipsum quoque approbavit perill. DE HALLER *el. physiol.*
T. VI p. 552.

Et, quae in viscerum pro secretion[e] bilis apparatu, ejusque defluxione ad intestinum tenue, vniuniformitas plurimis in animalibus homineque deprehenditur, officii quoque et vniuersae potestatis analogiam extra omne dubium ponit. Ad ea vero, quae nunc proponam, experimenta, bilem cysticam, et frequentissime quidem bubulam, dein porcina[m] quoque, et aliquoties humanam, prout occasio ab initio mei instituti concesserat, adhibui, et priorem quidem ideo inprimis, tum quod insigni, qua reperiri solet, copia se prae alia quauis commendet, tum etiam, quod pleraque aliorum auctorum pericula, quae imitari primum animus fuerat, cum eadem illa quoque bile facta sint. Quae ex reliquis, cum humana et brutorum animalium bile factis, vltteriusque faciendis periculis memoratu digna visa fuerint, aliis in scriptionibus enarrare animus est, quin primum de notabiliorum quorundam successuum veritate mihi euidentius constare existimauero.

§. VIII.

In ipsis autem experimentorum historiis, ea praemittere conuenientissimum duxi, quae bilis recentis integraeque in alia efficaciam declarare possint, et primum quidem hac vice, in eorum praecipuis, quae ad explorandam ejus vim saponaceam, toties a physiologis laudatam, cepi, subsistere constitui. Non ea quidem mihi mens est, vt argumentorum pro sententia communi, ejusue contraria,

omnium, hac in tractatione momenta ponderare suscipiam, cum ne quidem principiorum bilis chemicorum mentionem ullam nunc injecturus sim; sed cum nullius plane hypotheseos defensores agam, in vitium, spero, mihi non vertetur, quod eorum libertatem usurpauerim, quibus naturam interrogare animus est, neque experimenta etiam omnia, ex methodo systematis, ad eam doctrinam referenda, hac in scriptione complexus fuerim. Cum quoque minime fidendum esse existimauerim argumentis, quibus rerum naturalium efficacitates chemicis ex principiis, quantumvis clare expositis, eisdemque fauentissimis, constituuntur, nisi illae ipsae in mutatis quoque rebus manifeste cernantur; eo minus dubitare potui, quin et ab hisce meis experimentis analysin chemicam, quippe de saponacea bilis virtute nihil pro certo decidentem, sejungere, et ad aliud schediasma illam referuare mihi liceret.

E X P E R I M E N T A.

Exp. I.

Lactis vaccini recentis non cocti tres portiones, cum bile bubula itidem recente, varia in portione, mixtas, vnamque lactis puri, quatuor in vitris, in meum conclaue reposueram, quo bilis in lac efficaciam cernerem, dum in puro lacte cremoris et caseosi coaguli a sero pellucido solita secessio contingeret. Vitra autem secundum literas distinguere

guere liceat. Primum *A* lactis et bilis aequalia pondera, singulorumque II vncias, continebat. Alteri, *B*, lactis vnciae II, bilis VI drachmae infusae erant. In tertio *C*, lactis erant vnciae II et bilis modo II drachmae. Quartum denique, *D*, lactis puri III vncias continebat. Infusae lacti bilis portiones ad inferiora vitrorum decidebant, ibidemque fere sola pellucidaque bilis collecta reperiiebatur, etsi limites bilis inferius collectae lactisque sese contingentes ita sibi intermixti apparerent, ut liquida haec diuersa ibidem jam adunata esse viderentur, et aliquando, cum lente bilis instillaretur lacti, illius nonnihil hujus in summitate aliquantisper innataret. Ad commixtionem bilis cum lacte neque valida agitatione opus erat, quae utpote facili negotio aequalis obtineri poterat; verumtamen, ne desiderari quid posset, longam validamque mixtorum commotionem eburnei ope stili suscepi. Dein vitra haecce quatuor, chartis tecta, sibi propinqua in mensa conclauis reponebantur. Dies erat 9 Octobr. quo et sequentibus, a fornace calefacto, conclauis pars, ubi experimenta suscipiebantur, interdiu a 67° ad 72°, noctu vero non infra 57° thermom. Fahr. calere solebat. A primo jam horae quadrante, in vitris *A*, *B*, et *C*, ad liquidorum summitates, a parte reliqua inferiori separata conspiciebatur materies, cremoris instar superius colligi coepta, multo magis quam reliquum liquidum ad alborem vergens, minus etiam fluida, et facillime, ut axungia liquidior,

vitro inclinato adhaerescens. Augebatur sensim innatantis hujus materiei crassitudo, simulque differentia coloris et consistentiae eam inter et inferiorem, etiam intra horam reddebatur manifestior. Quum nempe per horam vitra steterant, maxima pinguioris hujus partis altitudo deprehendebatur in vitro *C*, et fere $1\frac{1}{2}$ lineae, minor in *B*, 1 lin. minima vero in *A*, fere $\frac{1}{2}$ lin. Inuersa autem ratio differentiae colorum erat, cujus praesertim ope diuersae materies distingui debebant. Non equidem asseruerim ipsas natantes pinguiore partes, diuersis alboris gradibus fuisse conspicuas, quum illi potius aequales mihi visi sint, sed inferius liquidum eo magis colore ex flauo viridi tinctum apparuisse, quo plus bilis continuit; manifestissima hinc erat colorum differentia in vitro *A*, minor in *B*, minima in *C*. In vitro autem *D*, lac purum continente, cremoris dulcis ad superiora colligendi initia, absolutis $\frac{4}{5}$ demum horae, ab infusione lactis in vitrum facta, obseruari poterant. Purus hicce cremor cum natante illa parte crassiori, quae ex mixtis liquidis vitrorum *A*, *B* et *C*, adscenderat, tantum conuenire videbatur, quoad volumen, lubricitatem, viscidam indolem, sedem, colorem, ut omnino vix dubitare quis potuerit, quin verus etiam lactis cremor materies illa spissior fuerit, ex lactis bilisque mixtione his in vitris extricata. Nouem transferant horae, calore interea ad 70° fere consistente, cum in vitro *A*, proxime infra partem cremori simillimam, circularis
liquidi

liquidi pars ad pelluciditatem quodammodo manifestius vergere videretur. Immo reliqui etiam liquoris omnis inferioris ita tunc mutata facies apparebat, vt naturali bilis colori magis appropinquaret, clariorique ille luci expositus, faciliorem quendam radiis transitum concederet. Similia plane in vitro *B*, sed hora demum, post factam commixtionem, decima sexta, obseruari poterant. Ex quibus binis vitris, *A* et *B* odor manifeste subacidus, simulque aliquo modo spirituosus, cum illo debilioris recentisque cereuisiae nonnihil conueniens, nunc percipiebatur. Sequentе summo mane, diei nempe alterius, in vitro *A* sub cremore, liquidum aequalis, et ad subuiridem ex flauo vergentis coloris, omneque paulo magis nunc ac antea, luci peruium esse, nondum tamen ex puro lactis sero et bile constare, apparebat. Ad fundum vitri vero dejecta etiam conspiciebatur massa quaedam solidior, grumosa, magis quam liquidum flaua, pauca tamen, vt fere dimidium cremoris volumen ipsi vix tribui potuerit. Cremoris altitudo seu crassities nonnihil increuisse videbatur. Reliquis in vitris vix quid hoc die mutatum obseruari poterat. Primo mane tertii diei aliquantulum aucta tenuioris illius mediae partis vitri *A* pelluciditas erat, cremorque nonnihil intumuerat, de reliquo nulla mutatio facta. Sed liquoris vitri *B* nunc eadem fere conditio erat, quam die praecedente in illo vitri *A* deprehenderam. Tres nempe a se inuicem distinctae conspiciebantur par-

tes, siquidem sub cremore nondum ulterius mutato, tenuis nunc, aquosus, et pelluciditati propinquus humor, colore conspicuus aequali, ad illum admixtae bilis maxime accedente, praeterea in vitri fundo sedimentum grumofum, profundius flauum apparuerint. Etiam in vitro *C* sedimentum, et major quidem copia quam in *A* et *B*, et fundo, cum vitrum inclinaretur adhaerescens, idque ipsum, aequale ac liquor hoc inter et cremorem constitutus, aequali subalbo, lacteoque colore praedita, cernebantur. Odor quoque subacidus ex hoc nunc vitro percipiebatur quam apertissime. Neque minus puri lactis, in vitro *D* seruati, liquida sub cremore pars in serum pellucidum, aquosum, limpidum, et in coagulum caseosum secesserant, ita quidem, quemadmodum initio fieri semper solet, ut coagulum occupare integrum illud spatium sub cremore ad fundum vasis, serumque paucum inter ejus partes distributum esse, videretur. Proximis diebus in vitris *A*, *B* et *D* memorabile nihil contigit, praeter aliquod augmentum pelluciditatis in media, tenuiori nempe, parte priorum, et voluminis in eorundem cremore conspicuum. In vitro autem *C* coagulum solidius, ejusque major copia quam in *A* et *B*, die quarto, ut ultra dimidium sub cremore spatium occuparet, ferique color adhuc idem, qui diluti lactis est, obseruabatur. Die quinto, serum vitri *C* limpidum quoque et mere aquosum apparebat, magis aucta simul coaguli caseosi copia. Mollius tamen

hocce

hocce coagulum erat, quam illud in puro lacte, etiam cremor in tribus vitris *A*, *B* et *C* non aeque solidus esse videbatur, quam in vitro *D*. Sedimenti in *A* et *B* conspiciui exigua illa memorata copia permansit, vt pro omni materie caseosa lactis admitti neutiquam haberi potuerit. Corruptionis putridae in liquidis hisce nullum indicium ad diem nonum, cum effunderentur, notari poterat. Odor in omnibus ad acidum satis manifeste vergebat; explorata tamen fluidiori parte ex vitris *A*, *B* et *C*, admistis varias ad portiones acidis spiritibus, et alcalicis salibus, et violarum syrupo: neque salium oppositorum conflictus, neque color a coeruleo syrupo ita mutatus apparuit, vt acidae vel alcalicae liquorum indolis argumentum praebuerit. In ipsis vitris *A*, *B* et *C*, effuso sero et molliori omni massa, fundo adhaerescens addensata pars obseruabatur, quae non nisi difficillime, aqua aliquoties infusa dilui et abstergi poterat; cum purum contra lactis coagulum, ex vitro *D*, facile integrum abscederet.

S C H O L I O N.

- *) Superfedere quidem forte mihi liceret characterum illorum expositione, quibus recens et sana bilis a vetustiore et corrupta differt, quod occasio neminem deficiat, propriis quotidie sensibus humorem istum vsurpandi. De sanitate quidem bestiarum minor esse solet sollicitudo, quam ne putrida bilis loco recentis obti-

neatur; verum de putredine, cum quoad illam, teste quoque perill. DE HALLER, ita sibi opposita sint experimenta, ut vix possint conciliari, o), omnino seorsim agendum erit. Ad repetenda autem experimenta, non plane sine comodo aliorum fore visum est, si, quae cautiones observandae mihi innotuerint, paucis referam. Quin bilem vetustiore loco recentis obtineas, vix metus erit, cum per plurium hebdomadam haud interruptum tempus omnem emas, nullamque fere conservandam lanioni relinquas. Sed parum attentus quoque ex tempore cystidis, et ex facie parenchymatis hepatici, cujus partem vesicae annexam simul abscindunt, summe probabilem conjecturam, et ad usum saepe sufficientem, de diebus primo vel altero faciet, a quibus mactatum animal fuerit. Praeterea tamen in bile, quam ex recens mactatis bobus et porcis obtinui, differentiam reperi coloris, viscosae indolis, odoris, et peluciditatis, omnino notabilem. Bubulae colorem frequentissime fere spadiceum deprehendi, qui autem nonnunquam ad viridem, etiam aliquando ad dilute rubrum, nonnihil vergit. Est autem is color magis minusue profundus, a varia praesertim animalis aetate. Porcina bilis recens fere semper dilute flava reperitur. Vidi tamen quoque, ad spadiceum propendentem,

ut

vt a bubula difficulter distingui potuerit; vidi etiam, in cystide per nycthemeron conseruatam, subatram, etsi corruptionis indicium tunc nondum vllum exhiberet. Quum corruptioni magis obnoxiam saepius illam bilem deprehenderim, etiam recentem, quae obscurior, minus cum pelluciditate splendens, manifestiusque odora fuit, non perfecte naturalis illa mihi visa est. Pelluciditatem vero optimam, et singulari cum splendore, fere qualis in gelatina animali per artem bene parata esse solet, saepissime deprehendere licet in bile tum porcina, tum praesertim bubula, si recentissimae fuerint; inde tamen minime quis recentem ideo habeat, quod pellucida sit splendeatque, cum ad tertium diem in temperato 60° fere calore, non raro talis permaneat, praecipue extra cystidem in obturato vase conseruata. Odorem haud raro plane nullum in bile recente, et optime comparata, distinguere valui, frequentius tamen aliquem adesse deprehendi exiguum, mihi saltem minime aduersum, et myrrhae quodammodo, etiam salviae nonnunquam, affinem, scilicet ex leniter quasi balsamico et aromatico mixtum p). Aliquando ex recente bubula bi-

K k §

le,

p) Consentit BOERHAAVIUS, dum, bilis (recens), inquit, nec foeret vrinofum, et si quem odorem habet, aromaticum et gratum habet. *Praelect. in instit. cum HALLERI comment. T. I. p. 435.*

le, per alias etiam notas integra, odor percipitur, qualem abdomen animalis fani, modo, breuique post mortem apertum, spargere solet *q)*, *suburinosum* dicunt; quod nomen tamen, si vera sunt experimenta PRINGLIANA, quae haecenus omnino vera deprehendi, facile in errorem ducit. Videtur autem ejusmodi bilis prima jam corruptionis initia fecisse, quantumvis perexigua sint. Viscosam indolem in recentissima et ab animalis calore adhuc tepente bile perexiguam et lacti modo analogam reperio, ut ipsa etiam, aquae instar, in guttis facile stillari se patiatur. *r)* Quum refriguit, praesertim in vesicula, ita viscosa esse solet, ut effusa in longa crassaque fila trahatur, atque se stillari plane renuat. In cystidis praesertim e bobus desumptae fundo, mucum libere fluctuare nunquam non observaui, a cujus admixtione caueas, cum pura bile pericula factururus.

Exp. II.

Nunc vaccini lactis recentis, neque cocti, binis vnciis, cum bilis bubulae subuiridis, ceterum integerrimae, sex drachmis, in obturato vitro multum agita-

q) Quem odorem bili recenti quoque tribuit perill. DE HALLER, fatuumque, fere incisum abdominis, nominat, simulque clarissimum RAMSAY aromaticum recentis bilis odorem dicere, refert *El. physiol. T. VI. p. 549.* Vtrumque verum esse reperi.

r) Idem ipsum NEVMANNVS quoque testatur *chem. med. edit. KESSELIANA T. III. p. 545.*

agitatis et aequabiliter mixtis, calorem statim conciliaui fere 96° thermom. Fahrenh. quo nempe thermometro his in experimentis semper sum usus. Binas per horas illum calorem semper aequalem conseruaui, leniterque interea vitrum aliquoties commoui. Quum vna fere hora transiisset, concessa nunc vitro quiete, ad summum liquidum portionem, duas fere lineas altam, magisque reliquo albam, ab inferiori parte facillime distinguere poteram, quae nempe viridi bilis colore profundius tincta comparebat. Portio ista superior, cum vitrum lente inclinaretur, manifeste arctius eidem adhaerebat, quam inferior, tardeque iterum erecto vitro suam sedem occupabat, quae utique cremoris indoles est. Concutiendo liquorem, aequalis quidem cremoris admixtio contingebat, post bina tamen fere minuta hicce denuo extricatus ad superiora rediit. Altera etiam absoluta hora, superior spissa portio quoad colorem a reliquo liquido nunc multo facilius distingui poterat. In odore peculiare nihil obseruabam, quum is tum a bile aliquis, tum a lacte, mixtus videretur. Sera vespere erat, qua reposui vitrum cum hoc liquore in conclaue, cuius calor tunc erat fere 62° . Primo mane, calore conclauis 58, conspiciebatur manifestissime separatus cremor, sub albo suo colore, eaque viscositate, quae parum emolliti per calorem butyri est, praeditus, et a liquido reliquo, cuius aequalis mixtio hactenus perititerat, facile distinguendus. Nunc etiam odor

ad subacidum satis manifeste vergebat. Imposito vitro in fornace calefacto, vbi calor esset ab 80° 100°, circa meridiem ad fundum dejici coepit flocculenta subalba materies, magis magisque dein ad densata, simulque paucis post horis, serum, in medio vitri constitutum, tenue, aquosum et quodammodo pellucidum reddebatur, subflauo tamen ejus colore permanente.

Exp. III.

De eodem lacte vaccino, exp. II., vnciam vnam, eademque de bile drachmam, cum salivae sani hominis et recentissimae drachmis binis, eadem vespera probe agitando miscueram. Aequalis et subviridis quoque reddebatur mixti color. In eodem caloris gradu cum altero vitro, non minus hac vespera quam per sequentem diem, semper etiam hoc servabatur, subinde leniter motum. Etiam, cum vna modo hora ab instituta mixtione transierat, in superiori liquoris parte, similiter plane atque in lacte, quod solam bilem immixtam habebat, portio quaedam, cremorem exacte referens, observari poterat; quae tamen hora secunda ad manifestius discrimen haud peruenit. Cremor per alterum diem, copia et externa facie cum illo plane conveniebat, qui lacti cum bile sola commixto infidebat. Verum grauior pars ad fundum vitri nulla dejiciebatur integro hoc secundo die, etsi tenuioris feri quid proxime sub cremore, a reliquo separatum liqui-

liquido, vesperi apparuerit. Tertio tamen die, et quidem summo jam mane, copia quoque satis magna, crassioris, et caseosae similis, materiae ad vitri fundum secesserat; in fero autem intermedio nulla pelluciditas, major tamen, quam quae in lacte est fluiditas, observabatur. Color ejus feri subflavus etiam continuabat. Putredinis plane nullum hactenus indicium aderat.

EXP. IV.

Eorum quoque experimentorum praecipua imitaturus, quae a Viro summo, cel. GAVBIO, publice instituta esse cl. NARCISSVS retulit, s) quaeque plurima fide digna nemo non cum perill. de HALLER t) habuerit, etiam illud repetii, quo coagulatum lac, cum bile coctum, pristinum recepisse fluorem, tradidit. Binas nempe lactis puri uncias, per septem dies conservatas, cum in cremorem, caseum, atque serum sponte discessissent, nec vlla in his putridae corruptionis nota neque minima quidem observaretur, cum bilis bubulae recentis tribus unciiis in mundo figulino vase permixtas, coctioni lentae commisi. Peracta vix coctione, modoque desinente ebullitione, pars quaedam crassior, dilutius flava, et nonnihil spumosa, in liquoris mixti superficie innatabat; et inter effundendum,

pluri-

s) In *diff. de generat. et receptaculis chyli*. Lugd hab. 1742. p. 9. n. 10. quae extat in perill. de HALLER *collect. diss. anat.* T. I. p. 777.

t) *Elem. physiol.* T. VI. p. 552.

plurimum coagulati, pro caseosa utique lactis materie habendi, prope fundum vasis collectum reperiatur, cujus etiam haud exigua pars vasi fortius adhaerescere, ut excuti non potuerit. Fluida tenuiorque mixti pars colore nunc flavo conspicua, sed pelluciditate illa privata*) erat, quam alias tum puro lactis fero, tum bili quoque recenti convenire satis constat. Cum haec omnia vitro infusa per noctem stetissent, tenuior in medio liquor puram fere bilem, ex fusco flavam referebat, crassiores vero mixti partes, minus profundo tinctas colore, ad superiora inferioraque, a medio liquido manifestissime separatas, cremorisque et casei externa facie omnino adhuc praeditas esse, deprehendi.

*) Coctionis calore, et minori quoque, nempe vix 150°, pelluciditas sua bilem etiam solam priuari, aliquoties observavi.

EXP. V.

Recentissimi dein sanique lactis vaccini octavam mensurae partem, cum bubulae recentisque bilis duabus unciiis commixtam, lente coxi, etiam in mundo vase figulino. u) Coctioni magis quam purum lac resistere hoc mixtum videbatur, etsi prunarum ignis satis fortis subesset. Dein tamen succedente coctione, et statim cum incepisset modo ebulli-

u) Etiam cl. NARCISSVS laud. diss. §. VIII. n. 9. inter experimenta GAVBIANA retulit, cum bile coctum lac non coagulatum, sed potius tenuius redditum fuisse, illudque postea nec repositum neque coagulum acedinem contraxisse.

ebullitio, ab igne vas remouebatur, vt in quiete relictum sponte nunc tepesceret. Quo facto, cum in vitrum, ampla praeditum apertura, liquidum infunderetur, plurimum coactae massae, liquido innatantis, deprehendi, aliamque coaguli portionem vasi figulino fortius adhaerentem, reperi. Sera erat vespera, qua mutationes, breui post succedentes, vltius attendere non poteram. Altero mane, materies, sub albo colore, pinguique indole cremori simillima et a reliquo manifeste distincta, huius ad summum aequaliter expansa comparebat. Tenuius liquidum, cremori huic subiectum, aequali flauo colore praeditum, conspiciebatur; neque tamen pellucidum illud erat, nec instar feri fluidum, sed quoad spissitudinem cum lacte potius conueniebat, quod quasi purum cum bile mixtum referre videbatur. Caseosa pars in vitro nunc nulla, tertioque demum die pauca, ad fundum vitri dejecta obseruabatur, forte quod eiusmodi massae plurimum in olla remanserit. Dein vero sequentibus diebus augebatur sensim, lente tamen, sedimentum, simulque tenuioris liquidum, medium locum tenentis, pelluciditas ac tenuitas increfcebant. Odor in hoc mixto peculiaris, neque verbis facile exprimendus erat, circa VII. tamen diem ad illum tenuis cereuiciae perparum vappescentis accedere videbatur. Die X magis manifeste ad acidum odor vergebat. Neque vero initio experimenti, nec vlllo sequentium dierum in cremore et caseosa parte tanta cohaerentia

haerentia nascebatur, nec serum ita pellucidum euadebat, quantaesse solent hae qualitates in iisdem partibus, ex puro lacte discedentibus. Corruptionis putridae indicium etiam ad X diem, deprehendi plane nullum poterat. Quum hoc die ad feri biliosi portionem salis tartari fixi tantillum admiscerem, nullam plane bullam, nullamque aliam mutationem obseruare poteram. Syrupus violarum alii portioni sollicitè admixtus, minime vere viridem illum, qualem in alcalicis rebus efficere solet, colorem excitabat. Alii portioni instillatum quid aquae fortis, ibi loci, quo guttae cadebant, sine omni bullula, membranulas producebat coagulatas, profundius quam ipsum illud serum flauas, dein sponte ad vasculi fundum delapsas. Acetum vini stillatitium quoque in aliam portionem instillabatur, eo successu, ut albesceret ea feri pars, in quam inciderant aceti guttae, nihil autem vere coegeretur, quamuis dein mucosi quid ad fundum vasculi sensim descendisse obseruauerim. Neque horum in commixtione ullus cernebatur salium oppositorum conflictus.

Exp. VI.

Ad bilis in olea efficaciam nunc progressurus x),
 bilis bubulae, omni nota integerrimae, vnciis duabus,

x) Contraria hisce meis experimenta esse videntur, quae laudat perill. DE HALLER *el. physiol. T. VI. p. 549. et 550.* Dolerem sane meorum aduersum illis euentum, nisi magni habenda veritas esset, quam in meis naturam docuisse proprio

bus, admiscui aquae purae fontanae coctae, iterumque tepentis semunciam; in manu aliquamdiu continui, quo calor naturalis mixto conciliaretur, dein affudi olei amygdalarum dulcium recens pressi binas drachinas. Agitaui fortissime vitrum atque diu, indeque turbidum quidem factum liquorem vidi, multamque innatam spumam; attamen quiete per vnum vel alterum horae minutum vitro concessa, pellucidae dilutaeque bili rursus innatans obseruavi oleum; tanta quidem copia, vt ejus nihil plane in bilem receptum esse videretur. Denique quam maxime vitrum agitando, bili oleum admiscere studui, dein per integrum diem in calore fere 96° conseruavi; vitrique commotionem saepe repetii; inspecto autem liquido, cum agitatio per breuissimum temporis, vnius saltem vel alterius minuti horae, spatium remitteret, bili pellucidae, naturalique calore praeditae, oleum semper, et ex probabili conjectura omne, innatare; immo manifestius etiam a bile separatum esse, quam cum loco bilis puram aquam fumerem, parique vi agitarer, deprehendi.

Exp. VII.

Sed nunc modo guttas X olei amygdalini bilis recentis bubulae vnciiis tribus adjeci. Probe agitato

sensu persuadeor. Puto enim, cum bili facultas tribuitur oleum aquae miscibile reddendi, non eam intelligi posse mixtionem, quae, in breuissimo tempore, sua sponte, intermissa agitatione, cessat.

tato vitreo vase, quo continebantur, per aliquot dies, motu etiam saepe repetito, in caloris illo gradu, qui homini naturalis est, illud conseruaui. Semper tamen, quum liquidum, breui quiete concessa, inspicerem, eandem, quoad contemplando aestimare liceret, olei quantitatem bili innatantem reperi, quam illi instillaueram, etsi fortissima agitatio saepe omnino repetita fuerit. *)

S C H O L I O N.

*) Aliquam sed exiguam in dignoscendo supra bilem oleo difficultatem spuma nectere potest, conuassatione forti excitata. Qui vero satis attenderit, breui sibi concessa mora, oleosas bullulas sub aquosa biliosaque spuma, aut ipsas olei particulas, colore illarum ad flauum magis vergente, facile distinguet. Ceterum hoc experimentum saepissime, cum suilla etiam bile, et pari semper cum successu, repetii.

Exp. VIII.

Varia inter pericula, quae cum humana bile institui, etiam quid haec in oleo soluendo et aquae adunando praestaret, aliquoties explorare studui. Primum ex cadauere infantis triennis, sine conspicua viscerum labe, atrophia demortui, bilem, tertio a morte die, ex cystide incisâ in vitrum fudi, ejusque pondus drachmae vnus et semissis reperi. Color ex flauo fuscus erat, pelluciditas nulla, tenacitas aequalis, tantaque, vt in fila longa tenuiaque trahi potuerit. Frigus haud acre, cui expositum haëtenus cadauer, nec infra 60°, fuerat; nullum tamen putredinis indicium odor praebebat,

bebat, vt ne quidem cum illo fatuo, ex recenter aperti animalis abdomine percipi solito, comparari posset, sed vere cum illo myrrhae balsamico potius conueniret. Omni huic bili aquae decuplum affudi, et probe agitando admiscui. Satis nunc fluidum hocce mixtum reddebatur, colore dilutiori et aequali conspicuum; nondum tamen, nisi in collo vitri angustiori pellucidum apparebat. Quiete per $\frac{1}{4}$ horae concessa, lenteque aliquoties inclinato vitro, quo fundus conspici posset, sedimenti nihil dejectum obseruari poterat. Instillatis nunc olei amygdalarum dulcium recentis XII guttis, obturatum subere vitrum in manu diu ac validissime agitaui. Initio quidem oleum, concessa vitro quiete, occultatum deprehendi, verum absoluto vix horae minuto, ad bilis dilutae summam illud quam manifestissime rursus colligebatur. Neque alius concussionis effectus erat, iterum iterumque repetitae; neque calor homini naturalis, cum vitro, binas per horas, blandam inter commotionem, communicatus, ad faciliorem perfectioremue olei solutionem quid conferebat. Tantum enim olei, in circumferentia summae planitiei bilis dilutae, a breui post agitationem quiete, semper natate deprehendebatur, quod additis XII. guttis aequari posse nemo fere dubitasset. Idem repetii experimentum in bile cystica ex adultae feminae cadauere desumpta. Sed cadaueris conditiones praecipue memorabiles breuibus antea descripsisse iuuabit. Femina, aeta-

tis XXX. fere annorum, enixa fetum in vtero mortuum, et prope maturum, die XXVII. Sept. h. anni, fato suo die XXVI. Octobr. functa fuerat. Infantis corpus, cum tertio a partu die in theatrum obtinerem, maxime putridum lividumque comparabat, eaque viscerum ejus ratio deprehendebatur, ut ante partum esse extinctum, dubitationi nullus plane locus fuerit. Ex matre adhuc viua, statim post partum ac dein ad mortem vsque, peculiarem cadaueris foetorem se percepisse obstetrix asseruerat, et praesentem visceris alicujus gangraenam inde collegerat. Quoad rescui, confecit illam febris lenta putrida, cum impeditis lochiis. In cadauere prope vteri corpus ligamentum latum sinistrum vomicam continebat, puris spissi et foetidi insigni copia, minimum dimidia libra, plenam. Ipse vterus interius inflammatus, flocculisque, a placenta forte residuis, atris et sphacelo corruptis, obsessus reperiiebatur. Ad basin ossis sacri sinus erat gangraenosus, ostio exterius conspicuo, qui ad periosteum vsque oblique descendebat. Vtriusque pulmonis magnae partes vlceribus amplissimis, maxime foetentibus, consumtae, etsi nec pinguedo infra vniuersam cutim, nec illa mesenterii, contabuerit, solumque fere omentum, quod nempe maxime extenuatum erat, reliquae adipis copiae non responderit. Memorabile quoque permagnum erat volumen hepatis, cujus quippe sinistra extremitas vix 1 1/2 poll. a costis hujus lateris distabat. Maculae

culae complures liuidae prope marginem hepatis anteriorem, in ejus vtraque superficie, et in contracto ad exiguum spatium ventriculo, juxta pylorum, rubrae inflammatae obseruabantur. Ab exsudata bile cystica, magis quam alias flauo colore tincta conspiciebantur propinqua viscera. Quum anatomicae demonstrationi hepar die demum XII. Nou. inferuisset, in aqua frigida eatenus conseruatum, neque solum id minime parum foeteret, sed in omnibus quoque ejusdem cadaueris musculis, subater jam putredine color esset conspicuus, bilem ex incisa cystide in vitrum effudi. Haecce vero, die quidem a morte feminae XVIIIvo, etiam nonnullis ex optimorum commilitonum numero testibus, plane nihil foetoris, nec odoris alius aduersi quid spargebat. Nequaquam tamen plane nullus erat, qui distingui amplius potuisset odor, nam ad instar myrrhae quam proxime olere videbatur. Ponderus erat fere drachmarum trium, color flauus, latericius, pelluciditas nulla. Complura, quae exiguum quantum admittebat, experimenta, hacce cum bile instituta, et alia vice recensenda, vix drachmae dimidium ad explorandam ejus efficaciam in oleo aquae vniendo reliquum fecerunt. Amygdalarum dulcium quoque oleum adhibui, ejusque guttas quinque bilis illi portioni, aquae tepidae duplo dilutae, instillaui. Vitrum in manu retentum diu fortissimeque agitaui, ante, vero, quam bina transirent horae minuta, oleum ad summita-

tem bilis dilutae collectum, non minori quam instillatum copia, obseruari poterat. Etiam si quoque nihil in repetenda concussione omitteretur, idem tamen semper continuabat experimenti euentus.

Exp. IX.

Cl. KÜCHELBECKERI artificia, §. IV. memorata, quibus bilem soluendo amygdalarum oleo parem fieri tradidit, etiam imitaturus, primo bilis bubulae pellucidae, integerrimae, drachmam, salis culinariae tantundem, olei amygdalini guttas XX, aquae coctae iterumque tepescentis vncias II, omnium ergo ipsa cl. auctoris pondera, in vitrum confudi. Statim diu, fortissimeque, vt nihil plane desiderari potuerit, vitrum agitaui, omniaque sic arctissime commiscere studui. Spuma in summitate liquoris copiosa excitabatur, quam tamen sola etiam bilis recens, tanta peracta ejus quassatione, concipere solet. In primo fere horae minuto ita collapsa erat spuma, vt quartam tantum partem spatii liquoris ipsius occuparet. Liquor autem ipse aequae fere, ac bilis antea sola, pellucidus erat, subuiridis, emulsioni nequaquam similis. Quiete liquori per vnum vel alterum horae minutum concessa, inclinato vitro, sub spuma alba oleum quam manifestissime comparuit. Repetita fortissima agitatione, concessaque denuo quiete, et vitro inclinato, tantum olei conspexi in liquore natans, quod

quod facillime guttis XX additis aequari potuerit. Post horae quadrantem, seruato interea vitro in calore conclauis 74°, etiam adunatae majusculae olei portiones, multo facilius ac antea dignoscendae, sub spuma comparebant. Iterum fortiter liquorem concussi, et in calore 96-100° per aliquot horas conseruaui, agitationem saepe repetii, semper vero, cum eundem inspicerem, concessa per vnum vel alterum minutum quiete, tot olei natantes particulas, eaque ratione pellucidum integrumque subiectum liquidum reperi, vt ex probabili conjectura, olei nihil in diluta illa et cum sale mixta bile solutum esse apparuerit.

Exp. X.

Alterum quoque repetii cl. KÜCHELBECKERI artificium, etsi quoad miscendorum proportionem quoddam discrimen admiserim. Bilis bubulae recentis et integerrimae drachmis quinque admiscueram spiritus salis ammoniaci vrinosi drachmam vnā. Fortiter agitaui vasculum, vidique multam enatam spumam, non plurem tamen dixerim, quam in concussa vehementer sola bile oriri solet. Huic nunc mixto instillaui olei amygdalarum dulcium recentis guttas XX, easque commotione vasis continuata illi admiscere studui. Majorem nunc spumae, ejusque densae, copiam, ex minimis bullulis compositam, ipsumque liquorem sua pelluciditate nunc ex parte priuatum, deprehendi. Olei nihil se paratum

apparebat. Retinui in fani hominis calore. Post horae dimidium spumam superesse paucam deprehendi, de oleo tamen nondum quid vidi, neque liquor pelluciditatem pristinam recuperauerat. Abhinc iterum per dimidiam horam expectans, oleum in tanta copia bili innatare deprehendi, ut vix de integris XX guttis, ex mixtione extricatis, dubitare quis potuerit. Aucta quidem nunc, sed non perfecte restituta pelluciditas. Admiscui iterum de falsi ammoniaci eodem spiritu drachmam, fortiterque vitrum agitaui, spumamque copiosam denuo exortam vidi. In fani hominis calore adhuc semper vitrum fere quietum feruare perrexii. Post horae fere dimidium vero, quum ad liquoris superficiem ante lumen candelae attenderem, sub laxiori nunc spuma, partem aliquam subalbam, exiguam, pro oleo verisimillime habendam, cernere poteram, ita dissolutam tamen, ut, cum lenissima institueretur agitatio, illa pars nubis instar ad medium fluctuaret, dein lente iterum quieto in liquido adscenderet. Eaque conditio hujus mixti continuauit per horas hujus diei reliquas, ad feram vesperam, conseruato interea vitro in calore hominis naturali. Veram ergo olei solutionem hoc in mixto factam esse, asserere nemo quidem ausit, etsi phaenomenon illi maxime appropinquauerit. Relinquebatur nunc mixtum per noctem in conclauis caloris fere 62° . Primo mane nondum quidem redierat pristina pelluciditas, sed oleum infra reliquam paucam spumam, inclinato pa-

rum

rum vitro, quam manifestissime apparebat. Passim quoque exiguae, in media liquidi superficie, oleosae natabant areolae. Agitavi denuo fortiter et in calore fere 96 iterum retinui, post horae autem dimidium, oleum, aliqua bile, vt videbatur, intermixtum, in lineae dimidia[rum] altitudine, ad superficiem liquidi marginem natans cernebatur, a leni agitatione tantisper quidem disparsens, dein iterum, quieto in liquore, visui denuo manifestum.

Exp. XI.

Bilis etiam bubulae drachmis tribus vnam olei terebinthinae drachmam affudi, quae ambo, a concussione forti et continuata, in vnum aequaliter mixtum liquidum transire videbantur. Hujus mixturae color ex viridi ad subflauum vergebat, liquido simul pelluciditate omni destituto. Elapso horae minuto, in vitri parte infima, liquor pristina[m] bilis solius faciem perfecte recuperabat, et in superiori vnice, magis magisque tantum decresciente, quantum inferior sensim augesceret, color ille persistebat ex viridi subflauus, cui ipsi etiam superiori, vt antea omni mixto, pelluciditas deficiebat. Spumae quidem faciem referebat quodammodo haec superior pars, certe tamen spuma non erat, cum a vera illi insidente spuma, sollicitius attendendo, manifeste distingui potuerit. Concussi denuo mixtum fortissime, et in manu retinui, eundemque iterum colorem, quem breui ante in superiori modo parte vi-

deram, per totum mixtum aequaliter expansum cernebam, etiam pelluciditatem simul per integrum liquidum plane deletam. Sed a dimidio fere vel etiam integro horae minuto, prior facies diuisarum liquidi portionum perfecte redibat. Et mihi quidem nullum subesse dubium videbatur, quin superior haud pellucida pars, ex mixtione iterum sursum protrusa, pro vero habenda fuerit terebinthinae oleo, in minimas particulas disrupto, quibus bilis pauxillum per concussionem intritum esset. Aquae nunc etiam purae, antea coctae iterumque tepescentis, vnciam ad illud mixtum affudi, et cum probe prius agitasset, et quietem in manu illis concessissem, omnia praecedentibus plane similia obseruabam. Diffusus nempe antea per totum liquidum ex viridi subflauus color, quocum pelluciditas deficiebat, superiora versus contrahebatur, isque absolutis binis, vel tribus etiam, horae minutis, ad octauam vel decimam partem illius spatii, quod integrum occupabat liquidum, reductus comparebat. Itaque semper satis manifeste constabat de supremae portionis cum oleo terebinthinae conuenientia, minusque apta bilis ad hoc oleum soluendum potestate. Neque tamen plane nihil de hoc oleo in bile diluta retentum fuisse, ideo veri videbatur simillimum, quod illi pristina pelluciditas ex integro non redierit; qua tamen in re bili prae aqua simplici purissima praerogatiuum tribuere non ausim, quum pariter haec, probe cum oleo terebinthinae agitata, perinde ac bilis,

pristi-

pristinam pelluciditatem perfecte recuperare non soleat.

Exp. XII.

Etiam olei absynthii stillatitii guttas XV. bilis bubulae drachmis VI, vitreum diu agitando vasculum, aliquantisper admixtas, deficiente spuma, omnes breui ad summitatem bilis iterum adscendisse mihi visae sunt, redeunte simul naturali hujus pelluciditate et colore. Neque repetita cum aliis similibus oleis aethereis experimenta, euentum ab hocce diuersum hactenus mihi exhibuerunt.

Exp. XIII.

Bilis dein bubulae recentis semidrachmae, cum semuncia salinae, a sano homine collectae, commiscui, hisque olei amygdalini guttas X. instillaui. Probe agitata haec et concussa in vitro subere clauso seruavi in calore fere 96°, quatuor per horas, repetita interim saepissime vitri agitatione. Semper vero, cum liquorem per breue modo tempus quietum adspexissem, oleum illud vice qualibet, et quidem, prout mihi videbatur, omne, in plurimas perexiguas diuisum portiunculas, liquido innatare deprehendi; nec vnquam apparebat, veram olei solutionem successisse, quae nempe separationem ejus, breui et sponte contingentem, non facile iterum concederet.

Exp. XIV.

EXP. XIV.

Cum butyro dein periculum feci, cujus recentissime parati, nec loti nec saliti, scrupulum vnum bilis bubulae duabus vnciis adjeci, dein valide vitrum clausum, quo haecce continebantur, agitaui. Etsi vero in spuma sic excitata, initio, aliqua etiam quiete concessa, oleum butyri dignosci haud potuerit, eadem tamen sensim deficiente, illud quoque, in exiguas diuisum portiunculas, et quidem ex probabili conjectura omne, ad summitatem liquidi collectum comparuit, bilisque simul pelluciditatem cum splendore suo naturalem fere ex integro recuperavit. Postea in calore quoque 96 ad 100° per integrum diem conseruaui, intereaque saepe vas commoui, sed nullam vidi successisse butyri solutionem; semper enim hocce rursus extricatum, breui post ad summitatem bilis adscendebat.

EXP. XV.

Saliuae sani hominis rec. semunciae, grana X butyri recentis, non saliti nec loti, aliquamdiu simul agitando, ita commiscebantur, vt butyrum in saliuam, lacteo mixti colore facto, plane dissolui, et post horae quoque spatium, vitro interea in calore sani hominis conseruato, perfecte immixtum permanfisse, nec ejus quid in quiete quadrantis horae extricari, mihi videretur. Affudi nunc bilis bubulae recentis semunciam, quae ad fundum vitri statim descen-

descendebat, et a reliquo liquore separata, ibidem conspici poterat. Dein his fortiter agitando commixtis calorem fere 95° impertii. Bilis quidem et salinae commixtionem facillime succedere animadvertēbam; sed spuma nunc primum pinguior reddi incipiebat, dein quoque brevi oleum butyri manifestius discerni poterat, et omnino pauca post minuta tantam butyri portionem in liquidi summitate natantem observavi, quam sine dubio adjectae ejus moli aequare liceret. Admiscere hanc denuo studui, fortissima satisque diu continuata vitri commotione, semperque servavi in eodem fani hominis calore; sed post horae quadrantem butyri quaedam portio, etsi manifeste nunc minor esset quam antea, ad summitatem collecta reperiebatur. Repetita dein frequenter forti agitatione, ita tandem butyrum videbatur dissolui, ut praeter complures natantes miculas, saltem instar levis nubeculae, profundius quam ipse liquor flavae, ad aliquam usque a summa planitie profunditatem extensae, et quieto in liquore fluctuantis, illud observatum sit, a leni autem vasis commotione statim disparuerit.

Exp. XVI.

Vinciis duabus bubulae recentisque bilis adjecti pinguedinem de jure carnis bubulae, in aqua modo coctae, ponderis quidem scrupuli unius. Bili pinguedinem diuturna vasis commotione admiscere, omnem operam adhibui, sed in quieto vase illam
ad

ad superiora bilis breui semper adscendere obseruauit. Retinui dein vltra XII horas in calore fere 95-100°, concussionem saepe repetii, nihil tamen adiectae pinguedinis, quanto ejus ex probabili conjectura aestimato, in bile solutum ire videbatur. Repetii experimentum saepe, etiam cum bile porcina, et ipso jure carniū diluta, nec minus addita quadam saliuæ portione, semper tamen adiectam pinguedinem in hisce mixtis humoribus, parum saltem quiescentibus, natantem, immo etiam in calore 96° solidescentem,prehendi.

EXP. XVII.

Recentis porro et ex naturali tepore fluidissimae bilis vnciam, in mortario marmoreo parum calefacto, adhibito etiam pistillo ex eadem materie confecto, contriui cum saponis veneti scrupulo. Commixtioni valde renuebant, etsi fortis tritus aliquamdiu institueretur. Tandem, exorta multa spuma, sapo in bilem se insinuasse videbatur. Concessa autem breui quiete, spuma desedit, atque nunc in turbida et splendore suo naturali priuata bile pingues albae plurimae miculae innatabant. In vitrum nunc fuso hocce mixto, et probe agitato, multa iterum oriebatur spuma, intra horae tamen minutum quoque disparens, conspicuis etiam nunc in bilis superficie albis et pinguibus miculis, quae breui post majori copia comparebant, et inclinati vitri lateribus facillime adhaerescebant. Turbida tamen
ipfa

ip**s**a primo hoc die bilis permanfit, vt etiam de fapone quid admixtum retinui**ſ**ſe videretur. Altero die perpauc**a**e fal**t**im natantes miculae ſupererant, materies vero pinguis, ejusdem ac illae coloris et ſubſtantiae, ad vitri fundum delapſa cernebatur, quae vitro etiam manifeſte, multo arctius quam ipſa bilis, adhaereſcebat; atque nunc pelluciditas, color, ſplendorque, bili alias purae naturales, redierant. Tertio die nihil amplius micarum bili innatabat, memoratae vero maffae pinguis major copia ad fundum vitri collecta cernebatur, nullumque plane hujus bilis a naturali et integerrima diſcrimen apparebat, cum neque corruptionis coeptae vllum haecenus indicium obſeruari poſſet.

Exp. XVIII.

Bilis quoque bubulae recentis ſemunciam, ſimili ratione in mortario marmoreo, cum balfami Peruuiani nigri optimi ſcrupulo, contriui. Multo adhibito labore aliqua quidem, ſed maxime imperfecta ſaltim commixtio ſic obtinebatur, ſiquidem balfami quaedam portio bile ſubigi plane non potuerit. Liquor ipſe tamen turbidus, et magis quam ſola bilis, profunde fuſco colore conſpicuus erat. Is cum in vitrum fuſus eſſet, hoc probe prius agitat**u**m, in menſam conclauis reponebatur. Quo fact**o** deſcendentem ſenſim balfamum, et in ſemi**h**ora fere omnem ad fundum vitri relapſum, facillime obſeruare poteram, parum tamen adhuc turbida manen-

manente bile. Postero die ad naturalem fere pelluciditatem rediit bilis, quodammodo viridiori tamen quam alias conspicua colore, et balsamus nunc ad vitri fundum fortius quam initio adhaereſcebat. Alia vice balsami Peruuiani drachmam bilis recentis bubulae vnciis duabus adjeceram, et instituta valida agitatione, plures integros per dies, interdium in calore $96 - 100^{\circ}$ conseruaui, vasisque commotionem saepissime repetii. Statim ab initio pelluciditatem et splendorem bilis plane deletos, ejusque natium colorem in viridem permutatum videram, tantam tamen prope fundum vitri permanentem balsami portionem nunquam non deprehendi, vt vel nihil vel paruum ejus in bile solutum esse conjiciendum fuerit. Et quamuis dein primo, secundo, tertioque die balsami portio ad vitrum fortiter adhaerescens agitatione vasis validissima, quoad fieri poterat, aliquando abstergeretur, ea tamen breui omnis, quoad probabili fides aestimationi, ex mixtione detrusa, et prope fundum collecta cernebatur. Quum nec tertio die vllum coeptae corruptionis indicium animaduernerem, bilis recentis bubulae vnam vnciam cum semisse affudi, saepeque mixtum, hoc et sequente die, agitaui, sed neque haec bilis major copia soluendo balsamo aptior esse minori prius adhibita videbatur. Tandem vitrum hocce in aquam reposui ad 150° calentem, eoque in calore per $\frac{3}{4}$ horae seruaui, agitationem aliquoties interea repetii, sed ne hac quidem ratione notabilis balsami pars in

bile

bile dissolui poterat. Hujus autem nunc bilis portioni, a balsamo defusae, vigecuplum aquae admiscui, quo aequaliter initio diluebatur, sed post horas fere duas prope vasis fundum nubeculae quaedam apparebant. Demto superiori pellucido liquore, reliquo inferiori turbido quid alcoholis vini instillaui, quo facto nubeculae disparebant, simulque miculae exiguae, pulueris instar, ad fundum vasculi deiciebantur. Etiam alii portioni istius purae viridis bilis, quae balsamo infusa fuerat, alcoholis quid instillaui, unde album coagulum liquori innatans, instar mollissimae tenuis pelliculae, excitabatur, quod per agitationem in densiores nubeculas ex mixtione detrusas, dein minores in miculas prope fundum fluctuantes, permutabatur; liquore quidem ipso nunc manifestius ad pelluciditatem suam redeunte.

Exp. XIX.

Myrrhae dein etiam electae, et in puluerem redactae, grana X cum bubulae bilis drachmis III. in tepido mortario marmoreo contriui. Longa demum et valida quassatione efficiebatur, ut pulvis ille bili admixtus videretur; ipse liquor autem nunc turbidus apparebat. Quum liquor hicce vitro infusus in quiete relinqueretur, fere omnis pulvis in semihora ad vitri fundum dejectus erat. Natiua tamen bili pelluciditas perfecte non rediit, neque diebus nec hebdomadibus insequentibus, quantum

illa ultra tres, et quamdiu ad indolem ejus attentio fuit adhibita, ab omni putrida corruptione immunis permanfit. Alia vice bilis bubulae etiam recentis duabus vnciis et femiffi grana tantum quinque pulueris myrrhae adjeci, validiffime haec in obturato vitro agitaui, dein aliquos per dies in calore fere 95-100° retinui, intereaue vitri commotionem faepe repetii. Sed, quum per pauca modo minuta vitro quies concederetur, eam femper pulueris myrrhae copiam fundo infidentem deprehendi, de cujus quinque granorum pondere quid euauiffe et in bilem receptum effe, nullus conjecturae locus apparebat. Permanens tamen alienatus et fubuiridis bilis color, quem ab injecta myrrha contraxerat, aliquam quantulamcunque bilis potestatem ex myrrha quid extrahendi, confirmare videbatur.

EXP. XX.

Extracti myrrhae gummosi, ficci, quale obtinueram ex pharmacopolio, in pollinem prius redacti, grana X adjeci bilis bubulae recentis vnciae I, dein mixtum hoc in caloris illo gradu, qui fano homini naturalis est, ultra XII horas retinui, faepeque interea fortiter vitrum, quo continebantur, fubere obturatum agitaui. Ab initio ftatim bilis reddebatur opacior, et pulueris dimidia fere portio, abfolutis quatuor horis euanescebat, reliquo autem tempore nihil amplius, et probabili conjectura, solutionem admittebat.

EXP.

Exp. XXI.

Gummi ammoniaci grana X cum bilis bubulae recentis tribus drachmis in tepido mortario marmoreo probe conteri feceram. Lacteum inde colorem in bile excitatum videbam, et hujus quidem materiae portionem bili non difficulter admisceri posse, aliam tamen partem integram relinqui, quae subactionem plane respueret. Alba autem facta haec bilis, nunc in vitrum fusa, tantum breui de soluto gummi ammoniaco dejiciebat, vt admistam illi partem aequare nemo forte dubitasset, nisi albus aliquis bili color mansisset, quadantenus quidem sequentibus diebus imminutus, aliquo tamen gradu, vltra tres hebdomades persistens, quo tempore nec vlla putredinis initia poterant obseruari.

Exp. XXII.

Bilis bubulae rec. vnciae vni gummi arabici in pollinem contriti grana X adjeci, iisque vna probe in vitro conquassatis, calorem conciliaui fere 95°, per integrum diem continuatum. Quum vna modo hora transierat, gummi partem solutam fuisse, absque pelluciditatis et natiui coloris in bile detrimento, manifeste obseruabam. Absolutis dein IV. horis omne fere gummi disparuit, praeter paucas exiguas particulas, prope fundum vasis, etiam post horam XII relictas, neque validissima diuque continuata vasis commotione in bile dissolubiles.

Exp. XXIII.

Bilis similis drachmas tres cum resinae gialapae granis X, in pollinem primum redactis, in mortario marmoreo calefacto fortiter quassavi, atque tritu hoc satis diu jam continuato nihil resinae bili admisceri posse, atque haec turbida saltem inde reddi, videbatur. Tandem vero omnem resinam subactam esse apparebat, ita tamen, ut simul cognoscerem, quam longissime bilem, hac sua resinam dissoluendi potestate, inferiorem esse emulsionem amygdalina aut alia, praesertim sacharata, aut oui vitello. Quum autem hicce nunc liquor, ex resina et bile mixtus, in vitrum effusus esset, et quies ipsi in loco, ad 68° calente, concederetur, ante horae absolutum quadrantem aliqua, neque exigua, resinae pars ad fundum relapsa cernebatur, finitaque hora dimidia, tantum ejus ex mixtione detrufum erat, ut de granis X resinae quid amplius bili inesse posse, nemo facile suspicatus fuisset. Parum tamen turbida et opaca permanfit bilis, etiam postero die; dein vero sensim, sequentibus diebus, absque corruptionis inceptae nota, ad majorem, immo naturalem quoque pelluciditatem rediit.

C O N S E C T A R I A.

Abrupto nunc historiae experimentorum filo, ad pauca, quibus locum jam esse concessum existimamus, inde colligenda confectaria progredimur.

Mecum

Mecum quidem facile et alius quisque perspexerit, multum abesse, quin vel verisimile quid, ex traditis hactenus meis periculis, de vera et naturali bilis efficacia pro certo erui, et in systema transferri queat. Verumtamen, cum sententia illa, quam plerosque recepisse constat, et quae bilis officia ex constituta ejus cum sapone alcalico convenientia explicare solet, minus haec mea experimenta consentire, nemo non statim animaduverterit. Videtur autem ex his elucescere :

- I. Secessionem cremoris ex lacte, quae in hocce puro sponte succedit, bilis admixtione neutiquam impediri, quin potius pinguioris illius partis ex lacte adscensus per additam bilem quodammodo promoueatur, et acceleretur. Neque illum caloris gradum, qui homini et animalibus ipsi affinis naturalis est, nec admistam saliuam praecavere, quo minus illa cremoris separatio contingat.
- II. Lactis coagula caseosa, a bile, etiam per coctionem admista, tota non dissolui, aut sero adunari, nec etiam, sponte alias contingentem caseosae partis e lacte discessionem solius bilis admistu plane impediri; potius eam ejus, quae fundum vasis petiit, portionem, magis addensatam, vasiq[ue] arctius adhaerescerentem apparere, omnino tamen quid simul caseosae partis, quo serum pelluciditate priuetur, in eo ipso retineri.
- III. Acescentiae, quae in lacte cum bile mixto contingit, aliam esse rationem quam in puro lacte;

haec vero vltiora omnino et peculiaria postulat, quibus dilucidetur, experimenta.

- IV. Quod ad olea et pinguedines attinet, satis constare videtur, veram eorum, quae in experimentis memorata fuere, solutionem in bile haud contingere, nisi forte perexiguam, neque notabilem oleorum partem in bilem receptam fuisse, asserere quis sustinuerit. Apparet quoque, nec sal culinare, nec vrinofum salis ammoniaci, neque saliuam, satis adjumenti praebere, quo vera et integra olei solutio obtineri queat, etsi saliuam quid, in butyro praesertim, effecisse visa sit. Manifeste praeterea liquet, ad pinguedines et olea, aquae miscibilia reddenda, bilem minime parem censendam esse, si talis mixtio intelligatur, quae non breui mixtorum secessione iterum auferatur.
- V. Omnino bilis aliquando ad extricandum ex mixto quodam oleum quid conferre videtur. Celerior cremoris ex lacte adscensus, pinguedinis e sapone veneto facta separatio, butyri, salivae antea intriti, denuo suborta apparentia, cum admixta bilis fuisset, isti forsitan conjecturae concedunt locum. Obseruaui quoque, ex emulsione amygdalina, cum bile mixta, purum oleum, post dierum aliquot interuallum, in summitate liquoris collectum fuisse, qui tamen euentus pura in emulsione, simul repozita, minime contigerat. Sed semel tantum institutum hocce experimentum, vario in calore, et illo qui homini naturalis est,

est, et aliquamdiu majori, susceptum, ex numero certiorum, saepiusque repetitorum adhuc excludendum duxi.

VI. Nec resinis neque gummeo resinosis materiis, illis minimum, quarum solutio a nobis tentata fuit, vere soluendis satis par aestimanda videtur bilis efficacia; puri autem gummi aliquam, etsi non magnam, portionem ab humore recipi et contineri posse, plane dubitari nequit.

VII. Annon ergo cum experimentis minus convenire censendum, illud bili attributum in chylopoiesi officium, quo ad instar saponis illam se habere, tenaciora quaeque emollire et attenuare, pingua aquosis humoribus, potulentis atque ciborum solidiorum succis, miscibilia reddere, hisque omnibus in massam homogeneam subigendis, inferuire, toties assertum fuit? Quum enim nec ista violentia, qua opus est ad commixtionem aliqualem oleorum et pinguedinum cum bile vel pura vel diluta efficiendam, in officina chyli adhibeatur, neque ea in chylo sit indoles, quae oleum ex aequali sua mixtione facile dimittat, vix ausim a dissolvente bilis potestate, qua instar saponis in alia lente penetraret, multum efficaciae in conficiendo chylo expectare. Et quisque, arbitror, nisi qui meis forte experimentis omnem fidem denegauerit, facilius mecum sentiet, cum perpenderit, quotuplicia et quam tenacia complura sint alimentorum genera, quae bene
tamen

tamen a nobis digeri posse, ex quotidiana observatione quam certissime constat. Non dubito quidem fore multos, qui per alia experimenta, etiam saepe ad confirmandam bilis indolem saponaceam allegata, quorum vero inter mea hactenus nulla fit mentio, receptam de bilis efficacia doctrinam satis jam esse stabilitam existiment. Verum praeterquam, quod nec eorum experimentorum successus, quoad ego comperi, ipseque hactenus pericula feci, meis modo propositis contraria videantur; hoc etiam confectarium per enarrata mea experimenta satis jam suffulciri crediderim.

Sed liceat mihi ab hisce dubiis hac vice abstinere, quae alia in descriptione propriis experimentis diluere constitui.





